



5.4.238

5.4.33

A

2-  
Jorio

5. 4. 238



1532 937  
VIII  
SANTIN  
*Munus eruditissimi Auctoris*  
*Fr*

*[Illegible handwritten signature]*

Ex Legato D: Equitij Antonij Francijci  
de Marnij



7. 4. 38 (1)  
S T A N I S L A I  
S A N T I N E L L I.

*Congregationis a Somascha  
Clerici Regularis*

DISSERTATIONES,  
ORATIONES,  
EPISTOLÆ, ET CARMINA.



V E N E T I I S.

A P U D C R I S T O P H O R U M Z A N E  
S U P E R I O R U M L I C E N T I A , A C P R I V I L E G I O .  
M D C C X X X I V .

THE UNIVERSITY OF CHICAGO

LIBRARY

1000  
CHICAGO, ILL.

OFFICE OF THE

LIBRARY

CHICAGO, ILL.

1000

CHICAGO, ILL.

CHICAGO, ILL.

CHICAGO, ILL.

CHICAGO, ILL.

VIRO AMPLISSIMO  
LAURENTIO TEUPOLO

*Equiti, atque Aedis Divi Marci  
Procuratori.*

STANISLAUS SANTINELLI.



Ubi opus aliquod in publicum emit-  
tant, solent plerique omnes magnos  
alicui viro illud inscribere, & dicere, ut sit  
qui ipsam ab invidorum moribus, & malevo-  
lorum dictis defendas. Ipse, Vir Amplissime,

Tibi hac opuscula sisto , & dedico , quod defensus ea esses , etiamsi non dedicassem . Qui enim mihi patronus es , numquam destitisses patrocinio Tuo hac ingenii mei , qualia qualia sint , monumenta . Non igitur Tibi hac opuscula dedico , ut gratiam Tuam mihi cupiam conciliare , sed ut hac oblata occasione liceat mihi palam profiteri , & predicare , me patrocinio Tuo ornari , & tegi . Nullum sane mihi aut majus ornamentum , aut tutius praesidium gratia Tua est , aut esse velim . Quanto mihi decori est , quanta securitati primi fastigii in hac Republica Senatorem patronum ciere , cujus gloria ob bene administratam rempublicam tanta est , ut augustis senatus sacrariis continui minime possit . Qui exorta , qualia inter parentes , ac liberos aliquando , cum Principe ob supremum sacerdotium nunquam non verendo diffidia , aliquot abhinc annis , cum Reipublica Orator Vienna degeres , absens , negotio Tibi ab senatu dato , sedasti ; idem nova iterum diffidia exorta , domi rempublicam gerendo , consilio Tuo iterum ,

& au-

Et auctoritate sedasti . Qui tot obitibus apud externos  
Principes legationibus tantam peperisti nomini Tuo  
celebritatem , Et famam ; idem eam domi nunc cre-  
bris cum Galliarum Regis Oratore congressionibus ,  
Senatus jussu , publicam rem procurans , ita cumula-  
sti , ut , qua transacta cum eodem sunt cum scripto  
a Te commissa recitantur in Senatu , Tibi jam ;  
quod fieri posse nemo credidisset , consilio , Et elo-  
quentia prestare ipse omnibus videaris . Hac dum  
memoro , aliquid mihi esse videor , cum quan-  
tus es ipse , perpendo . Dedicent igitur alii inge-  
nii sui monumenta magnis viris , ut sibi , ac  
operibus suis patronos adiscant ; ego Tibi hac  
opuscula dedico , quod hinc locus factus est mihi  
aperte pradicandi , me Amplissimi magna apud  
universam Rempublicam gratia , Et auctoritate  
Senatoris , equestri Ordine , Et Procuratoria digni-  
tate illustris , rei literaria III-Viri , sanctioris  
consilii deliberationibus ad Senatum referendis Servi-  
ri , LAURENTII TEUPOLI patrocinio  
frui . Quod id tanta animi gestientis exulta-

tione

tione profiteor , & pradio , ne ulli offensa apud  
Te mihi sit ea , qua Te observo , & colo , re-  
verentia vehementer rogo . Vale .

LECTO-



# LECTORI.

**D**UM pauca hæc opuscula in unum collecta ad sæculi genium iusto quidem, sed modesto, & simplici titulo inscribere cupio, atque hac de re amicos consulo; vereor, ne tumido nimis esse usus dicar. Videri enim potest alicui, cum *Dissertationes, Orationes, Epistolæ, & Carmina* promittuntur, magno hiatu plura volumina promitti. Verum, licet alii dissertationum, orationum alii, epistolarum, & carminum iusta volumina ediderint; non video, cur singulorum generum pauca opuscula non possint in unum volumen colligi. Singulorum, quæ promittuntur, haud multum esse numerum, mole sua prodit volumen, quod fronte, & titulo minime præfert. Initio equidem statueram duas tantum Dissertationes, quæ priorem hujus voluminis partem implent, alteram, alias etiam publici juris factam, sed nunc a me recognitam, *De Romanorum Veterum Nobilitate*, alteram non antea editam, *De Disciplina, & Moribus Romanarum Fæminarum*, typorum opera in vulgus emittere. Sed placuit postea minutiora alia addere. Quæ hæc sint, sequens pagina indicabit. Tu si quid lectu dignum judicaveris, legito: mihi non placere non potuit, mea hæc, quæ forte ex plurimis, quæ melioribus annis scripsi, apud me extabant, ab interitu vindicasse. Vale.

INDEX

# I N D E X

## O P U S C U L O R U M ,

Quæ hoc Volumine continentur .

<b>D</b> <i>Issertatio de Romanorum Veterum Nobilitate, ab auctore recognita. Editæ primum fuit Venetiis 1717. apud Jo: Baptistam Recurti.</i>	Pag. 3
<i>Dissertatio de Disciplina, &amp; Moribus Romanarum Fæminarum.</i>	95
<i>Orationes de SS. Trinitate habitæ in Sacello Pontificio. Editæ primum sunt Romæ annis 1707. 1708. 1709. 1710. 1711. 1712. apud Jo: Franciscum Cbracæ.</i>	187
<i>Oratio in funere Jo: Baptistæ Nicolosi Magni Venetæ Reipublicæ Cancellarii. Impressa extat Venetiis 1717. apud Antonium Groppum.</i>	201
<i>Oratio in funere Cleti Caspii Abbatis Congregationis Casinensis.</i>	212
<i>Oratio in funere Fortunati Balleonii Abbatis Congregationis Casinensis.</i>	219
<i>Oratio in funere Angeli Zoni Magni Venetæ Reipublicæ Cancellarii. Impressit primum Venetiis 1724. Blasius Maldura.</i>	225
<i>Oratio in funere Petri Barbadiçi Patriarchæ Venetiarum. Prodiit Venetiis 1725. apud Carolum Bonarrigum.</i>	232
<i>Oratio in funere Michaelis Angeli Gaspareni Abbatis Congregationis Camaldulensis.</i>	239
<i>Oratio in funere Joseph Bolagno Cæsaris apud Venetam Rempubicam Oratoris. Prodiit Venetiis 1732. ex Typographia Ducali Pinelliana.</i>	245
<i>Oratio in funere Bonaventuræ Finardi Abbatis Congregationis Casinensis.</i>	254
<i>Ad N. V. Laurentium Grimanum Epistolæ 4. Afferuntur nonnulla ad Senatum Romanum spectantia.</i>	26
<i>Ad V. Cl. Apostolum Zenum Epistolæ 2. Explicantur duo loci, alter Livii, alter Ciceronis, quibus videtur lectio Senatorum Romanorum Populo tribui.</i>	266
<i>Ad N. V. Franciscum Teupolum Epistolæ 7. Agitur de antiquis Ducum Venetorum nummis.</i>	269
<i>Ad V. Cl. Bernardum Mariam de Rubeis Epistola. Explicantur Inscriptiones quorundam Vasculorum Romæ repertorum.</i>	280
<i>Dedicatoriæ aliquot Orationum alias impressarum.</i>	284
<i>Carmina.</i>	293

D E  
ROMANORUM  
VETERUM  
NOBILITATE.

THE TOMMY  
HUTCHES  
LITERATURE

# DE ROMANORUM VETERUM NOBILITATE DISSERTATIO.

## C A P U T I.

*Scribende dissertationis occasio. Rei Litterariae Triumviris  
(a) inscribitur. Dicendorum propositio.*



EM haud ita magni inter antiquas momenti, eademque jam occupatam, de Veterum Romanorum Nobilitate ipse non alia de causa iterum aggressus sum, Viri Amplissimi, rei litterariae Moderatores, nisi ut octavam Juvenalis Satyram, quam in Veneto hoc gymnasio explanandam susceperam, illustrarem prius aliqua priscorum morum notitia, ne rhetoricum artificium, carminis praestantiam, ibique latentis philosophiae placita depromenti digredi alio opus esset. Id statim significandum vobis duxi, ne aut ad hanc scribenda me gloriae spe abreptum, existimetis, aut vos ad nova, magnaque legenda vocatos, hac ad vos missa dissertatione. Levia igitur, inquitis, & aliena donas. Levia fateor, si cum caeteris comparentur, quae antiquitatis studiosos solent tenere, aliena autem, negotio. Sicut enim, quae aliorum fuerant, emptis sibi vestibus, aliquid assuendo, aliquid abscindendo, novam sibi, & quae eorum propria sit, tenuiores homines concinnant, ita ipse quoque illis plurima demendo, quae infinitae eruditionis vir Tiraquellus ad prisci, nostrique aevi nobilitatem

A. 2

spe-

(a) Hieron. Veneris Equiti, Francisco Superantio, Laurent. Theupelo Equi. adit D. M. Procuratoribus, gymnasi Potavini moderatoribus.

ſpectantia non Jurisconſultis tantum ſuis, ſed philologis etiam ſcripſit, multa iis addendo, quæ curſim nimium clariffima litteratorum capita Sigonius, & Lipſius tradidere, aliiſque antiquarum rerum non indoctiſiſ investigatores, hanc alienis, meiſque obſervationibus compaſſam diſſertationem confeſi. Tenuem autem, & nullius pretii, quod mea, ut aliquo pretio eſſet, veſtram ſacturus, mittere ad vos decrevi. Quamquam, quæcumque ſit, veſtra nunquam non fuit, cum a me ſit, cujus nihil eſt, quin veſtrum dici omni jure debeat, ingenium, quod excitatis, ſtudia, quæ ſovetis, ipſe hic publice docendi locus, qui omnibus quidem, qui illum ante me obtinuerunt, honeſtiſſimus, mihi vero veſtro tantorum virorum judicio, ac beneficio multo honeſtior, quam cæteris. Ut igitur, quæ vobis ex prædiis veſtris afferuntur, ruſticana munera, primos arborum veſtrarum fructus minime temnitis; ita hoc quoque leve donum ne dedignemini, ingenii, quod beneficiis veſtris alitur, opus; atque ſicut illa, quamvis palato nota, guſtatis tamen, & fortalſe jucundius; ita hæc quoque, quamvis ex aliis auctoribus notiſſima, legere tamen velitis, & legatis patientius. Quicquid credidi ad veterum, præcipue Romanorum nobilitatem pertinere, hoc ſyntagmate complexus ſum. De nomine, de nobilitatis natura, ejuſque generibus, quorum fuerit, quibus inſignibus oſtendatur, breviter diſſerentem audietis.

## C A P U T I I.

*Etymon. Nobilis de quacumque re: verbum medium: ſæpius ad laudem ſumitur: ſit hominum proprium, & ad genus refertur. Generoſus idem ac nobilis. Alia ſynonima.*

**N**obilis a verbo Noſco proficiſci, idemque ſibi velle, ac notus; ſeu noſcibilis; dignuſque qui omnibus cognitus ſit, cum patet ex Feſto Pompejo, ac Nomio Marcello, tum maxime ex auctorum uſu. Virgilius: (a)

*Eſt locus Italia medio ſub montibus altis*

*Nobilis —*

quod Servius interpretatur *notus*, mentem poetæ aſſequutus ex ſequentibus, ſubjicit enim poeta

*— & ſuma multis memoratus in oris*

*Ampſancti vallis.*

Li-

Livius (a) de pugna inter Horatios, & Curiatios: *neque ferme res antiqua alia est nobilior, tamen in re tam clara nominum error manet, utrius populi Horatii, utrius Curiatii fuerint. Idem: (b) inter hos viros nobiles inimicitie erant. Apud eundem de his cum M. Emilio Lepido inimicitias Fulvius libro superiore: (c) quum sint nobilissimæ sibi cum Consule inimicitie. Ita enim legendum contendit ex manuscriptorum fide Gronovius, (d) ubi editi vulgo habent, notissimæ. Vellejus: (e) tum Cimbri, & Teutoni transcendere Rhenum multis mox nostris suisque cladibus nobiles.*

A nobili autem nobilitas fit, & nobilito, quorum prius notitiam, seu ipsum esse notum, alterum notum facere significat. Cicero: (f) *in eo ipso, in quo predicationem, nobilitatemque despiciunt, predicari de se, ac nominari volunt. Idem: (g) quid poetæ? nonne post mortem nobilitari volunt? Sed quid poetæ? Artifices post mortem nobilitari volunt. Cornelius Nepos: (h) Iphicrates Atheniensis non tam magnitudine rerum, quam disciplina militari nobilitatus est. Contraria sunt his Ignobilis, & Ignobilitas contraria pariter significatione, ut notitiam utrumque neget. Plautus: (i)*

*Peregrina facies videtur hominis atque ignobilis.*

Cicero: (k) *Utebatur Medico ignobili, sed spectato homine Cleophranto.*

Cum itaque nulla res esse nota non possit, præterea etiam quilibet & magnis bonis innotescat, & magnis malis; illud sequitur primum, ut nobilis, & quæ ab eo sunt, de nulla re proprie dici nequeant, deinde & illud, ut singula sint verba media, & quæ in utramque partem, seu ad laudem, seu ad vituperationem usurpentur. Si cui otium est, legat apud Tiraquellum (l) longam satis rerum animatarum non modo, sed & anima carentium seriem, quibus ab auctoribus, in quorum lectione abunde se versatum ostendit, nobilitas tribuitur, quæque nobiles, ac nobilitate appellantur. Quod vero in malam quoque partem hæc nomina accipi soleant, ut aliquod afferamus testimonium, patet ex Tullio, cujus est illud (m) etiam a Nonio citatum, cum nobile idem esse, ac notum confirmat: *sestis est Phalaris, cujus est præter cæteros nobilitata crudelitas. Idem alibi: (n) Nico ille nobilissimus pirata. Quintus etiam Cicero: (o) non eris difficile certamen cum iis competitoribus, qui nequaquam sunt tam genere insignes, quam vitii nobiles. Seneca: (p)*

*— scelere Lemnon nobilem.*

Ve-

(a) l. 1. c. 24. (b) l. 40. c. 45. (c) l. 39. c. 4. (d) ad Liv. l. c. (e) l. 2.

(f) Pro Arch. c. 26. juxta editionem Nizolianam. (g) Tuscul. 1. c. 34. (h) Iphicr.

(i) Pseudo 4. sec. 2. (k) pro Cluent. c. 47. (l) Tract. de Nob. c. 2. m. 18. (m) Of. 2. c. 26.

(n) In Ver. l. 5. c. 29. (o) De preliis, Consul. c. 3. (p) Agamem. 4. 3.

Verum eo fortasse, quod illa tantum cognoscere, aut oculis, aut sermonibus usurpando, cupimus, quæ bono aliquo præstant, factum est, ut *nobilis* in laude sæpius, & contrarium dumtaxat in vituperatione poneretur, idemque fere esset *nobilis*, ac *fama dignus*, & *multorum sermone celebratus*, secus vero *ignobilis*. Ita Horatius [a]

— *pater nobile fratrum*.

quod Acron interpretatur *notum*, *famosum*. Idem alibi [b] quamquam ironice, sed ironia planius facit *ferio*, & proprie loquenti ad laudem dici:

— *in Accj*

*Nobilibus trimetris*.

Tullius citra ironiam: [c] *sibi ipse* (L. Crassus) *peperit maximam laudem in illa accusatione nobili, & gloriosa*. Livius: [d] *nobilem regulum Corribilonem*. Nominis celebritas est *nobilitas* etiam Cornelio Nepoti: [e] *Nescio quomodo, cum cum nemo anteciret his virtutibus, multis nobilitate præcurrerunt*. Contrarium significat *ignobilis* apud Ciceronem: [f] *multa dixi in ignobilem regem*. Quamquam vero sic quoque accepta hæc vox, dubium est nemini, quin de omnibus rebus & possit dici, & soleat; sæpius tamen hominibus tribuitur, ut velut illorum tantummodo propriam consuetudo fecerit.

Hinc autem altera pressior ejusdem vocis oritur significatio. Quoniam enim inter ea, quibus homo cum præstat, innotescere aliis, & notior solet esse, quam cæteri, generis præstantia dubio procul recensenda est; hinc factum, ut jam *nobilis* ille audiat, *qui generis & natalium excellit gloria*, & ea proprie videatur significatio subesse nobilitati, quæ excellentiam & præstantiam generis signat. Nos quoque ira hic *nobilem*, & *nobilitatem* accipimus, cum de iis acturos nos esse, pollicemur. Dicit autem *nobilem*, qui habet generis dignitatem, eo quod hinc notior sit, quam cæteri, confirmat tum locus Senecæ, [g] ubi virtuti Stoice tribuens nobilitatem: *qui imagines*, ait, *in atrio exponunt, noti magis, quam nobiles sunt*; tum consuetudo loquendi cum ignoti nobilibus opponuntur. Svetonius: [h] *ignotissimum quaesturae candidatum nobilissimis anteposuit*. Præterea etiam *notus* aliquando pro *nobili* dictum est. Tacitus: [i] *notos quoque equites Romanos operas arene promittere subegit*. Erit igitur nobilitas id, quod Græcis *ἀρετή*. Contrarium tamen sensisse videtur Tullius, cum scribit Appio: [k] *nihil errabis si paulo diligentius (ut quid sit virtus, quid sit nobilitas intelligas)* Athenodorus Sandonis filius quid de his rebus dicat,

[a] 2. Sat. 3. [b] In Art. [c] Of. 2. c. 47. [d] l. 35. c. 23. [e] Thrasib.

[f] L. 2. ad Quins. epist. 12. [g] 3. Benef. c. 23. [h] Tib. c. 42. [i] Ann. l. 14. c. 14.

[k] 2. Epist. fam. epist. 7.



cat, attenderis. Sed hic sententiam Stoici Philosophi, hujus enim seculi Athenodorus erat, probat Cicero, ut Appii detrahat nobilitati, suæque ignobilitati ab ejus contumeliis caveat. Nobilis autem Græcis est εὐγενής, quod bono genere dixeris, quomodo loquutus Plautus: [a]

*Qui bono sunt genere nati, si sunt ingenio malo,  
Suaute culpa degeneres abeunt: genus ingenio improbant.*

Tullius etiam: [b] si tibi hoc sumis, nisi qui patricius sit, neminem bono esse genere natum, facis, ut rursus plebs in Aventinum convocanda esse videatur. Nobilis etiam respondet Græco illi ἐπάτριος, seu ἐπατρίδης, quod esset bono patre, aut bonis parentibus, ut loquitur Cicero: [c] qui cum esset bonis parentibus, atque bono loco natus. Bonus atamen, etiam sub hac acceptione, latius patere, quam nobilis, negare non ausim, ac velut genus de specie, ita Bonum de nobili dici, ut bono quidem genere sit, quicumque est nobilis, quamvis quicumque bono est genere, is non continuo nobilis sit. Liqueat ex Terentio, a quo eadem puella & bonis parentibus esse dicitur, & ignobilis: [d]

*— illam civem esse Atticam*

*Bonam bonis prognatam —*

at paullo post:

*Illene indotatam virginem, atque ignobilem*

Propterea optime Donatus ad hunc locum bonam interpretatus fuit non vilem.

Cæterum quod Sigonius, [e], ac Lipsius [f] nobilitatem Romanorum non ex genere æstimant, sed ab imaginibus; ne credas, eos censuisse, nobilitatem ullam fuisse apud Romanos, quæ bonum genus, bonosque parentes minime significaret. At cum Romanorum alii genere patricii essent, alii plebei, viri hi præclarissimi id docent, bonum genus non patriciorum aut plebeiorum fuisse, sed eorum, qui imagines majorum haberent. Ita ego intelligendos eos puto, qui nobilitatem ajunt non esse ex genere, sed ab imaginibus. Quæ omnia suo loco clariora fient. Etenim tantum abest, ut Romanorum etiam, sicut cæterarum gentium nobilitas dignitatem generis minime diceret, ut auctores Romani ipsum generis nomen ad significandam nobilitatem sæpissime usurpent. Ovidius: [g]

*Nam genus, & proavos, & quæ non fecimus ipsi,*

*Vix ea nostra puto.*

Horatius: [h]

*Et*

[a] Merc. a. 5. sc. 4. [b] Pro Mur. c. 15. [c] Tuscul. 5. c. 38. [d] Phorm. act. 1. c. 2. [e] De Nom. Rom. c. 6, item de jure Civ. l. 2. c. 20. [f] Eliebl. l. 1. c. 29. [g] Metam. 13. [h] L. 2. Sat. 5.

*Et genus, & virtus, nisi cum re, vilior alga.*

Seneca (a)

— *Nobiles non sunt mihi  
Avi, nec altis inclitum titulis genus,  
Sed clara virtus. Qui genus jactat suum  
Aliena laudat.*

Sed ne alia, quæ innumera sunt, persequar, Cicero pro Murena (b) sexies paucissimis versibus nomen *generis* assumit ad significandam nobilitatem. Optime igitur Nonius Marcellus: *nobilis*, ait, ad dignitatem generis refertur.

Hinc *nobilis*, & *generosus* a Latinis scriptoribus aut confunduntur, aut ita inter se distinguuntur, ut latius *nobilis* pateat, quam *generosus*. Virgilius (c) *generosum* sumit certe pro eo, qui generis dignitate excellit:

*Mæonia generose domo —*

Horatius: (d)

*Sed fulgente trahit constrictos gloria currus  
Non minus ignotos generosis.*

Manifestius alter Satyricus hujus vocis usum vulgarem ostendit, cum illum improbat: (e)

— *Quis enim generosum dixerit hunc, qui  
Indignus genere, & præclaro nomine tantum  
Insignis?*

Cum autem Cicero ortum *generosum*, dicit, atque hunc humili opponit, planum est *generosum* idem illi esse, ac nobilem: (f) *humilem* sane relinquunt, & minime *generosum* (ut ita dicam) ortum *amicitiæ*, quam ex inopia, atque indigentia natam volunt. Addo etiam pulcherrimum locum ex Cassiodoro (g), ut intelligas nullo non tempore Latium ita loquutum: *Doctrina siquidem quos ab imperitis discernit, sapientibus amica societate conjungit, cui persaepe est ornare generosum, quæ etiam ex obscuro nobilem facit.* Optime ideo utrumque nobilem, & *generosum*, alterum cum altero confundit Ovidius, (h) ubi alloquens Fabios, eos modo *generosam domum*, modo *nobilitatem* appellat:

*Quo ruitis generosa domus? male creditis hosti.*

*Simplex nobilitas perfida tela cave:*

Nec non ubi Ulysses (i) sibi *nobilitatem* a matre additam primum ait, deinde se appellat ortu materno *generosorem*.

*Est quoque per matrem Cyllenius addita nobis*

*Altera nobilitas.*

De-

(a) *Herc. Fur. a. 2. sc. 3.* (b) *A. c. 15.* (c) *Æneid. 10.* (d) *L. p. Sat. 6.* (e) *Juv. Sat. 8.*  
(f) *de Amic.* (g) *Var. l. 9. epist. 5.* (h) *Fast. 2.* (i) *Metam. 13.*

Deinde:

*Sed neque materno quod sim generosior ortu.*

Ita pariter Græci aliquando *ἄγνως*, quod est nobilis & *γενναῖος* confundunt, quod aliquibus est *generosus*. Sed Græcis hoc discrimen proprie est inter *ἄγνως*, & *γενναῖος*, ut habemus ab Aristotele, (a) quod *ἄγνως*, qui illustri est genere, *γενναῖος*, qui ab illo non degenerat, appellatur.

Apud Romanos etiam aliquid interfuisse inter *nobilem*, & *generosum*, constat ex Tullio, qui genus a nobilitate distinguit, quemadmodum pro Roscio Amerino: (b) *genere & nobilitate facile princeps*. Clarius Juvenalis (c):

— Nobilis, & generosus

*Adpositam nigra lunam subtexit alula.*

Cicero item: (d) *aliqua generosa, ac nobili virgine*. Nusquam tamen apud Latinos ita distinctum inveniri puto nobilem a generoso, ut nobilis sit, qui bono genere, & præstanti; generosus, qui ab eo non desciscit. Græco enim illi *γενναῖος* sub hac acceptione unum verbum, quod responderet, Latinis nequaquam fuit, quamquam aliter videntur sentire doctissimi Aristotelis interpretes Barbarus, Muretus, Sigonius, Majoragius, qui *γενναῖος* verbum verbo vertentes *generosum* interpretantur. Aliquid esse discriminis apud Latinos inter *nobilem*, & *generosum* fatetur Gerardus Joannes Vossius, non idem tamen, quod apud Græcos inter *εὐγενῆς* & *γενναῖος*. En ejus verba: (e) *Porro horum quidem, qui nobiles, nascuntur, alii sunt εὐγενῆς, sive nobiles, alii etiam γενναῖος, sive generosi. Sed & Latinis aliud est nobilis, aliud generosus: unde est quod in Epistol. Hypsipetes ad Jasonem conjungantur ab Ovidio:*

*Si tua nobilitas, generosaque nomina tangunt,*

*& hoc Juvenalis sat. 8.*

Felix, & sapiens, & nobilis, & generosus

Accipe tamen, quod Vossius non attulit, discrimen inter duo illa nomina ex antiquis Grammaticis: (f) *Nobilem dicimus nobilitate rerum, generosum autem eum, qui græce γενναῖος appellatur*. Quod si hic pro *γενναῖος*, quam lectionem ipse sollicitare necessariis destitutus minime ausim, recte legit Tiraquellus (g) *ἄγνως*, clarius liquet, generositatem apud Latinos idem sibi velle, ac bonitatem, seu dignitatem generis. Dubium tamen omne tollit vetus glossarium, quod alii citant: *Generosus ἄγνως, ὁ ἀπὸ γεννῆς*. Itaque Latinis, quod Græcis *εὐγενῆς*, *generosus* potius erit, quam nobilis, quod illis *γενναῖος*, *nobilis*

B

lis

(a) Rhet. 2. c. 12. (b) c. 15. (c) Sat. 7. (d) parad. 3. (e) Inst. Orat. l. 2, c. 7.

(f) Corn. Front. de dif. verb. (g) c. 2. n. 47.

lis potius, quam generosus, licet secus visum sit viris præclarissimis; generosus siquidem genus signat, nobilis mores, quibus qui præstant, a maioribus minime degenerant. Allatam a Frontone horum verborum differentiam fulcrum ex Ovidio: (a)

*O qui nominibus cum sis generosus avitis,*

*Exsuperas morum nobilitate gemas,*

Item ex Livio: (b) *Vestius Messius ex Volscis nobilior vir factis, quam genere.* Quare nobilis ex quacumque virtutis, & rerum dignitate, generosus ex solius generis dignitate dicitur, si strictim accipienda hæc nomina sint, quamquam laxius nobilem dicere ex dignitate generis frequentissimum est, & fortassis usitatus. Generosum vero etiam ex morum dignitate, & ex virtute dici aliquando, licet asserat Tiraquellus (c), nescio, an continuo affirmandum sit. Duplex enim locus, quem affert ipse, non satis mihi est ad id firmandum validus. Alter est Sallustii, (d) apud quem Marius: *fortissimum quemque generosissimum esse*; alter Juvenalis (e): *Quis generosa putet, nisi fortia?* Sed prioris sententia est, *fortissimum quemque esse optimo genere*; alterius, *optimi genere solummodo esse fortia*. Nempe uterque, quod illis ita e re sua visum, nobilitatem omnem evertere, nihili faciendam generis præstantiam, & omnia virtuti tribuenda esse, contendunt. Pro his stabit & Seneca, (f) cum ait: *Quis est ergo generosus? ad virtutem bene a natura compositus.* Sed hanc Stoicorum sententiam alibi refellemus. Fateor tamen, generosum aliquando sumi pro eo, qui magno, & elato animo est, quæ significatio ex priori certe est orta. Qui enim sunt excellenti genere, hi magno, & excelso præditi animo esse solent. Cicero: (g) *cum de Imperio certamen esset cum rege generoso, & potenti.* Nepos de Attico: (h) *qua ex re in pueritia nobilis inter aequales ferebatur, clariusque explendescibat, quam generosi condiscipuli animo æquo ferre possent.* Sed non est tanti his diutius immorari.

Sicut vero generosus, hoc est, qui genere præstat, nobilis etiam dicitur, quia facile & civibus suis, & cæteris omnibus innotescit, sic etiam aliis nominibus appellatur, omnibus fere id proprie significantibus, quod vel luce, vel loco omnium oculis proditur. Dicitur itaque claro genere, splendido, illustri, præterea alto, sublimi, summo. Contra ignobiles etiam ignoti, obscuri, bumiles, infimi, imi appellantur.

(a) Trist. 4. el. 4. (b) l. 4. c. 28. (c) c. 2. n. 49. (d) Jugurt. (e) Sat. 8. (f) Epist. 44. (g) Of. 3. c. 36. (h) in Vit.

## CAPUT III.

*Nobilium, & Nobiliorum Familiae. Nobilissimi dignitas.*

**N**obilis, Nobilior, Nobilissimus aliquando ad genus minime referuntur, quod nimirum priora duo abierint in cognomina familiarum Romanarum, postremum in titulum præclarissimæ dignitatis. De Nobilis, ac Nobilioris apud Romanos cognomine asserui ex mente Tiraquelli (a), quamvis, ut dubium est nemini de Nobilitate, quod cognomen erat Fulviæ gentis, teste Lævio, aliisque Latinis Scriptoribus, quibus crebro memorantur Marci, & Quinti Fulvii Nobiliores; ita non æque videatur mihi certum de Nobili.

Servum quidem nomine *Nobilem* (b) quin & equum eodem nomine (c) invenio in Gruterianis inscriptionibus; nullibi vero adhuc ullam familiam inveni *Nobilium* cognominatam. Potuisse hanc tamen extare, haud inficior, quamvis ejus, quod obscura forte, & libertinorum, omnis fortasse memoria interierit. Potuit enim libertus aliquis, qui antequam libertate donaretur, *Nobilis* vocabatur, de fervili hoc suoque veteri nomine novam familiam cognominare, cui de gentilitio patroni nomine nomen fieret, quod libertis in more positum infra c. 5. docebimus. Quemadmodum itaque fuisse novimus ex Grutero *Sallustiam Q. L. Nobilem* (d), ita servus esse potuit aliquis nomine *Nobilis*, qui deinde e.g. *Q. Sallustius Q. L. Nobilis* cum factus esset, *Sallustiorum Nobilium* familiam propagavit. Hujus rei suspicionem injicere etiam possunt *Volcatius Nobilis*, & *Valerius Nobilis*, Tiraquello memorati. Quamquam *Volcatium* illum *Nobilem*, cujus meminit Plinius (e), *Volcatium nobilem* video dici in optimæ notæ editionibus. *Valerium* verò *Nobilem*, *tribunum militum*, quem Tiraquellus citat ex Julio Frontino, si ita melius, quam *Valerium nobilem*, vel *nobilem tribunum militum* legendum est, haud absurdum esset credere ita potius appellatum agnomine ipsi peculiari, quam quod familiæ esset, quæ istiusmodi cognomine donaretur. Cæterum quod Tiraquellus idem affert ex historia Machabeorum (f) de *Aniocho Eupatore*, quo nomine scelestissimi parentis filius suorum adulatione, ut notant sacri interpretes, vocatus est, illud non magis dixerim gentis cognomen, quam Ptolomeorum fuerit Soter, aut Philadelphius. Manifeste autem lapsus est in regno suo vir juris peritissimus, cum *Honorium Nobilem* consulem cum Evodio sub Theodosio, & Arcadio citat, quam-

B 2

vis

(a) c. 37. nu. 83. (b) *V. Grut.* DLXXXIII. 8. (c) *Id.* CCCXLII. (d) DCCXL. 8. (e) l. 8. c. 1. (f) l. 1. c. 17.

vis id non innuat, proculdubio e codice Theodosiano. Hic enim non e *Nobilium* familia erat Honorius, sed ipsius Imperatoris filius, ideoque *Nobilissimus*, ut ferebat consuetudo, appellatus, quo titulo inscriptæ geminæ leges in memorato codice inveniuntur: *Honorio Nobilissimo puero, & Evodio consulibus*, quemadmodum aliæ: *Valentiniano Nobilissimo puero, & Victore consulibus*, quod notavit vir doctissimus æque, ac diligentissimus Spanhemius (a).

Etenim, ut aliquid de Nobilissimo etiam dicam, obtinuerat multo ante usus, ut hoc honorario epitheto Imperatorum filii donarentur, tanquam eorum peculiari, & proprio, non eo duntaxat modo, quod bona Spanhemii pace dixerim, quo Claudii tempore talia augustæ domus subsidia Britannicus, & Nero *nobiles pueri* vocati a Tacito (b) sunt. Tacitus enim non hoc eos tanquam illorum proprio epitheto ab aliis discernere videtur, quod *Nobilissimi* titulo deinceps est factitatum, sed potius aliis conjungere, & confundere cum cæteris. En ejus verba: *sedente Claudio circensibus cum pueri nobiles equis ludicrum Trojæ inirent, interque eos Britannicus Imperatore genitus, & L. Domitius mox in imperium, & cognomen Neronis adsciscens*. Morem autem nobilissimos vocandi Imperatorum filios, & potissimum Cæsares repetendum, ait Spanhemius (c) a Trajano, testimonio veterum lapidum, & ab ævo Commodi, quo idem adhuc Cæsar *Pontifex nobilissimus* appellatur.

Verum qui lapis Nervæ Trajano positus fuisse aliquibus visus fuerat, hunc jam planum est omnibus, quod Gudius animadvertit, (d) Decio Trajano, qui Philippis successit, tribuendum esse. Hallucinatus etiam est Bulengerus (e), cum primum omnium in veteri lapide Licinium Valerianum ait, vocatum *nobilissimum*, mox Carinum, & Numerianum. Multo enim ante Valerianum id usurpatum, lapides, ac nummi declarant. Fragmentum quoddam marmoris reperitur apud Gruterum (f), unde conjicies Aurelium Antoninum Commodi patrem forte omnium primum fuisse, cujus monumentis *nobilissimi* titulus sit inscriptus. Commodum certe ejus filium ita vocatum docet integra inscriptio (g):

IMP.

(a) *Uf. & præf. Numif. dis. 8.* (b) *Ann. l. 11. c. 11.* (c) *l. c.* (d) *V. Grut. CCXLVI. 3.*  
(e) *de Imper. l. 2. c. 9.* (f) *CCLIX. 1.* (g) *Grut. CCLXII. 4.*

IMP. CAES. M. ANTONINI  
 PII. GERM. SAR. FIL. DIVI  
 PII. NEP. DIVI HADR. PRO  
 NEP. DIVI. TRAJANI. PARTH  
 ABNEP. DIVI. NER. ADNEP  
 M. AUR. COMMODO  
 ANTONINO. PIO. FEL. AUG  
 SARM. GERM. MAX. BRIT  
 P. M. TRIB. POT. XIIII  
 IMP. VIIII. COS. V P. P.  
 NOBILISSIMO. PRINCIPI  
 BENACENSES

Eundem pariter Commodum primum fuisse, qui nobilitatem nummis inscribi voluerit, testatur Vaillant (a), circumferrique ait ejus nummum ex argenteis obvium, ex aureis rarissimum cum epigraphe: *Nobilitas Augusti*. Jure autem suo sibi ille hoc sumpsit, quippe qui, teste Herodiano, unus omnium ante se Imperatorum nobilissimus, at nullo illi jure, qui non humili solum, sed sordidissimo loco nati, Thraces, & Arabes, ac si Deorum sanguis fuissent, ausi sunt natalium sordibus præclarissimum nobilissimi epitheton prætere. Philippum enim, qui humillimo ortus locus fuit, patre nobilissimo latronum ductore, ut ille ait (b), nobilissimum Imperatorem, filiumque Cæsarem nobilissimum dici, non puduit (c):

OB. HONOREM. PHILLIPPI. IM  
 PERATORIS. NOBILISS. SEM  
 PER. AUGUSTI. ET. PHILIPPI  
 CAESARIS. NOBILISSIMI

Quamquam vero post ævum Commodi alii quoque ante Philippum, Geta nimirum (d), Alexander Severus (e), ac Maximus Maximini filius (f), nobilissimi Cæsares in lapidibus dicuntur; neminem tamen, Spanhemio teste (g), ante Philippum juniorem in nummis ita vocatum invenies. Ille enim omnium primus in nummis dicitur. *M. Jul. Philippus Nobilissimus Caesar*. Post Philippum autem passim & nummos, & lapides offendes, in quibus Q. Herennius, Hostilianus, Valerianus junior, Carinus, Numerianus, Constantius, Maximianus Armentarius, Valerius Severus, Licinianus, Constantinus, Crispus, nobilissimi Cæsares appellantur, nondum Imperii sede Byzantium translata. Quin & fæminis domus augustæ eundem hunc titulum tributum constat (h):

JU-

(a) *Numism. Imp. Rom. l. 2.* (b) *Aur. Viâ. Epitom.* (c) *Grut. CCLXXII. 9.*

(d) *Id. LXXIII. 9.* (e) *Id. MLXXXII. 9.* (f) *Spanh. l. c.* (g) *l. c.* (h) *Grut. CCLV. 7.*

JULIAE. NOBILISS  
 PUELLAE. FIL. GAL  
 LIENI. AUG. ET. SALON  
 AUG

Sed post restitutum etiam Occidentis Imperium Imperatoris sororem, ac liberos honorario hoc *nobilissimi* epitheto donatos invenio, quod ad priorum Imperatorum exemplum factum existimo. Cum enim in literis Gisela<sup>a</sup> sanctimonialis, quae Caroli Magni soror erat, ejus, ac trium Caroli Magni filiorum nomina subscriberet Cancellarius ( ipsi enim non sua nomina, sed signum crucis tantum sua manu exaraverant, ut eruditissimus Mabillonius (a) advertit ) Gisela<sup>m</sup> sororem, tresque Caroli filios *nobilissimos* appellavit. Talem damus, qualis extat subscriptio apud eundem Mabillonium: [ b ] *signum* ✠ *Gisela<sup>m</sup> nobilissima Filia Pipini Regis, qui hanc donationem fieri rogavit. Signum* ✠ *Caroli nobilissimi filii Domni Caroli praecllentissimi Regis. Signum* ✠ *Pipini nobilissimi filii Domni Caroli praecllentissimi Regis. Signum* ✠ *Chlodoici nobilissimi filii Domni Caroli praecllentissimi Regis.*

Verum non ita pridem distincta illa Nobilissimi, ac Caesaris nomina, & peculiaris Nobilissimi dignitas ornandis iis, qui propiores erant Augustorum fastigio, instituta fuerat, eadem dicta Graecis *ἐπιφανέστατος ἄρχισ*, seu *νωβελίσσιμος*, sicut etiam *ἐπιφανέστατος*, nobilissimi, qui tamen & *νοβελίσσιμοι*. Quod si recte affirmat Spanheimius (c), hoc tandem, postquam novam Romam translata est imperii sedes, inter Byzantinæ aulae honores inventum fuisse; oportet, aut affirmet Bulengerus Nobilissimi dignitatem, a Caesaris dignitate distinctam, vere institutam a Magno Constantino fuisse post translatum imperium, aut Zozimum arguat erroris, non quod alteram cum altera confundit, sed quod alteram ab altera distinguit. Neque enim mihi videtur, ut visus est Bulengero (d), Zozimus utramque confudisse, sed alteram potius ab altera distinxisse, cum Delmatio referat alteram, hoc est *Caesaris*, alteram, hoc est *Nobilissimi dignitatem* Constantio, & Anaballiano collatam a Constantino, subjiciens etiam quibus vestibus hi pro hac dignitate induerentur. Ejus verba latine dabo: (e) *Erant & imperii quodam modo participes Delmatius a Constantino Caesar dictus & Constantius ejus frater, & Anaballianus, qui purpurea, & aureis ornata limbis veste utebantur dignitatem Nobilissimatus, ut vocant, ab ipso Constantino propter adgnationis reverentiam consequuti. Crediderim propterea Nobilissimi dignitatem, seu Nobilissimatum inventum fuisse primum a*  
 Con-

(a) De re diplom. l. 2. c. 22. (b) Ibidem. (c) l. c. (d) de Imperat. Rom. l. 2. c. 9. (e) l. 2.



Constantino, a quo etiam Patricii dignitatem institutam, eamque Oprato collatam idem Zozimus (a) refert, & a quo inauditos antea alios titulos, novasque dignitates, scilicet Regis Regum, & Regis Ponticarum nationum, præcipue Anaballianum, seu mavis Haniballianum, Anaballiani fratris filium, honestandi gratia, excogitatas sciimus, *cujus pariter ævo dignitates Illustrium, Spectabilium, Clarissimum, Perfectissimorum natae sunt*, ut idem Bulengerus fatetur (b).

*Nobilissimum* tamen infra *Cæsariatum* stetit progressu temporis, argumento est, quod inter Augustorum liberos alii *Cæsares*, alii *Nobilissimi*, iique juniores appellabantur, præterea etiam, quod ii, qui *Nobilissimi* fuerant, mox *Cæsares* creabantur, cum propius ad spem imperii, & succedendi jura admoventur, ut in notis suis ad Procopii Anecdota, Justiniani, & Valentiniani junioris exemplo ostendit Alemannus, qui propterea ait, multos *Nobilissimos* dictos, qui numquam *Cæsares* fuere. *Nobilissimorum*, autem uxores *Nobilissimæ* vocatae sunt, ut Bulengerus (c), & Cangius (d) affirmant, qui etiam addit ab his domos ipsas *nobilissimas* dictas. Utrumque constat ex descriptione Constantinopoleos, ubi regione prima legitur: *domus Nobilissimæ Marinae*, regione nona, & decima: *domus Nobilissimæ Arcadiae*, deinde in Collectione civitatis: *habet igitur Urbs Constantinopolitana palatia 5., Ecclesias 14., domos divinas Augustarum 6., domos nobilissimas 3., Protonobilissimi præterea honor deinceps inventus est in aula Byzantina*, quo insignitus fuit Eumathius amorum Nysminii, & Nysminæ scriptor, eodem teste Alemanno. Sed satis de his, quæ ad nomen aliquo modo spectare visa sunt.

## C A P U T IV.

*Nobilitatis finitio. Nobilitas non est virtus. Genus honestum idem, ac nobile.*

**S**I nobilitatis tandem, quæ veterum fuit, finitionem quæris, accipe, quam tradit vir genere nobilissimus Boëtius: (e) *videtur esse nobilitas quædam de meritis veniens laus parentum*. Id enim semper fuit esse nobilem a clarissimis viris genus trahere, magnorum virorum sobolem prædicari, eaque aspergi gloria, quam majores non sibi tantum, sed posteris etiam suis peperere. Quæ laus igitur de majorum meritis ad eos venit, qui ab ipsis propagantur, ea nobilitas est. At inquires, non igitur

No-

(a) l. c. (b) *de Imperio Rom. l. 2. c. 21.* (c) *De Imperat. Rom. l. 2. c. 9.* (d) *Gloss. lat. Consol. l. 3. pr. 6.*

— Nobilitas (a) sola est atque unica virtus?

Multa quidem Tullius, multa Seneca, torque alii scriptores tradiderunt, ut nullam præter virtutem nobilitatem esse evincerent. Sed hoc inter Stoicorum *παράδοξα* numerandum est. Aliquid virtutem esse tanto nobilitate præclarior, quanto est illustrius propriis, quam parentum meritis prædicari, ultro concedo; virtutem idem esse, ac ea, de qua loquimur nobilitate, concedet nemo. Alteram ab altera, ut inter tot unius saltem testimonio utamur, distinguit Cicero, ubi ait: (b) *hominum ignobilium virtutem persæpe nobilitatis inertia prætulerunt*. Quicquid igitur contra asserunt auctores, id vel ad elevandam sui generis obscuritatem, vel ad sapientum sibi nomen parandum artificiose, & tumide jactant. Si in contentionem virtutem cum nobilitate voces, & ipse equidem

*Malo, pater tibi sit Therfites, dummodo tu sis*

*Æacidæ similis, Vulcaniaque arma capeffas, (c)*

*Quam te Therfita similem producat Achilles.*

Cæterum ut ut vulcania arma capeffas, efficies nunquam, ut Achille sis genitus, si tibi Therfites pater. Confert igitur hominibus splendorem, & claritudinem suam, & si hoc mavis, nobilitatem suam virtus, generis nobilitatem non confert, nec generis nobilitas ipsa est. Id vero etiam concedendum arbitror, hanc generis nobilitatem fuisse a virtute, minime illa quidem nobilium, sed parentum eorum, quibus eam totam nepotes debent. Etenim si nobilitatem diximus, laudem de meritis parentum venientem, necesse est, eos tanta floruisse virtute, ut nominis amplitudinem sibi comparatam ad posteros quoque transmittere potuerint. Qui claro propterea, & nobili genere orti dicebantur, iidem a causa honesto genere appellati sunt.

Fallitur enim Gebhardus, qui ad quemdam Cornelii Nepotis (d) locum inquit: *Latini quorum parentes obscuros dicere nolunt, ac viles, vocant honestos gratia quadam sermonis*. Obscurum, & vilem Latini inboneffum, non autem honestum dixere:

*Quo patre sis natus, num obscura matre inhonestus (e).*

Sed male illud eo sibi persuasit Gebhardus, quod Nepos Epaminondam honesto genere natum dicit, cujus patrem Ælianus scribit (f) fuisse *ἀγαθόν*. Cum enim vocat ille Epaminondæ genus honestum; in hoc dissentit ab Æliano, quemadmodum dissentit a Plutarcho cum Neocleum Themistoclis patrem vocat (g) *generosum*, & ab iis, qui referunt, patrem Eumenis ex aurigatione victum sibi quævisse, cum

ait

(a) Juv. sat. 3. (b) pro Corn. Bal. c. 51. (c) Juv. sat. 3. (d) Epam.  
(e) Horat. l. 1. Sat. 6. (f) Variar. l. 12. c. 23. (g) Themist.

ait (a), Eumenem domestico summo genere fuisse. Nobili autem genere fuisse Epaminondam, non unus sentit Nepos, sed præterea Plutarchus, (b) qui eum genere parem Pelopidæ utique nobilissimo facit. Hoc etiam innuit Svidas, qui clypeum sepulcro ejus impositum, clypeo autem draconem insculptum tradit, ut nimirum pateret, eum ex Spartorum genere esse, hoc est eorum, qui e dentibus draconis per Cadmum satis orti credebantur. Splendori autem debuit fuisse apud Thebanos ab illis Thebarum conditoribus genus ducere, alioqui hoc ad sepulcri honorem, sepultique gloriam significare symbolo insculpto, inane, ac ridiculum fuisset. Sed sententiam suam confirmat Gebhardus tullianis verbis: (c) *Qui cum esset bonis parentibus atque honesto loco natus, quæ tamen verba manifeste contra ipsum faciunt.* En integram Tullii sententiam: qui (Dionysius senior) cum esset bonis parentibus atque honesto loco natus (etsi id quidem alius alio modo tradidit) abundaretque equalium familiaritatibus, & consuetudine propinquorum; haberet etiam more Græciæ quosdam adolescentes amore conjunctos, credebat eorum nemini. Sed iis, quos ex familiis locupletum servos delegerat, quibus nomen servitutis ipse detraxerat, & quibusdam convenis, & seris barbaris corporis custodiam committebat. Miserrima hic a timore Dionysii vita describitur. Atqui ad hanc intelligendam non parum refert, quod ille illustri genere, illustri ideo etiam genere æqualium, & propinquorum consuetudinem horrens, servis se crederet. Certe tenuitas, & obscuritas generis quid ad hoc pertinere possit, non video, ut ejus præsertim dubiæ, & apud aliquos controversiæ faciendæ fuerit mentio. Sed Cicero mentem suam satis explicat, cum locum honestum conjungit cum bonis parentibus, quæ verba respondent græco illi *ἑστὸς*. Sed haud ægre sibi quisque persuadebit Gebhardum falli, qui honestum gratia sermonis putat dici pro obscuro, ac vili; me autem etiam non falli, qui honestum puto, idem esse Latinis, ac nobilem, ægre fortasse sibi aliquis persuadebit. Etenim postquam etiam nitore suo, quam fieri potuit, restitutus est Latinus sermo, honestos solemus eos appellare, quos inter humiles, ac nobiles velut medios volumus significare.

Haud diffiteor equidem deprehendi apud optimos authores discrimen aliquod inter honestatem & nobilitatem, inter honestum & nobilem. Primum enim honestas, & honestus, cum præcipue neque generi, neque familiæ, neque parentibus, aliisque similibus junguntur, sæpe animum, & mores respiciunt, ac virtutem, probitatem, dignitatem, laudem significant. Pro Archia Cicero: (d) *nihil esse in vita*

C

ma-

---

(a) in Vit. (b) Pelopid. (c) Tust. 5. c. 38. (d) c. 14.

magnopere expetendum, nisi laudem, & honestatem. Pro Flacco (a): habetis & honestatem hominis, & auctoritatem testimonii. Atqui præstantius aliquid ipsa nobilitate tunc significare, æquis virtutis æstimatori- bus non est dubitandum. Sallustius (b) *Ea tempestate in exercitu nostro fuisse complures novi, atque nobiles, quibus divitiarum bono, honestoque potiores erant, factiosi, domi potentes, apud socios clari magis, quam honesti.* Livius (c): *ex juventute quidam Lucanorum pretio asciti clari magis inter populares, quam honesti.* Qui porro honesti sint, explicat Tullius (d): *cum bonus sit præmium virtutis, judicio, studioque civium delatum ad aliquem, qui cum sententiis, qui suffragiis adeptus est, is mihi & honestus, & honoratus videtur.*

Cum vero honestus ad genus, & natalium qualitatem, hominisque statum refertur, vetuste bonos pro magnis, honestos pro divitibus dictos, innuit Asconius (e). Nos idem de honesto sentiendum putamus, quod supra c. 2. de bono sentiendum diximus, nimirum honestum la- tius patere, quam nobilem, ut nobilis quisque idem & honestus, non autem honestus quisque idem & nobilis dici possit. Honestas itaque & nobiles & ignobiles, qui modo infimi generis, & ultimæ sortis non sint, amplectetur. Vilioribus enim honestos opponit idem ævi augu- stæ scriptor, ut optime conjectat Gerardus Joannes Vossius (f), Asconius (g): *prætexta honestorum, toga viliorum.* Infimum etiam ge- nus honestatis opponit Livius (h): *fautorem infimi generis hominum, ex quo ipse sit, odio alienæ honestatis, creptum primoribus agrum sordidissi- mo cuique divisisse.* Ex utriusque autem authoris loco id mihi videoor posse inferre, honestum proprie ad omnes omnino ingenuos pertine- re, eosque a libertinis distinguere. Quem enim Livius verbis Tarqui- nii infimi generis appellavit, & alienam honestatem odisse dixit, is Rex Servius erat, quem antea servum, & serva genitum compellarat. Viliores etiam illi, quorum, Pedianus ait, togam fuisse, erant pari- ter libertini, cum ingenuorum omnium, quos idem honestos vocat, prætexta esset, ut clarius ex infra dicendis apparebit. Eodem re- cidit, aut ego fallor, livianum illud, ubi servorum vitia honestis na- talibus, & liberali institutioni opponuntur: (i) *Cn. Fulvium Quiri- tium Romanorum exercitus honeste genitos, liberaliter educatos servilibus vitiiis imbuisse.* Item illud, ubi volones, milites scilicet ex servis, pro honestis, imo etiam pro generosis, quod ad augendam oratio- nem facit, habendos, suadetur: (k) *ne quam exprobratio cuiquam ve- teris fortune discordiam inter ordines fereret: vetus miles tironi, liber vo- loni se se æquare sineret: omnes satis honestas, generosæque ducerent, qui-*  
bus

(a) c. 48. (b) Jugurt. (c) l. 8. c. 27. (d) Brut. (e) ad Cicer. in Ver. de Prat. Urb. (f) de Hist. Lat. l. 1. c. 27. (g) Ibid. (h) l. 1. c. 47. (i) l. 26. c. 2. (k) l. 23. c. 35.

bus arma sua, signaque populus Romanus commisisset. Quo autem loco ait Afconius, libertinos a Cicerone honestis oratorie æquiparari, inde clare inferitur, libertinos duntaxat honestos dici non potuisse: (a) quorum (libertinorum) non conditionem, sed more suo quasi honestorum ordinem vocat. Honestum igitur tam late, quam ingenuum patere, forsitan non temere iudicavero.

Quamquam vero inter ingenuitatem, & nobilitatem quondam intercedere affinitatem, Aristoteles (b) docet, seu quia tam ingenuus, quam nobilis natalibus æstimatur, ut ejusdem interpreti visum (c), seu quia ingenuitati nobilitas velut adnascitur, & succrescit, juxta illud (d): *En unquam fando audistis, patricios primo esse factos, non de celo demissos, sed qui patrem ciere possent, idest nihil ultra, quam ingenuos; nihilominus ingenuum pro nobili dictum, numquam me legisse memini. At honestum, ut ut æque late pateat, & nihil ultra significet proprie, quam ingenuum, pro nobili tamen usurpari solitum, neque id raro, ne dubites. Tranquillus (e) Pollam Vespasiani matrem dicit Nursiæ honesto genere ortam, cum deinde, quæ extabant complura Vespasiorum monumenta, vocet magnum indicium splendoris familiæ, & vetustatis. Afconius, quos honestos vocavit, eosdem mox nobiles vocat (f): cum Sulla post victoriam circenses faceret, ita ut honesti homines quadrigas agitent, fuit inter eos C. Antonius; paullo post autem: diximus jam supra Sullæ ludis, quos hic post victoriam fecerit, quadrigam C. Antonium, & alios quosdam nobiles homines agitasse. Cicero sæpissime honestum cum amplo conjungit, aut cum nobili: (g) quas familias honestatis, amplitudinisque gratia nomino: (h) est ipse honestissimi, ac nobilissimi generis. Scrupulum autem injiciat nemini, quod Tullius priori loco honestatem altero amplitudinem, sicuti alibi honestam primum, deinde nobilem ita videtur usurpasse, quasi minus significanti majus aliquid esset subiectum, quod fit in oratoriis amplificationibus. Amplo enim idem quoque honestum subicere non dubitat, ubi, quod animadversione dignum puto, plebejorum nobilitas cum patriciorum nobilitate confertur: (i) si sum amplæ & honestæ familiæ plebejæ. Ita & honestum nobili: (k) Halicyensis Eumenidæ nobilis hominis, & honesti. Loco etiam supra citato, unde in hunc campum excurrimus, Dionysium ait fuisse bonis parentibus, & honesto loco natum, ubi aut neutra loquendi ratio nobilitatem, aut utraque certe significat.*

Noli autem mirari, quod veteres honestum pro nobili usurparunt.

C 2

Ho.

(a) ad l. 1. in Verr. de Pr. Urb. (b) Politic. l. 3. c. 8. (c) Ob. Gypb. ibid.

(d) Liv. l. 10. c. 8. (e) Vespas. c. 1. (f) in orat. contra Comp. (g) pro Rosc. Amer. c. 15.

(h) pro Sull. c. 25. (i) pro Mur. c. 15. (k) l. 5. in Verr. c. 15.

*Honestum* enim semper sonat aliquid virtuti conforme, ac *bonestatem* quælibet nobilitas ab *honestis* viris, hoc est virtute eximiis haud dubie profecta, quasi parentem agnoscit, ut supra innuimus. Sicut in novo omni populo, quod Livius de Romano aiebat (a); ita & in nova omni familia, *omnis repentina & ex virtute nobilitas fuit*. Neque alia certe apud Romanos veteres ad nobilitatem via, nec temere iactabat illa apud populum Marius (b) contra nobilitatem: *si jure despiciunt me, faciant idem majoribus suis, quibus, ut mihi, ex virtute nobilitas cepit*. Qui consilio apud eos, vel manu potens rempublicam domi, aut foris administrandam susceperat, hic tantam laudem consequutus putabatur, ut posteris omnibus gloriæ, & magnæ quidem fuerit ab eo genus suum trahere. Hoc vero, quod manifestius fiet infra de veteribus Romanis, haud aliter se habet in omni bene constituta republica hac quoque ætate. Aliquem mihi memorate, qui fortitudine, prudentia, caritate in patriam ad rempublicam admotus sit, & in altissimo collocatus honorum fastigio, hic sane virtute sua in totam familiam, in *atos natorum*, & *qui nascitur ab illis nobilitatem invelit*. Quod utinam meminerint ii, qui tanto opere nobilitatem suam iactant. Profecto hoc fieret, ne vellent ab hac majorum virtute degenerando, quod clarissimum ab illis acceperunt, vitorum suorum sordibus nomen obscurare. Neque enim hanc avitæ gloriæ hæreditatem sine sacris adeundam esse, credendum est, quam posteris virtute cum avis certando in dies augere, & splendidiorem facere debent. Illis, qui secus sentiunt, plautinum illud (c) occinere debemus:

*Itane tandem majores famam tradiderunt tibi tui,*

*Ut virtute eorum ante parta per flagitium perderes?*

*Si quid est in nobilitate bonum id esse arbitror*, aiebat Boëtius (d), *ut imposita nobilibus necessitudo videatur, ne a majorum virtute degenerent*. Pulcrum quidem si de omnibus nobilibus id dici possit, quod Brutus Ciceroni de ejus filio scribebat: (e) *Cicero filius tuus sic mihi se probat, industria, patientia, laboro, animi magnitudine, omni denique officio, ut prorsus numquam dimittere videatur cogitationem, cujus sit filius*. Commodus ille genere quidem nobilissimus, sed inter imperii sordes flagitiis suis numerandus, licet genus vitiis sædaverit, imponere tamen futuræ ætati conatus est, cum adversæ illius nummi parti, quem ad iactandam nobilitatem cudi voluerat, mulierem imprimi jussit stantem, & hastam dextera tenentem, ut scilicet ipsam nobilitatem vitorum suis inclarescere significaret (f). Adeo non ignorant, quid de-

(a) l. 1. c. 73. (b) Sallust. jugurt. (c) Trin. act. 3. sc. 2. (d) Conf. l. 3. p. 6.

(e) Brut. German. epist. 3. (f) Vail. Numism. Imp. Rom. l. 2.

debeant facere, & qui minime faciunt, quod debent. Sed meum non est officii sui nobiles admonere.

## C A P U T V.

*Divitiæ non sunt nobilitas. Falsum est nobilitatem unquam emi.*

*Plures ad nobilitatem viæ.*

O Ccurrendum jam est illis, qui, haud scio, an opinari possint, divitiis veterum nobilitatem contineri: Usurpant enim illud: (a)

— genus, & formam regina pecunia donat.

Si his persuasum est, formam pecunia donari, & genus donari credant; sin autem id a poeta ex sensu avarorum dictum est, qui omnia pecuniæ deferunt, id potius sibi persuasum velint: (b)

*Licet superbus ambules pecunia,*

*Fortuna non mutat genus.*

Hæc duo itaque optime distinguit Historicus: (c) *bunc principem genere, & divitiis; itemque infra: (d) mulier nomine Bussa, genere clara, ac divitiis: alibi quoque (e): nobilis idem, ac dives erat. Cornelius Nepos (f): Callias quidam non tam generosus, quam pecuniosus, qui magnas pecunias ex metallis fecerat. Cornelius item Tacitus: (g) Plancina nobilitate, & opibus. Nihil enim divitiis unquam fuit, quemadmodum ne modo quidem est, cum nobilitate, sive novæ sint, sive a majoribus relictæ, ideoque inter angustias fortunæ M. Hortalus dicitur (h) retinens avitæ nobilitatis, quemadmodum etiam natalium splendor, quamquam paupertate pressum, Accium illum Suram (i) ad spem præturæ hortabatur.*

Pro diversa tamen sententia citant nonnulli Aristotelem, qui ait: (k) *genere nobiles videntur esse, quibus majorum est virtus, & divitiæ.* Verum hæc Philosophum ex vulgi opinione loquutum, cum patet eo, quod pluribus locis in eodem politicorum opere nobiles, ac divites distinguit, tum eo maxime, quod nobilitatem supra (l) non timide dixerat, *videri*, sed plane falsus fuerat *generis esse virtutem*, hoc est *præstantiam*, ut Obertus Gyphanius interpretatur. Ex vulgi opinione multo magis loquutos, ne longior sim singulorum auditorum verbis referendis, omnes eos dicam, qui, nulla virtutis mentione solis divitiis nobilitari homines, asserunt. Vulgus autem, cujus oculos

ni-

(a) Horat. l. p. epist. 10. (b) Horat. epod. ed. 4. (c) Liv. l. 22. c. 24. (d) *ibid.* c. 52. (e) l. 3. c. 1. (f) Cimon. (g) Ann. l. 2. c. 43. (h) Tac. ann. 2. c. 38. (i) Plin. l. 10. ep. 7. (k) Polit. l. 5. cap. 2. (l) l. 3. c. 8.

nihil magis præstringit, quam divitiæ, qui beatum neminem putant præter divites, divitiis etiam nobilitatem definire, cui mirum? præcipue cum divitiis nobilitatem egere ad tuendum locum suum, eisque magis illustrari ultro docti etiam fateantur, laudentque Tiberium, qui *nobilitatem opibus juvandam*, (a) aliquando censuit, ac Vespasianum, qui *consulares inopes quingenis sestertiis annuis sustentavit* (b).

Quamquam vero opibus, & divitiis nobilitas minime continetur, fit tamen sæpissime, ut multi nobilitatem divitiis debeant. Proinde enim virtutis, ex qua una, iterum dico, nobilitas proficiscitur, animique magnitudinis declarandæ occasionem sæpe magnis viris opes suppeditarunt, qui obstante re angusta domi numquam forte e foribus emerissent. Qua una ratione nostra etiam hac ætate auro parari posse nobilitatem, contendo. Nunquam enim venalis proscribi nobilitas potest, licet vulgo dicamus, aliquos sibi, ac suis nobilitatem pretio emere, eandemque tanti indicari. Optime hoc quidem ille: (c)

*Nobilitate hominem non ulla pecunia, nulla*

*Divitiæ possunt: pretio nam dignior omni est*

*Nobilitas: hæc non emitur, nec venditur auro.*

Cum Principes nobilium loco, titulis, jure illum donant, qui magnam auri vim in ærarium intulit, non ementi nobilitatem addicunt, sed magno hoc præmio, ob levatum ærarium, civium in patriam amorem prosequuntur. Vera autem, & germana hæc, quæ vocatur, patriæ caritas sit, necne, parum refert, cum præmia Princeps & militibus largiatur fortiter ob honoris spem, aut penarum metum agentibus, quorum tamen vera fortitudo non est, teste Aristotele (d). Si, cum Veneti bello Januensi ad Clodiam, civitatem suam optimo jure, ideoque nobilitatem, quæ apud ipsos optimo civitatis jure continetur, iis largiti sunt, qui privatis sumptibus pecunia, commeatu, militeque, aut classem, aut littorales copias juvarunt (e), nobilitatem tamen eos vendidisse, minime dicimus; cur iidem dicendi sint nobilitatem vendere, cum eam illis largiuntur, qui opes difficillimis reipublicæ temporibus inferunt in ærarium, quibus classis parari possit, non video. Nempe eadem utrobique mihi videtur in patriam caritas, idem honestus, gloriosusque divitiarum usus. Nobilitatem itaque unius virtutis esse præmium, iterum ajo, virtuti tamen, ut eam promereri possit, aliquando divitias, aliquando etiam litterarum studia materiam subjectam tantummodo esse.

Sed

(a) Tac. ann. l. 3 c. 48. (b) Sueton. Vesp. c. 27. (c) Palingen. Virg. (d) Esch. J. 3 c. 2. (e) Sabel. rer. Ven. dec. 2. l. 6.



Sed ne diutius de verbis disputem, quod ad rem spectat, illud inter omnes constare arbitror, neminem nobilitatem consequi, nisi qui sanguinis sordes, ut ita dicam, eluat, & abstergat, nobiliumque quæ sunt, jura, & locum obtineat. Huc autem cum pervenire quis possit, civilis prudentiæ, fortitudinis, aliarumque virtutum specimen edendo, opes ad belli subsidia, seu pacis ornamenta conferendo, eloquentia, juris civilis scientia, aliisque disciplinis optime de republica merendo, per hæc omnia nobilitatem acquiri posse, fateor; horum ullo nobilitatem contineri, nego. Virtutibus insigni, divitiis pollenti, litteris instructo multæ patent ad nobilitatem viæ, cum tamen, neque virtus, neque divitiæ, neque litteræ ullæ aut sint modo, aut unquam nobilitas fuerint. Verum qui primus quicumque de causa ab iis, ad quos spectat, nobilium jure, ac loco donatur, hunc *novum* potius appellabo, quam *nobilem*: qui ab eo descende-  
inceps erunt, hos *nobiles* dicam, cum de illius meritis laus ad ipsos ventura sit.

Quæres tamen, cum Princeps homines nec privatim, nec publice utiles nobiles appellat, ac appellari jubet, quænam laus ad eorum posteros venire possit, ut nobiles sint? Licere hoc Principibus quilibet, inopem, divitem, frugi, nequam, mediocris, infimi generis in nobiles cooptare, ita ut, quo cæteri, qui in eorum ditione sunt, nobiles optimo fruatur jure, certissimum puto, & veterum etiam exemplo infra docturus sum. Quoniam vero in Principum facta inquirere eorum reverentia prohibemur, taciti tunc Principis beneficium admiramur, virtutemque ejus, qui illud promeritus est, dum credere malumus, quam scrutari, illaudatos non sinimus, qui ab eodem sunt. Plura qui desiderat de nobilitatis acquirendæ ratione, Ti-  
raquellum consulat, cum a nobis petenda non sint, qui de veterum ægimus nobilitate.

## C A P U T V I.

*Majorum mentio ad significandam nobilitatem. Terræ filius pro ignobili Genealogiæ. Imagines. Sine gente ignobilis. Nomen pro nobilitate. Quedam de multiplici Romanorum nomine. Nobilitas non est quid alienum.*

**C**onsuetudo obtinet apud auctores, ut majorum mentionem faciant ad significandam nobilitatem. Virgilius: (a)  
*Turnus avis, atavisque potens.*

Ovi.

(a) 7. *Æn.*

Ovidius: (a)

*Si modo non census, nec clarum nomen avorum,  
Sed probitas magnos, ingeniumque facit.*

Martialis ad Gelliam: (b)

*Dum proavos, atavosque refers & nomina magna.*

Cicero: (c) *homini ille bonorem, non generi: moribus, non majoribus meis, virtuti perspectæ, non auditæ nobilitati.* Plinius (d): *illos ingentium virorum nepotes, illos posteros libertatis.*

Hinc factum est, ut qui ignobilis erat, *terræ filius* nuncuparetur, ut pluribus ostendit Angelus Politianus (e). Cum enim ignotis parentibus, & obscuris ortus esset, ita appellabatur, ac si bruta terra natus esset, cui pudor erat patrem ciere. Ideo apud Ciceronem hoc habemus: (f) *Cn. Octavius, an Cn. Cornelius quidam familiaris tuus, summo genere natus, terræ filius.* Obscurissimum hominem, de cujus ne nomine quidem constabat, postquam irridens summo genere natum dixit, terræ filium appellat. Hinc ille (g) *fraterculus gigantum*, ille (h) *terræ progeniem* huiusmodi sortis homines vocat. Aliud tamen significat *terræ filius* apud Petronium, ubi ait: (i) *& ille stipēs, dum fratri suo irascitur, nescio cui terræ filio patrimonium legavit.* Sumitur enim hic *terræ filius* pro alieno, extraneo, quem nulla affinitate, nullo grado contingas. Hinc optime subdit satyricus ex Varro-ne illud: *Longe fugit, quisque suos fugit.*

Porro quoties alicujus nobilitatem luculentius ostendere, & extollere volebant veteres, quid aliud faciebant, quam quod modo facimus? scilicet genealogias ordinabant, & a primo generis auctore totam posterorum seriem recensiebant. Virgilius, ut Latini nobilitatem explicaret: (k)

*Hunc Fauno, & Nympha genitum Laurente Marica  
Accipimus. Fauno Picus pater: isque parentem.  
Te, Saturne, refert, tu sanguinis ultimus auctor.*

Apud Ovidium Ajax: (l)

*Nobilitate potens essem Telamone creatus,  
Mænia qui forti Trojana sub Hercule caput,  
Litora que invasit pegasæa Cholca carina.  
Æacus huic pater est, qui iura silentibus illis  
Reddit, ubi Æolidem saxum grave Sisyphon urget.  
Æacon agnovit summus, prolemque fatetur  
Juppiter esse suam, sic a Jove tertius Ajax.*

Et

---

(a) l. 5. *Pan. eleg.* 10. (b) l. 5. *epig.* 17. (c) *In Pis.* c. 2. (d) *Paneg.* c. 69.  
(e) *Miscell.* c. 2. (f) l. 7. *famil. epist.* 9. (g) *Juven. Sat.* 14. (h) *Pers. sat.* 3.  
(i) *in fragm. Trag.* (k) *Æn.* 7. (l) *Metam.* 13.

Et Ulysses pariter, cum de nobilitate certaret, similem profert majorum seriem (a). Ita etiam Historici, inter quos Plutarchus Pyrrhi (b), nec non Agidis, & Leonidæ (c) majores per gradus commemorat, & quot distent gradibus a primo nobilitatis auctore ostendit.

Sed nullo tempore non fuit hoc in usu, ut ad familiarum splendorem proendum docti viri integras conscriberent ex professo genealogias, inter quos sic familiarum originem subtexit Pomponius Atticus, ut, quemadmodum auctor ejus vitæ (d) testatur, *ex eo*, donec extavit, *clarorum virorum propagines* potuerint omnes cognoscere. Quoniam autem nemo non solitus omnibus sæculis de sua nobilitate gloriari, solitum quoque fuisse veteribus id curare, ut familiarum suarum genealogia ab aliquibus conscriberetur, discimus ab eodem auctore, qui hoc rogatus a M. Bruto, a Marcello, a Scipione, a Fabio Maximo eundem Atticum tradit: (e) *Fecit hoc idem* [Pomponius Atticus] *separatim in aliis libris, ut Marci Bruti rogatu Juniam familiam a stirpe ad hanc ætatem ordine enumeravit, notans, qui, a quo ortus; quos honores, quibusque temporibus cepisset: pari modo Marcelli Claudii de Marcellorum, Scipionis Cornelii, & Fabii Maximi de Corneliorum, & Fabiorum, & Emiliorum quoque.*

Propterea cum, qui nobilitatem jactabat, idem majorum suorum seriem jactaret, ceperunt majorum imagines domi tanta diligentia servari, & ostentari verissimum nobilitatis argumentum, ut si quis nullas domi imagines haberet, nobilis nequaquam haberetur. Jus itaque imaginum a Rosino (f), & Sigonio (g) dicitur idem esse, ac jus nobilitatis, scilicet, quod qui nobiles erant, nobis sibi sumebant, ut imagines suorum ponerent, ac per eas vellent ab obscuris discerni, qui minime audebant posteris custodiendos parentum vultus committere, quorum facta non poterant posterorum memoriæ mandare. Quare optime metonymicè dicitur nobilitas esse ab imaginibus, a majoribus scilicet, quorum imagines servantur, & imagines pro ipsa nobilitate sumuntur, quemadmodum Cicero: (h) *obrepisti ad bonores commendatione fumosarum imaginum*. Sed de imaginibus plura alibi.

Huc etiam spectat, quod præclarum ducebatur apud Romanos gentem habere, & jure gentilicis frui. Contra ignobiles *sine gente* dicebantur. Horatius: (i)

*Qui quamvis perjurus eris, sine gente, cruentus  
Sanguine fraterno.*

D

Gens

(a) *ibidem*. (b) *in Pyr.* (c) *In Agid.* (d) *Corn. Nep. in Att.* (e) *l. c.*  
(f) *Antiq. Rom. l. 1. c. 19.* (g) *de jure Civ. l. 2. cap. 20.* (h) *In Pis. cap. 1.*  
(i) *l. 2. Sat. 5.*

Gens autem modo late sumitur pro qualibet cognatione:

— Priami de gente vetusta: (a)

— Bellum gerimus cum gente Deorum (b):

hinc sacra, hinc gens, hinc majorum multa vestigia (c): colligere sparsas gentilitates (d): modo pressius gens ita refertur ad familiam, ut gens, quemadmodum scribit Sigonius, (e) ad nomen, familia ad cognomen referatur. Itaque illa totum continere videtur, hæc quodammodo partem: exempli causa Cornelii omnes unius gentis esse dicuntur, quia uno nomine continentur omnes, at vero partes gentis hujus sunt plures, quæ ex cognominum varietate distinctæ sunt, eaque familie dicuntur, ut Cornelii Dolabella; Cornelii Cethegi, Cornelii Scipiones, Cornelii Lentuli, itemque in cæteris. At vero Cornelii omnes unius existunt gentis. Hæc ille; sed tamen hoc vocum discrimen non perpetuo servari ab auctoribus, obiter notandum ex Livio, qui sex & trecentos Fabios, patricium illum exercitum contra Veientes profectum modo gentem, modo familiam vocat: tum Fabia gens senatum adit, consul pro gente loquitur (f). At deinde: familiam unam subjisse civitatis onus (g), pariterque continua oratione: sex & trecenti milites omnes patricii, omnes unius gentis, quorum neminem ducem sperneret egregius quibuslibet temporibus senatus, ibant unius familie viribus Veienti populo pestem minitantes (h). A gente autem dicti gentiles, qui ejusdem gentis inter se erant, & gentilitas ipsa inter gentiles cognatio. Sed aliquando gens, & gentilitas significat jus quoddam, quod gentilitatis dicebatur, & quo utebantur gentiles inter se. De hoc statim inferiori capite agemus.

Animadvertendum hic est, adeo præclarum Romanis visum posse gentem jactare, ut a nomine, quod præclari viri gentis auctores tradiderant, totam generis gloriam trahentes, nomen pro nobilitate sumerent. Tullius: (i) ista vestra nomina nunquam firmi admiratus: viros esse, qui ea vobis reliquissent, magnos arbitrabar. Idem: (k) est tuum nomen utraque familia consulare, atque alibi: (l) posteris suis amplitudinem nominis tradere. Ita etiam de nobilissima Brutorum familia: (m) est quasi Deorum immortalium beneficio, & munere datum Reipublicæ Brutorum genus, & nomen ad libertatem populi Romani vel constituendam, vel recuperandam. De nova pariter Catonis nobilitate: (n) venit mihi in mentem M. Catonis hominis sapientissimi, qui cum se virtute, non genere populo Romano commendari putaret, cum ipse sui generis initium, ac nominis ab se gigni ac propagari vellet, hominum potentissimorum suscepit ini-

(a) Virg. æn. 9. (b) Idem æn. 11. (c) Cic. legg. 2. c. 3. (d) Plin. Paneg. c. 39.

(e) ad Liv. l. 4. c. 1. (f) l. 2. c. 42. (g) ibid. c. 40. (h) ibid. (i) l. 3. Epist. fam. 7.

(k) pro Plans. c. 18. (l) pro Mur. c. 16. (m) Philip 4. c. 7. (n) in Ver. l. 5. c. 180.

inimicitias. Plinius Junior: (a) quibus imaginibus oneretur, quæ nomina, & quanta sustineat. Ovidius (b)

*Credidimus blandis, quorum tibi copia verbis,*

*Credidimus generi, nominibusque tuis.*

Nomen autem proprie ad gentem refertur. Cum enim Romani, ut viri docti observarunt (c), multiplici appellarentur nomine; primo, quod & *prænomen*, personæ distinguebantur, altero, quod proprie *nomen*, gentes, tertio, quod & *cognomen*, familiæ, quibus insuper addi aliud aliquando solebat ex aliqua ratione, vel eventu quæsitum, quod *agnomen* dicebatur, quamquam hoc quoque *cognomen* improprie dictum invenies. Livius hæc habet de Cornelio Scipione (d): *Africanum cognomen militaris prius faver, an aura popularis celebraveris, an sicut Felicis Sulla, magnique Pompeii patrum memoria capium ab assentatione familiari, parum compertum habeo. Primus certe hic imperator nomine victæ ab se gentis nobilitatus: exemplo deinde hujus nequaquam victoria pares, insignes imaginum titulos, claraque cognomina familiæ fecere.*

Quærendum modo mihi est, an tot hæc nomina *nobilium* tantummodo fuerint, cujus rei suspicionem movet illud Aufonii de ternario numero: (e)

*Tres equitum turma, tria nomina nobiliorum.*

Fere omnes Juvenalis interpretes, inter quos & vetus Scholiastes, id affirmant, ad illud poetæ: (f)

*Es ponere foris, si quid tentaveris unquam*

*Hiscere, tamquam habeas tria nomina.*

Ipse tamen dicam cum Politiano: (g) tria nomina nec soli habebant nobiles, nec universi.

Soli certe nobiles non habebant, cum non ignobiles tantum, ut M. Porcius Cato, M. Tullius Cicero ita vocarentur, antequam ultimum iniissent magistratum, sed & liberti tribus nominibus appellarentur. Prænomen enim inditum servis tunc statim, cum manumitterentur, clarum ex Persio: (h)

*Vertere hunc Dominus, memento temporis exit*

*Marcus Dama.*

Patroni autem prænomen imponi libertis solebat, licet aliud etiam aliquando sibi sumerent, ut tradit idem Politianus (i) quamdam Ciceronis epistolam interpretatus, cum quo sentit Antonius Augustinus (k). Ita Cicero ad Atticum: (l) *de Eumebide gratum, qui vetere*

D 2

præ-

(a) l. 3. epist. 3. (b) ep. Phyl. ad demoph. (c) Sig. de nom. Rom. c. 2 (d) l. 30. c. 45. (e) Edyl. 11. (f) Sat. 5. (g) Miscell. c. 31. (h) Sat. 5. (i) l. c. (k) emend. l. 3. c. 8 (l) l. 4. Att. 15.

prænominē, novo nomine T. eris Cæcilius, ut est ex me, & ex te junctus Dionysius, M. Pomponius. Eutychides igitur libertate donatus ab Attico, postquam hic per adoptionem avunculi non T. Pomponius, sed Q. Cæcilius vocabatur, maluit tamen vetus patroni prænomen sumere, & Titus appellari; Dionysius vero ante adoptionem manumissus, non patroni, sed Ciceronis prænominē Marcus dici maluit, si-ve, ut, quæ inter ipsum, patronumque intercedebat, amicitia adplauderet, si-ve ut se utrique obnoxium declararet. Nomen autem ille Cæcili, hic Pomponii sumpsit, cum id de patroni gente nemo non sumeret, cujus nominis novam familiam liberti ordiebantur, vetere eorum nomine, quo ante manumissionem vocabantur, in familiæ cognomen converso. Hinc Cæcilia Eutychidum, Pomponia Dionysiorum, ac Pompeja Theophanum, Tullia Tironum, quarum gentium auctores memorati Eutychides Q. Cæcili, Dionysius T. Pomponii, necnon Theophanes Pompeii, ac Ciceronis Tiro liberti.

Quoties vero aliquem cum Romano nomine, & barbaro cognomine inveneris; hunc continuo servorum genus ne existimes. Et id enim noveris, si quis peregrinus Romanam civitatem adipisceretur, hunc consuevisse nomen sibi sumere ejus gentis, e qua ille erat, cujus beneficio, aut lege in civitatem Romanam venerat, vetere, quo appellabatur, nomine ad novam familiam, quæ tum primum civitatis jure potiebatur, distinguendam servato. Obvia exempla afferam. Archias Antiochenus auctoritate, & gratia Luculli, ut Tullius testatur (a), ab Heracliensibus impetrata civitate, atque hinc Romanam consequutus, A. Licinius Archias dictus est, quoniam e Licinia gente Luculli: Balbus Gaditanus civitate a Pompejo (b) lege Cornelia donatus L. Cornelius Balbus vocari cepit. Eandem ob causam Demetrium Megam P. Cornelium vocatum, quod per Cornelium Dolabellam a Cæsare civitatem impetraverat, Tullius narrat (c). Cum Demetrio Mega mihi vetustum hospitium est: familiaritas autem tanta, quanta cum Siculo nullo. Ei Dolabella rogatu meo civitatem a Cæsare impetravit: qua in re ego quoque interfui. Itaque nunc P. Cornelius vocatur. At aliam ob causam Philoxenus quidam Aviano sibi nomen fecit, eodem Tullio teste (d): Avianus Philoxenus antiquus est hospes meus, & præter hospitium valde etiam familiaris: quem Cæsar meo beneficio in Novocomenses retulit. Nomen autem Avianii sequutus est, quod homine nullo plus est usus, quam Flacco Aviano: Puto tamen hoc rarius

(a) pro Arch. cap. 6. (b) Cic. pro Balb. cap. 19. (c) famil. lib. 13. ep. 36.  
(d) ibid. ep. 35.

rius accidisse, ut aliud nomen hi novi cives sequerentur, quam ejus, cujus opera, beneficio, lege civitatem erant adepti.

Jam vero neque universi nobiles tribus nominibus utebantur. Cognomine enim nullo usus C. Marius ne post septimum quidem consulatum, nullo Antoniorum familia plebeja, quæ tamen nobilissima. Agnomen autem modo aliquorum peculiare fuit, ut Affricanus, Asiaticus, modo totius familiæ commune, idque præcipue cum alicujus gentis familia in alias familias secabatur, ut e Cornelia gente familia Lentulorum, qui in Caudinos, Lupos, Suras, Spintheres, Marcellinos dividebantur.

Sed ex iis, quæ de *genealogiis*, de *gente*, ac *nomine* dicta hoc capite sunt, satis liquere arbitror, nobilitatem etiam apud veteres nihil fuisse aliud, quam majorum gloriam, qua eorum posterius aspergebantur. Cæterum quamquam hinc probabilis satis fit Bœtius definitio, nequaquam tamen cum eo sentio, cum ex definitione sua infert, alienum quid esse nobilitatem, quæ, ait ipse, (a) *si ad claritudinem refertur, aliena est*. Aqua enim, licet fonti debeatur, ejus tamen alvei est, in quem defluit. Est aliqua gloriæ hæreditas, sicut pecuniæ, quæ si cui evenit, ejus est. Optima hæreditas, teste Cicerone, (b) *traditur liberis, omnique patrimonio præstantior gloria virtutis, rerumque gestarum, cui dedecori esse nefas, & impium judicandum est*. At si quis ipsi dedecori est, is adhuc maximo suo malo nobilis est, vel omni nobilium jure multatus. Magno Brutorum generi dedecus fuit in Marco illo, qui tamen adhuc esse dicitur Bruto nomine: (c) *iisdem temporibus M. Brutus, in quo magnum fuit, Brute, dedecus generi vestro, qui cum tanto nomine esset, patremque optimum virum habuisset, & juris peritissimum, accusationem facitavit, ut Athenis Lycurgus*. Aliquid naturæ imbibitum, atque ita proprium, ut exui minime possit, nobilitatem esse, significavit pariter Tullius, cum Appiorum, & Lentulorum nobilitatem, licet per contemptum, *Appiæritatem* vocavit, (d) & *Lentulitatem*. Tacitus etiam nobilitatem ingentam dicit, quam non sibi peperit Drusus, sed majoribus debuit, quæ ejus tamen fuit, si illi adnata. (e) *Drusus, ait, quæquam rudis dicendi, tamen nobilitate ingenta incusat priora, probat præsentia*.

(a) l. 3. p. 6. (b) *Offic.* 1. cap. 121. (c) *Cic. Brut.* cap. 130. (d) *lib. 3. fam. ep. 7.*  
(e) l. 1. *ann. 6.* 39.

## C A P U T V I I.

*De jure gentilitatis. Nobiles unde nostratibus dicti gentiles.  
Venetorum cognomina omnium antiquissima.*

**D**E jure gentilitatis acturum me hoc capite pollicitus sum. Hoc aliquando proprium tantummodo fuisse patriciorum constat ex Livio, qui, cum ageretur de connubiis patrum, ac plebis, ait, ratos, Patres, (a) *contaminari sanguinem suum, confundique jura gentium, & clarius, ubi plebejus ita patricos alloquitur: (b) semper ista, audita sunt eadem, penes vos auspicia esse, vos solos gentem habere.* Fortasse enim soli patricii prioribus saltem temporibus erant, qui etsi in plures familias discreti, singulos tamen singularum gentium auctores, tamquam omnium ramorum stipitem, seu omnium rivulorum fontem ostentare, & jactare poterant, unde sua cujusque familia diducta; secus vero plebei gentem habere non poterant, qui obscuris parentibus orti, a quo quisque derivaretur, unde quisque existeret, minime poterant ostendere, ideoque gentem, seu gentilitatem soli patricii habere dicebantur, sibi que tantum gentilitatis jura sumebant, quibus frui plebeiis, utpote ignobilibus minime permissum.

Utrum vero postquam plebeiis patuit aditus ad honores, ideoque ad nobilitatem, illi quoque gentem habere dicti sint, hoc est jure gentilitatis sint usi, affirmat quidem Sigonius (c), sed ut verum fatear, res non videtur mihi tam facile judicanda. Ad hoc affirmandum adducitur ille verbis Decii apud Livium, (d) qui plebejos patres patriciis facit, quod illi ex ingenuis orti sint, æque ac patricii. Sed hic locus nihil me mover, ubi omnia oratorie a Decio dicuntur, & ex illius verbis non tantum gentem esse plebeiis, evincitur, sed eosdem etiam esse patricos, ut idem Sigonius vidit. En integer Livii locus: *Semper ista audita sunt eadem, penes vos auspicia esse, vos solos gentem habere, vos solos justum imperium domi, militiæque. Æque adhuc prosperum plebejorum, ac patricium fuit, paræque erit. Eum unquam fando audistis, patricos primo esse factos, non de cælo demissos, sed qui patrem ciere possent, idest nihil ultra, quam ingenuos? Consulem jam patrem ciere possum, avumque jam poterit filius meus.* Ex hac Decii oratione quid unquam pro Sigonii sententia efficitur? Si laus enim gentilitatis plebeiis communicata est, ecquando hoc fuit, nisi

(a) l. 4. c. 1. (b) l. 10. c. 8. (c) ad Liv. l. 10. c. 8. (d) l. c.



nisi cum communicata ipsis nobilitas? Atqui Decius affirmat tunc fuisse nobilitatem plebeis: *jam ne nobilitatis quidem suæ plebejos panitere* [a]; cum tamen, quamquam nulla re patriciis inferiores plebejos esse contendit, palam dicat, eis solum gentem fuisse: *semper ista audita sunt eadem, vos solos gentem habere*, quam laudem deinde elevaturus, docturusque, eos inania nomina jactare, ut se verbis superiores faciant illis, quibus re pares sunt, illa subjicit, quæ modo attulimus. Tamen rem adhuc dubiam facit, quod Scævola apud Tullium [b] gentiles, eos sollicitet, qui ejusdem inter se gentis erant, ita definit: *Gentiles sunt, qui inter se eodem nomine sunt, qui ab ingenuis oriundi sunt, quorum nemo servitutem servivit, neque capite diminutus est*. Ex hac definitione satis ostenditur, inquit Alciatus, [c] *id jus*, (gentilitatis) quod solis patriciis competebat, ad plebejos quoque perductum cum ingenui ipsi, majoresque sui semper fuissent. Interpret etiam Ciceronis, non aliunde ait, [d] dici gentilitatem, quam ab ingenuorum antiquitate. *Gentiles sunt qui eodem nomine inter se sunt, ut Scipiones, Bruti, & ceteri. Quid si servi sunt? Num ulla gentilitas esse potest? Minime. Quid si libertinorum civium Romanorum eodem nomine nuncuparentur? Num ulla gentilitas est? Ne id quidem, quoniam ab antiquitate ingenuorum gentilitas dicitur*. Hinc cum gentilitas hæc nihil videatur plus dicere, quam ingenuitatem, & plebejorum nobilium gentilitatem fuisse, arbitrati nonnulli, quos non refellit Alciatus, [e] gentiles, dixerunt, esse clarioris familiae agnatos, & Turnebus: [f] *gens*, ait, *inter nobiles erat, qui capitis nullam erant diminutionem passi*. Mihi etiam non parum momenti pro hac sententia posse addere videtur, quod Bæcius [g] Brutos commemorat, ut gentiliū exempla afferat, qui Bruti sive a L. Junio illo patriæ liberatore propagati essent, sive non, certe inter plebejos numerabantur. Quamquam Bæcius, ut male, licet vir acerrimo judicio, Scipiones, & Brutos gentiles vocat; cum Scipionum gens Cornelia fuerit, Junia Brutorum; ita etiam falli potuit, cum plebejos gentilibus accensuit. Falli tamen Tullium non æque mihi probabile est, qui M. Pennum M. Bruti gentilem vocat, quoniam & Penni ex eadem gente Jania, qua Bruti: [h] *tunc vero gentilis Brute, M. Pennus*. Nihilominus aliud videtur suadere alius Ciceronis locus, unde colligi potest, nullum plebeis, quantumvis nobilibus, jus gentilitatis fuisse. Ita ille [i]: *cum Marcelli ab liberti filio stirpe, Claudii patricii ejusdem hominis hereditatem gente ad se rediisse dicerent,*

NON

[a] l. c. [b] *Topic. c. 29.* [c] *Parerg. jur. l. 1. c. 12.* [d] *Bæc. in Top. Cicer.*  
 [e] *com. in ff. de verb. fig.* [f] *in Cicer. legg. 2.* [g] l. c. [h] *Bruti. c. 109.*  
 [i] *De orat. l. 1. c. 176.*

non ne in ea causa fuit oratoribus de toto stirpis, ac gentilitatis jure dicendum? Ex his fluctuat Alciatus, &, apparet, inquit, [a] gentiles proprie dictos patricios inter se. Vellem equidem, inquam ego cum magni nominis jurisconsulto, [b] illæ orationes de utroque jure, vel etiam ipsum de hac causa centumvirale judicium sententiaque extaret. Tunc sane rem satis dubiam dijudicare facile possemus. Attamen credi adhuc potest, quamvis gens dicat solum ingenuitatem, multum hinc accessisse ratos nobilitati suæ patricios, ut hoc nomine se ab origine ingenuos profiterentur, hancque propterea laudem, & quod ex illa jus, cum cæteris nobilibus ipsos numquam communicasse, quorum ingenuitatem, ut ut antiquam, ab origine non fuisse videri voluerint. Contra vero non ita facile omnibus probabitur, quod ex unico Plinii loco Alciatus [c] asserit, scilicet servis quoque aliquando, fortasse ante leges duodecim tabularum, jus fuisse gentilitatis. Hoc Plinius: [d] *singuli Marci porēs, Luciporesque* (ita antiquis servi vocabantur Marcipor, Publipor, hoc est Marci puer, Publii puer) *dominorum gentiles vitam in promiscuo habebant*. Alii aliter locum hunc interpretantur. Ego id existimo, ad melius significandam hanc servorum, ac dominorum similem, & in promiscuo vitam, quam ibi Plinius exaggerat, late, & translate eos dominorum gentiles appellatos, quemadmodum Tullius [e] homines, dicit, *Deorum agnatione & gente teneri*, atque eo, quod similitudo hominibus cum Deo intercedit, Dei cognatos homines vocat: [f] *est homini cum Deo similitudo. Quod cum ita sit, quæ tandem potest esse propior, certiorve cognatio?* Sed quæ essent jura hæc gentilitatis jam videamus.

Erant hæc jura hæreditatum, & tutelarum. Ita Balduinus: [g] *ego existimo gentilitatem, cui competunt jura hæreditatum, & tutelarum*. De hoc eodem jure Alciatus: [h] *existimatur autem id juris patriciis fuisse, ut, excluso fisco, cujuslibet cognominis sui hæreditatem gentilitio jure ad se traherens*. Hoc duplici duodecim tabularum lege videtur posse colligi: Si pater familias intestatus moritur, familia, pecuniaque ejus agnatorum, gentiliumque esto. Item alia: si furiosus existat, agnatorum, gentiliumque in eo, pecuniamque ejus potestas esto. Accedit locus Ciceronis: [i] *Minucius quidam mortuus est ante istum prætorem. Ejus testamentum nullum erat: lege hæreditas ad gentem Minuciam veniebat*. Item Svetonius, qui refert, [k] *Cæsarem multatum gentilitiis hæreditatibus a Sulla*. Jus tutelarum collige ex joco illo Ciceronis: [l] *simul illud*

[a] *Parerg. jur. l. 1. c. 12.* [b] *Baldwin. in legg. 12. Tab. c. 30.* [c] *l. c.* [d] *l. 33 c. 1.*

[e] *legg. 1. c. 23.* [f] *ibid. c. 25.* [g] *l. c.* [h] *l. c.* [i] *in Ver. l. 1. c. 115.* [k] *Cæsar. c. 1.*

[l] *pro Cor. Bal. c. 56.*

illud nesciebat prædiorum nullam esse gentem : emptionibus ea solere sæpe ad alienos homines, sæpe ad infimos, non legibus, tanquam tutelas, pervenire. Mirum vero videatur nemini, si satis certum, satis firmum nihil de hac gentilitate attulimus, quando nondum constat inter jurisconsultos, utrum gentiles iidem, ac agnati sint, an diversi. *Res adhuc tota*, inquit Balduinus (a), *valde obscura est, & confusa. Quidam enim putant agnatos, & gentiles fuisse eosdem, quidam ita diversos, ut neutri teneant, quod querimus.*

Sed satis nondum in his tenebris erravimus. Est aliquid, quod adicere non alienum a proposito nostro sit. *Fuit & alia gentilium in jure interpretatio*, ait Alciatus, (b) *nempe ut quemlibet significet Romano imperio non subiectum, quia non jure civili, sed jure gentium vivit, quo fit, ut perinde sit, cum gentilem dicas, ac si barbarum. Quod deinde probat ex Theodosiano codice lib. 1. de Nuptiis. Idem innuit Marcus Vellserus in sua historia (c), & potissimum circa theodosianum ævum ita appellari cepisse barbaros credit, probatque tum auctoritate codicis citati, tum constare ait sæpius ex Notitia. Huc etiam trahit Claudianum. (d)*

— cum mixto turbine gentes

*Jam deserta suas in nos transfunderet Arctos :*  
atque illud (e):

*Discite vesana Romam non temnere gentes.*

His adde tu Cassiodorum: (f) *ibi enim impetus gentilis excipitur, & transmissis jaculis sauciatur furibunda præsumptio, ac paulo post. sic gentilis impetus vestra venatio est: Adde & Jornandem: (g) quia tunc Odovacer regnum Italiæ occupasset, Zenon Imperator cernens jam gentes illam patriam possidere. Rursus paucis interjectis: ovanque rex gentium, & consul Romanus Theodoricus Italiam petit. Sed fortassis, & multo ante ita loquuti scriptores Romani. Lucanus: (h)*

— date gentibus iras.

Martialis (i):

*Terrarum Dea, gentiumque Roma.*

Quin ipse Cicero distinguit cives a gentibus: (k) *quibus auctoribus, & defensoribus omnium tum salus esset non civium solum, verum etiam gentium defensa, ac reserata.*

Oriri hinc potest dubium, utrum cum in Italia, Gallia, Hispania, Britannia quoque gentiles pro nobilibus dicuntur, hoc desumptum sit ab antiqua illa gentilium appellatione, qua nimirum genti-

E les

(a) l. c. (b) *Parerg. jur. l. 1. c. 13.* (c) *Rev. Augst. lib. 2.* (d) *de 4. Consul. Honor.*  
(e) *ibid.* (f) *Variar. lib. 7. epigr. 4.* (g) *de Reg. succ.* (h) l. 2. (i) l. 12. epigr. 2.  
(k) *pro Flac. c. 2.*

les audiebant ingenui ab origine, & quorum majores nulli servitutum servissent, an ab hac inferioris longe ævi propria, cum gentiles barbari vocabantur. Prioris sententiæ Budæus fuit (a), cum quo sentit Tiraquellus (b): sed alterum venit in mentem citato Velfero, ejus hæc sunt: (c) *Hinc nimirum fluxit, quod cum barbari postmodum in devictis provinciis meliori quam Romani jure uterentur (hoc autem probat quadam ex Ripuariis legibus) gentilitatis nomen existimationem induerit, paulatimque res eo prolapsa sit, ut gentiles homines pro nobilibus dicerentur, quæ in Italia, Gallia consuetudo, item Hispania quodammodo ad hoc ævi tenet.* In hanc sententiam ipse etiam animum inclino. Neque enim, cum hæc loquendi apud nostrates consuetudo tunc cœperit certe, cum nullum juris Romani, nullum Romanorum morum, nullum fere Romani sermonis, qui in alios corruptus abibat, vestigium, aut vola; adduci possum, ut credam, novam hanc nobilium appellationem ab antiqua illa, & adeo eleganti gentilium significatione, quod puram putam saperet urbanitatem, fluxisse. Neque moveor tantum, quod in provinciis meliori jure uterentur barbari, quam Romani, sed multo magis, quod in ipsa Italia, atque adeo in urbe ipsa aut omnes revera gentiles erant, ac barbari, aut forsitan, siqui Romanæ originis supererant, hi ad odium declinandum, & vitanda nova mala, quæ certe potissimum in nobiliores parabantur, quo nobiliores erant, eo enixius barbaros se, & e gentibus dici, & credi volebant; turpe hoc nomen saluti obtendentes. Jornandes hoc innuit: (d) *Belisarius Romanam urbem ingressus est, exceptusque ab illo populo quondam Romano, & Senatu, jam pene ipso nomine cum virtute sepulto.* Sed eventus ipse hoc docet. Adeo Romanum nomen, adeo Romanarum gentium, & familiarum memoria aut omnino deleta, aut barbariæ tenebris obscurata, ut se ipsum nemo nosceret, neque per illa sæcula cujus gentis esset, sciret aliquis. Cognominum enim, ut modo vocamus, quæ gentem significant, & Romanorum nominibus respondent, nullus tota Europa usus, postquam Romanum Imperium, ejusque quondam sedem Italiam barbari irruperant. Quæ autem post longa tandem intervalla cœperint stabili, proprioque cognomine distinguui inter se, eæ fuerunt veteres, & Tribunicæ, quas vocant, familiæ Venetorum, quæ omnium Italicarum, & exterarum primæ hujusmodi cognomina usurparunt, ut animadvertit Clarissimus Vir, nullique satis laudatus Justus Fontanus (e). Hoc vero constat ex diplomate anno DCCCCLXXXII. confecto (f), quo Tribunus Mem-

(a) in *Pamd.* (b) *c. 2. n. 53.* (c) *l. c.* (d) *l. c.* (e) *Vind. de re dipl. in app. pag. 255.*  
 (f) *Apud Ugbecl. tom. 5. col. 1272. edit. Rom.*

Memmus Dux insulam Sancti Georgii Majoris Beato Joanni Mauroceno donat, ac Monachis Sancti Benedicti, ubi inter ceteros quamplurimos, quorum familiae modo extinctae sunt, diplomati subscriptos legimus, earum familiarum, quae modo etiam vigent, ac florent, *Bragadinos, Bombos, Maurocenos, Contarenos, Baduarios, Auriros, Basilios*, seu, ut graecizantes tunc scribebant, *Vasilios, Dandulos, Gradonicos, Marcellos, Longos, Mauros, Barbaros, Bonos, Magnos, Justinianos, Zenos, Capellos*, quos ordine, quo illic extant, recensui.

Plura ex hoc diplomate erui possent ad Venetas antiquitates illustrandas; ipse duo obiter colligo, quae ad eadem cognomina spectant. Primum manifestum est, quam vetusta sit nostrorum consuetudo, ut cognomen litera O finitum nulla per casus flexione scriberent, quod ab illis usque temporibus ad nostra perpetuum durat, quemadmodum nunc etiam ita publica diplomata, ac nummi inscribuntur Principis nomine, qui octavum jam annum Reipublicae praestitit: *Joannes Cornelio Dux Venetiarum* (a). Omnes fere, qui nomen suum diplomati relato subscribere, singuli certe ex illis, quas numeravi, familiis eandem scribendi rationem usurpant, praeter Maurocenos, ac Contarenos, quorum alii aliter scribunt. Extat nimirum Dominicus *Mauroceno*: Stephanus *Maurocenus* filius Petri *Mauroceni*: Petrus *Mauroceni* filius Petri *Mauroceni*, pariterque, Ego Dominicus *Contareno*: Signum manus Vitalis *Contareni*, nisi typorum error sit, namque ipse authographum, sive ex authographo exscriptum minime vidi, quamvis id facile potuissem.

Advertendum deinde, aliqua Venetorum cognomina ex propriis nominibus facta. *Baduarii* enim, qui antea *Particiati*, seu *Participatii*, ut annales nostri testantur, sic dicti sunt proculdubio a gentiliis aliquo, cui *Baduario* fuit nomen. *Baduarius* autem nomen proprium fuisse, eo patet, quod & *Bragadinorum* aliquis ita vocabatur. Post nomen enim Tribuni Ducis statim legitur: signum manus *Baduarii Bragadino*, & multis interjacentibus deinde: ego *Leo Bragadino*, statimque: signum *Joannis Baduario*. Propterea, cum illinc constet etiam, aliquem fuisse qui *Fuscarenus* nomine proprio appellabatur, siquidem legitur: signum manus filii *Fuscareni Micani*, probabile sit, praeclarissimam *Fuscarenorum* familiam ab aliquo, cui *Fuscarenus* nomen, cepisse cognominari. Huic fundamento innixa non probari omnibus non potest nuper deprompta ab eodem celeberrimo Fontanino (b) conjectura, eoque magis, quod praedictam a longo

E 2

tem.

(a) an. 1717. edita est primum hac dissertatiuncula Venetiis apud Jo: Baptistam Recursi.

(b) Dissert. de Sancti. Petro Ursuolo praef.

tempore vulgi opinionem evertit, scilicet a *Particiaca* longe nobilissima apud nostrates gente, ut *Baduarii* per aliquem proprio nomine *Baduarium*, ita *Ursones* seu *Urseolos* per *Ursum* seu *Ursonem* aliquem, quo præcipue nomine *Particiaci* oblectati, atque *Iustinianos*, qui nostris etiam temporibus inter primores censentur, per *Iustinianum Particiacum*, qui haud ita longe ab initio sæculi noni Princeps Reipublicæ erat, fuisse propagatos.

## C A P U T VIII.

*Nobilitas apud nationes omnes in pretio. Duplex, ἀπλῶς, & κατὰ τι. Domi nobilis.*

**E**TSI de Romanis potissimum sermo mihi fuerit, quoniam & de his mihi propositum est agere; & eorum res clarioribus monumentis ad nos pervenere; attamen certissimum est, nullam gentem, nullum toto terrarum orbe populum fuisse, apud quem non in aliquo pretio nobilitas fuerit. Primum enim Græcis vel tum ab heroicis temporibus præclarum genus maximi æstimatum fuisse, testis est Helena Theodecti, quæ se ex Diis ab utraque stirpe prognatam gloriatur. (a): testes sunt poetæ omnes, qui heroes suos Deorum sanguine propagatos tradunt, quorum auctoritates afferre non nisi abutentis otio esset. Universe autem cum apud ceteros Græcos, tum præcipue apud Lacedemonios, & Corinthios opifices ignobiles habitos, generosiores vero eos, qui a manuariis operibus abstinerent, didicimus ex Herodoto (b). Dum autem ille dubitat, num id ab Ægyptiis Græci mutuati sint, certissimum fit, discrimen hoc nobilium, & ignobilium apud Ægyptios quoque obtinuisse, ac prius fortasse, quam apud Græcos obtineret. Quod si Asiæ populos scrutari libet, eundem morem Scythiis, Persis, Lydis fuisse, idem Historicus docet (c). De Persis præterea Curtius (d): quo major proditionis merces esset, obicere hosti parabat gratiorem omni pecunia prædam, nobiles viros, prætorum Darii conjuges, liberosque, ac paulo post: ille cultus tot nobilium virorum, tot illustrium feminarum. Cæteris etiam Afris præter Ægyptios, de quibus testatur Herodotus, suam nobilitatem fuisse, constat ex Sallustio, (e) ubi & ignobilitas Jugurtæ, & Massagredæ genus memoratur, & Nabdalsa, & Hamilcar ex nobilitate laudantur. Neque hi ejusdem erant civitatis, ut in aliqua solum Africæ parte familiarum discrimen ex earum splendore fuis-

(a) *Arist. pol.* 1. c. 4. (b) *Euterp.* (c) *Ibid.* (d) *l.* 3. c. 25. (e) *Jugurt.*

fuisse, possumus credere. Sed ut in Europam tandem transeamus, ubi nunc maxima elegantia, tunc mera barbaries, si cum Italia tantum quasdam Græcas civitates excipias; nullus tamen fuit tam ferus, tam Martius populus, apud quem nobiles ab ignobilibus non internoscerentur. De Gallia fidem facit Cæsar: ut Gallia omni nobilitate spoliaretur (a): omnem nobilitatem, omnem senatum, omnem equitatum amisisse (b). Sed clarius illorum temporum populos recensendo, omnes quidem barbaros, & vix humanitatis conscios: erat in Carnutibus summo loco natus Tasgestius (c): hujus potentia causa matrem in Biturigibus homini illic nobilissimo, ac potentissimo collocasse (d): coactos esse Sequanis obsides dare nobilissimos civitatis (e): de ejus adventu Helvetii certiores facti, legatos ad eum mittunt nobilissimos civitatis (f). De Hispanis præterea certum ex Livio: (g) atate, & forma florentes circa eam Indibilis filia erant, alieque nobilitate pari, quæ omnes eam pro parente colebant. Præterea: (h) nobilissimos Hispanos supra trecentos. De Germanis Tacitus: (i) inerant sæmine nobiles, inter quas uxor Arminii, eademque filia Segestis. Idem alibi: (k) reges ex nobilitate, duces ex virtute sumunt. Subodoramur quædam de Britannis ex eodem: (l) principum filios liberalibus artibus crude: itemque: (m) olim regibus parebant, nunc per principes factionibus, & studiis trahuntur. Quod si omnibus populis, ac gentibus nobilitatis nomen innotuit, hanc etiam in pretio apud omnes fuisse, certissimum puto, quandoquidem, ubi nobiles, ignobiles, vulgus sunt, atque uno omnes ordine habentur, ridiculum est nobiles ab ignobilibus distinguere. Sed apud singulos nobilitatem domi fuisse honoratam, testatur etiam Philosophus (n).

Verum quamvis omnium idem esset de nobilitate sensus, non tamen eadem erat omnium gentium nobilitas. Ait enim Aristoteles, (o) nobilitatem fuisse aliam ἀπλῶς, aliam κατὰ τὴν. Quæ simpliciter igitur dicebatur nobilitas, ea tam splendida erat, & luculenta, ut talis ob omnibus haberetur, quæ vero κατὰ τὴν ea apud aliquas solum gentes, & in aliquibus solum urbibus, aut regionibus nobilitas habebatur. Res itaque apud veteres eodem modo, quo apud nos his temporibus, se se habuit. Etenim quamvis aliqui in suis oppidis, & regionibus nobiles audiant, non tamen ubique gentium ab omnibus eo loco habentur, quo alii nobiles, nimirum, quod vel satis parvæ, & inopis civitatis sint, vel in exigui domini ditione censeantur, ut nobiles se inter suos illi jactent quidem, alii vero neque titulis,

(a) *Bel. Gall.* 5. (b) *l.* 1. (c) *l.* 5. (d) *l.* 1. (e) *ibid.* (f) *ibid.* (g) *l.* 37. c. 37.

(h) *l.* 24. c. 49. (i) *Ann.* l. 1. c. 55. (k) *German.* c. 7. (l) *Agrie.* c. 21. (m) *ibid.* c. 12.

(n) *Pol.* l. 3. c. 8. (o) *ibid.* l. 1. c. 4.

tulis, neque loco nobilium dignentur. Apud antiquos pariter nobilis ἀπλῶς dicebatur, qui legibus, & moribus omnium gentium nobilis habebatur; cæteri vero κατὰ τῆς, & domi nobiles, quippe qui non ubivis gentium, sed in suis sedibus, a suis tantum, minime vero extra domum, vel patriam suam nobiles haberentur.

Hæc, aut his similia sublegisse ex Tiraquello Raderum ad quemdam Curtii locum (a), notat alius Curtii interpres Freinshemius, proculdubio quod alienis utatur, tacite insimulans. Sed mihi plagiū non est iis, quæ publici juris sunt, uti. Illud potius admiror, quod neque assequutus Historici mentem est Raderus, neque loco suo hæc attulit, seu ex Aristotele, seu ex Tiraquello de duplici nobilitatis genere. Accipite, ut jacet, Curtii locum: *Mentoris filietres, ac nobilissimi ducis Memmonis conjux, ac filius, vixque ulli domus purpurati fuit tantæ cladis expertus. Lacedemonii quoque & Athenienses societatis fide violata Persas sequuti, Aristogiton & Dropides, & Iphicrates inter Athenienses genere, fama que longe clarissimi. Lacedemonii Perasippus, & Onomasiorides cum Omaio, & Callicatride, bi quoque domi nobiles.* Ad hæc verba Raderus putat, Curtium Aristogitoni, cæterisque Atheniensibus absolutam, & ἀπλῶς nobilitatem tribuisse, Lacedemoniis vero imminutam illam, & κατὰ τῆς, quod eos domi nobiles appellat. Hoc esset quidem verum si hæc κατὰ τῆς nobilitas aut semper per ea verba domi nobilis, aut per ea dumtaxat Latinis significaretur. Atqui aliæ sunt apud Latinos loquendi rationes, quibus eadem subest significatio. Cæsar: (b) *butus potentie causa matrem in Biturigibus homini illic nobilissimo collocasse.* Cicero: (c) *Sextus Roscius cum genere & nobilitate, & pecunia non modo sui municipii, verum etiam ejus vicinitatis facile primus, & paulo post: (d) honestissimus inter suos numerabatur.* Hoc autem inter suos, ne alia persequamur, usurpat etiam idem Cæsar: (e) *Jacius Rhemus summa nobilitate, & gratia inter suos; quin & Curtius: (f) clari inter suos.* Si igitur vocasset Curtius, Aristogitonem, Dropidem, & Iphicratem Athenienses inter suos nobiles, illis κατὰ τῆς nobilitatem tribuisset; ἀπλῶς autem nobilitatem tribuit, quod inter Athenienses nobiles vocat? Unum idemque mihi videtur, Athenienses dici nobiles inter Athenienses, ac dici nobiles inter suos. Paulo aliter loquutus Cæsar: (g) Apud Helvetios longe nobilissimus, & ditissimus fuit Orgetorix. Non ideo ampliorem tribuit Curtius bona pace Raderi, nobilitatem Atheniensibus, quam Lacedemoniis, neque adeo Lacedemoni Athenæ præstabant, ut qui essent Athenis nobiles, ubique nobiles haberentur, secus vero qui Lacedemone.

Num-

(a) l. 3. c. 25. (b) *Bel. Gal. l. 1.* (c) *pro Rose. Americ. 13.* (d) c. 16. (e) *Bel. Gal. l. 2.* (f) l. 4. c. 1. (g) *Bel. Gal. l. 1.*



Numquid autem Atheniensibus æque, ac Lacedemoniis imminutam illam nobilitatem tribuere, eosque minus, quam Persas, nobiles, voluit Curtius per ea verba significare? Ne id quidem Historico in mentem venisse puto, ideoque nullus hic videtur fuisse doctrinæ a Radero traditæ locus. Neque enim adduci possum, ut credam, Athenis, & Lacedemone, in tam claris scilicet civitatibus, quæ universæ Græciæ præsidium, & ornamentum, nobiles, non ubique gentium etiam nobiles fuisse habitos, cumque Romani tantum Græcis deferrent, ut barbaras omnes gentes præter ipsos vocarent, ac crederent; Romanum certe hominem, quicumque is sit Curtius, & quocumque floruerit tempore, ac de Græcorum factis scribentem, minus nobiles Athenienses credidisse, ac Lacedemonios, quam Persas. Innuit igitur ibi Curtius loci, & civitatis tantum discrimen, nulla instituta nobilitatis comparatione. Hoc autem in usu esse solet apud alios scriptores Romanos, ut per illud *domi nobilis*, similemque loquendi formas, velint tantum peregrinam nobilitatem a Romana distinguere.

Hinc propterea fit, ut Freinshemius putet, male a Radero, qui id etiam a Tiraquello sumpsit, notari Adagiographum, quod *domi nobilem* interpretatur eum, *qui non opibus tantum, & potentia clarus, sed ex parentibus nobilibus nobilis prognatus est* (a). Mihi tamen quoque hæc verba tam bene definire videntur *domi nobilem*, quam bene ipsum *domi nobilis* inter proverbia, ut alia id genus multa, relatum est ad implendas chiliades. *Domi nobilem* opibus tantum, & potentia clarum nemo vocavit, ut admoneri deberemus, hoc insuper requiri, ut *nobilis nobilibus parentibus prognatus sit*. Exli autem exempla ab Erasmo allata, ut ait Freinshemius, ostendant, eam loquendi formam pertinere ad peregrinam nobilitatem; non ideo tamen potest *domi nobilis* per id genus tantum definiri, quod & ad Romæ nobilem pertinet. Verissimum est, nullam apud exterarum nationum nobilitatem fuisse, quæ ab illustribus majoribus minime profisceretur. Itaque Cicero de homine Lilybetano (b): *Avitum mihi hospitium est cum Lisone Lisonis filio Lilybetano, valdeque ab eo observor: cognovique dignum & patre, & avo; est enim nobilissima familia*. Atqui nullam ne Romæ quidem nobilitatem fuisse, quæ non talis esset, satis supra docuimus. Propterea si cui probabilis est ea Adagiographi definitio, eandem non eo, quod peregrinam tantummodo nobilitatem, sed quod cujuscumque gentis, & nationis nobilitatem describit, probare forsitan poterit.

Noli enim credere, peregrinos dumtaxat *domi nobiles* appellatos. Sicut

(a) *Chiliad. 4. cent. 9. 46.* (b) *Famil. l. 13. Epist. 34.*

Sicut extranei a Romanis, sic Romani ab extraneis *domi nobiles* cur dici non debuerint, non video. Domus enim hic nihil aliud, quam patriam, & natale solum significat. Quemadmodum autem alios domo Patavio, alios domo Roma (a) ad eorum patriam significandam dictos invenimus; ita ad significandum, quo quisque ordine in patria sua esset, *domi nobiles* & Patavinum, & Romanum, cum opus esset, dictos, minime possum dubitare. Ad loci itaque & patriæ discrimen dumtaxat indicandum, quod paullo ante dixi, illud *domi nobilis* sæpe a Latinis usurpatur, nec natura sua aut ἀπλῶς, aut κατὰ τὴν nobilitatem signat. Ita sumendum mihi videtur Sallustianum illud (b), ubi nihil ad propositum, forte etiam contra propositum esset aliquid velle alicujus nobilitati detrachere: eo convenere senatorii ordinis L. Lentulus, P. Antonius. Ad hæc ex coloniis, & municipiis *domi nobiles*.

Aliquando tamen, & fortasse etiam frequentius, per illud *domi nobilis* apud Romanos Scriptores nobilitas domus ipsius ac loci, ubi aliquis nobilis dicitur, finibus circumscripta significatur. Patet eo, quod qui extra Romam nobiles erant, nonnumquam latius, quam *domi* tantum, nobiles prædicantur. Hinc Cicero (c): *Sextius Roscius genere, nobilitate, & pecunia non modo sui municipii, verum etiam ejus vicinitatis facile primus*: itemque alibi: (d) *Archagatum Haluntinum, hominem non solum domi suæ, sed tota Sicilia in primis nobilem vocari jussit*. Sed & idem probat quod de Melitenfi Diodoro Cicero idem ait: (e) *homo & domi nobilis, & apud eos, quo se contulit, propter virtutem splendidus & gratiosus*. Etenim si Diodorus, quia *domi nobilis*, ubique nobilis fuisset, non ob virtutem tantum apud alios splendidus diceretur. Imminutam autem illam, & κατὰ τὴν nobilitatem cæteris omnibus, sibi tantummodo amplissimam aliam, & ἀπλῶς Romanos tribuisse, nec immerito credimus. Primum enim omnium gentium, ac populorum, præcipue qui opibus, imperio, gloria florent, fuisse, suam nobiliorem, ut ita dicam, nobilitatem credere ingenta omnibus superbia, nimioque erga sua amore, non ægre mihi persuaserim. Athenienses ne viderentur immixti aliis gentibus, indigenas se, nullaque cum aliis aut accolis, aut advenis commixtione ex se se ortos jactabant. Neque aliud, hæc de Eumene refert Nepos: (f) *ei defuit, quam generosa stirps: etsi ille domestico summo genere erat, tamen Macedones eum sibi anteponi indigne ferebant*. Nimirum ex Thracia Cardiano homini nullam esse nobilitatem, quæ satis ipsum commendare posset, præ sua Macedones existimabant. Constat deinde, externos omnes Romanis contemptui numquam non fuisse. Ipsis necdum re-

rum

(a) V. Grut. CCCXXX. 4. (b) Catilin. (c) Pro Reßt. Am. t. 15.

(d) l. 2. in Ver. c. 51. (e) l. 4. in Ver. c. 38. (f) in Vit.

rum dominis Tanaquil, quæ summo loco nata (a) Tarquiniis in Etruria, contemptim peregrina mulier dicitur (b). Mox post reges exactos ad regum, qui Romæ fuerant, genus elevandum: Numam aiebat quidam (c), non modo non patricium, sed ne civem quidem Romanum, ex Sabino agro accitum; L. Tarquinium non modo Romanæ, sed ne Italicæ quidem gentis. Mirum itaque sit nemini, si postquam rerum potiti sunt, adeo peregrinos cujusque gentis, ac generis contempserint, ut conquesti sint (d), per Claudium cæsus alienigenarum tamquam captivitatem urbi inferri. Exteros etiam Seneca comparat servis: (e) sive libertini ante vos habentur, sive servi, sive exterarum gentium homines. Hinc non Torquatus modo peregrinam originem vetere republica Ciceroni objiciebat (f), sed ipse quoque Catilina tamquam magni convicii loco: (g) *M. Tullius inquilinus civis urbis Romæ*.

## C A P U T IX.

*Parergon de genere Ciceronis. Cicero domi nobilis.*

Quoniam Ciceronis incidit mentio, cogit me tanti viri nomen, ut paululum a proposito divertens pauca de ejus genere disseram. Hunc ex Arpino fuisse, Romæque hominem novum, dubitat nemo. At num domi suæ nobilis? Id ajo enimvero. Neque absurdum, ita Tullium a nobis appellari, quomodo alios equites Romanos ipse Tullius appellavit: (h) *M. Orsum equitem Romanum nostrum & pernecessarium, & quod est ex municipio Atellano, quod scis esse in fide nostra. Itaque cum tibi commendo in majorem modum, hominem domi splendidum, gratiosum etiam extra domum.*

Primum enim antiquissimam fuisse Ciceronum familiam, ex qua natus, testatur ipse, ubi ait: (i) *hinc orti stirpe antiquissima*. Deinde hujus antiquissimæ stirpis auctorem nobilissimum fuisse, scilicet Tullium Volscorum regem, ejusdem pariter testimonio probatur (k): *Fuit (Pherecydes Syrus) meo regnante gentili*. Neque enim dicendum est, hunc Tullium vocari a Cicerone gentilem suum ob solam nominis similitudinem. Licet enim Festus gentiles definiat, qui ex eodem genere sunt, & simili nomine appellantur; quamvis & ipse vellem, quod ait Balduinus (l), *rem banc diligentius exposuisset*, tamen certum est, præter nominis similitudinem & idem genus requiri, ut aliquis gentilis dicatur, ac per illud simili nomine appellantur idem voluisse Festum

F

stum

(a) Liv. l. 1. c. 34. (b) *ibid.* cap. 47. (c) Liv. l. 4. c. 3. (d) Tac. ann. 11. c. 23. (e) 3. Benef. c. 28. (f) Pro Sul. c. 22. (g) Sall. Catil. (h) 2. Quint. epist. 14. (i) Legg. 2. c. 3. (k) Tusc. 1. c. 38. (l) in Legg. 12. tab. c. 30.

stum significare, quod Scaevola, cum aiebat: (a) *gentiles sunt, qui eodem nomine inter se sunt*. Quod si constaret ob solam nominis similitudinem gentiles late saltem, & laxè dici posse, quo sensu hac voce utatur Cicero, dubitare; verum hoc uno Ciceronis loco confirmare, posse gentiles ita sumi, quicquid dicat vir eruditissimus (b), mihi non placet. Nam & illud addere plinianum, *Marcipores, & Lucipores dominorum gentiles* non idem probat, sed aliquid multo absurdus, scilicet & prænominis similitudine gentiles posse dici. Verum hoc supra interpretati sumus, hoc vero tullianum nullam video posse pati interpretationem. Si enim Cicero huiusmodi æquivocatione aut ludere, quamquam non erat illic locus, aut illustris generis suspicionem movere voluisset, & se alicubi gentilem M. Tullii vocasset, qui patricius cum Servio Sulpicio consul anno decimo post exactos reges fuit, quod tamen horret dicere, & se ab eo non esse, aperte profitetur (c). Quare Eusebio, Eutropio, Silio, imo ipsi Ciceroni credo, verè cum regio Volscorum sanguine fuisse, idque eo magis quod jam tum a Plutarchi temporibus, ut idem asserit (d), de hoc dubitabatur. Si enim hoc falsum esset, Ciceronis inimici, qui sane neque pauci, neque elingues fuere, hoc neque vulgari unquam neque ab aliquibus pro vero sumi, passi essent. Sed est veritas invidiæ potentior. Hunc autem regem Tullie Ciceronum familiæ audorem non Tullum, sed Tullum vocat Silius (e).

*Tullius ætatas raptabat in agmina turmis,  
Regia progenies, & Tullo sanguis ab alto,  
Indole probè quanta juvenis, quantumque daturus  
Ausoniæ populis ventura in sæcula civem.  
Ille super gangem, super exauditus & Indos  
Implebit terras voce, & furialia bella  
Fulmine compestet linguæ, nec deinde relinquet  
Par decus eloquii cuiquam sperare nepotum.*

Ab hac clarissima origine numquam degenerasse majores Marci nostri, sed omnes semper in Arpinati republica floruisse, constare puto, quod idem majorum suorum cum laude mentionem facit. *Hic*, ait, (f), *sacra, hic gens, hic majorum multa vestigia*. Quæ autem vestigia cum animi voluptate repetenda, præcipue juxta illam laudiorum patris sui villam, relinquere potuissent majores obscuri, & inhonesti? Sed apertissime apud universum Romanum populum asseruit Tullius ipse, illis tantum defuisse Romanæ Reipublicæ honores, & po-

(a) *Cic. Topic. c. 29.* (b) *Bald. l. c.* (c) *Bruto c. 62.* (d) *in Cicero.* (e) *l. 8.*  
(f) *Legg. 2. c. 3.*

& populi illius terrarum domini laudes: (a) *Mibi quidem apud vos de meis majoribus dicendi facultas non datur, non quod non tales fuerint, quales nos illorum sanguine creatos, disciplinisque institutos videris, sed quod laude populari atque honoris vestri luce ea uerunt.* Ad quæ verba ita Lauredanus noster: (b) *Negat se de majoribus suis aliquid nobilium more esse dicturum, & quia obijci poterat, ideo eos præteriri, quia humili, & obscuro loco erant nati, occurrit questionem, sed modeste.* Eos enim, ait, liberaliter atque honeste vixisse, cujus rei signum se ipsum affert, qui eorum sanguine procreatus, & disciplinis institutus est. Neque hac laude, ac luce forsitan caruissent, si egredi municipio suo voluissent. Marcus certe Marci nostri avus eum se gessit, nepote teste (c), in municipio suo cum Gratio, cujus sororem in matrimonio habebat, ferenti legem tabellariam, ut ei, re ad se delata, Scaurus consul: *utinam, dixerit, Marce Cicero, isto animo, atque virtute in summa republica nobiscum versari, quam in municipali maluisses.* Oportet autem Marcum hunc vere egregium virum, civemque fuisse, quique domesticam Ciceronum gloriam non leviter auxerit, cum noster ejus mentionem inferat, ubi memorat quo natus sit tempore: (d) *hoc ipso in loco, cum avus viveret, me scito esse natum.* Eo etiam facile adducor, ut credam Ciceronum familiam egregiis viris semper floruisse, quod avo illi tanto propiores & Silius ex ea finxerit (e), fuisse qui annibalico intertuerit bello, & Plutarchus asserere non dubitavit (f), qui primus hujus gentis Cicero dictus est, eum certo floruisse magna laudum celebritate, quando hoc cognomen, quod ludibrio ab aliquibus vertebatur, ejus posterius tam avide amplexi sunt.

Verum qui aliter, ac nos, de Ciceronis genere sentiant, nituntur potissimum illius Q. Caleni maledica oratione, quæ apud Dionem extat (g), ubi pater ejus fulloniam fecisse, ac vites, oleasque semper coluisse dicitur. Sed hunc Calenum, imo Dionem, cum totus veneni in Ciceronem plenus sit, nihil moror. Habeo, quas contra educam auctoritates, & Catilinæ primum apud Sallustium (h), ubi tantus inimicus aliud nihil illi obijcit præter genus peregrinum: *Cicero inquilinus civis urbis Romæ*, deinde & Sallustii, cujus nomine quideclamationem illam adornavit, quæ Sallustii nomine circumfertur, quamvis non obiter genus, & rei familiaris angustias exprobrat, *Romulum Arpinatam*, omnia in unum velut cogendo, compellat, quod tunc paulo plus sonat, quam illud, quod sibi objectum a Torquato ipse fatetur Cicero (i), eum scilicet tertium a Tarquinio, & Numa pe-

(a) *Pro leg. agr. ad pop. c. 1.* (b) *Bern. Laur. in or. pro leg. ad pop. c. 1.* (c) *Legg. 3. c. 36.* (d) *Legg. 2. c. 3.* (e) *Id. (f) Cicero, (g) l. 46. (h) Catilin. (i) pro Sul. c. 22.*

*peregrinum regem esse*. Accedit alius non minus fervide carminibus suis solitus declamitare, qui ut ejus genus contemnat, eum *ignobilem* solum vocat, quod procul dubio ad Romanam nobilitatem refertur: (a)

*Hic novus Arpinas, ignobilis, & modo Roma  
Municipalis eques,*

Accedit Historicorum fides, quorum nemo præter Plutarchum, qui (b) ex aliorum, invidiorum certe, sermone hoc, ut dubium tamen, retulit, similia de ejus genere tradit. Quare potius quam Caleno, ipsi Ciceroni habenda fides videtur, qui *pavem suum*, ait (c), *in literis* (quod certe plusquam tenuis, ac bene instituti hominis est) *cum infirma esset valetudine, vitam egisse*. Quod si veriora essent, quæ Dio Caleni verbis evulgavit, exangui adeo fronte futurum fuisse Ciceronem, nequaquam puto, ut viro nobili, qui ei convicium facturus peregrinum appellaverat, ita publice in foro apud Judices intanta auditorum corona responderet: (d) *vehementer lætor, eum esse me, in quem tu, cum cuperes, nullam contumeliam jacere potueris, quæ non ad maximam partem civium conveniret*. Cum itaque & antiquitate familiaræ, & regia origine, & illustri majorum serie floruerit domi suæ Cicero, quæ tria non nobilitatem tantummodo arguunt, sed splendidissimam nobilitatem, eum puto *inter Arpinates nobilem fuisse*, & domi nobilem posse appellari, neque id debere de illo dici, quod de alio Valerius Maximus: (e) *Marcus Porcius Cato, qui nomen suum Tusculi ignobile Romæ nobilissimum reddidit*.

At inquiunt rursus: ipse Cicero valde demisse de majoribus suis loquitur, & generis humilitatem palam fatetur. Hoc debuit orator callidus, ut populi beneficia augeret, hoc etiam aliquando voluit homo satis tumidus, ut major hinc laus virtuti suæ existeret. Itaque non illis major fides habenda est; quæ orator orationibus suis artificiose permiscuit, quam illis, quæ philosophus in aliis operibus multo scripta simplicius reliquit. Quamquam quæ etiam ex oratoris operibus colligimus, nihil aliud evincunt, quam eum hominem novum Romæ, primumque suorum populi Romani magistratus, honoresque consequutum fuisse.

C A-

---

(a) *Juven. sat. 8.* (b) *in Cic.* (c) *Legg. 2. c. 3.* (d) *pro Sul. c. 23.* (e) *l. 3. cap. 4.*

## CAPUT X.

*Quæ splendidissima nobilitas? Antiquitas originis. Splendor originis a Diis, a regibus, a viris magnæ virtutis. Continua clarorum majorum series.*

NON æque illustris omnium nobilitas apud veteres habebatur, quemadmodum ne nostris quidem temporibus, sed aliam alia illustriorem, splendidiorem, & nobiliorem, ut ita dicam, fuisse, satis id probat, quod & inter reges certamen fuisse *de nobilitate generis*, narrat Tranquillus [a]. Hinc Cicero Sulpicii [b] ac L. Philippi [c] necnon Lepidi [d] nobilitatem vocat *summam*, C. Cæsaris [e] *excellentem*, quo significari arbitror, eos hac laude aliis nobilibus præstitisse. Sed & ignobilium alii aliis ignobiliores: C. Terentius Varro loco non humili solum sed etiam sordido ortus [f].

Verum ad splendorem hunc majoris nobilitatis primum plurimum contulit *antiquitas originis*. Propterea Persius de eo, qui nobilitate ob antiquam generis originem gloriabatur: [g]

— *An deceat pulmonem rumpere ventis,*

*Stemmata quod Tusco ramum millefimo ducis,*

scilicet, millefimus es a primo generis auctore. Videmus propterea hujus antiquitatis mentionem sæpe fieri simul cum nobilitate, ad hanc scilicet luculentiorē declarandam. Cum Ex familia veteri, & illustri consul designatus [h]: Vetus nobilitas, *majorum facta fortia* [i]: *hominem veteris prosapiae, & multarum imaginum* [k]: Svetonius [l]: *haud dubie nobilissimus, magnæque, & vetere prosapia*. Sed præterea antiquitas ipsa sumitur pro nobilitate. Sallustius: [m] *præter vetustatem familiæ, alia omnia abunde Mario*. De eodem Mario Valerius maximus: [n] *novitatis suæ conscientia, vetustati non sane propitius*. Cicero: [o] *primus in veterem familiam consulatum attulisset*. Huc spectat illud longo sanguine censerī [p], quod interpretantur multos habere nobilitatis gradus, huc etiam, quod a Tullio [q], & Seneca [r] imagines vocantur *fumosæ*, quod dici credo, non solum quia in atrio servatæ, ubi focus, sed etiam quia fuliginem quādam ob diuturnitatem temporis contraxerant: huc etiam spectat, quod poeta *veteres ceras*, quod *medios* dicit *Æmilianos*, [f] *vetustate* scilicet *dimidiatos*, & alia hujusmodi.

Sed

[a] *Cæso* c. 22. [b] *pro Muren.* c. 6. [c] *pro Planc.* c. 57. [d] *Philip.* 13. c. 8. [e] *in Vatin.* c. 15. [f] *Liv.* l. 22. c. 15. [g] *Sat.* 3. [h] *Cic. pro Mur.* c. 17. [i] *Sallust. Jugurt.* [k] *Sallust. ibid.* [l] *Gitl.* c. 2. [m] *Jugurt.* [n] *l. 2. c. 1.* [o] *pro Mur.* c. 86. [p] *Juven. sat.* 8. [q] *in Pis.* c. 1. [r] *Epist.* 44. [s] *Juven. sat.* 8.

Sed præter vetustatem splendor etiam originis non parum auxit nobilitatem, quæ illustrior fuit, quo ejus auctor fuerat illustrior. Propterea ut patriciorum detrahat nobilitati ille apud Historicum, (a) nihilo majorem dignitatem eorum generi esse, ait, quam quod ab ingenuis proficiuntur: *En unquam fando audistis, patricos primo esse factos, non de cælo demissos, sed qui patrem ciere possent, idest nihil ultra, quam ingenios?* Singillatim vero Claudius exprobrat Sabinum advenam principem nobilitatis vestræ (b). Ita etiam Ajax Ulyssis genus contemnit, quod a Sisypho infami latrone ortum ducat (c), & Satyroglyphus hinc universe omnium Romanorum nobilitatem depmit, quamvis antiquissimam: (d)

*Est tamen ut longe repetas, longeque revolvās*

*Nomen, ab infami gentem deducis asylo.*

Attamen hoc more, ac jure suo a poeta dictum puto. Etenim patricii omnes majorum saltem gentium, utpote ab ingenuis parentibus exorti, præterea Sabini, qui Romulo, Albani, qui Tullo, Latini, qui Anco regnante sub urbis exordium Romam migrarunt, ab asylo gentem minime deducebant. Contra vero magnus honor apud Græcos fuit Heraclidis, Æacidis, Pelopidis, Ædontidis ob Herculem, Æacum, similesque eorum progenitores.

Sunt autem huic originis splendori gradus sui. Primum enim splendidissima illa origo, quæ a Diis, unde Heroas suos progenitos omnes poetæ finxere. Quin nemo non fuit, qui vulgi errore ad hanc gloriam non uteretur, cum posset. Hos irridens Seneca: (e) non est, ait, quod te isti decipiant, qui cum majores suos recensent, ubicumque deficit nomen illustre, illico Deum fingunt. Proximus originis splendor fuit a Regibus. Ex utroque amitam Juliam commendat Cæsar, (f) ut paternum genus a Diis, maternum a regibus fuisse gloriatur: *Amicæ meæ Juliæ maternum genus ab regibus ortum, paternum cum Diis immortalibus conjunctum est.* Nam ab Anco Marcio sunt Marcii Reges, quo nomine fuit mater, a Venere Julii, cujus gentis familia est nostra. Hanc splendidissimam originem Vellejus putavit, cum Lycurgum, & Caranum vocat generis regii (g), sed præcipue cum stirpem regiam opponit ultimæ, tanquam illa esset inter humanas prima. Ita enim de Pseudophilippo: (h) *Philippum se, regiaeque stirpis ferebat, cum esset ultimæ.* Tertio splendida putabatur illa origo, quæ a viro erat magnæ virtutis. Quare licet gens Junia a Trojanis profecta esset, & inter patricias numeraretur ante L. Brutum, hunc

ta-

(a) Livius l. 10. c. 2. (b) Ibidem. (c) Ovid Metam. l. 13. (d) Juven. sat. 8.

(e) Sen. l. 3. c. 28. (f) Cæsar. Caf. c. 6. (g) l. 1. (h) l. 6.



tamen tamquam generis auctorem ostendit ob ejus præclara in patriam merita, ideoque Tullius (a): *L. Brutus patriam liberavit præclarus auctor nobilitatis suæ*. Alibi etiam: (b) *Quis putet celeritatem ingenii L. Bruto illi nobilitatis vestræ principi defuisse*. Apud Romanos propterea illustrior nobilitas, nam de omni nobilitate infra negabo, ortum fumebat ab iis, qui magistratum curulem cæpissent, quique propterea maxima virtute viri fuisse videbantur.

Tandem præter vetustatem, & splendorem originis ad luculentam nobilitatem debuit accedere *series illustrium majorum*, continuatque familiæ honores. Nulla non floruit memoratarum laudum apud Romanos Lamiarum familia, cum poetæ testimonio (c) a Lamo esset, qui vetustus, qui rex Formiarum, & cujus posterī omnes in publicis fastis, & annalibus celebres.

*Æli vetusto nobilis ab Lamo,  
Quando & priores hinc Lamias serunt  
Denominatos, & nepotum  
Per memores genus omne fastos;  
Auctore ab illo ducis originem,  
Qui Formiarum mænia dicitur  
Princeps, & innantem Maricæ  
Littoribus tenuisse Lirim*

*Late tyrannus,*

ut nemini mirum sit, tanti æstimatam fuisse eorum nobilitatem, ut *Lamiæ* alteri poetæ pro quocunque maxima nobilitate viro, & matrona usurpentur.

*Quædam de numero Lamiarum, & nominis alti (d):*

*— hoc nocuit Lamiarum cæde madenti. (e)*

Ex hac continenti illustrium majorum serie extollit Xenophon Agæfilai nobilitatem, cujus majores reges fuisse omnes (f). Athalaricus etiam Gothorum rex hac regum serie se propagatum gloriatur, cum eum commendat, qui prosapiæ suæ genealogiam conscripserat: (g) *setendit se etiam in antiquam prosapiam nostram lætione discens, quod vix majorum notitia cana retinebat*. Iste reges Gothorum longa oblivione celatos latibulo vetustatis eduxit. Iste Amalos cum generis sui claritate restituit, evidenter ostendens in decimam septimam progeniem stirpem nos habere regalem. Audi etiam, quomodo apud eundem Cassiodorum Deciorum nobilitas commendetur: (h) *maxime Serenitatis nostræ luminibus Deciorum sanguis irradiat, qui tot annis continuis simul splendet.*  
cla-

(a) *Tusc. 4. c. 2* (b) *Brut. 53* (c) *Horat. l. 3. od. 17.* (d) *Juven. sat. 6.* (e) *id. sat. 4.*  
(f) *Orat. de Agel.* (g) *Cassiod. variar. l. 9. epist. 25.* (h) *l. 3. epist. 6.*

claritate virtutis, & quamvis rara sit gloria, non agnoscitur in tam longo stemmate variata. Saeculis suis producit nobilis vena primarios, nescit inde aliquid nasci mediocre: tot probati, quos genti, & quod difficile provenit, electa frequentia. Sed felicioribus saeculis notata est etiam Paterculo Ceciliæ familiæ claritudo, (a) quippe intra viginti duos annos illius temporis consules fuere Metelli, aut censores, aut triumpharunt amplius duodecim, ut appareat; ait Historicus, quemadmodum urbium, imperiorumque, ita gentium nunc florere fortunam, nunc senescere, nunc interire.

Quemadmodum autem florere dicuntur gentes, ac familiæ, cum magnum virorum proventum ferunt, ita senescere videntur, cum claris viris per longum tempus destituuntur. Sallustius: (b) Sulla gentis patriciæ nobilis fuit familia prope jam extincta majorum ignavia. Idem testatur Vellejus: (c) hic (Sulla) natus familia nobili sextus a Cornelio Rufino, qui bello Pyrrhi inter celeberrimos erat duces, cum familiæ ejus claritudo intermissa esset, diu ita se gessit, ut nullam petendi consulatus cogitationem habere videretur. Cicero etiam Sulpicii nobilitati minus defert, quod honoribus aliquando caruerit: (d) tua vero nobilitas, Servi Sulpici, tametsi summa est, tamen hominibus litteratis, & historicis est notior, populo vero & suffragatoribus obscurior. Pater enim fui equestri loco, avus nulla illustri laude celebratus. Itaque non ex sermone hominum recenti, sed ex annalium vetustate eruenda est memoria nobilitatis tuæ. Non ideo tamen verum puto, quod Streinnius assermat, (e) patricias familias, postquam diu nullis magnis viris floruisse, plebeiis accensitas fuisse. Hoc enim, quod unus ille, ut puto, asseruit, falsum declarat locus Sallustii citatus, qui Sullarum familiam quamvis prope extinctam majorum ignavia, tamen adhuc patriciam dicit. Neque nobilitatem, ut ut obscuraretur, amisisse putabantur, cum eandem familiam Sullarum nobilem, & idem Sallustius, & Paterculus vocent locis citatis. Verum est nihilominus, tam difficile posteris fuisse jacentem hanc nobilitatem excitare iterum, ut æque illis ac ignobilibus videretur interclusus ad honores aditus. Quare Tullius: (f) *Ejusdem animi, atque ingenii est posteris suis, quod Pompejus fecit, amplitudinem nominis, quam non acceperit, tradere, & ut Scaurus, memoriam prope intermortuam generis sui virtute renovare.* Qua ratione adductus non dubitat Servium Sulpicium patricium, & antiquæ nobilitatis virum novorum loco habere: (g) quare ego te semper in nostrorum numerum (hominum novorum) ag-

gre-

(a) l. 2. (b) Jugurth. (c) l. 2. (d) pro Mur. c. 15. (e) de gens. & fam. Rom. ad Marcell. (f) pro Mur. c. 16. (g) l. c.

gregare soleo, quod virtute, industriaque perfecisti, ut cum equitis Romani esses filius, summa tamen ampliudine dignus putarere. Hoc idem esse in causa, Alconius affirmat (a), cur Tullius Scaurum quoque hominem novum appellat, quamvis nobilem, & patricium; nec opus est, ultra se torqueat Sigonius (b), ut hinc inferat patriciorum aliquos non fuisse nobiles, quod infra confutabimus.

## C A P U T X I.

*Nobilitas a patre primum; splendidior tamen ab utroque parente.  
Nulla nobis, & spuris.*

**H**Æc, quanta quanta erat nobilitas, tota a paterno genere proficiscebatur, neque maternum genus aliquid faciebat, ut nobilis posset aliquis, ac deberet appellari. Nempe patrem sequuntur liberi, ait ille (c). Ideo Vellejus: (d) quamquam dicit, Sejanum materno genere clarissimas, veteresque & insignes honoribus complexum familias; attamen, quod patre, qui tantum princeps equestris ordinis fuerat, natus, novum fatetur, excusatque, antiquo Senatus, & populi Romani more, Cæsarem, qui illum in tam altum fastigium provexerat. Non parum tamen splendoris accessisse, vel a sola matris nobilitate illinc patet, quod Ancus Marcius Livio dicitur (e) nobilis una imagine Numæ, qui Numam materno tantum genere ex Pomponia ejus filia natus attingebat. Poeta quoque, quamvis quæ poetarum sunt, adulationem plerumque sapere videantur: (f)

— *Quicquid patrio cessatum est sanguine mater*

*Reddidit, obscurumque latus clarescere vidit*

*Connubio gavisa domus.*

Quamvis autem matris nobilitate filii nobilitati nunquam sint, pulcrum tamen semper fuit, quando alterum deest, posse alicui dici: (g)

*Stemmata materno felix, virtute paterna.*

At quæ nullam attulit nobilitatem, si nobilis, multum, quæ a patre habebatur, nobilitatem imminuit, si ignobilis. Hinc Horatius eos, qui curiosius in genus aliorum inquirent, quærere ait, (h)

*Quo patre sit natus, num ignota matre inbonefuit.*

Cicero propterea Pisoni e Calpurnia patricia gente homini matrem præconis Placentini filiam obijcere numquam definit: (i) *O familie*

G

non

(a) in orat. pro Scaur. (b) Emend. l. 2. (c) Liv. l. 4. c. 4. (d) l. 2. (e) lib. 1. cap. 34. (f) Stat. l. 3. syl. 3. (g) Id. l. 4. syl. 4. (h) l. 1. Sat. 6. (i) in Pis. c. 53.

non dicam Calpurniæ, sed Calventiæ, neque hujus urbis, sed Placentini municipii, neque paterni generis, sed braccatæ cognationis dedecus. Mox: (a) o paterni generis oblite, materni vix memor, ac paulo post: inferius etiam, quam us Mediolanensi præcone avo tuo dignum esse videatur. Quin etiam Pisonem ipsum Insubrem (b) contemptim vocat, & nova illa nomina Semiplacentini Calventii (c), ac sales illos de calicibus Placentinis, ac de gallicinio (d) in ipsum felis plenus ingerit. Idem Cicero etiam Torquato, par pari relaturus, quod se peregrinum appellasset, qualis certe ipse erat ex patre, non dubitat obijcere peregrinam matrem: (e) Est enim ipse a materno genere municipalis, honestissimæ, ac nobilissimæ generis, sed tamen *Asculani*. Tanaquil quoque vel tum ab urbis exordio Anci Marcii genus contemnebat, quod *Sabina* matre ortus (f). Converso vero civitatis statu Cajus Agrippæ se nepotem neque credi, neque dici ob ignobilitatem ejus volebat, idemque *Liviam Augustam* proaviam suam ignobilitatis arguere ausus est, quasi avo decurione *Fundano* ortam (g).

Contra vero inclaruit multum nobilitas, si maternæ etiam familiæ splendor accederet. Clarum id ex Tacito (h): Germanico alienatio patrui amorem apud ceteros auxerat: & quia claritudine materni generis antebat, avum M. Antonium, avunculum Augustum ferens. Contra Druso proavus eques Romanus Pomponius Atticus dedecere Claudiorum imagines videbatur. Patet etiam ex Juvenale, qui Rubellium Plautum reprehendit (i) materno Drusorum stemmate tumentem: ex Tullio, qui Lateranensis genus extollens (k), est nomen tuum, ait, utraque familia consulare: iterum ex Tacito (l): Piso M. Crasso, & Scribonia genitus, nobilis utrinque. Sic Cæsar in Juliæ laudem (m): amicitæ meæ Juliæ maternum genus ab regibus ortum, paternum cum Diis immortalibus conjunctum est. Suetonius pariter de Galba hæc refert: (n) imperator vero etiam stemma in atrio proposuerit, quo paternam originem ad Jovem maternam ad Pasiphaen Minois uxorem referret. Hinc profecta illa certamina apud Romanos, cum ageretur de promiscuis Patrum, ac plebis connubiis, quibus patres contaminari sanguinem suum, confundique jura gentium rebantur (o). Turpe enim videbatur, si quis dimidiis patrum esset, dimidiis plebis, ne secum quidem ipse concors (p). Graviter igitur queritur Canulejus, (q) quod per connubia plebis pollui nobilitatem istam suam patres exstimerent.

Cæterum non apud Romanos solum tanta erat materni generis æstima-

(a) c. 62. (b) c. 34. (c) c. 14. (d) c. 67. (e) pro Snl. c. 25. (f) Liv. 1.7. c. 34. (g) Suet. Cajo. c. 23. (h) Ann. 1. 2. c. 43. (i) Sat. 8. (k) pro Plane. cap. 17. (l) Hist. 1. 1. c. 14. (m) Suet. Cæsar. c. 6. (n) Galb. c. 2. (o) Liv. 1. 4. c. 1. (p) id. ib. (q) Liv. 1. 4. c. 4.

stimatio, verum & apud Græcos, quibus *μειζοβάρβαροι* dicti ii, qui altero tantummodo Græco parente nati essent. Menestheus propterea Iphicratis Atheniensis filius ex Tressa Anaxandride natus, quamquam hæc Cori regis filia erat, contemnebat tamen patri cum barbarâ sâmina matrimonium. Cum enim interrogaretur [a] utrum pluris patrem, matrem ne faceret: matrem inquit. Id cum omnibus mirum videretur: at ille merito, inquit; nam pater, quantum in se fuit, Thracem me genuit: contra vero mater Aibeniensem.

Hujusmodi autem homines e diversæ gentis, fortissive parentibus *hybridæ* a Romanis vocabantur, seu quia Umbri antiquis erant spurrii, unde *ibridæ* scribunt aliqui, seu appellatione translata, ut Plinio placet, ab animalibus semiferis, hoc est altero fero, altero domestico natis. Ita ille: [b] *in nullo genere æque facilis* (quam in suillo) *mixtura cum fero, qualiter natos antiqui hybridas vocabant, seu semiferos: ad homines quoque, ut in Cajum Antonium Ciceronis in consularu collegam appellatione translata.* Hybridam ideo vocat Flaccus Persium illum, qui matre Romana, patre Græco natus erat. [c]

*Hybrida quo pacto sit Persius ultus.*

Ab utroque parente igitur vera nobilitas, per legitimam tamen ab ipsis originem, ut Aristoteles docet [d]. Neque enim unquam seu patris, seu matris nobilitas aliquo fuit pretio, ni simul legitimis nuptiis sociati essent. Fateor, si quis incerto altero parente natus fuerat, hinc aliquid infamiae detractum ex alterius nobilitate. Virgilius: [e]

—— *Antiphatem*

*Tœbana de matre noibum Sarpedonis alti.*

& de Drance illo: [f]

—— *genus huic materna superbum*

*Nobilitas dabat, incerto de patre ferebat.*

Attamen hujusmodi hominibus labes hæc ita semper inhærere communi vulgi opinione visa est, ut nec patris, nec matris nobilitate abstergi satis putaretur, tantum abest, ut illi tanquam aviti splendoris participes genus jactare unquam possent. Servorum numero habitos, qui ex militibus Romanis, & ex mulieribus Hispanis, cum quibus connubium non fuerat, natos se memorabant, constat ex Livio [g], qui propterea decrevisse Senatum, refert, uti nomina sua apud L. Canulejum profiterentur, eorumque si quos manumississet, ii Carthagini ad Oceanum deducerentur. Hinc Martialis (h) Qui-

G 2

rina-

[a] *Corn Nep. Iphicr.* [b] *l. 8. c. 53.* [c] *l. 1. sat. 7.* [d] *Rhet. l. 1. c. 15.* [e] *Æneid. l. 9.* [f] *Æneid. l. 12.* [g] *l. 43. c. 3.* [h] *l. 1. epig. 80.*

rinalem equitem Romanum, quod filios ex ancilla susceperat, ita irridet:

*Domumque & agros implet equitibus vernis.*

*Pater familiæ verus est Quirinalis.*

Hoc natalium dedecus exprobrat Pyrrho Agamemnon: (a)

*Ex virginis concepte furtivo stupro.*

Eandem generis infamiam obiectam Timotheo scimus, qui, ut eam eluderet, Thressam matrem (hæc erat nobile scortum, quæ postea modestiæ exemplar evasit) exprobrantibus, at per eam, inquebat, (b) *sum Cononis Filius*. Leotychidem fratris filium, ut ipse moriens confessus fuerat, in regni contentione superavit Agésilas (c), quod autea Agis dubitaverat suus ne esset, nimirum, ob suspectum cum Alcibiade Timeæ uxoris adulterium. Sed Athenienses ne in communi quidem in gymnasio exerceri voluere turpibus natalibus homines, quibus Cynofargen alterum gymnasium, quo illi convenirent, aperuerant. Notam hanc tamen ut elueret Themistocles (d) ex Abiotano Threicia Neocli filius, huc alliciens ingenuos, & legitime procreatos adolescentes, effecit, ut qui non metuerant nothis admisceri in eorum gymnasio, eosdem non dubitarent postea in suum conventum admittere. Apud Afros etiam maxima labe ex concubina ortis. Jugurtam Masinissa, quod ortus ex concubina erat, privatum reliquerat, ejusque ignobilitatem, quia materno genere impar erat, Hiempsal despiciebat (e). Quin hæc ad posteros etiam derivabatur: (f) *Dabar*, inquit Historicus, *filius ex gente Masinissæ, ceterum materno genere impar, nam pater ejus ex concubina ortus erat.*

Hujusmodi tamen notæ aliquando, postquam scilicet litteræ omnes, omnisque elegantia totius Europæ finibus ob irrupientes barbaros exturbata fuerat, adeo sæcula illa undequaque miserrima non puduit; ut, cum primum cognomina nominibus propriis addi iterum cepissent, hinc nonnulli *Bastardi* cognominati in antiquis monumentis occurrant (g). Quoniam præterea firma paucis cognomina erant, cum multi de patris nomine cognomentum sibi adsciscerent, ita aliquos, quod ignoto patre orti essent, antiquis chartis subscriptos legit vir immortalitate dignissimus Joannes Mabillonius: (h) *Herluinus filius matris suæ; Petrus filius matris suæ*. Hos autem & matrem ignorasse, ut expofiri solent, probabile arbitror, si quidem matrem compellassent, si potuissent, quemadmodum apud eundem Mabillonium ille *Paganus filius Mariæ* (i). Sed & melioribus

(a) *Syn. Troad. a. 2.* (b) *Athen. l. 13.* (c) *Corn. Nep. Ag. fil.* (d) *Plutarch. Themist.*  
(e) *Sallust. Jug.* (f) *ibid.* (g) *Vid. mabill. de re diplom. l. 2. c. 7.* (h) *ibid.* (i) *ibid.*

ribus temporibus, qui hac natalium turpitudine inquinabantur, eandem palam professos, puto, cum fieri aliter non posset, quod lapides antiqui testantur. Offendes apud Gruterum, qui se *Gintus-fæ* filium (a), qui *Gemine* filium (b), qui *D. F.* (c), hoc est *Cajæ* filium se appellat.

## C A P U T XII.

*Nemo Patriciorum ignobilis. Princeps ignobiles potest nobilitare:*

**E**X his, quæ hætenus dicta sunt, satis apparet, quinam generatim fuerint nobiles apud præcos Romanos, sed peculiariter aliqua restant dicenda de hoc cæterorum domino populo, deque tam illustri omnibus sæculis gente. Cum igitur hoc discrimen fuerit civium Romanorum ut alii patricii fuerint, alii plebeji, quæritur, cujus generis fuerint nobiles.

Advertendum autem est primum, plebejos bifariam dici, modo prout opponuntur patriciis, modo prout opponuntur Senatui, & equitibus. Prout plebeji patriciis opponuntur, ii omnes sunt, qui a patribus, sive majorum, sive minorum gentium originem minime ducebant, qui enim ducerent, patricii vocabantur, quæ divisio optime dicitur Rosino (d) *divisio naturæ*. Prout vero plebeji opponuntur Senatui, & equitibus, ii omnes sunt, qui in senatum non assumpti, neque inter equites censi, & divisio hæc *juris* dicitur (e). Univerfus enim populus Romanus in tres ordines discretus erat, *senatorium*, *equestrem*, *plebejum*. Hoc duplex naturæ, seu generis, & juris, seu ordinis discrimen fortassis innuit Tullius cum ait: (f) *omnes boni omnium* generum, atque ordinum *suam salutem cum mea conjungunt*, itemque alibi: (g) *ea denique* generum, ordinumque *omnium*. Sed omnia notiora sunt, quam ut his immorari ultra debeam.

Cum autem quærimus, utrum plebejorum aliqui nobiles fuerint apud Romanos, non sumendi plebeji sunt, prout Senatui opponuntur. Cum enim, & in amplissimum ordinem utriusque generis homines assumpti fuerint, & in alterum equestrem, in tertio etiam, qui plebejus vocabatur, & patricii, & plebeji genere, & nobiles, & ignobiles hærebant. Hic propterea extremus ordo bifariam rursus aliquibus dividebatur, in *populum*, & *tribus*. Populi quidem est & alia acceptio, ut senatui opponatur comprehendatque omnes *tum plebejos*  
*tum*

(a) DCCLXIV. 4. (b) DCXLIX 5. (c) DCCXXIV. 5. (d) *Antiq. Rom.* l. 1. cap. 18. (e) *Ref. l. c.* (f) *pro Sul.* cap. 29. (g) *in Pis. c. 41.*

tum equites, hic vero populus primores plebis complectitur, tribus vilissimam turbam.

*Dat populus, dat gratus eques, dat ibura senatus,  
Et diant Latias tertia dona tribus (a).*

Jam vero illorum, qui plebeji genere erant, ulline nobiles? Placuit est, quam ut probatione indigeat. Quinam vero, mox dicam. Interim quærere libet, utrum & patriciorum aliqui ignobiles. Visum hoc Lipsio (b), quod tamen probari mihi non potest. Neque meæ me sententiæ pœnitebit unquam, cum præcipue iis inicitur rationibus, quibus viros doctissimos (c) assensus fuisse video.

Primum enim hoc certum puto, antequam plebejis via esset ad nobilitatem, nobilitatem ipsam ita fuisse patriciorum, ut nobilis non aliunde aliquis esset, nisi qui patricius, ideoque patricium neminem fuisse, qui simul non esset & nobilis. Sub initium enim libertatis cum duæ tantum familiæ honores reipublicæ delibassent, certe Vitellii, & Aquilii nobilissimi juvenes (d) dici non poterant, nisi quia patricii, pariterque hac sola de causa C. Mucius *adolescens nobilis* (e).

Sed Plebejus homo aperte affirmat, nobilitatem eorum omnium esse, qui patricii sint, hoc uno nomine, quia patricii, nulla habita alia generis, aut sanguinis ratione: (f) *hoc* (sermo est de promiscuis utriusque ordinis connubiis) *si polluit nobilitatem istam vestram, quam plerique non genere, nec sanguine, sed per cooptationem in patres habetis, aut a regibus cæli, aut post reges exactos jussu populi.* Cur autem postquam plebejis communicata nobilitas, patricii suam amitterent? Cum plebs alterum consulem ex suis fieri contenderet, non se patriciis nobilitatem adimere, sed eam participare velle dicebat: (g) *quippe ex illa die in plebem ventura omnia, quibus patricii excellant; imperium, atque honorem, gloriam belli, genus, nobilitatem, magna ipsis fruenda, majora posteris relinquenda.*

At poterant etiam patricii imagines non habere. Verum vel ad nobilitatem nunquam, vel semper illis sufficit ejus ostentare imaginem, eumque generis sui auctorem prodere, qui inter patres virtute sua vel a Romulo, vel a Tarquinio, vel ab alio quopiam, qui patrum numerum auxit, allectus fuerat.

Quid porro opus conjecturis? Etiam cum aliqui plebejorum nobiles essent, qui scilicet tribunatum militum consulari potestate erant consequuti, Livius *nobilitatem* pro universo patriciorum corpore usurpat. Certamen erat de altero consule ex plebe creando, ubi ait Histori-

(a) *Martial. l. 8. epig. 15.* (b) *eleph. l. 1. c. 29.* (c) *V. Calepinum editum a V. C. Jacobo Pacciolato Patavii 1718. v. Nobilit.* (d) *Liv. l. 1. c. 5.* (e) *id. l. 2. cap. 12.* (f) *id. l. 4. c. 4.* (g) *Liv. l. 6. c. 37.*



floricus: (a) *comitia consulum adversa nobilitate habita*, deinde paulo post: *Concessumque ab nobilitate plebi de consule plebejo: a plebe nobilitati de Prætoris uno, qui jus in urbe diceret, ex patribus creando*. Præterea alibi: (b) *non patientibus tacitum tribunis*, quod pro consule uno plebejo tres patricios magistratus curulibus sellis prætextatos tamquam consules sedentes nobilitas sibi sumpsisset.

Sed quo tempore patricii splendidiore habiti non sunt plebejis quantumvis nobilibus? Hos etiam illi contempserunt, quantum conjicio, & certamen matronarum in sacello Pudicitæ patriciæ (c) satis fortasse hoc probat, cum Virginiam Auli filiam patriciam nupram Volumnio consuli matronæ patriciæ, quod e patribus enupsisset, sacris arcuerunt. Sed dum timide videtur Cicero Sulpicio exprobrare, (d) cum sibi hoc sumere, ut, nisi quæ patriciæ sint, bono esse genere familiam nullam credat, puto convicii loco, & in Sulpicium, & in cæteros patricos voluisse illum ingerere. Hoc enim ægre tulisse plebejos nobiles, quod patricii suam pluris, quam plebejorum facerent nobilitatem, liquet ex alio Ciceronis loco, ubi Torquatum ita alloquitur: (e) *sed tamen te a me pro magnis causis nostræ necessitudinis monendum esse etiam atque etiam puto: non possunt omnes esse patricii, si verum queris, ne curant quidem, nec se aequales tui propter istam causam abs te anteciri putant*.

Addo etiam, nihil fuisse plebejis nobilibus, cur inter patricos legerentur, nisi hinc illustrior eorum nobilitas fieri potuisset, quod certe non accidisset, nisi patricius ordo & nobilis universus, & splendidior etiam fuisset nobilitate. Legimus autem apud Tacitum hæc: (f) *iiisdem diebus ascivit Cæsar (Claudius) vetustissimum quemque ex senatu, aut quibus clari parentes fuerant in numerum patriciorum*. Hoc vero quanti a Romanis fieret, colligi potest ex Gruterianis inscriptionibus, in quarum nonnullis inter præclarissimorum virorum titulos & id memoratur, quod lecti inter patricos. P. Cælius P. F. (g), P. Plautius Pulcher (h), Cn. Domitius Lucanus (i), recensitis aliis dignitatibus, honorumque titulis, lecti inter patricos dicuntur.

Neque enim credendum est illis collatam Patriciatus dignitatem, quæ multo est illis temporibus recentior. Ut enim hoc obiter dicam, quod & supra innui, instituere aliquando imperatores *Patricos* non ordine, non genere, sed dignitate, ita velut patres principis appellatos.

Siquis autem, ut contrarium evincat, objiciat, patricos etiam sæpe

(a) l. 6. cap. 42. (b) l. 7. cap. 1. (c) Liv. l. 10. cap. 23. (d) pro Mur. cap. 13. (e) pro Sul. cap. 23. (f) Ann. l. 11. c. 25. (g) CCCXXXIX. 6. (h) CCCCLII. 5. (i) CCCCIII. 1.

pe transiisse ad plebem, ita factum non ibo inficias; attamen hoc aliis de causis accidisse, ajo, quas hic non refert memorare, non autem ideo, ut splendidiorem gradum hac transiitione consequerentur. Patet eo, quod familiæ origine plebejæ, modo nominis saltem similitudine vulgo hoc pcessent probare, inter plebejasa patriciis transiisse, pleræque gloriabantur, non aliam sane ob causam, quam quod illi splendidior otigo, splendidiorque patriciorum nobilitas. Cicero aperte id asstmat: (a) *falsa genera, & ad plebem transiitiones, cum homines humiliores in alienum ejusdem nominis infunderentur genus.*

Propositum eo etiam firmo, quod ab auctoribus sæpe, cum plebejorum nobilitatem fit mentio, ea fit cum aliqua diminutione. Apud Livium: (b) *minor C. Licinio Stolo, illustri quidem viro tamen plebejo.* Cave autem, ne illustrem hic alio sensu accipias, quam pro nobili. Confertur enim Licinius cum Servio Sulpicio genere, non virtutibus, totaque historia illa sororum Fabiarum de genere maritorum est. Vere autem fuit nobilis Stolo, quippe qui C. illius Licinii Calvi omnium primi ex plebe tribuni militum consulari potestate ex Lucio filio nepos erat.

Sed si patriciorum aliqui non nobiles aliquando fuere, cum tamen iis ad nobilitatem per honores via interclusa non esset, nonnumquam apud auctores mentio incideret patricii alicujus novi. Novus enim, ut infra, vocabatur, qui primus nobilitatem sibi pareret, ac suis. Verum quamquam novos eorum aliquos dictos asstmat Sigonius (c), non tamen alios memorat, quam Scaurum, qui tantum abest, ut vere novus esset, ut *nobilissimus* dicatur Tullio, opponaturque Q. Pompejo vere homini novo: [d] *nec mihi unquam minus in Q. Pompejo novo homine, & fortissimo viro virtutis esse visum est, quam in homine nobilissimo M. Emilio.* Porro cum Tullius ait, [e] Scauro ad honores parandos *presidium fortunæ defuisse*, quomodo hoc dicat, dubitat etiam Asconius, [f] *cum Scaurus patricius fuerit, quæ generis claritas etiam inertes homines ad summos honores provexit.* Idem tamen quæstionem solvit, ita loquutum Ciceronem affirmans, quod *tribus supra bene Scaurum ætatibus jauerat domus ejus fortuna.* Quemadmodum igitur, ut supra docuimus, in *sum* (novorum) locum aggregare, ait Tullius, [g] *Sulpicium*, ita & Scaurum aggregare poterat. Utrique enim quamvis nobili ob intermortuam familiæ gloriam æque, ac novis laborandum fuit ad parandos honores, quæ una est ratio, propter quam patricii aliquando novi videri potuerint.

Sed

---

(a) *Brut. c. 62.* (b) *l. 6. c. 34.* (c) *Emend. l. 2.* (d) *pro Mur. c. 16.* (e) *pro Scaur.*  
(f) *in orat. pro Scauro* (g) *pro Mur. c. 16.*

Sed tandem hoc addo, quoties patriciorum, plebejorumque mentio fit, nunquam in patriciis nobilitatis discrimen notari, secus vero in plebejis, quod sane probat, eos omnes fuisse nobiles, horum quosdam tantummodo. Livius: (a) *tribus patriciis petentibus P. Cornelio Merenda, L. Manlio Volsone, M. Emilio Lepido, duobus nobilibus jam familiarum plebei C. Atilio Serrano, & Q. Alio Pato*. Citatus Alconius: (b) *sex competitores in consulatus petitione Cicero habuit, duos patricios P. Sulpicium Galbam, L. Sergium Catilinam: quatuor plebejos, ex quibus duo nobiles, C. Antonium M. Antonii oratoris filium, L. Cassium Longinum*. Neque vero audiendi essent, qui dicerent, hoc ideo fieri, quia patricii amissa nobilitate plebejis annumerabantur, postquam diutius caruisset honoribus familia. Primum enim hoc supra rejecimus, deinde hoc non probaret eorum, qui vere patricii haberentur, ac dicerentur, aliquos fuisse ignobiles, imo contrarium hinc conficeretur, scilicet non potuisse patricios amittere nobilitatem, nisi simul & esse patricii desissent. Omnes ergo patricii nobiles semper fuere.

At Ancus, qui patricio patre ortus, dicitur *nobilis una imagine Numa* (c). Illic vero quaeritur nobilitas, quæ regno Romanorum dignos faceret, qualis superbissimæ fæminæ patriciorum nobilitas visa non fuit.

Fortasse aliquibus majorem possent suspicionem movere Macrobii verba, ex quibus colligi videtur discrimen fuisse inter patricios, eosque propriis usos insignibus, quorum majores magistratum curulem gessissent. Ita ille: (d) *Alii putant, eundem Priscum, cum is statum civium solertia providi principis ordinaret, cultum quoque ingenuorum puerorum inter præcipua duxisse, instituisseque, ut patricii bulla aurea cum toga, cui purpura prætextitur, uterentur; dumtaxat illi, quorum patres curulem gesserant magistratum. Cæteris autem, ut prætexta tantum uterentur, indultum: sed usque ad eos, quorum parentes equo stipendia justa meruissent*. Verum mihi crucem nunquam figet hoc Macrobii testimonium, cum hic omnia oscitanter aliunde congesta inveniantur. Alii ostendam prætextam, & bullam plurimis aliis gestata, præter patricios: hic autem quaeso, quem patricii magistratum curulem gere-re poterant sub regibus? consulatumne, præturam, ædilitatem? An aliquis sella curuli sedebat præter regem? Nescio, an ulli hoc dici possit, cum Livius inter regia insignia & sellam curulem recenscat, ubi illa omnia ab Etruscis sumpta, sibi persuasum affirmat. (f) *Me- haud penites eorum sententiæ esse, quibus & apparitores, & hoc genus ab*

H

Etru-

(a) l. 22. c. 35. (b) in or. cont. Comp. (c) Liv. l. 1. c. 34. (d) Saturn. l. 1. cap. 6.  
(e) l. 1. c. 8.

*Etruria finitima, unde sella curulis, unde toga praetexta sumpta est, numerum quoque ipsum sumptum places.* Qui primi civium sella curuli sedere, hi regibus exadis consules fuere, qui, eodem historico teste, (a) omnia jura, omnia insignia regia primi tenere, ideoque praetura, ac aedilitate institutis non patiebantur tacitum tribuni, ut idem ait (b), tres patricios magistratus curulibus sellis praetextatos tamquam consules sedentes. Hinc apparet, quae fides haberi Macrobio possit, cum a Tarquinio Prisco quinto Romanorum rege propriis insignibus donatos asserit patricios, quorum patres curulem gesserant magistratum. Porro cum planum factum sit, patricios omnes nobiles fuisse, addo etiam, quod hinc satis constare puto, nobilitatem statim eum consequutum, qui e plebeis inter patricios lectus fuisset. Licet enim, qui civitate Romana donabantur, plebeji omnes essent, non pauci tamen fuere, qui inter patricios a regibus primum, deinde lege lata ad populum, tandem ab imperatoribus transducti sunt.

Quapropter non mirari non possum; quod sint aliqui hac nostra aetate, qui contendant, satis id non esse, ut dicatur aliquis nobilitatem adeptus, quod cum Princeps in numerum nobilium aggreget, & esse nobilem patentibus litteris, vel alia sanciat ratione. Sicut enim veterum Romanorum exemplo nobilitari eos concedimus (quamquam ne hoc quidem concoquere aliqui sciant) quibus Princeps amplissimos magistratus, & dignitates confert; ita eorum exemplo concedendum mihi videtur, illos quoque nobilitari, quos Princeps ex more, ac reipublicae legibus nobiles vocat. Si enim hoc sibi sumpserunt juris, quicumque Romae imperarunt, ut quem vellent esse patricium, is patricius, ideoque nobilis continuo esset; cur nunc etiam Principes hoc sibi non sumant, ut continuo nobilis sit, quem esse nobilem jubent? Dederunt hoc prisca saecula imperatoribus suis, ut natales possent restituere, quod ne ad jurisperitos abeamus, satis patet ex quadam ad Trajanum pliniana epistola (c), ut nimirum libertis maculam servitutis perinde abstergerent, ac si ingenui nati essent: hoc nos quoque Principibus damus, quin etiam nobilibus primi fastigii quamplurimis, ut natales spuris, & nothis restituant; id vero illis negabimus esse juris, ut ignoti quantumvis, & obscuri hominis natales honestent, ac nobilitent? *Non genere, non sanguine, sed per cooptationem in patres*, ut ille aiebat (d), habebant nobilitatem Romanorum nonnulli, habeant eandem nostris quoque temporibus illi, qui a Principibus in eum leguntur ordinem, qui nobilium est, sive hi patricii, sive Comites, sive nobiles tantummodo, aut alio

(a) l. 6. c. 1. (b) l. 7. c. 1. (c) l. 10. ep. 77. (d) Liv. l. 4. c. 4.

alio quovis nominæ pro regionum, ac rerum publicarum diversitate appellentur: Quicquid enim alii dicant, cum instituti mei non sit pluribus hoc confirmare, Cæsaris primum, ut Plinius ait (a), deinde omnium Principum esse puto, ut *nobiles & conservent, & efficiant*.

## C A P U T XIII.

## De Plebejorum nobilitate. Novi qui?

**D**E Plebejis, qui plebeji *ordine & jure* erant, verba facienda non sunt. In hunc enim ordinem redigebantur patricii etiam, ideoque nobiles, cum nec senatores erant, neque ob paupertatem equo merere poterant. Ita plebejus erat ordine, quamquam patricius genere, ac propterea uobilis, ille L. Tarquitijs, quem Livius ait (b), *stipendia pedibus propter paupertatem secisse*.

De Plebejis genere igitur est nobis sermo, quos a patriciis *natura* ipsa discreverat. Antequam pateret plebi ad magistratus curules via, nobilitas patriciorum solummodo fuit, quæ deinde plebejis quoque per magistratus curules communicata. Cum primum enim utrisque promiscui facti sunt curules magistratus, in plebem statim, quod futurum ille aiebat (c), venerunt omnia, quibus patricii excellebant, *imperium, honor, gloria belli, genus, nobilitas*. A curuli enim magistratu jus sumebant plebeji ponendæ imaginis, quod nobilium dumtaxat esse voluerunt. Itaque Tullius se ait, *ob adilitatem* (d) *adeptum jus imaginis ad memoriam, posteritatemque prodendæ*. Certum propterea apud omnes est, plebejorum eos fuisse nobiles, quorum majores sella curuli sedissent.

Sed priusquam etiam aditus esset plebi ad curules magistratus, aliud quod erat inter plebejos generis discrimen, ut si minus nobiles, ac certe *boni bonis prognati*, quemadmodum civis illa Attica (e), & haberetur aliqui, & vocarentur. Non alia de causa Livius Icilius appellat (f) *generosos, ut inter plebejos*. Hujus ordinis quin fuerint, non dubito, quos *primores plebis, & principes plebis* vocat idem Historicus. Nondum tamen hi nobiles, siquidem Livius a nobilibus distinguit: *primores* (g) *plebis nobilium amici*, atque ad nobilium honores, hoc est ad curules magistratus aspirantes describit, *principes plebis* (h) *jamdudum necquicquam imminentes spei majoris honoris*. Ad eam autem, quæ eorum esse poterat, nominis præstantiam e plebeculæ sordibus illos præcipue

H 2

cipue

(a) paneg. c. 69. (b) l. 3. c. 27. (c) Liv. l. 6. c. 37. (d) in Ferr. l. 5. c. 36.  
(e) Terent. Phorm. act. 1. 5. 2. (f) l. 4. cap. 54. (g) l. 4. cap. 60. (h) l. 4. cap. 25.

cipue emeruisse crediderim, qui minores, & plebejos magistratus, & præsertim tribunatum plebis gessissent. Sicut enim hinc sua plebejorum *novitas*, ita hinc & suæ eorum *nobilitas*. Tribunorum sanguinem Ichios, appellat Livius *generosos*, ut inter plebejos, & tribunos idem *homines novos*: facile homines novos (a) *auctoritate principum de sententia deduci*. Eos etiam qui consequuti primum quæsturam fuere, *novos* pariter dicit: (b) *patefactus ad consulatum, & triumphos locus novis hominibus videbatur*.

Verum postquam inveſta fuit in plebem per magistratus curules vera nobilitas, flocci fieri cæpit quæcumque ulli eſſet generis & natalium bonitas, ipſique e plebe nobiles iisdem ac patricii ſacris initiati (c) *contemnere plebem, ex quo contemni deſierant a patribus, cæpere*. Itaque ille jam tantummodo *novus* dictus, qui primus in familiam magistratum curulem attuliſſet, quo ſolum familia, ac poſteri nobilitari poterant. A *novis* autem qui propagabantur, ii nobiles erant. Ita Cicero pater, ut ipſe ſe appellat, homo *novus*, Cicero filius nobilis fuit. Utrumque, quamquam apud omnes in conſeſſo eſt, firmo uno Livii loco: (d) *nec finem ante belli habituros, quam conſulem vere plebejum, ideſt hominem novum feciſſent*. Nam plebejos nobiles iisdem initiatos eſſe ſacris, & contemnere plebem, ex quo contemni deſierint a patribus, cepiſſe. Advertendum tamen, quod iis, quorum parentes primi magistratus geſſerant, huicque nobilitatis initio proximi nimium erant, tam obſcura, utpote nimium recens, nobilitas erat, ut quamvis novi dici non poſſent, timide tamen nobiles dicerentur: Colligitur hoc ex Pediano, qui huiusmodi homines a nobilibus diſtinguit: (e) *ſex competitores in conſulatus petitione Cicero habuit, duos patricios P. Sulpicium Galbam, L. Sergium Catilinam: quatuor plebejos, ex quibus duo nobiles, C. Antonium M. Antonii oratoris filium, L. Caſſium Longinum, duos qui tantum non primi ex familiis ſuis magistratum adepti erant, Q. Cornificium, & C. Licinium Sacerdotem*.

Est & alia novi hominis acceptio, ut putat Sigonius, cujus hæc sunt (f): *Novus homo apud Livium dicitur & is, qui magistratum cepit, quem non antea geſſit, & qui primus ex familia curulem magistratum cepit*. Hoc ſecundum in conſeſſo eſt apud omnes: priori autem ſignificatione *novum* dictum a Livio, Sigonius putat hoc ſingulari loco, quem ita legit, cum depravatum inveniſſet: (g) *nec cuiquam eorum præter Terentium conſulem erat mandatus honos, quem non jam antea geſſiſſet, præteritis aliquot fortibus, ac ſtrenuis viris, quia in tali tempore nul-*

(a) l. 4. c. 48. (b) l. 4. c. 34. (c) l. 22. c. 34. (d) l. 22. c. 34. (e) in orat. contr. Compet. (f) ad Liv. l. 22. c. 35. (g) Liv. l. 6.

nullus novis magistratus videbatur mandandus. Verum parum feliciter, ut alia multa, hunc locum emendasse Sigonium, arbitror, eo maxime, quod emendatio tota nititur hac nova novi hominis acceptione, quæ nemini ante ipsum cognita, quamque comminisci opus non fuisset, si ita legisset, ut postea Gronovius (a): *nulli novus magistratus videbatur mandandus. Novus* igitur dictus ille est tantummodo, qui primus e sua familia magistratum cepisset.

## C A P U T XIV.

*An equites Romani nobiles?*

Postquam vidimus, patricios omnes nobiles fuisse, nobiles etiam nonnullos ex plebe, non esset, cur quæreremus alia de equitibus, nisi huc nos aliquis vocasset. Divisio enim equitum non naturæ est, sed juris, ac sicut in infimo civium ordine, hoc est plebejo, multi erant non nobiles dumtaxat, sed patricii, ita etiam in secundo, seu equestri. Equites enim ex censu lecti, non ex genere, ideoque equitum patricii alii, alii plebeji, nobiles item alii, alii ignobiles. Hæc certa adeo sunt, ut non mirari non possim, quod Tiraquello in mentem venerit id quærere, (b) utrum equites Romani nobiles fuerint, quodque id ipsum satis illi probabile fuerit visum. Quid enim refert, quod Hirtius dicat: *cecidere eo prælio, splendidi & illustres viri nonnulli equites Romani*, quod Plinius junior: (c) *Seriorum Severum prætorium virum, aliosque equites Romanos splendidos*, quod idem alibi: (d) *Robustum splendidum equitem Romanum*, quod Cicero: (e) *rogatum a C. Plotio equite Romano splendido, Nursino*, quod idem etiam, potuit enim hoc quoque Tiraquellus adjicere: (f) *equitibus Romanis honestissimis viris offeruntur ex Asia quotidie litteræ*. Ut enim hoc dem Tiraquello, his, & hujusmodi aliis epithetis nobilitatem semper, & nihil aliud significari; hæc omnia aliaque multa, quæ afferri possent, testimonia aliud non evincunt, quam qui ita appellantur, fuisse nobiles, nequaquam vero universum equitum ordinem ex solis nobilibus constitisse.

Rem satis per se claram ut alicujus tamen auctoritate illustremus; eques Romanus M. Tullius equitibus Romanis nobiles ex adverso ponit (g): *equitum Romanorum in homines nobilissimos maledicta*. Adde ex eadem oratione pro Plancio plura, quæ probant, proximos quidem nobi-

(a) ad Liv. l. c. (b) cap. 37. num. 164. (c) l. 5. epist. 1. (d) l. 6. epist. 25.  
(e) Fin. 2. cap. 38. (f) pro leg. Man. cap. 4. (g) pro Planc. cap. 33.

nobilium fastigio equites fuisse, non illud tamen tenuisse. *Hic* (a) familia consulari est, ille prætoriam, reliquos video esse equestri loco: *cedat* consulari generi prætorium, nec contendant cum prætorio equester locus. Si quod (b) equitis Romani filius est, inferior esse debuit, omnes secum equitum Romanorum filii petiverunt. Cum vero qui nobilitati favebant (c), fecisse ædilem Latorensem, cæteros non item dicat; clare ostendit, Laterensem, cujus nomen utraque familia consulari, nobilem fuisse, non item Plancium, licet ea vetustate (d) equestris ordinis, ut pater, ut avus, ut majores ejus omnes equites Romani fuerint. Hæc de aliis Tullius; de Tullio autem poeta (e)

*Hic novus Arpinas ignobilis, & modo Romæ*

*Municipalis eques.*

Converso civitatis statu tantum splendoris sub Imperatoribus accessit equestri ordini, ut Tranquillus, & Tacitus *equestre fastigium* (f), *summum equestrem gradum* (g), *ordines amplissimos* (h), senatorium scilicet, & equestrem vocent, equitesque illustres, insignes, splendidos, motos passim memorent. Si unquam enim, tunc nobilibus ille ordo abundabat. Namque scimus Julium Cæsarem, (i) quum ordo equester diminutus esset, ex omni suo, etiam extra Italiam, imperio multos affinitatibus, & opibus primarios accersitos in eum allegisse. Quod idem præstitit Vespasianus, qui (k) *amplissimos ordines, exhaustos cæde varia, & contaminatos veteri negligentia purgavit, supplavitque recensito senatu, & equite, submotis indignissimis, & honestissimo quoque Italicorum, ac provincialium allecto*. Præterea & qui ignobiles erant, imo & libertini, ac liberti, & muneribus, quæ illis mandabantur a Principe, & opibus, quas illinc constabant, non nobilitabantur dumtaxat, sed auctoritate etiam senatoribus præstabant sæpius. Hæc habemus de L. Vestino; (l) *Curam restituendi Capitoli in L. Vestinum confert equestris ordinis virum, sed auctoritate famaque inter proceres*. Erant autem hæc munera præcipue præfectura prætorii ab Augusto usque, deinde procurationes principis, neque illæ solum, quibus loco præsidum provinciis præesse juebantur, de quibus Lipsium consule ad Tacitum (m), sed etiam quæ privatis principum negotiis agitandis institutæ erant. Hinc præter immensas opes exuisse etiam equitum nobilitatem Tacitus aperte affirmat loco alibi citato: (n) *utrumque avum procuratorem Cæsarum habuit, quæ equestris nobilitas est*. Pater Pompejæ Macrinæ certe dicitur ab eodem Tacito, eques illustris: (o) *etiam in Pompejam Macrinam exilium sta-*

tni-

(a) c. 15. (b) c. 17. (c) c. 18. (d) c. 32. (e) *Juven. sat. 8.* (f) *Tac. ann. 4. c. 40.* (g) *Suet. Gall. c. 14.* (h) *Id. Vespas. c. 9.* (i) *Dio. l. 43.* (k) *Suet. Vespas. c. 9.* (l) *Tacit. ann. l. 4. c. 53.* (m) *ad l. 12. Exc. B.* (n) *Agric. c. 4.* (o) *ann. l. 6. c. 18.*



tuitur. Pater quoque illustris eques Romanus, ac frater prætorius, cum damnatio instaret, se ipsi interfecere. At unde hic libertini generis homo continuo nobilis, & illustris? nempe M. Pompejo Theophane genitus, qui, ut ex Strabone (a), Asiæ procurator sub Tiberio, cui ex intimis amicis, fuerat. Ut omnia magis eluceant, accipe horum Pompejorum stemma.

Theophanes Mitylenæus Pompeii libertus.

M. Pompejus Theophanes Asiæ procurator.

Pompejus Theophanes eques illustris.

Pompeja Macrina. Pompejus Theophanes prætorius.

Idem manifestius fit adhuc his, quæ de duobus equitibus Romanis leguntur: (b) *Mella*, & *Crispinus equites Romani dignitate senatoria*. Lipsius hic optime: non enim revera senatores, sed opibus, & splendore cuivis senatorum pares. At unde opes, & splendor? Nam hic (Crispinus) quondam præfectus prætorii, & consularibus insignibus donatus: *Mella*, quibus Gallio, & Seneca parentibus natus, petitione bonorum abstinuerat per ambitionem præposteram, ut eques Romanus consularibus potentia equaretur, simul acquirendæ pecuniæ brevius iter credebat per procuraciones administrandis principis negotiis. Quare constat, neque prisca, neque recentiori republica ulli nobilitatem fuisse, eo quod ordine esset equestri, in quem non ignobiles solum cives, sed libertini, ac liberti beneficio principis, converso statu civitatis, affecti sunt; verum inter equites multos fuisse nobiles, vel ob antiquam majorum dignitatem, vel muneribus nobilitatos, quibus præficiabantur a Principe.

Sed Tiraquellum hominem Gallum proculdubio decepit vernacula loquendi consuetudo, qua modo Galli, Hispani, Itali viros nobilissimo loco natos *Equites* dicimus, unde etiam non dubitavit asserere, (c) Romanorum equitum velut vestigia esse, quos *militēs auratos*, aut *equites torquatos* dicimus, quæ falsissima, imo & ridicula puto. Hinc tamen deceptus certe & Hispanus quidam, qui quæstionem

in-

(a) l. 13. (b) Tac. ann. 16, c. 17. (c) l. 2.

instituens, utrum apud Romanos nobilior esset annulus in digito, an luna in calceis: (a) annulus, ait, maximum dignitatis, sive nobilitatis argumentum apud Romanos passim, insigne ordinis equestris. Sed cum annulus ordinis equestris insigne fuerit, nullum fuit nobilitatis argumentum, neque cum calceorum lunulis conferendus, quæ vere nobilitatem arguebant, ut mox ostendam.

## C A P U T X V.

*An antiquis gentilitia insignia? Stemma quid?*

**Q**Uoniam eo deveni, ut agendum sit de nobilium insignibus, investigare libet, utrum apud antiquos ea fuerint singulis nobilium familiis insignia propria ad eam rationem, qua nostris temporibus usurpamus, quæque gentilitia insignia, seu arma vocamus, ideo fortasse non inepte, ut ait Tiraquellus, (b) quoniam plerumque hæc insignia in armis insculpi, & antiquis, & nostris temporibus solebant. Hoc idem auctor affirmat illo Ovidii testimonio: (c)

*Sumpserat ignara Theseus data pocula dextra,*

*Cum pater in capulo gladii conspexit eburno*

*Signa sui generis —*

Sed & Aventinus apud Maronem (d)

*— clypeoque insigne paternum*

*Centum angues, cinctamque gerit serpentibus hydram.*

Turnus etiam, cui, (e)

*— si prima domus repetatur origo,*

*Inachus, Acrisiusque patres, mediaque Mycenæ,*

clypeum gestabat, quem (f)

*— sublati Cornibus Io*

*Auro insignibat jam setis obsita, jam bor:*

Addi poterat & Senecæ (g) Hyppolitus, in cujus ense

*Regale parvis asperum signis ebur*

*Capulo refulget, gentis Aibæ decus.*

Accedat Svidæ auctoritas asserentis, apud Thebanos, qui σφαῖρῶν progenies essent, eorum clypeo solitum insculpi draconem. Neque spernendus alius Virgilio locus, qui ideo videri potest, Helenori illi Mæonii Regis notho puram, & nullis imaginibus insignitam parmam dedisse, quia furtivo concubitu ex serva editus paternam ori-

(a) *Mendoza, Virid. erud. l. 15. probl. 76.* (b) *c. 6. n. 19.* (c) *Metam. 7.* (d) *Æn. 2.* (e) *ibid.* (f) *ibid.* (g) *Hyp. a. 3. sc. 2.*

originem iactare non poterat, & quasi servilis generis habebatur :  
(a)

— quorum primævus Helenor,  
Meonio regi quem serva Lycimnia furtim  
Sustulerat, vestitisque ad Trojam miserat armis :  
Ense levis nudo, parmaque inglorius alba.

Hæc vero, & alia poetarum testimonia levem fidem mereri, si heroica tempora respiciamus, fatetur Silvester Petrasanta, (b) *quoniam dicere quis posset isthæc fingi a poetis ad commendationem ævi sui, atque antiquitati consecrari recens inventum*. Eadem tamen propterea, inquam ego, rem valde suspiciosam facere possunt, si ad illa tempora referantur, quibus poetæ scripsere, sæpissime adumbrata ab illis, & præcipue a Marone, qui omnis, quæ apud Romanos obtinebat, consuetudinis vestigia quædam illis etiam Heroum temporibus ostendit, ut tacite significet ab illis ad Romanos deductam. Sed hæc mera nugamenta mihi erunt, donec validius aliquid afferatur. Quod autem insuper affert Tiraquellus ex Svetonio: (c) *cetera familiarum insignia nobilissimo cuique ademit, Torquato torquem, Cincinnato crinem*, nihil omnino ad rem. Hæc enim insignia non ejus rationis erant, de quibus quærimus. Torques enim collo circumdabatur Torquatis, ut clarum ex nummis, non clypeo insculpebatur: cirros etiam deferebant Cincinnati, non clypeo insculpebant, quod licet ad majorum suorum morem, eorumque memoriam facerent, non magis gentis insignia erant illa, quam Cethegorum brachium exertum.

Illos, qui has inanias captant, mirum etiam non affirmasse, in usu quoque antiquis fuisse & litteras signare, & monetam cudere gentilitiis symbolis, ut nostro ævo faciunt viri principes, quibus ejus cudendæ jus. Affert Fulvius Ursinus (d) Sullæ denarium traditione Jugurthæ signatum, quam & annulo signatorio scalptam habuisse, Plinius tradit (e). Innuere alterum morem, videtur etiam Plautus (f):

*Sed epistolas quando obsignatas afferet,  
Siquidem obsignatas attuleris epistolas,  
Nonne arbitraris eum adolescentem annuli  
Paterni signum novisse?*

Verum hæc, aliaque plurima, quæ hic referri possent, nullius unquam roboris erunt. Nemo enim hoc evincet, proprium, perpetuum,

I

tuum,

(a) *Æn.* 9. (b) *Tesser. gentil.* c. 3. (c) *Cal.* c. 35. (d) *Fam. Rom.* (e) *l.* 37. c. 1.  
(f) *Terent.* a. 3 sc. 3.

tuum, & tanquam hæreditario jure a majoribus transmissum morem singulis gentibus, & familiis fuisse, ut iisdem gentiles omnes insignibus clypeos, aliave arma ornarent, litteras signarent, ac nummos. Arma ornasse, annulo signatorio usos esse, denariis symbolum aliquod excudisse, nequaquam diffiteor, his etiam aliquando gentium, & familiarum originem, quamquam sæpius propria facta, significasse, ut cum idem Sulla Sibylla denarium alium signavit, quo ostenderet, ut explicat Urfinus [a], cognomen a Sibylla familiæ suæ factum, ex cujus libris ludi apollinares primum sunt instituti suadente Cornelio Rufo Decemviro, qui propterea Sibylla primum, postea Sulla dictus. Verum hæc singuli pro arbitrio variare soliti fuere: nihil apud omnes certum, ac ne apud singulos quidem, cum id liberet.

Si enim par videtur ratio de cæteris, ac de annulis sigillaribus, illud argumento est, singulos pluribus aliquando usos, quod majoris fidei gratiæ, quo annulo, & imagine litteras signaverant, amicis significabant. Hinc Plinius: [b] *signata est annulo meo, cujus est apophragisma quadriga*: Præterea ut intelligas, id nihil ad posteros pertinuisse, constat quidem, Julium Cæsarem annulo usum cum imagine Veneris Victricis, a qua per Æneam genus trahere gloriabatur. Verum Augustus hac, quæ videri poterat propria Juliæ gentis tessera, minime est usus, qui primo sphingen, dein Alexandri imaginem, tandem suam adhibuit. Qui autem Augustum sequuti sunt Principes, quidam Augusti ipsius, quidam suomet vultu, quidam alia imagine pro libito signarunt. Adi Abrahami Goriæ in *Dactylisbecam suam Præloquium*, si plura de his quæris. Fateor equidem, in Macrianorum familia tam viris, quam sæminis Alexandri imaginem cum alibi, tum maxime in annulis semper gestatam, quemadmodum Trebellius Pollio, non vero Spartianus, ut habet Leonardus Augustinus [c], refert. Hoc tamen in more apud ipsos fuit, non quod hoc esset ejus familiæ symbolum, verum quia illa imagine juvari in negotiis, consiliisque, qui eam ferret, persuasum erat. Clarum ex Pollione: [d] *quod idcirco posui, quia dicuntur juvari in omni actu suo, qui Alexandrum expressum auro gestitans, vel argento*.

Propterea hi quoque, qui ferendorum insignium morem a vetustissimis sæculis, & a priscis Romanis repetunt, hunc non ab illis, quæ antiqui ferebant, insignibus fluxisse asserunt, sed a vestium ornatu [e]. Hæc autem sententia minime absurda videri fortasse potest,

[a] l.c. [b] *l. 10. epist. 16.* [c] *Dissert. de Gem. Antig.* [d] in *Quiet.* [e] *Petrusant. c. 10.*

test, siquidem nostra, ut nunc usus habet, insignia non tam rebus, quam coloribus constant, quibus & clypeorum aræ, & symbolorum imagines distingui solent, ut harum rerum periti ajunt [a], ideoque heraldicæ artis illud circumfertur tamquam præcipuum axioma, ne color color, aut metallo metallum superaddatur. Id tamen si quis etiam animadvertat, illi forte magis probabitur aliorum sententia, qui a vestium quidem ornatu nostrum hunc morem deducunt, verum non eo, qui a prisca Romanis repetendus sit, sed quo multis post sæculis induebantur viri nobiles in hastiludiis, seu torneamentis, ut vocant.

Cæterum mihi præ omnibus arridet Velferi opinio [b], quam Hoepingius etiam amplectitur [c], ferendorum insignium morem natura duce, ejusque instinctu inventum, arbitrantis. Hoc satis probabile fit tot illis exemplis, quibus docemur, clypeos cum imaginibus vel ab heroicis temporibus in usu fuisse. Verum hinc nihil contra sententiam nostram conficitur. Neque enim ideo colligi potest, Romanorum, totiusque ante eos antiquitatis insignia certa, perpetua, genti cuique, & familiæ propria, ordinis jure, principum favore usurpata, iisque circumscripta legibus fuisse, quibus heraldica ars nostris temporibus innititur. Insignia igitur sua antiquis fuisse ad cuiusque arbitrium: nostra nobis sunt ad earum legum normam, quas ipsi condidimus nullo antiquitatis exemplo præcunte. Optime ad hanc rem Velfer: [d] hæc (antiquorum insignia) ad unum aliquod idem præscriptum cum nostri ævi insignibus non exigenda sunt: falluntur admodum, qui exigunt, & res, quas ex eodem fonte naturæ parentis instinctu hausas fatemur, sed alio, atque alio ritu, pro ut temporum ferebant consuetudines, constitutas fuisse videmus, imperite confundunt. Quin leges, quæ bodie opinione, an certo jure insignia circumscribunt, ut antiquissima sint, Carolam Magnum non prævertunt, a quo primum adumbratas, sub Henrico demum Aucepe, & posteris perpolitæ arbitror. Sed multo recentius initium his nostris gentilitiis insignibus tribuit Papebrochius [e], quippe quæ putat ex probatorum auctororum conjecturis tandem sæculo decimo tertio inventa, qualia nunc consuetudo habet, fuisse.

Sed Tiraquellus, dum antiquitati deberi gentilitia hæc, seu familiaria insignia, contendit, eo lapsus est, ut stemmatis nomine putaret ea apud antiquos significata. Stemma, ait, [f] quasi στεφάνωμα, nam & hæc insignia gentilitia, ut & nunc quoque videmus, infigi

[a] Velfer. rer. Aug. vind. l. 4. [b] l. c. [c] de jur. Insign. c. 3. [d] l. c. [e] Tam. 4. Maii pag. 12. [f] c. 6. n. 14.

*depingique solebant in medio coronæ ex multis floribus composita*. *Stemma* quidem quasi *στέμμα* omnes interpretantur, sed *stemma* pro gentilitiis insignibus nemo adhuc, qui quidem latine sciret, usurpavit. Falsus circa *stemma* & alius magni nominis jurisconsultus Alciatus, (a) dum credit idem proprie esse, ac imaginem, quod tamen dum putat, satis acute *schema* ubique legendum apud auctores suspicatur pro *stemma*. Sed quamvis *stemma* proprie imaginem non significet, aliquid tamen significat, quod proprie ad imagines pertinebat, propterea & pro ipsis imaginibus aliquando, & sicut ipsæ imagines, ita & *stemma* sumitur pro nobilitate.

*Stemmata quid faciunt?* (b)

*Stemmata materno felix.* (c)

Erat autem *stemma* corona quædam, seu circulus, quo inclusæ imagines pictæ inter se jungebantur lineis ad earum singulas discurrentibus. Docet hoc Plinius: (d) *stemma* vero lineis discurrerent ad imagines pictas. Has lineas, quibus *stemma*, ideoque imagines illis inclusæ inter se jungebantur, vocat Seneca *flexuras*: (e) nomina familie longo ordine, ac multis *steminatum* illigata flexuris in parte prima adium collocant. Ramos vocat Persius: (f)

*Stemmata, quod Tusco ramum millefimo ducis.*

Itaque *stemma* pro serie illa imaginum inter se junctarum ab auctoribus sumitur: Cassiodorus, (g) *stemma* longo dixit, hoc est longa serie imaginum. Sed clarius Svetonius: (h) *imperator* vero etiam *stemma* in atrio proposuit, quo paternam originem ad Jovem, matrem ad Pasiphaen Minos uxorem referret. Optime propterea recentioribus *stemma* significat arborem genealogicam, quam vocant, ubi videmus, nomina, aliquando & effigies majorum omnium circulis inclusas, lineisque discurrentibus inter se junctas.

CA.

(a) *Parerg. jur. lib. 2. cap. 30.* (b) *Juven. sat. 8.* (c) *Stat. lib. 4. syl. 4.*  
(d) *lib. 35. cap. 2.* (e) *de Ben. lib. 3. cap. 28.* (f) *Sat. 3.* (g) *Variar. l. 3. epist. 6.*  
(h) *Galb. cap. 2.*

## CAPUT XVI.

*Imagines in atrio : earum usus : paternæ , & maternæ : aliorum etiam præterquam illorum , qui magistratus curules gesserant .*

**D**icendum jam est de imaginibus , quæ non signum solum , sed potissimum ac luculentissimum nobilitatis signum fuere . *Est autem imago* inquit Polybius (a) , *cujus verba toto hoc capite ex Isaaci Caulaboni versione dabo , vultus similitudo , quam accuratissime expressa tum deformatione figuræ , tum & pigmentis .* Ut igitur aliquis in gente , aut familia claruerat , eo mortuo simulacrum ejus , solo tamen vultu , quam fieri poterat viventi simile , a posteris excitabatur , servabaturque , appposito nomine , titulisque , quibus inclaruerat . Has autem imagines e cera fuisse præter Juvenalis testimonium , qui *veteras ceras* (b) pro imaginibus dixit , ex Plinio etiam certum : (c) *expressi cera vultus* . Nomen autem , & dignitatem , gestorumque honorum titulos apponi solitos , & infra certum fiet auditorum locis , quos ad aliud probandum citabimus , & satis interea firmatur hoc Livii testimonio (d) : *cujus imaginis titulo consulatus , censuraque , & triumphus æquo animo legetur , si auguratum , aut pontificatum adjeceris , non sustinebunt legentium oculi ?*

Servabantur autem imagines in celeberrima ædium parte , ut Polybius (e) , hoc est in atrio , ut aperte indicant auctores .

*Tota licet veteres exornent atria cera* (f) :

Seneca : (g) *atrium plenum fumosis imaginibus* . Neque ullum decipiat , quod habet Tacitus : (h) *in vestibulo effigiem patris Silii demonstrat* . Procul dubio enim hic Historicus *vestibulum* pro atrio sumit , quod aliis scriptoribus Latinis aliquando usitatum , etiam postquam vestibulum ab atrio quid erat diversum , unde A. Gellius : (i) *animadverti , quosdam haud indoctos viros pinari , vestibulum esse partem domus priorum , quam vulgus atrium vocat* . Sed manifestum est , vestibulum ibi a Tacito pro atrio sumi , quod illam effigiem non demonstratam ait , nisi patefactæ domo . *Vestibulum* enim proprie dictum ante ædes erat , ut ex Macrobio clarum (k) , intra ædes *atrium* , quo ut perveniretur , fores recludi oportebat : *patefieri* (l) *domum adulteri , atque illuc deduci imperatorem jubet , ac primum in vestibulo effigiem patris Silii consilio senatus abolitam demonstrat* .

Ser-

(a) lib. 6. (b) Sat. 8. (c) l. 35. c. 2. (d) l. 10. c. 7. (e) l. c. (f) *suorum. sat. 8.*  
(g) *epist. 44.* (h) *Ann. l. 12. c. 35.* (i) l. 16. c. 5. (k) *Satur. l. 6. c. 8.* (l) *Tac. h. c.*

Servabantur porro cereæ imagines in armariis, ut ex Plinio: (a) *expressi cera vultus singulis disponebantur armariis*. Polybius etiam: (b) *imaginem defuncti in celeberrima adium parte ponunt*, lignea quadam ædicula circumtectam. Verum quoniam non tam frequenter hæc patebant armaria, neque cereæ imagines proferebantur; extrinsecus, quæ intus latebant, armariorum postibus, seu thecis illis ac ædiculis ligneis depictæ erant, discurrentibusque lineis inter se jungebantur, hæque sunt, quas *stemmatis* inclusas fuisse superiori capite diximus. Plinius: (c) *expressi cera vultus singulis disponebantur armariis*. *Stemmata vero lineis discurrerant ad imagines pictas*.

Causa servandarum imaginum videri potuit ad ostentationem nobilitatis; tamquam illæ essent generis, ac nominis, ut Tullius vocat, (d) *insignia, & ornamenta*, cum nobilis nemini videretur, qui nullas haberet, ut apud Svetonium: (e) *gens Flavia obscura illa quidem, ac sine ullis majorum imaginibus*; is autem aliis nobilior, qui plures, sicuti apud Sallustium: (f) *hominem veteris prosapia, ac multarum imaginum*. Hinc adventantibus aliquis, forte servus, qui atrii custodiæ præpositus, ideoque atrienfis dictus, quor gradibus alter ab altero distaret, aut speciatim alicujus inter cæteros clarissimæ imaginem ad familiæ decus elata virga ostendebat. Huc respexit Juvenalis, aut ego cum aliis fallor: (g)

— multa contingere virga

*Fumosos equitum cum dictatore magistros.*

Servari tamen cæperunt imagines primum optimo consilio, ut posteris ad virtutem majorum exemplo excitarentur. Ita Valerius Maximus: (h) *prudenter viro succurrebat effigies majorum cum titulis suis* iccirco in prima adium parte poni solere; ut eorum virtutes posteris non legerent solum, sed imitarentur. Neque frustra fuit aliquando hoc institutum. Nam præter id, quod refert ibi Valerius, ait etiam Sallustius, (i) *Maximos, Scipiones, præterea Romana reipublica præclaros viros solitos esse dicere, cum majorum imagines intuerentur, vehementissime animum sibi ad virtutem accendi*.

Qui autem videri potest præcipuus imaginum usus is fuit, ut in funerum pompa proferrentur. Etenim ait Plinius (k), ut tandem locum integrum afferam, *expressi cera vultus singulis disponebantur armariis, ut essent imagines, quæ comitarentur gentilitia funera, semperque defuncto aliquo totus aderat familiæ ejus, qui unquam fuerat, populus*. Cum igitur aliquis nobilium decesserat, toto gentilium suorum popu-

(a) l. c. (b) l. c. (c) l. c. (d) pro Sul. c. 33. (e) Vespas. c. 1. (f) Jugurt. (g) Sat. 2.  
(h) l. 5. c. 8. (i) Jugurt. præm. (k) l. c.



populo, ut pliniana verba usurpem, comitante efferebatur. Namque apertis armariis depromptæ imagines, longisque perticis, seu hastis impositæ, ut fercula solent triumphorum, longo ordine, & pompa ante cadaver ferebantur. Hanc ferendarum imaginum rationem fuisse, Lipsius (a) docuit ex Silio (b):

— aut celsis de more pberetris

*Præcedens prisca exequias decorabat imago.*

Aliam vero longe augustiorem fuisse, accepimus ex Polybio (c), quæ insigniores cæteris erant. Cum illustris vir aliquis ex eadem gente vel familia diem clausit ultimum, ad funeris elationem eas (imagines) proferunt, & ut quam simillimæ sint defuncto, reliquum etiam corporis truncum adjiciunt. Hæc porro simulacra togas assumunt, si vir consularis, aut prætorius quis fuerit, prætextas: si censorius, purpureas: si triumphalis, aut simili quo honore functus, auro radiantes. Et hi quidem curru vecti procedunt: at fasces, & securæ, & quæcumque alia magistratus comitari solent insignia, ibi quoque præcedunt pro honore & dignitate, quam quisque in republica, dum viveret, obtinuit. Ad rostra aut ventum, ordine omnes sellis insident eburnis.

Aliqui tradiderunt in funeribus imagines quasdam etiam foris, & circa limina domus expositas fuisse, neque omnes funus comitatas. Sed hos decepit certe Plinius cursim nimis lectus. Ait ille quidem, fuisse foris & circa limina imagines, sive hæ majorum fuerint, sive aliorum, quod mox examinabimus, affixis etiam hostium spoliis; attamen hujusmodi imagines non in funeribus solum inspiciebantur, sed nunquam non patebant, atque illinc refigere ne emptor quidem ædium poterat. (d) *Aliæ foris, & circa limina domitarum gentium imagines erant, affixis hostium spoliis, quæ nec emptori refigere liceret: triumphabantque etiam dominis mutatis ipsa domus.* Innuit multo ante & Livius: (e) *quorum domos spoliis hostium affixis insignes inter alias feceritis.* Idem alibi: (f) *qui spolia ex hoste fixa domi haberent.* Magnitudo quidem & hæ imagines, quamvis alius generis, nobilitatis argumentum, cum ædium domini magnorum virorum soboles non videri non possent, quorum facta præclara spolia hostica, & devictarum gentium simulacra testabantur.

Ex allatis Plinii verbis asserit quidam (g), in vestibulo, & in ipsis foribus atrii magnorum virorum, eorum scilicet, quorum cereræ imagines in atrio, fuisse statuas collocatas. Hoc significare videri potuit fortasse Plinius, donec non sine mendo ejus ita legebatur locus: *aliæ foris,*

(a) *elest. l. 1. c. 29.* (b) *l. 10.* (c) *l. 6.* (d) *Plin. l. 6.* (e) *l. 10. c. 7.* (f) *l. 23. c. 23.* (g) *Nicol. Abr. in phil. 2. Cicer.*

foris, & circa limina animorum ingentium imagines erant; verum postquam recentiores critici haud dubiis conjecturis legendum judicarunt: domitarum gentium imagines erant, idem argui ex plinianis verbis minime potest. Nihilominus tamen mihi quoque probabile est, non domitarum tantum gentium, sed ducum etiam, qui eas devicerant, conspicuas imagines fuisse, hasque etiam aut pugnantium, aut triumphantium habitu. Nec dubitarim huc & ipse trahere Juvenalem, qui cum imaginibus piæis, solumque vultum referentibus, quæ certe in atrio, ac extima armariorum superficie, statuas triumphales, aliasque incerti generis conjungit, simulque cum illis & has ostentatas a nobilibus, significat: (a)

— pictosque ostendere vultus

Majorum, & stantes in curribus Æmilianos,

Et Curios jam dimidios, humerosque minorem

Corvinum, & Galbam auriculis, nasoque carentem.

Morem utrumque imagines majorum in atrio servandi, spoliaque hostium foribus, & liminibus affigendi adumbravit Virgilius, cum regiam Latini describeret, quamquam pro imaginibus cereis statuas cedrinæ finxit aptius ad carminis dignitatem: (b)

Quin etiam veterum effigies ex ordine avorum

Antiqua e cedro; Italusque, paterque Sabinus

Vitisator, curvam servans sub imagine falcem,

Saturnusque senex, Janique bisfrontis imago

Vestibulo adstabant, aliique ab origine reges,

Martia qui ob patriam pugnando vulnere passi.

Multaque præterea sacris in postibus arma,

Captivi pendunt currus, curvæque securæ,

Et crisse caput, & portarum ingentia claustra,

Spiculaque, clypeique, creptæque rostra carinis.

Sed revertamur tandem, unde digressi sumus.

Armaria illa, ubi imagines e cera, non in gentilium tantum funeribus referata. Quamvis enim imagines non proferrentur, recludebantur tamen armaria per solemnitates publicas, & imagines tunc conspiciebantur cum studio etiam exornatæ. Testatur Polybius (c). Quia lætis etiam rebus privatis in familiæ gratulatione pariter apertas, clare indicat hæc Tullii ironia: (d) domus erit, credo, exornata: aperientur majorum imagines: ipse ornatum, ac vestitum recuperabit. Omnia, judices, hæc amissa sunt: omnia generis, nominis, honoris insignia, atque ornamenta unius judicii calamitate occiderunt. Scimus etiam

ex eo-

(a) Sat. 8. (b) Æn. 1. 7. (c) l. c. (d) pro Sul. c. 28.

ex eodem solitas per huiusmodi tempora imagines laurea coronari : (a) eam imaginem clarissimi viri parentis sui , quam laureatam in sua gratulatione conspexit . Hic imaginum usus .

Numquid vero apud omnes nobiles huiusmodi imagines ? Probabile id quidem , donec saltem nobilitatis ratio habita fuit , quamquam id libere , siquidem Catoni Stoico paterni generis unam imaginem fuisse , cum plures habere posset , Valerius Maximus affirmat : (b) exiguum viri patrimonium , adstricti continentia mores , modica clientela ; domus ambitioni clausa , paterni generis una imago , minime blanda frons , sed omnibus numeris perfecta virtus . Plinius (c) suo ævo sublatam hanc consuetudinem , queritur , quod proculdubio contigit , cum omnia ex unius nutu pendere cæperunt , & per imperatorum vim , ac superbiam nobiles , ignobiles uno ordine habebantur .

Qui imagines majorum ad posteritatem prodebant , hos utriusque familiæ , paternæ scilicet , & maternæ prodidisse , omnes affirmant , neque ulli licet dubitare . Svetonius de Galba : (d) stemma in ævio proposuit , quo paternam originem ad Jovem , maternam ad Pasiphaen Minois uxorem referret . Præterea cum elato cadavere delatæ sint utraque , clarum , & utrasque domi fuisse . Tacitus autem de Drusi funere : (e) circumfusas lecto Claudiorum , Juliorumque (Lipius (f) emendat Liviorumque ) imagines , destitutum in foro , laudatum pro rostris . Sed cum deinde aviæ imagines non frangeret nepos , matris autem adderet , factum puto , ut ad veritatem sint expressa illa : atrium plenum fumosis imaginibus (g) : imagines , quæ implere cæsareum atrium (h) :

Atrique immodicis ardeat imaginibus (i) .

Sane in Junia funere viginti (k) clarissimarum familiarum imagines antelatae sunt , Manlii , Quintii , aliaque ejusdem nobilitatis nomina .

Hic quærendum tandem est , quorum virorum imagines ponere liceret . Uno ore omnes , quos offendi , auctores , eorum ajunt , qui magistratum curulem cepissent , ædilitatem , præturam , censuram , consulatum , tribunatum militum consulari potestate , decemviratum ferendarum legum , dictaturam , magisterium equitum . Horum omnium servatas imagines , certius est , quam ut firmari ullius auctoritate debeat . Liceat tamen ea afferre , quibus mihi videor , bona magnorum virorum aliter opinantium venia , posse affirmare , non eorum tantummodo imagines positas fuisse .

Primum autem nihil me movent verba Ciceronis , (l) qui ab

K

ædi.

(a) pro Mur. c. 88. (b) l. 2. c. 10. (c) l. c. (d) Gel. c. 2. (e) ann. l. 3. v. 5. (f) quæst. epist. l. 4. epist. 3. (g) Sen. epist. 44. (h) id. consol. ad Pol. c. 33. (i) Mart. ad. l. 2. epigr. 90. (k) Tac. ann. l. 3. c. 76. (l) in Ferr. l. 5. c. 36.

ædilitate se consequutum, inquit, *jus imaginis ad posteros prodendæ*. Ibi enim Cicero id refert, quod juris illi fuit, non id etiam, quod aliis esse potuit, ut alibi innui. Neque pariter contrarium evincunt illa alterius loci: (a) *qui beneficio vestro imagines familie consequuti sunt*. Cum enim non magistratus tantum curulis, sed quilibet magistratus, imo & sacerdotium post legem domitiam, de qua Tullio fit mentio (b), beneficium populi fuerit, illinc conficeretur, cujusque magistratus, & sacerdotis imagines esse positas.

Præter magistratus curules, Deorum imagines habuere primum, qui ab iis se credi volebant propagatos. Hinc Jupiter in Galbæ stemmate, ut ex Svetonio (c). Deinde Heroum, & indigetum, tertio regum. Clare Tacitus: (d) *funus imaginum pompa maxime illustre fuit, cum origo Juliæ gentis Æneas, omnesque Albanorum reges, & conditor urbis Romulus, longo ordine spectarentur*. Regum etiam imagines memorantur Livio: (e) *Ancum nobilem una imagine Numa*, pariterque ubi Tullia Tarquinio: (f) *Dii te penates, patriique, & patris imago, & domus regia, & in domo regale solium*. Converso vero reipublicæ statu imperatorum imagines servatas quidem domi, arbitror, minime tamen prolatas in funere posterorum, discimus ex Dione (g), qui in funere Augusti tradit, Julii Cæsaris non visam imaginem, quia inter semideos relatus. Sed o novum adulationis genus! Num superioris subfelli Deus Cæsar, quam Æneas, aut Romulus? Ita quisque nova somniabat, ut dominis gratius blandiretur.

Post regum imagines non dubito clarissimas fuisse eorum, qui magistratus curules cæpissent. Post has quidni etiam imagines eorum, qui sacerdotio fundi, aut tribunatum plebis gessere, sive ne abrumperentur successionum gradus, sive quia & hi inter familiæ decora? Si enim imaginis titulis adjiciebatur etiam post alios honores auguratus, & pontificatus, ut ex Livio clarum (h), ad magis honestandam viri memoriam, nescio, quare, si Pontifex tantum hic fuisset, ut nonnulli fuere de honorum curriculo immatura morte submoti, dignus videri non debuerit, cujus nomen imagine posita posteritati proderetur.

Fac, P. illum Licinium Crassum, congestis omnibus humanis a natura, (i) *fortunaque bonis illustrem*, antequam ædilis crearetur, in pontificatu maximo, quem senibus duobus, honoratisque victis consequutus fuerat (k), cum nondum sella curuli sedisset, fac, inquam,

ex-

(a) de leg. Agr. ad pop. c. 2. (b) Bruns. epist. 5. (c) Galb. c. 2. (d) Ann. l. 4. c. 9.

(e) l. 2. c. 34. (f) ibid. c. 47. (g) l. 56. (h) l. 10. cap. 7. (i) Liv. l. 30. cap. 1.

(k) Id. l. 25. c. 5.

extinctum; quis ejus imaginem tanto populi favore, tanta expectatione juvenis a posteris non habendam fuisse, credat? Idem dicendum videtur de P. Cornelio Calussa, qui centum viginti annis ante hunc Crassum (a) Pontifex Maximus fuerat, priusquam sella curuli sedisset.

Tantumne pugnassent plebeji, ut secum etiam sacerdotia communicarentur, nisi sacerdotum nomen, ut consulum familiarum ornamentum futurum fuisset? Eo magis dubito, quod Cicero inter nobilitatis decora sacerdotia etiam numerat, atque hæc tamquam ad imagines spectantia: (b) *delestat amplissimus civitatis gradus, sella curulis, fasces, imperia, provincie, sacerdotia, triumphi, denique imago ipsa ad posteritatis memoriam prodita.*

De tribunis vero plebis rem satis manifestam afferro. L. Minucii illius, qui præfatus annonæ Sp. Melii ambitionem deprehendit, & ad senatum detulit, imago fuit apud Minucios tribuni plebis titulo inscripta, falso quidem, ut observat Livius (c), sed tamen hoc titulo inscripta. Non video autem, cur patricii Minucii id mentiri voluerint, nisi quod speciosior tribuni titulus illis visus, quam tantum præfati annonæ, eumque tribunorum imagines poni solerent, illinc petittum a minoribus jus imaginis illius ponendæ, quæ ob tanti viri virtutem, ejusque in rempublicam merita, in laudem familiarum digna visa est, quæ servaretur. Præterea Sex. illum Titium damnatum scimus, (d) quod Saturnini imaginem domi habebat. Hic vero Saturninus tribunus plebis itidem fuerat, & in eo magistratu ob motam seditionem occisus.

Sed & cujuslibet senatoris imaginem servatam dicam post Syetonium, apud quem habemus: (e) *multis in familia senatoriis imaginibus.* Quin cujuscumque, modo vir egregius fuerit, & patriam juvarit, imaginem servatam, arbitror. Si enim cujus imaginis titulus a prætura poterat sumi, & a consulatu, hujus imagini non alius apponitur, quam qui generatim virtutem indicet, mihi videor posse affirmare, futurum fuisse, ut ejus imaginem ponerent posterii, etiam si semper privatus, prætor, aut consul non fuisset, quando horum honorum nulla in titulo mentio. Fuit autem Cassii imago ita inscripta: (f) *C. Cassius dux partium*, quamvis hic prætor fuisset, & consul designatus.

Privatorum, qui virtute inclaruissent, imaginem fuisse apud po-

K 2

ste

(a) *Id. ibid.* (b) *pro Rab. Post. c. 16.* (c) *l. 4. c. 16.* (d) *pro C. Rab. per d. c. 24.*  
(e) *Aug. c. 4* (f) *ann. l. 16. c. 7.*

stros, colligitur etiam ex P. Cornelii Nasicæ verbis, ubi ait, suam, etiam non consulis, ac triumphalis viri, satis honoratam imaginem dumtaxat ob virtutum titulos, futuram fuisse, (a) quod ad se attinet, sibi gloriæ in omnem vitam illo die satis quæsitum esse: quo se virum optimum judicatum ad accipiendam matrem Idæam misisset Senatus. Hoc titulo, etsi nec consulatus, nec triumphus addatur, satis honestam, honoratamque P. Cornelii Nasicæ imaginem fore.

Præterea quo spectant illa de Scaptio? (b) clarum hac fore imaginem Scaptium nomen? Certe hunc nullum gessisse magistratum, memorat Livius, cum consul affirmet, nihilominus posituros ejus imaginem posteros, quod patriam prolatis finibus juvarit. Cum autem hujusmodi optime de republica meritis civibus statuas publice positas aliquando, ignoret nemo, privatim ipsorum imaginem ab eorum posteris non positam, numquam credam.

## C A P U T XVII.

*Imagines pro libito positæ, hominum etiam contemptorum. Quædam, arrepta occasione, de eorum nominibus, qui ab aliis in filios adoptabantur. Vetitum damnatorum imagines servare. Imagines, quæ minime ad nobilitatem spectarent.*

**E**Xtat apud Ciceronem celebris quædam epistola (c) ad L. Papirium Pætum, ex qua enucleatius aliquid de imaginibus statui posse, existimo: Videtur autem Pætus rerum suarum satis ignarus, & velut domi suæ hospes, cum forte agitare animo majorum suorum imagines ordinare, plebejusque ipse Papirios omnes plebejos fuisse crederet, Ciceronem hac de re consuluisse. Huic Cicero respondurus, Papiriam gentem, quæ ante Papisia, origine patriciam fuisse, docet, in plures deinde familias diductam, patricias alias, alias plebejas. Patriciæ fuere Mugillanorum, Crassorum, Curforum, Massonum, quorum omnium patriciorum Pætus imagines habeat, vult Cicero. Plebejæ fuere Turdorum, & Carbonum. Hos contemnendos censet. Quæ hinc arguo, hæc sunt.

Cum patricius aliquis ad plebem transibat, familiæ hic inter plebejos novæ quærere minime debebat novam a magistratibus curulibus nobilitatem, sed gentis adhuc ipse, posterique nobilitate fruebantur. Pætus enim plebejus erat, quippe qui ne noverat quidem Papiriorum ullum

(a) Liv. l. 36. c. 40. (b) Liv. l. 3. c. 72. (c) fam. l. 9. epist. 22.

ullum fuisse patricium. Nobilem tamen ille se noverat, qui de majorum imaginibus ordinandis cogitabat; nobilem certe fatetur Cicero, cum eum velit majorum imagines habere. Tota ergo illi nobilitas a gente Papiria. Ex familia enim Pæta nemo unus adhuc inventus est, qui sella curuli sederit, quod pariter dicendum est, si a Papiria Turdorum familia Pætos propagatos credamus. Carbonum id honoris consequutos aliquos scimus, sed a Carbonibus Pætos fuisse, nemo credet, cum advertet, quam illos Cicero apud Pætum vituperet.

Nobilibus, quorum ex gentilibus suis liberet, eorum licebat imagines habere. L. enim Pæti gentiles æque erant Papirii patricii, ac Papirii plebei. Plebejorum tamen, licet ex iis Carbonum aliqui & cives e republica fuissent, & sella curuli sedissent, nullius prodendam imaginem, omnesque contemnendos, Cicero censet. Mugillanorum. Crassorum, Curforum, Massonum omnium, ut imagines habeat, Pæto suadet. Ex iis autem familiis omnes curulem magistratum adeptos, neque affirmat Tullius, nec credibile videtur. Imo Curforum aliquem tantummodo hominem valde honoratum Cicero appellat: Massonum, præter unum ædilitium, multos tantummodo fuisse, ait, cum id tamen ponat: quorum tu omnium patriciorum imagines habereas, volo. Neque eorum ideo dumtaxat, qui sella curuli sedissent, neque omnium, qui sella curuli sedissent, sed quorum liberet, gentilium imagines prodere, mos nobilibus Romanis fuit.

Nulla habita magistratus curulis ratione imagines positas, manifestius ex Plinio colligitur, qui nebulonis cujusdam in atrio Scipionum offendit imaginem. Ita Plinius (a): *similis causa Messala seni expressit volumina illa, quæ de familiis condidit; eum Scipionis Pomponiani* (ita legendum, non Africaniviri docti viderunt) *transisset atrium, vidissetque adoptione testamentaria Salutiones* (hoc enim ei fuerat cognomen) *Africanorum dedecore irrepentes Scipionum nomini. Ad hæc verba ita eruditissimus Plinii interpretes* (b): *id ei cognomen* (Pomponiani) *a Pomponio Salutione mimo obtigisse significat hominem prædixisse, ejus testamento factus heres Scipio fuerat, ut Pomponiani nomen assumeret, quod Romæ solemne fuit: sic enim Scipio Æmilianus appellatus: sic alii permuti. Eidem autem Scipioni Pomponiani, & Salutionis cognomen hæsit, ob affinitatem eam, & vultus quoque similitudinem. Propositum satis firmo, modo hic, cujus imago stomachum Messalæ movit, fuerit Scipio cognomento Salutio, vel Salatto, ut Dio illum vocat* (c). cus

(a) l. 35. cap. 2. (b) Harduin. in. Plin. loc. cit. (c) l. 42.

tus enim hic vir, accipe ex Svetonio: (a) *ad eludendas vaticinationes, quibus felix, & invictum in ea provincia Scipionum nomen ferebatur, despectissimum quemdam ex Corneliorum gente, cui ad opprobrium vite Salutioni cognomen erat, in castris secum habuit. Verum illa imago non Scipionis, qui Salutio dictus, sed ipsius Pomponii Salutionis erat, qui propterea dicitur irrepsisse Scipionum nomini, in quod ille Scipio quamcumvis despectissimus hominum jure suo venerat, nec dici poterat irrepsisse. Sed ne irrepere quidem Scipionum nomini poterat amplius Scipio a Pomponio adoptatus, cum per adoptionem capitis diminutionem passus fuisset. Capite enim diminutos non amplius gentilibus adnumerari, docuit Scævola (b). Scipio autem Pomponianus, qui alius esse poterat, quam Pomponius ipse testamento in nomen, ac familiam Scipionum adoptatus? Neque mirum e Cornelia quidem gente, sed tamen despectissimum hominem in filium sibi mimum illum Pomponiorum forte libertum, libertini certe generis, addcivisse ob oris, unde & illi viventi Salutioni cognomen factum (c), & fortasse multo etiam magis ob morum similitudinem sibi antea satis conciliatum.*

Hoc Romæ solemne fuit, ut quod nomen levi commutatione aliter flecteretur, hoc adoptati, non adoptantis esset, ita *Æmilii*, Scipio *Æmilianus*, ita Pomponius, Scipio Pomponianus dictus est, uterque a Scipionibus adoptatus. Quod si verum est, ut Antonio Augustino visum (d), hinc etiam fluxisse morem, ut adoptatus adoptivi patris nomen ita inflexum sumeret, hoc nonnisi a Salutionis temporibus perquam longe in usu esse capit. Justinianus enim, si ita appellatus fuit a Justinī, qui eum adoptavit, nomine, scimus quot sæculis distet a Julio Cæsare, sub quo Salutio vixit, a quo etiam, licet propius, multum abest tamen & Paulus jurisconsultus Alexandri Severi temporibus clarus, qui, si locus ejus sanus est, ut Augustino, non autem mendosus, ut aliis videtur, Titianum quendam memorat Titii filium legitimum, hoc est adoptivum, ut jurisconsulti interpretantur. Cæterum, ut optime docet ex Dione Sigonius, (e) illud certum est, *qui adoptarentur ab aliquo, eos nomina illorum omnia, a quibus adoptarentur, ferre consuevisse, suum vero gentilitium nomen retinuisse illud quidem, sed aliquo modo commutasse.* Liceat, quamvis parum fortasse ad rem, aliqua hic de adoptatorum nominibus addere, ut planius fiat Pomponium a Scipione, non Scipionem a Pomponio adoptatum.

No-

(a) *Jul. Caf. c. 59.* (b) *Cicer. Topic. c. 39.* (c) *Plin. l. 7. c. 14.* (d) *Emend. l. 2. c. 2.*  
(e) *De nomin. Rom. c. 3.*



Nomen gentilitium ita commutabant, qui adoptabantur, ut tamquam aliud ab illo derivatum adjectivorum more in *Annus* desineret, cognomen vero familiae, in qua nati erant, post illud nulla mutatione usurpabant. Ideo Cicero, alterius enim Pomponii subit recordatio, T. Pomponio Attico, postquam a Q. Cæcilio avunculo adoptatus fuerat, ita litteras inscribit: (a) *Cicero S. D. Q. Cæcilio Q. F. Pomponiano Attico*. Hoc autem omnibus solemne fuit, qui adoptarentur, neque de nominis gentilitii mutatione dubitare Siginium (b), æquum est, quamvis Aurelium Orestem a Cn. Aufidio adoptatum, Cn. Aufidium Orestem, Calpurnium Pisonem a M. Pupio, M. Pupium Pisonem nominatos invenerit. Tam enim illi erant Aufidius Aurelianus Orestes, Pupius Calpurnianus Piso, ac pariter alii Q. Metellus Pius Cornelianus Scipio, Q. Cæpio Junianus Brutus; quam T. olim Pomponius, Q. Cæcilius Pomponianus Atticus, licet *Attico* tantummodo inscribat alias epistolas Cicero, idemque Cæcilius Atticus vocetur solum a Svetonio: (c) *Agrippinam M. Agrippa genitam, neptem Cæciliæ Atticæ, ad quem sunt Ciceronis epistolæ, duxit uxorem*, ut certissimum sit, quoties gentis nullum nomen invenitur, id omitti, quia ex familiae cognomine gentis nomen facile intelligitur. Etenim ne tot nominum tam longa serie uterentur, non dubito aliqua aliquando præterisse. Aliquos autem usitatus fuit gentis nomine vocari, ut Scipionem Æmilianum potius, quam Paullum, aliquos familiae cognomine, ut Cæpionem Brutum potius, quam Junianum, ut omnibus constaret, ex qua Juniorum familia esset.

Familiae tamen cognomen aliquo modo commutatum aliquando, sensit citatus Augustinus in suis emendationibus, (d) cum ait; *a Julii Juliani, a Marcellis Marcellini, a Domitiis Domitiani*, quod apertius etiam asserit alibi, (e) ubi ait, Marcellum, qui per adoptionem in familiam transit Lentulorum, fuisse appellatum P. Lentulum Marcellinum, & ab eo originem Marcellinos duxisse. Lentulos Marcellinos a Marcellorum aliquo, qui a Lentulo adoptatus fuerat, propagatos, certissimum puto vel eo solum, quod ejusdem generis Marcelli, ac Marcellini dicuntur a Cicerone: (f) *omnium Marcellorum, Marcellinorum etiam* [ *mirificus enim generis, ac nominis vestri fuit erga me semper animus* ]. Verum qui Marcellorum primus in Lentulorum familiam adscitus, eum aliter ac Lentulum Marcellum,

(a) *l. 3. Attic. ep. 30.* (b) *l. c.* (c) *Tib. c. 7.* (d) *l. c.* (e) *Famil. Rem. ad Corn. Lentul.* (f) *l. 15. fam. ep. 10.*

lum, sive Lentulum Clodianum Marcellum vocatum esse, ut affirmem, non ita facile adducar. Falso enim hujus rei citatur testis Cicero, qui nihil ait aliud (a), quam P. Lentulum fuisse M. Marcelli filium. Sed ipse Augustinus parum sibi constans, cum meminit Cn. Lentuli Cn. F. Clodiani qui consul fuit anno DCLXXXI. cum L. Gellio, hæc habet: (b) *hic Lentulus ex cognomine videtur a Clodia in Corneliam familiam transisse, cujus rei incerta historia est, nisi forte primus Marcellinorum sit*. Primus autem Marcellinorum hic, puto, idem est ac auctor ipse Marcellinorum. Attamen ne hoc quidem verum esse potest, cum anno urbis DCXCVII. consul fuerit Cn. Cornelius Lentulus Marcellinus, qui P. F. dicitur, unde apparet Marcellinos a Cn. Lentulo Clodiano minime esse profectos. Quare potius assentior Sigonio, qui ait, (c) P. Lentulum, qui Cn. hujus Marcellini pater fuit, P. illius Lentuli filium fuisse, qui M. Marcello natus erat. Puto itaque P. Lentulum P. Lentuli Marcelli filium statim appellatum Marcellinum, quo nomine deinde Cn. filius, totaque ejus posteritas Marcellini sint appellati. Ad majorem dictorum claritatem sic mihi videor posse Marcellinorum stemma ordinare.

M. Marcellus, qui deinde P. Cornelius  
Lentulus Clodianus Marcellus

P. Cornelius Lentulus Marcellinus P. F.

P. Cornelius Lentulus Marcellinus P. F. P. N.

Cn. Cornelius Lentulus Marcellinus P. F.

P. N. P. Pron. Consul anno Urbis DCXCVII. cum L. Marcio Philippo.

Est autem hic Cn. consul Marcellinus appellatus non Clodianus, non ut omnes intelligerent ex qua Claudiorum familia ortus esset, quemadmodum ait Sigonius (d), sed ut omnes intelligerent ortum ab eo, qui a Claudiis Marcellis ad Cornelios Lentulos transierat, neque ut ab altero Lentulo Clodiano tum vivente internosceretur, sed quia inter

---

(a) *Brut.* 136. (b) *l. c.* (c) *com. in fast. ad an. DCXCVII.* (d) *l. c.*

inter Lentulos natus, non in eorum nomen per adoptionem adscitus, *Clodianus* vocari non poterat, quo tamen nomine *Publius* proavus ejus vocatus fuerat.

Sed id dum contendo, cognomina familiæ nulla unquam ratione commutata fuisse, ne putes, aliquando hoc etiam accidisse gentilitio nomini, ut non aliter flecteretur. Scio, *M. Terentium Varro* nem *Lucullum*, qui consul fuit cum *C. Cassio Varo* anno DCLXXX. non *Licinianum* *Lucullum*, sed *Licinium* *Lucullum* appellatum inveniri, ita enim plumbeus tubulus Romæ, ut *Sigonius* refert (a), inventus: *C. Cassio Varo M. Licinio Lucullo Cos.* Novum tamen hoc minime esse animadvertit, ut etiam post adoptionem eo, quod ante adoptionem eorum fuerat, vetere nomine adoptati vocarentur, seu quia ita libebat, seu quia eo notiores fortasse erant. Ita *Cicero*, qui *Pomponiano Attico* literas dederat III. non. Octob. (b), idem recentissima adhuc adoptione VI. Kal. & prid. Kal. Decemb. *Pomponium* appellat: (c) *Mi Pomponi*, pugna: (d) *Tertium caput, mi Pomponi*. *Varro* etiam innuit: (e) *Atticus*, qui nunc *T. Pomponius*, nunc *Q. Cecilius* cognomine eodem. Quare cum *Licinium Lucullum*, cum *Pomponium Atticum* legis, eos scito, naturæ, & quo nati sunt, non legum, aut consuetudinis, & adoptionis nomine appellari, simulque id certum sit, utro libuisset, eos licitum, & usitatum nomine appellare.

Neque illud credas, quoties cognomina aliquorum in *Anus* definentia invenis, per ea adoptionem semper significari. Neque enim a *Vespasii* *Vespasianus*, neque a *Domitiis* *Domitianus* ad *Flavios* transierant. Verum cum liberum esset, cognomina majorum relinquere, ac nova sibi sumere [quod *Cn. Pompeii* exemplo satis probatur, qui *Pompeii Strabonis* filius, *Strabo* nunquam dici voluit] alteri non *Flavio Sabino* patris cognomine, sed *Flavio Vespasiano* a matre *Vespasia Polla*, alteri a matre *Domitilla Domitiano* cognomen est inditum. Sic etiam, teste *Plinio* (f) *Catonum* alii *Liciniani* ex *Licina* priore *Catonis* *Censorii* uxore, alii *Saloniani* ex *Salonia* altera uxore dicti sunt.

Sed iterum ad *Scipionem* illum *Salutionem*, cujus imago inter *Africanos*, postquam ex *Pomponio* mimo *Scipio Pomponianus* *Africanorum* dedecore factus fuerat, satis ostendit, nullius vetitum, nobilibus saltem, fuisse imaginem servare præterquam eorum, qui

L

judi-

(a) *com. in fast. ad an. DCLXXX.* (b) *l. 3, Attic. ep. 30.* (c) *epist. 22.* (d) *epist. 23.* (e) *l. 2, de re rust. c. 2.* (f) *l. 7. c. 14.*

judicio damnati fuerant, cujus rei causam colligere possumus ex Cicerone, ubi Titium damnatum ob servatam Saturnini imaginem refert: (a) *statuerunt equites Romani illo judicio, improbum civem esse, & non retinendum in civitate, qui hominis hostilem in modum seditiosi imagine, aut mortem ejus honestaret, aut desideria imperitorum misericordia commoveret, aut suam significaret imitanda improbitatis voluntatem.* Damnatorum autem imagines vetitas, & abolitas tacite ipsa hominis damnatione, verissimum puto, aliquando tamen & in ipsas imagines sententiam dictam, reperimus. Tum Cotta Messalinus, (b) *ne imago Libonis exequias posterorum comitaretur, censuit.* Attamen & has servabant, nisi animadverteret accusator aliquis, unde Titio vetere republica crimini fuit Saturnini imago (c), deinde & Silio imago patris (d), & Cassio Longino Cassii percussoris Cæsaris imago (e). Quin postquam deflagraverat civium odium, judicii memoria facta erat obscurior, horum etiam imagines proferebant, quemadmodum legimus, (f) C. Cæsarem ausum omnium primum imagines Marii in Juliæ funere proferre.

Sed præter imagines majorum, quod obiter dictum sit, aliorum etiam in atrio servatas, invenio, non has sane ad nobilitatis ostentationem, sed alicujus, quem valde admirabantur, religiosum veluti cultum, & amoris significationem. Has vero non ex cera, sed ex ære, aliave materia. Ita Brutus ob Demosthenis amorem ejus imaginem in atrio habuit. Cicero: (g) *Demosthenes quidem, cujus nuper inter imagines tuas, ac tuorum [quod cum, credo, amares] cum ad te in Tusculanum venissem, imaginem ex ære vidi.* Plinius alter etiam de Titinio Capitone: (h) *mirum est qua religione, quo studio imagines Brutorum, Cassiorum, Catonum domi, ubi potest, habeat.*

C A-

(a) *pro Rab. perd. c. 24.* (b) *Tac. ann. l. 2, c. 32.* (c) *Cic. l. c.* (d) *Tac. ann. l. 11, c. 35.* (e) *id. ann. l. 16, c. 7.* (f) *Plutarch. Cæs.* (g) *orat. ad Br. cap. 110*  
(h) *l. 1. epist. 17.*

## C A P U T XVIII.

*De calceis lunatis Romanorum. Nobiles omnes gestabant. Nec prætex-  
ta, nec bulla aurea, nec phalæra, nec annuli aurei erant nobilitatis  
insignia. Alia apud alias nationes insignia nobilitatis.*

**S**icut imagines domi habere, ita lunulam gerere calceis adsu-  
tam signum erat nobilitatis apud Romanos. Hac promiscue  
nobiles omnes & patricios, & plebejos usos fuisse, ajo. Erat au-  
tem hæc lunula *fibula eburnea ad instar lune corniculantis*. Calcei,  
quibus hæc fibula adfuta, lunati dicebantur. Hanc patriciam lunam  
vocat Statius: (a)

— *genitum sibi Curia sensit*

*Primaque patricia clausit vestigia luna*

Patriciorum etiam fuisse tantummodo nota videtur innuere vetus  
Jovenalis Scholiastes: (b) *lunula adfuta calceis discernebantur pa-  
tricii a novitiis*. Plane hoc affirmat Isidorus, qui etiam ait eam  
notam fuisse centenarii numeri, quia quos patres adscivit Ro-  
mulus, hi centum numero fuere: *patricios calceos Romulus repe-  
rit quatuor corrigiarum, assutaque luna. Iis soli patricii utebantur.*  
*Luna autem in iis non sideris formam, sed notam centenarii numeri si-  
gnificabat, quod initio patricii senatores centum fuerint.* Melius dixit-  
set, quod initio patricii a centum senatoribus fuerint. Sed tamen  
fallitur dubio procul Isidorus. Quicquid enim luna illa significa-  
ret, initio patriciorum solum fuit, verum sequentibus temporibus,  
cum plebei parta sibi nobilitate iisdem sacris initiati sunt, eausi  
promiscue nobiles omnes.

Hinc ortum proverbium: nobilitatem gestare in pedum malleo-  
lis, *ἢ τοῖς ἀσπαλάοις*, in eos, qui nobilitatem jactant, quo  
proverbio Bradeam quemdam vellicavit Herodes Sophista (c).  
Quoniam autem Statius vocat *patriciam lunam*, non dubito aut ab  
iis, qui primum gessere, sumpto nomine, ita semper appellatam,  
aut illum saltem illustriori nomine voluisse appellare. Scholiastem  
vero Jovenalis, satis apparet, patricios pro quibuscunque nobilibus  
accepisse, cum eos novitiis opponat. Proprie enim patricii plebeiis,  
nobiles novis opponuntur. Sed ipse satyrogaphus, Quintilianum

L 2

lu-

(a) l. 4. Syl. 2. (b) ad Sat. 7. (c) Philost. Vit. Soph. l. 2. Her.

lunam gessisse affirmat, quod nobilis, non quod etiam patricius, qualem certe eum nemo dixerit: (a)

— nobilis, & generosus

*Adpositam nigrae lunam subtexit alutæ.*

Philostratus etiam: (b) *Bradeas celeberrimus inter consules, & nobilitatis notam appositam calceis gestans. Hoc vero signum talare eburneum est lunula instar.* Ne hic quidem ullam patricii generis mentionem invenio, neque Bradeam patricium puto. Addo Plutarchum, qui querit: (c) *cur qui nobilitatis genere aliis prestare videbantur [ non ait, qui patricii ] lunulas calceis gestabant.* Quas vero rationes ad solvendam quaestionem affert, quamquam omnes ingeniosas verius, quam probabiles fateor, nulla tamen est, quæ in solos patricos cadere possit.

Quid vero hæc lunula significaret, ad rem nostram nihil facit. Satis mihi est ostendisse, hoc nobilium omnium insigne fuisse, non patriciorum tantummodo. Hæc autem vera est ratio, quam aliis querendam reliquit Octavius Ferrarius (d), cur qui nec patricii, nec senatores, lunulam calceis apposuerint. Alia porro ad calceos patricos spectantia, ut de eorum colore, de numero corrigiarum, de assuendæ lunulæ loco apud eundem auctorem, aliosque invenies, quæ tamen de omnium nobilium calceis dicta, semper ipse credam. Postquam enim, iterum repeto, plebei sunt *iisdem initiati sacris*, quibus patricii, quæ eorum aliquando propria fuisse, jure, injuria sibi etiam vindicasse, nemini non probabile puto.

Præter calceorum lunulas nobilitatis insignia apud Romanos fuisse *bullam auream, phaleras, aureos annulos, & prætextam* Tiraquellus docet (e). Contra ego horum nullum nobilitatis insigne fuisse, assero.

*Prætexta*, ut singula hinc incipiam judicio doctorum virorum subjicere, gestabatur ab adultis simul, & pueris. Ex adultis gestabant magistratus, & sacerdotes, hæcque honoris, & dignitatis, non nobilitatis insigne erat. Dubium exoritur utrum e pueris nobiles solum gestarent. Sane de puerorum prætexta, quæ tam marium erat, quam seminarum loquitur Asconius (f), cujus una auctoritate

(a) *Juvén. Sat. 7.* (b) *l. c.* *Bradeas* ὑποδημάτων ἐν τῷ ὑπὸ τοῦ ποδὸς, καὶ τὸ ἔμβλημα τῆς ὑποδησίας περιερρημένος τῷ ὑποδηματί. τὸ πρὶν τὸ εἶναι ὑποδηματίον ἐξηγάντων, μνησθεὶς. (c) *quaest. Rom. 76.* Διὰ τὴν τὰς ἐν τοῖς ὑποδηματί σιδῶν ἰδῶν αὐτῶν διαφέρειν τῶν ὑποδημάτων. (d) *Analekt. de re Vest. cap. 34.* (e) *cap. 37. num. 160.* (f) *ad lib. 2. in Ver.*

tate nititur Tiraquelli sententia . Pueri prætexta simul cum bulla collo suspensa uti solebant ab eo tempore , cum Tarquinius Priscus bello sabino filium suum , quod annos quatuordecim natus hostem manu percusserat , pro concione laudatum bulla aurea , prætextaque donavit . Ferebant autem eam pueri , donec togam puram , quæ & virilis , fumerent , hoc est usque ad annum decimum quintum , vel decimum septimum , ut alii arbitrantur , quo tempore ex ephæbis egressi prætextam exuebant , bullamque laribus appendebant .

Sed de iis tandem quibus prætextæ jus fuerat , hæc Macrobius alibi etiam citatus . (a) *Alii putant , eundem Priscum , cum is statum civium solertia providi principis ordinaret , culum quoque ingenuorum puerorum inter præcipua duxisse , instituisseque , ut patricii bulla aurea cum toga , cui purpura prætexitur , uterentur : dumtaxat illi quorum patres curulem gesserant magistratum . Cæteris autem , ut prætexta tantum uterentur indultum , sed usque ad eos , quorum parentes equo stipendia meruissent .* Deinde aliquibus interjectis : *concessum , ut libertinorum quoque filii , qui iusta dumtaxat matrefamilias nati fuissent , togam prætextam , & lorum in collo pro bullæ decore gestarent .* Verum quanti facienda sit hæc Macrobiï auctoritas , cum patet ex iis , quibus illam alibi rejecimus , quod sub regibus nullus esset magistratus curulis , quem patriciï gererent , tum etiam , quod Plinium , qui certe scribenti Macrobio est obversatus , male idem transcripsit . Plinius enim bullam auream illis quoque traderat , quibus Macrobius prætextam dumtaxat . Ita Plinius : (b) *A Prisco Tarquinio omnium primo filium , cum in prætextæ annis occidisset hostem , bulla aurea donatum constat : unde mos bullæ duravit , ut eorum , qui equo meruissent , filii insigne id haberent , cæteri lorum .*

Aliquid clarius , & tutius ut de iis ferri iudicium possit , assert Tullius , ubi ait : (c) *cripies igitur pupillæ togam prætextam ? detrahes ornamenta non solum fortune , sed etiam ingenuitatis ? ( scilicet eandem prætextam ) .* Idem aliquanto post . (d) *Neque te tam commovebat , quod ille cum toga prætexta , quam quod sine bulla venerat . Vestitus enim neminem commovebat is , quem illi mos & jus ingenuitatis dabat , quod ornamentum pueritiæ pater dederat , indicium , atque insigne fortune , ( nempe bullam ) hoc ab isto prædone ereptum esse , graviter , & acerbe homines ferebant .* Patet igitur prætextam ingenuorum

---

(a) *Suurn lib. 1. cap. 6. (b) lib. 33. cap. 8. (c) lib. 1. in Ver. cap. 113. (d) cap. 152.*

rum propriam fuisse, & jure *ingenuitatis* ferri solitam, quod sentire etiam Alconium, cum *prætextam* bonis tribuit, *togam* vilioribus, alio loco ostendimus, ideoque nobilitatis ex ea nullum argumentum. Aliud enim ingenuitas, aliud nobilitas fuerat, atque ingenui, qui libertinis opponuntur, multo plures.

Porro, si *bullas aureas* post *prætextam* in manus sumamus, apparet, ne illis quidem nobilitatem significatam, earumdemque ferendarum morem ab ingenuitate fuisse, quemadmodum ferendæ *prætextæ*. Plinius quoque nullum nobilitatis argumentum in illis deprehendit, cum ait: (a) *mos bullæ duravit, ut eorum, qui equo inervissent, filii id insigne haberent, ceteri lorum*. Neque enim soli nobiles equo merebant, neque equestris militia initium erat nobilitatis.

Verum fortasse Tullius rem acu tangit, ut nemo melius. Affert ille, ut ex nuper citatis locis ex libro primo actionis secundæ in Verrem aperte colligitur, *prætexta* quidem *ingenuitatem* argui, *bullæ aureæ* tantum *divitias*, ideoque hanc vocat *ornamentum fortune*, *ornamentum pueritiæ*, *indicium*, atque *insigne fortune*, quodque animadversione dignum est, *prætextam* dari, ait, *more*, & *jure ingenuitatis*, *bullam auream* non nisi *patris voluntate*: (b) *vestitus* (hic *prætextæ*) *quem illi mos*, & *jus ingenuitatis* *dabat*: quod *ornamentum pueritiæ* (hoc *bullæ*) *pater dederat indicium*, atque *insigne fortune*. Itaque hoc certum statuere tandem posse mihi videor, ingenuos omnes pueros jure suo *prætextatos*, cui etiam *bullam auream* addebant, si, unde emeretur, suppeteret, ita tamen ut ab eadem ingenuitate *jus etiam bullæ aureæ ferendæ* iisdem esset, si per rem familiarem liceret sumere, cum libertini, ut ut divites numquam *bullam auream* ferre possent, sed *bullam scoræam*, nimirum *lorum* tantummodo. Quapropter qui ob paupertatem, sive fortasse etiam aliquando ob patris avariciam, *bullæ aureæ* insigniri minime poterant, hi adhuc collo circumdabant *lorum*, idest *ligamentum cum nodo*, unde debuisset *bullæ* pendere, quod Plinio visum moris fuisse eorum filiis, qui *pedibus meruerant* (c), cum tamen non quia eorum patres *pedibus meruerant*, id haberent in more positum, sed quia hujusmodi homines tenuiores, & pauperiores erant.

Jus itaque *aureæ bullæ ingenuorum omnium* fuit, *bullæ ipsa divitum*. Propositum firmo Juvenalis testimonio: (d)

— Quis

---

(a) l. c. (b) loc. cit. (c) l. c. (d) Sat. 5.



— *Quis enim tam nudus, ut illum*

*Bis feras, etruscum puero si contigit aurum,*

*Vel nodus tantum, & signum de paupere loro,*

ubi vides, lorum vocari pauper, quia pauperum erat e collo suspendere nodum hunc e loro, tamquam signum bullæ, quæ appendi debuisset. Signum itaque de paupere loro vetus poetæ Scholiastes interpretatur esse (a), corrigiam paribicam, unde solet bulla pendere signum ingenuitatis. Statius in Epicedio patris prætextam quoque divitibus solum gestatam, ait. (b)

*Nec sine luce genus (quamquam fortuna parentum*

*Arctior expensis) etenim te divite ritu*

*Ponere purpureos infantia adegit amictus*

*Stirpis honore datos, & nobile pectoris aurum.*

Locum hunc, quem satis implicatum fateor, primum ita explicat Emericus Cruceus, ut velit ponere accipiendum hic esse pro sumere, probarique his splendidum Statii genus, quoniam prætextam divite ritu induerat: ita deinde, ut ponere idem concedat esse, ac deponere, relinquere, abjicere, hisque probari, dicat, arctiorem fortunam parentum, quoniam reliquerit Statius una cum divite ritu, ut ipse Cruceus exponit, purpuram, seu prætextam. Mihi quidem violenta est prior interpretatio præcipue ob verbum illud *adegit*, quod invitum fecisse significat. Invitum autem prætextam sumpsisse, ridiculum est, invitum reliquisse facile intelligimus. Illud autem *divite ritu*, quod molestiam creat, jungam cum *purpureos*, ut sententia sit: *paupertas coegit deponere amictum, cui prætexta purpura, qualem solent divites ferre; vel etiam jungi potest cum sequentibus stirpis honore datos*, ut hic sit sensus: *paupertas coegit deponere purpuram ad stirpis honorem concessam, modo eam ferre per fortunam liceret, quemadmodum mos est divitum*. Facile vero adducor, ut credam, pauperibus licet ingenuis nullam aliquando fuisse prætextam, sed tamen hoc rarius evenisse puto, ac non nisi maxima premerentur egestate, ne umquam cum libertinis confunderentur.

Video autem novum posse scrupulum injici ex allatis poetæ verbis, ut hinc aliquis iterum velit, nobilitati prætextam, & auream bullam vindicare. Sed quam aliam credis, hominis Epirotæ generi lucem fuisse, quam præsertim Statius Romæ jactaret, nisi quod ingenuus civis Romanus? Non aliam ipse puto fuisse, quamvis credam, hanc in Epiro maximi æstimatam, atque hujus-

(a) *ibid.* (b) *l. 5. Syl. 3.*

huiusce stirpis honore Statio patii prætextam, & bullam convenisse, mihi persuadeo. Cum vero poeta bullam vocat *nobile pectoris aurum*, idem hic est *nobile*, ac ubi ait: (a)

*Nobile gemmato speculum portaverat auro  
Sed jam de phaleris.*

Has virosum fortium fuisse, certissimum est, ideoque inter dona militaria recensentur ab Alconio: (b) *quædam præmia & bonori, & lucro sunt, ut bæstæ, vexilla, phaleræ, coronæ civiæ*. Nobilitati dumtaxat phaleras tribuit tamquam ejus insigne Tiraquelus, non alia fretus auctoritate, quam illis Persii verbis: (c)

*Ad populum phaleras.*

Fortasse melius usus esset liviano loco, qui illi persuasit, annulos aureos nobilium tantum proprios fuisse, cum ibi phaleræ annulis jungantur ab historico: (d) *tantumque Flavii comitia indiguitatis habuerunt, ut plerique nobilium annulos aureos, & phaleras deponerent*. Verum quid sibi velit his verbis Livius, infra explicabo, cum mentio de annulis fiet, quando pro annulis illa assert juriconsultus; interim Persii locum nihil ad propositum facere, ajo. Neque enim phaleras propria significatione poeta usurpat, cum inquit:

*Ad populum phaleras: ego te intus, & in cute novi;*

sed phaleras bona aut corporis, aut externa vocavit, quæ quia populus miratur, ideo ea populo jactari posse, concedit, cum tamen viri sapientes animi tantum bona æstiment, quibus parum instructus est ille, quem poeta alloquitur. Hæc est vera Persii mens, ut doctissimus ejus interpres Isaacus Gausabonus exponit, cujus de phaleris hic est sensus: (e) *Inter ornamenta virosum fortium fuerunt phaleræ, ut omnes sciunt: hæc qui erant consecuti, cum insolentius jactarent, proverbiali locutioni locum fecerunt, qua res inanes, & fastuosæ appellantur phaleræ*.

Cæterum, qui phaleras nobilium tantum fuisse dicet, si cum phaleris & cursores apud Petronium offendimus? *Hinc involutus cocina gausapa lectica impositus est, præcedentibus phaleratis cursoribus*. Quin etiam apud Svetonium: (f) *armillata, & phalerata cum Mazacum turba, atque cursorum*. Num & id genus homines nobiles erant, qui rhedam, aut equos vel per urbem, vel in itinere præcederent? Servos dumtaxat hoc fungi cursorum munere Ale-

(a) l. 3. Syl. 4. (b) in l. 2. in Ver. (c) Sat. 3. (d) l. 9. c. 46. (e) ad Pers. l. c. (f) Ner. c. 30.

Alexander Severus iussit, eosque eodem loco, ac vilissimos hominum cocos, piscatores, fullones, balneatores habuit: (a) *cursorem nunquam nisi servum suum, dicens ingenuum currere nisi in sacro certamine non licere. Cocos, piscatores, fullones, & balneatores nisi servos suos habuit. Superest, ut de annulis videamus.*

Annulos phaleris junxisse Livium, nuper allatus locus ostendit. verum ejus verbis neutrum satis probatur nobilitatis insigne fuisse. Nobiles enim gestabant procul dubio annulos aureos, si, quod in luctu fieri consueverat, C. Flavio Cnei hominis libertini filio, ædili curuli creato, eos deposuere, ac si soli nobiles deposuere; hoc argumento nequaquam est, solos nobiles gestasse. Gestabat annulos aureos Flavii temporibus, quibus, teste Plinio, (b) *frequentior eorum usus deprehenditur, universus senatus, gestabant equites, quandoquidem alii, ut idem docet Plinius (c), ob Flavii comitia universum senatum, alii & equestrem ordinem, alii nobiles solos deposuisse tradiderunt.*

Quamvis & servis annulos aureos aliquando usurpatos, auctor idem Plinius sit (d), tamen videntur annuli aurei peculiare fuisse equitum ornamentum, iisque distinctum equestrem ordinem fuisse a plebe. Quod tamen non nisi sero constitutum, credam. Ex Cicerone (e) intelligimus, annulo aureo usum Verris scribam: sed ab eodem, scimus quoque, Verrem increpari, quod amicos suos, vilissimos scilicet homines, in concione annulis aureis (f) donasset. Asconius etiam sæpius citatus non plus annulis aureis tribuit, (g) quam ut essent *ingenuitatis* signa. Quapropter tandem Tiberii principatus anno nono puto, hoc certum obtinuisse, ut soli equites aureis annulis ornarentur, cum scilicet, quemadmodum refert Plinius, (h) *constitutum est, ne cui jus id esset, nisi cui ingenuo ipsi, patri, avoque paterno sestertia CCCC census fuisset, & lege Julia theatrâli in XVI ordinibus sedendi.* Sed hoc iterum quam cito abolicum? eodem (i) asserente, *postea gregatim insigne id appeti ceptum.* Sed qui plura de annulis desiderat, Plinium ipsum adeat, eosque qui hoc argumentum ex professo traçant: mihi satis est declarasse, nullam ex illis unquam, tamquam ex proprio insigni nobilitatem argui potuisse apud Romanos.

M

Aliis

(a) *Lamprid. in Vis.* (b) *lib. 33. cap. 2.* (c) *loc. cit.* (d) *loc. cit.*  
 (e) *lib. 2. in Ver. cap. 157.* (f) *lib. 2. in Ver. c. 29.* (g) *in l. 2. in Ver.* (h) *l. 2. c. 2.* (i) *ibid.*

Aliis gentibus alia fuisse nobilitatis insignia. Aliqua ex Tiraello (a) de hac re iuvat exscribere, omissis auctorum locis, quos ipse citat. *Apud Indos byssum non nisi nobilis inducat: apud Paribos nobiles anaxpridem triplam, & manicatam tunicam: apud Germanos viri nobiles non fluctuante veste, sed stricta, & singulos artus exprimente utebantur, contra Libyorum principes sagis. Ipsi Indis, Persis, Atheniensibus in auribus aurum ferre nobilitatem designabat: Thracibus punctos esse in facie nobiles significabat. Britannis, Gelomis, & Agatyrhis nobiliores ceruleo pingebantur: Apud Aegyptios comina proluxa signum erat nobilitatis. Quorum omnium fides penes eorum auctores sit.*

## C A P U T U L T I M U M.

*Impositura ex nobilium insignibus; eorum mores.*

**M**ultas ex nobilitatis insignibus imposituras factas apud gentes omnes puto, cum numquam, & nusquam defuerint, qui videri nobiles velent, cum minime essent, aut splendidiori saltem nobilitate, quam vere essent,

*Quilibet hanc bodie sibi vult, sibi dicit inesse,*

*Plus licet inde absit, quam distet Iberus ab Indo (b).*

Hoc apud Romanos usitatum, certe scio. De stigmatia illo Martialis: (c)

*Non hesterni sedet lunata lingua planta,*

Nimirum ut nobilis videretur lunatos calceos induerat.

Imagines vero mentitos, alienas aliquando suis inferendo, colligimus ex illo Plinii: (d) *extat Messala oratoris indignatio, qua prohibuit inferi genti suae Levinorum alienam imaginem, inertium etiam & despectorum aliquando imagines excitando, ex iis, quæ de Salutatione idem Plinius tradidit. Eos tamen, qui hoc agerent, eidem auctori excusantur: (e) sed pæc Messalarum dixisse liceat, etiam mentiri clarorum imagines erat aliquis virtutum amor, multoque honestius, quam mereri ne suas quis expeteret.*

Auxis-

---

(a) cap. 37. num. 162. (b) Palingen. Virg. (c) lib. 2. epig. 29. (d) lib. 35. cap. 2. (e) loc. cit.

Auxisse aliquando titulum imaginis posteros, patet ex Livio (a), quin falsos etiam titulos imaginibus inscriptos, ex iis, quæ de Minncio tradidimus, dum ad se familia quæque famam rerum gestarum, bonorumque trahit (b). Hinc vitiatam antiquitatis memoriam Historicus queritur (c). Huc spectant etiam mortuorum laudationes, quas, ait Tullius, (d) familia sua quasi ornamenta, & monumenta servabant, & ad usum, si quis ejusdem generis occidisset, & ad memoriam laudum domesticarum, & ad illustrandam nobilitatem suam. Verum dum quisque cupit laudes domesticas amplificare, & illustrare nobilitatem suam, historia rerum Romanarum facta est mendosior. Multa enim scripta sunt in illis, quæ facta non sunt, falsi triumphi, plures consulatus, genera etiam falsa, & ad plebem transiiones, cum homines humiliores in alienum ejusdem nominis infunderentur genus. Liquet ideo, quanti facta sit omnibus temporibus nobilitas, cum ei qui haberent, eam ostentare omni ratione niterentur, & qui minime haberent, omni arte mentiri. Præterquam quod enim homines, dum pleraque oratione majores suos extollunt eorum fortia facta commemorando clariores se esse putant (e), exiguo, sæpe etiam nullo labore, qui imaginum commendationem afferunt, honores, quorum humanum genus avidissimum est, consequuntur. Fatetur Cicero: (f) non idem mihi licet, quod iis, qui nobili genere nati sunt, quibus omnia populi Romani beneficia dormientibus affervuntur.

Qui fuerint veteribus sæculis nobilitati mores, Aristoteles docuit (g), neque de illis dubitandum. Honorum maxime appetentes semper nobiles fuere, ut jure questus sit Marius, (h) omnes honores non ex merito, sed quasi debitos repetisse nobilitatem, & bonorum premia creptum ire. Ignobilium contemtores describit Livius: (i) plebejos nobiles jam eisdem initiatos esse sacris (quibus patricii) ac contemnere plebem, ex quo contemni desierint a patribus; quin & novorum hominum, qui scilicet id nuperrime consequuti, quod olim eorum majores, significat Marius: (k) contemnunt novitatem meam. Sed luculentissimis verbis testatur etiam Cicero odium nobilium in novos: (l) videmus quanta sit in invidia,

M 2

quan-

(a) lib. 22. cap. 31. (b) Liv. lib. 4. cap. 16. (c) id. lib. 8. cap. 40.

(d) Brut. cap. 62. (e) Sallust. Jugur. (f) in Ver. l. 5. cap. 180. (g) Rhetor. lib. 2. cap. 18. (h) Sallust. Jugur. (i) lib. 22. cap. 34. (k) Sallust. Jugur.

(l) in Ver. l. 5. c. 122.

quantoque in odio apud quosdam homines nobiles novorum hominum virtus, & industria: si tantulum oculos dejecerimus, præsto esse insidias: Si ullum locum aperuerimus suspicioni, aut crimini, accipiendum esse statim vulnus: esse nobis semper vigilandum, semper laborandum videmus. Plura de veterum nobilitate quæ colligerem, non occurrunt. Hæc autem si quis cum iis velit, quæ nostris temporibus obtinere videmus, comparare, facili negotio possit.

F I N I S.

D E  
DISCIPLINA,  
E T  
M O R I B U S  
R O M A N A R U M  
F Æ M I N A R U M.

AMERICAN

IN

THE

REPUBLICAN

MUSEUM



# DE DISCIPLINA, ET MORIBUS ROMANARUM FÆMINARUM.

## C A P U T I.

*Petro Gradonico opusculum inscribitur .  
Ejus argumentum .*



Eminisse facile poteris , V. C. Petre Gradonice ; me aliquando pollicitum , hanc de *Disciplina* , & *moribus Romanarum Fæminarum* dissertatiunculam , qua complexus omnia ea sum , quæ ad sequioris sexus *vitam* , *instituta* , *studia* , *culum etiam* , & *ornatum* pertinere judicavi , non alii , quam tibi inscripturum , si unquam in publicum emissem .

Promissi itaque reus fidem meam libero . Hæc si vacuum tibi fuerit legendo percurrere , haud aliter , quam cum eadem e superiori loco a me recitata auribus olim exciperes , meam in levibus his , ac minutulis investigandis sedulitatem tibi probatum iri pro tua in me humanitate , confido . Quamquam haud nescio id fieri non posse , ut quod te adolescentem , qui in disciplinam meam totum te tradideras , literarum genus oblectabat , idem reipublicæ jam admotum , atque attentum patremfamilias oblectare possit , cum præcipue ex eo tempore tam multa inciderint , ut sit in rebus humanis , quæ a literarum studiis si minus totum avocarunt , certe in tam varia distraxerunt , ut qui non nisi in literis esse solebas , ad eas nunc divertere vix aliquando possis . Quantæ , quam multiplices , quam assiduas circumstetere te publicæ curæ hoc ipse præsertim superiore quadrien-

driennio, cum Veronenſem Præturam magna quidem cum gloria, ſed magnis etiam cum laboribus geſiſti, ad quas privatæ etiam, & domeſticæ qua lætæ, qua tristes acceſſere, ut cum utraq; fortuna tibi dimicandum velut fuerit. Lætiffimum illud quidem, quod tandem filiolo auctus es, maximo ſane Superum munere, quem eo ſuſceptum tempore, quo rempublicam Prætor Veronenſis gerebas, & nobiliſſimæ familiæ ornamento, & patriæ adjumento natum ſperamus. Verum quam triſte illud, quod paullo poſt optimo parente orbatus es, *Vincentio*, procuratoria dignitate clariffimo, ſed virtutibus omnibus ampliffimo ſenatore dignis longe clariore. Heu! quam grave illud vulnus fuit amantiſſimis liberis, quam grave omnibus bonis, mihi vero, qui tantum Mæcenatem, *praſidium*, & dulce de-  
*cus meum* amiſi, vix tolerabile. Sed mittamus triſtia commemorare. Qui tuum erga me, ac mea favorem ſatis perſpectum habeo, nulla re prohiberi volui, quo minus opusculum hoc, ut ut levis argu-  
 menti, ad te mitterem. Id autem libentius etiam nunc facio, quod vix e Veronenſi Prætura redux, ac jam rei frumentariæ curandæ  
 V — Vir in *ampliſſimum Ordinem* adleſtus, quo in altiori collocatus es honoris gradu, eo etiam bonarum artium ſtudiis, ſtudioſiſque pro tuo, jam non in eas dicam, ſed in rempublicam, cui maximo illæ ornamento ſunt, amore, favere impenſius *ſenator* debes.

## C A P U T II.

*Dies nominalis. Fæminarum prænomina: nomina: cognomina.  
 De nuptiarum nominibus.*

**D**IES luſtricus, ſeu nominalis, quo ſcilicet recens natæ puellæ luſtrabantur, eiſque nomen imponebatur, octavus a natali erat, cum pueri nono luſtrarentur, teſte (a) Plutarcho. Luſtratas etiam puellas per aviam, aut materteram, ſeu aliam ſuperſtitioſam vetulam, quam piatricem vocatam nonnulli ajunt, eodemque ritu, quo pueros reſert Perſius (b) luſtrari ſolitos, donec aliquis contrarium doceat, affirmare minime vereor. Votis vero conceptis, quid precatas puellæ anus illas deliras, credimus, niſi ut ſuo tempore nuberet, eam ſibi quæque beatiffima nura cuperet, formæ elegantia cæteras vinceret, & id genus ineptias? Luſtratis puellis nomen eadem die imponebatur.

De fæminarum nominibus, quæ a me alibi dicta ſunt, juvat modo

(a) *quaſt. Rom.* 102. (b) *ſat.* 2. v. 31.

do recoquere, & huc in suum locum transferre. Primum autem certissimum est, Fæminas prænominibus usas. Præterquam quod enim hoc evincit apertissima Varronis (a) auctoritas; contra Castalione (b) qui lapidum testimonio fæminarum nulli prænomen fuisse arguebat, collegit nuper vir doctissimus (c) plurimas inscriptiones Gruterianas ex quibus clare apparet, *Appiæ, Aulæ, Lucie, Marcæ, Numeriæ, Publiæ, Tiberiæ, Titæ*, prænominibus fæminas vocitatas. Adverte autem horum prænominum aliqua, ut a masculinis distinguerentur, solita scribi initiali litera inversa, ita *W. Marcæ, J. Titæ*, quamquam aliquando videtur per *J.* ita inversum *Luciam* etiam significari. Quoniam vero in antiquis lapidibus haud ita frequenter nominibus fæminarum præpositum prænomen reperitur, putant aliqui, rarum admodum ejus usum fæminis fuisse. His assentiri ego malo, quam contra pugnare. Aliqua tamen sunt de hujusmodi prænominibus adhuc disquirenda.

Prænomen *Cajæ*, quod pariter inversa *Q.* scribebatur, non proprium fuisse alicujus fæminæ, sed omnium commune, quod nubentes fumebant, ajunt. De communi nomine *Cajæ* alibi dicam, hic peculiare etiam nonnullarum fuisse, contendo. Sicut enim quamvis omnis mater familias *Cajæ*, & pater familias *Cajus* vocaretur, tamen *Cajus* aliquorum proprium prænomen erat; cur & *Cajam* fæminæ alicujus esse proprium, negant? Si enim vere fuit prænomen *Cajæ* Cecilie uxoris Tarquinii, cur & aliarum esse non potuit? Exat apud Gruterum (d) hæc inscriptio.

Q. CLODIAE. FILIAE. DULCISSIMAE  
DECIPIMUR. VOTIS. ET. TEMPORE  
D. FALLIMUR. ET. MORS M.  
DERIDET. CURAS. ANXIA. VITA  
N I H I L

Porro si vir clarissimus Sertorius Ursatus, nulli in hoc eruditionis genere secundus, ac in explicandis antiquorum lapidum inscriptionibus acutus æque ac felix, non errasse dicendus est, ubi (e) ex parentum, qui satis ex verbis apparet, caritatis ac mærotis sensu, tenella adhuc ætate Clodiam hanc decessisse, satis liquere arbitratur; N falli

(a) de L. L. lib. 5. (b) Contr. Assert. Prænom. fem. (c) Joan. Ant. Ursatus in notis ad epist. Italicæ Sertorii Ursati epist. 12. Patav. apud. Cominum 1719.

(d) pag. DCLXXVII. 12. (e) epist. Italica Patavii apud Frambertum 1659. Epist. 3.

falli non possumus asserentes fœminarum aliquas etiam ante nuptias, proprio & peculiari prænominine appellatas *Cajas*.

Sed præterea *Primam*, *Secundam*, *Tertiam*, *Quartam*, *Quintam*, & his similia fuisse fœminarum prænominina, asserit Sigonius (a), negant tamen aliqui, sive qui dicunt nomina fuisse mere ordinalia, sive qui potius credunt fuisse cognomina. Verum nomina mere numeralia, & ordinalia certe non fuerunt, cum diminutiva fiant, sicut cætera fœminarum nomina. Ut enim *Domitilla* dicebatur, *Clau-dilla*, *Livilla*, *Drusilla*, quæ omnia diminuta sunt blandimenti gratia a *Domitia*, *Claudia*, *Livia*, *Drusa*, ut *Tulliola*, *Paullina* a *Tullia*, & *Paulia*; ita etiam a *Prima* *Primilla*, & *Primula*, a *Quinta* *Quintilla*, & *Quintula*, a *Tertia* *Tertulla*. Insuper cum fœminæ hoc aliquando solum nomine & a suis, & ab alienis appellentur, quis credat, per hæc nomina ordinem dumtaxat, quo natæ sunt, significari? Ergo illa *Tertia* nullo alio nomine nota, quam *Tullius* ait a *Verre* in *Syracusanum* lucum productam, vere *tertia* erat *Isidori* filia? cui hoc ex *Tullianis* verbis videbitur? En illa (b): *huc Tertia illa perducta per dolum, atque insidias ab Rhodio tibicine maximas in istius castris effecisse turbas dicitur*. Deinde paucis interjectis: *sic hanc Tertiam dilexit, ut eam secum ex provincia exportaret*. *Tertiam* *Æmiliam* ita pater appellat apud *Tullium* eundem (c): *quid est, mea Tertia? quare tristis es?* Sic pariter *Tullius Juniam Cassii* modo *Tertiam* modo *Tertullam* vocat. Ad *Brutum*: (d) *quod scribis te ad Tertiam sororem scripsisse*. Ad *Atticum* (e): *Tertullæ nollem abortum*. *Tertiam* vero nomen inditum fœminis frequentius puto, quam alia, quæ a numero deducta sunt. Plures enim *Tertias* ex auctoribus, ac lapidibus novimus, quam *Quartas*, aut *Quintas*.

Cum autem huiusmodi numeralia inter vera, ac propria fœminarum nomina recensenda sint, earum potius prænominina, quam cognomina arbitror fuisse. Cognomina tamen aliquando eadem facta, inficiari non audeo, cum præcipue ne in viris quidem novum hoc sit, ex prænominibus gentium nomina, & familiarum cognomina facta aliquando esse. Assentior itaque viro eruditissimo (f) asserenti in illa inscriptione, quæ apud *Gruterum* reperitur (g).

#### L. AFRENA

#### C. F. SECUNDA

*Secundam* cognomen *L. Afrenæ* fuisse, quo cognomine multi etiam  
ma-

(a) de nom. Rom. cap. 3. (b) in *Verr.* lib. 5. cap. 31. (c) de divin. lib. 1. cap. 103.  
(d) *Brut. Germ. epist.* 6. (e) lib. 14. *epist.* 20. (f) *J. Ant. Ursas. in notis ut supr.*  
(g) pag. DCCXXV. 9.

mares inveniuntur. Perpetuum tamen hoc fuisse ne credam, facit Varronis (a) auctoritas: in prænominibus ideo non fit item, quod hæc instituta ad usum singularia, quibus discernerentur nomina gentilitia, ut a numero Prima, Secunda, Tertia, Quinta. Cur autem Quintus, Sextus, Decimus fuerint marium prænomena, quamvis sic vocari ceperint a numero, quo erant inter fratres, illa vero non fuerint prænomena fæminarum? Ajunt frequentius inveniri gentilitio nomini postposita, sed hoc & in maribus aliquando accidit, ut prænomen nomini postponatur. Qua de causa cum præponuntur, temere id fieri dicemus, non vero, cum postponuntur? Cur qui ajunt nihil referre, quod scriptum sit in quodam lapide (b).

TERTIA

UTTEDIA. C. F.

iidem pro se facere putant, quod in alio e regione hujus posito legimus (c)

UTTEDIAI. C. F.

QUARTAI

De eadem fæmina inquit Livius (d): unius *Claudie Quintæ*, Tullius vero (e): ne progenies quidem mea *Q. illa Claudia*. Cur autem *Quintam* cognomine potius ex Livio, quam prænominem ex Cicerone dictam fuisse Claudiam, arguemus? Inveni lapidem hunc Cominiorum apud Gruterum (f).

QUARTUS. COMINIUS

C. F. SIBI. ET

TERTIAE. PETRONIAE

M. F. UXORI. ET

L. COMINIO. C. F. ET

C. COMINIO C. F.

FRATRIBUS. ET

TERTIAE. COMINIAE

SORORI. ET

AMPLIATO. ET. FELICI. LIB.

Cum tres *Cominios* sine ullo cognomine hic videas, quis credet *Cominiae* cognomen fuisse *Tertiae*, vel si illud nomini postpositum invenisset? *Tertia* ergo erat *Cominiae*, ideoque & *Petroniae* prænomen. Quid quid tamen sit de his, ac de aliis fæminarum prænominibus, certe raro admodum prænominibus fæminæ ab auctoribus distinguuntur.

N 2

(a) de L. L. l. 1. (b) Grut. pag. DCDXXVII. 3. (c) *ibid.* n. 4. (d) l. 29. c. 14. (e) *Pro Cal.* c. 34. (f) pag. DCCXXXIII. 1.

tur. Etenim his satis est sorores inter se ætatis ratione distinguere, ut *Tullia Major*, & *Minor*, ab aliis autem omnibus fœminis, vel patris nomine, ut *Cæcilia Balearici filia*, vel mariti, ut *Junia Cassii*, sic enim nullo alio addito semper uxor significatur, aliquando & filiorum, ut *Cornelia Gracchorum mater*.

Quæ Fœminæ prænomine carebant, si carebant ullæ, eæ vel uno tantum, hoc est gentilitio, vel duobus adhuc nominibus, gentilitio scilicet nomine, ac cognomine vocabantur. Cognomen omnibus fœminis non fuisse, certum est ex lapidibus. Præterea quæ ex familia erant, cui nullum esset cognomen, ut *Antonia*, eas probabile non est, sibi inditum voluisse. Falsum autem dicere, natu majoribus tantummodo cognomen adjectum discriminandi causa, ut videtur innuere Lipsius, ubi ait (a): *Cn. Domitio duas fuisse filias, quarum utraque Domitia gentis nomine dicta: sed minor discriminandi causa cum Lepidæ cognomine*. Primum enim valde incertum est, unane, an duæ fuerint Domitiæ, deinde dicendum videretur, quot quot fœminæ occurrunt cum nomine, & cognomine, omnes fuisse alia sorore minores, quod certe dicturum puto neminem, alioqui *Vipsania*, *M. Agrippæ filia*, ex *Attica* suscepta, minor fuisset *Agrippina*, quam idem suscepit ex *Julia*. Et illam enim, quamvis Tacitus (b) *Vipsaniam* solum vocet, *Agrippinam* tamen patris cognomine vocatam, discimus ex *Svetonio* (c): *Agrippinam M. Agrippa genitam, neptem Cæcilii Attici, ad quem sunt Ciceronis epistolæ, duxit uxorem*. Verum si & alteram *Agrippinam*, *Julia genitam*, *Vipsaniam* nomine pariter dictam negaverimus, quamquam cognomine notior est, jam & de fœminarum nominibus incipiet dubitari.

Nomen autem, & cognomen fœminæ de patris nomine & cognomine plerumque sumebant, ut *Vipsania Agrippina Vipsanii Agrippæ*, *Valeria Messalina Valerii Messalæ*, *Vespasia Polla Vespasii Pollionis filia*. Magis tamen nonnumquam placuit matris, & avi materni, seu aliorum ex majoribus nomen. Sic *M. Agrippa* alteram ex *Julia* filiam *Juliam* Augusti avi ejus materni nomine appellavit, sic *Claudius Imperator* filiam ex *Petina*, *M. Antonii* avi sui materni nomine *Antoniam* nominari voluit. Aliquando cum alterius gentis nominis patris tamen cognomen sumebant, ut apud *Gruterum* (d) quamdam *Clodiæ Nices*, & *Lælii Sperati* filiam, *Clodiam Speratam* dictam invenio. Sæpius tamen, si alterutrum ex nominibus extra paternam domum sumebatur, nomen quidem patris erat, cognomen vero

(a) ad Tac. l. 12. ann. c. 64. (b) l. 1. ann. c. 12. & l. 3. c. 19. (c) Tiber. c. 7. (d) pag. 627. num. 11.

vero aliunde petitum . Ita *Junia* C. Junii Silani filia *Torquata* cognomen fuit , *Domitia* L. Domitii Aenobarbi filia fuit cognomen *Lepida* . Haud ita tamen raro fœminis utrumque , nomen ſcilicet , & cognomen extra patris familiam quaſitum , imponi conſuevit . De *Poppæa* Tacitus (a) : *erat in civitate Sabina Poppæa, T. Ollio patre genita, ſed nomen avi materni ſumpſerat illuſtri memoria Poppæi Sabini, conſulari, & triumphali decore præfulgentis.* Hoc autem animadvertendum eſt, ne quoties lapides reperimus, ubi fratres, & ſorores diverſo nomine, ac cognomine donantur, eos ſtatim uterinos potius, quam conſanguineos fratres exiſtimemus. Potuit enim ſoror conſanguinea aliunde habuiſſe indita nomina, ac frater haberet .

Dubitant viri docti fuiſſe poſt nuptias, iis ſcilicet, quibus antea vocabantur, an maritorum nominibus fœminæ appellarentur. Chriſtianus Ulricus Grupen, illas uxores, quæ in matrimonio tantum, non autem in manu etiam maritorum erant, [ de utriſque infra ] certum (b) putat, iisdem nominibus vocitatas, quibus, antequam nuberent, vocabantur, ac dubium de illis eſſe poſſe dumtaxat, quæ in manum mariti convenerant . De his igitur intelligendus Reineſius, ubi ex Antiſtiæ Antiſtii monumento quodam docuit (c), *uxores in familias maritorum tranſiſſe, cenſitasque maritorum gentilitiis nominibus.* Neque enim in maritorum familiam tranſibant, niſi quæ uxores in manu conveniebant. Non erat ideo, cur ipſum ſententiæ ſuæ pœniteret, alibi aſſerentem (d), *uxores non ſemper ſequi familias maritorum, ſed denominari a parentibus, pariterque alio loco (e), in more Romanorum tam innuptas filias, quam factas uxores, modo maritorum, modo parentum nominibus, & cognominibus nuncupare, modo patris ſolum.* Etenim quæ occurrunt uxores iisdem, ac viri, nominibus nuncupatæ, ex eo uxorum genere has eſſe dicemus, quæ in viri manum convenerant, atque in ejus familiam tranſierant; quæ vero diverſis, ac maritus, nominibus appellantur, ex altero uxorum genere fuiſſe dicendum eſt, quæ in matrimonium tantum cum viro convenerant, neque in ejus familiam tranſierant .

Sed ut probabiliora fortasſe loquamur, placet cum laudato Grupen (f) idem exiſtimare de nominibus uxorum, quæ in manum convenerant, ac de filiorum adoptivorum . Tam hujusmodi enim uxores, quam adoptati in alienam familiam diverſo quidem modo, ſed pari effectu tranſibant. Sicut igitur qui adoptabatur, quamvis & lege

(a) l. 15. ann. 2. 23. (b) de Uxor. Rom. c. 3. § 23. (c) Cl. I. 12. (d) Cl. VI. 20. (e) Cl. I. 23. (f) *ibid.*

lege adoptionis, & more publico adoptantis nominibus vocari nunquam non debuisset, tamen & in familiari sermone, & ab auctoribus etiam sæpe patris naturalis nomine vocabatur, de quo aliqua a me quoque alibi (a) delibata sunt; sic etiam uxores, quæ in mariti manu, mancipioque erant, maritorum quidem nomina sumpsisse debebant, sed prioribus tamen, quæ ante nuptias indita, appellari frequentius solebant, seu quod illis notiores erant, seu quod ita libebat.

At dices: si uxor, quæ in viri manu, ac potestate erat, mariti nomine vocabatur, quid erat, quod Augustus Liviam, quam in manu habuisse nemo forte negaverit, suum nomen ferre testamento juberet? Teste enim Svetonio (b) *heredes instituit primos Tiberium ex parte dimidia, & sextante, Liviam ex parte tertia, quos & ferre nomen suum jussit*. Id mirum visum est Causabono (c) de Tiberio, qui multo ante ab Augusto adoptatus, filius illius erat, ejusque propterea nomen ferebat. Quod itaque vir eruditissimus de Tiberio existimat, & nos de Livia existimabimus, scilicet & Tiberium per adoptionem, & Liviam per conventionem in manu, cum uterque in familiam Augusti transiisset, cætera omnia ejus nomina consecutos præter Augusti cognomen, quod sibi Octavianus servaverat, quod in eo forte vim magnam potentis suæ sitam arbitrabatur. Hoc igitur nomen est, quod tandem cum illis communicatum testamento voluit. Hujus sententiæ videtur fuisse & Philippus Beroaldus, qui ait (d), *ut Tiberius Augustus, Livia Augusta diceretur*. Sed de Augusti nomine intelligendum esse locum Svetonii, satis mihi constat ex verbis alterius Historici, qui de Livia inquit (e), *in familiam Juliam, nomenque Augustæ adsumebatur*.

Locus tamen hic Taciti novum potest scrupulum injicere, quoniam ut certos de *Augustæ* nomine, ita nos de *Julie* nomine, quod ante mariti testamentum Livie convenisse credimus, sicut mariti nomina aliis etiam uxoribus, quæ in manu ejus erant, facere dubios potest. Etenim non ante *Julie* nomine vocari potuit, quam in familiam Juliam assumpta esset. Verum id non mihi tantum obijcitur, qui uxores statim, ac in maritorum manum convenissent, eorum nominibus ajo appellatas, sed iis omnibus etiam, qui hujusmodi uxores asserunt *in familiam maritorum migrasse*, quos vide apud Græpæ (f). Mirum itaque sit nemini, quæ in Julia familia erat, quod uxor, iterum per adoptionem in eandem familiam adsumptam fuis-

(a) de Nobil. Rom. Vet. c. 17. (b) Aug. c. 101. (c) ad Suet. l. c. (d) ad Sueton. l. c. (e) Tac. ann. 1. (f) de Ur. Rom. c. 2. §. 3.



fuisse, ut quæ, conjux fuerat, novo exemplo, ut ait Lipsius (a), *filia etiam mariti fieret*, novumque jus eorumdem ferendorum nomen acquireret. Hoc autem ideo factum ab Augusto censeo, quod aliter non posse crediderit eam in Augustæ nomen adsumere, nisi filio Tiberio in omnibus æquasset. Cæterum & ante adoptionem *Juliam* eam auctores Græci vocant, non κατὰ πρόληψιν, ut Causabonus (b) putavit, sed quia & tunc vere *Julia* erat, & post adoptionem *Liviam* ex Latinis Plinius (c) vocat, quia *Liviæ* familiæ aliquando fuerat, eo plane modo, quo paullo ante diximus, de adoptatis fuisse usitatum.

Id etiam addo, labente Imperio, postquam facta est, ut eruditi omnes observarunt, magna nominum confusio, cum jam matrimonia per conventionem in manu in desuetudinem abierant, videri tamen mulieres gentilitiis maritorum nominibus nuncupatas, quæ aut sola, aut cum paternæ gentis nominibus conjuncta usurpabant. Ita *Constantii Clori*, qui e gente *Flavia*, uxores, *Helena* e gente *Julia*, & *Theodora* Valerii Maximiani privigna, *Flavia Helena Augusta*, aut *Flavia Julia Helena Augusta*, & *Flavia Maximiana Theodora* nuncupantur in nummis apud Mediobarbum, & Bandurium. Hoc autem a prisca liberæ reipublicæ, & priorum Imperatorum temporibus derivatum, nemo non dixerit.

### C A P U T III.

*Puella sub pædagogi custodia. Lanificio, & literarum studiis deditæ. Nuptiarum apparatus.*

**N**utrices, quæ pueros, infantes minutulos domi procurabant (d), & infantes minutulas procurasse, minime ambigo. Verum, cum infantia egressæ puellulæ, non earum custodia nutriculis solummodo credita fuit, sed adhibiti etiam pædagogi, qui ex libertis, aut certe ex honestioribus servis, vitæ morumque custodes. Facile conjicias hoc ex Plinio (e), ubi de Fundani. filia: *ut nutrices, ut pædagogos, ut præceptores pro suo quemque officio diligebat*: ut ex Valerio Maximo (f), qui Pontium Aufidianum refert, postquam comperit filiæ suæ virginitatem a pædago proditam Fannio Saturnino, & sceleratum servum affecisse supplicio, & ipsam etiam puellam necasse. Quapropter Lepidæ illi destinatæ aliquando L. Cæsari uxori, ac D. Au.

(a) ad Tac. l. c. (b) ad Svet. l. c. (c) l. 37. c. 10. (d) Plant. Pæn. prol. v. 28. (e) l. 5. epist. 16. (f) l. 6. c. 1.

Augusto nurui, cui simulati ex P. Quirinio partus accusatæ aqua, & igne interdictum fuit, pædagogum fuisse Pudentem quemdam existimo, cujus est marmor, quod Bergomi visebatur, referente Lipsio (a). Extat idem etiam in collectione Mazochii (b), sed nulla ibi Pudentis mentio.

PUDENS. M. LEPIDI. L. GRAMMATICUS  
 PROCURATOR. ERAM. LEPIDAE. MORES. Q  
 REGEbam. DUM. VIXI. MANSIT. CÆSA  
 RIS. ILLA. NURUS. PHILOLOGUS. DISCI  
 PULUS

Duo hic in familia Lepidi munera videtur exercuisse, alterum procuratoris, quales in divitum domibus fuisse, ex Fabio Majore (c) constat, alterum filiae pædagi. Mores enim regere pædagi erat, neque ulla propterea major Pudenti, cui non temere videtur Lipsio post Lepidæ damnationem positus lapis, adscribi gloria potuit, quam quod, eo vivo, & mores regente, casta & bona Lepida fuerit.

Hæc prima parentum cura, ut probis moribus puellæ imbuerentur, altera, ut industriæ statim assuescerent. Lanificio autem a prima ætate deditas patet ex joco illo, quo Q. Opimius Egilio puellares delicias exprobrabat (d): *quid tu, Egilia mea? Quando ad me venis cum tua lana, & colu?* Hoc clarum etiam ex Sancto Hieronymo, ubi ad Latam de Paulæ institutione scribit (e): *disceat & lanam facere, tenere colum, ponere in gremio calathum, rosare fuscum, stamina pollice ducere*: Itemque ubi de instituenda Pacatula scribit ad Gaudentium (f): *Interim & tenero sentet pollice fila ducere: rumpat sepe stamina, ut aliquando non rumpat*. Neque aliter esse potuit, cum nuptæ etiam, ut infra ostendemus, hujusmodi operibus operam darent. Exercebantur autem domi una cum matre. Ovidius epistolam, quam ad Perillam filiam suam dedit, ita alloquitur (g):

*Aut illam invenies dulci cum matre sedentem,*  
 interpretor, ad lanæ opificium.

Verum virgunculæ Romanæ literis quoque nec Latinis tantum, sed & Græcis operam navabant. Hinc Quintiliani vota nemo rideat, ad optimam filiorum institutionem etiam in matribus eruditionem optantis (h): *in parentibus vero quamplurimum eruditionis optaverim. Verum nec de patribus tantum loquor*. Nutrices quidem, quippe quæ, servæ, aut libertinæ cum essent, minime liberaliter institutæ fuerant, si fieri posset, sapientes optasse Chrysippum, solummodo ait; matres vero

(a) *ad Tac. l. 3 ann. c. 4.* (b) *pag. 43.* (c) *Declam. 345.* (d) *Cic. de Orat. l. 2. c. 277.*  
 (e) *Epist. 57. alias 7.* (f) *Epist. 94. alias 12.* (g) *Trist. l. 3. eleg. 7. v. 3.* (h) *inß. l. 1. c. 12.*

vero ideo certe eruditas idem quoque libere optat, quod hæ ingenuæ atque ingenue in literis educatæ. At cum Juvenalis, & univæ sœ-  
minis Græcanicæ eruditionis, sermonisque affectationem exprobet,  
& in juvenculis hanc tolerandam, affirmet, id plane ostendit, Ro-  
manas fœminas a pueritia in Græcis literis versatas. (a)

*Nam quid rancidius, quam quod se non putat ulla  
Formosam, quam quæ de Tusca Græcula facta est,  
De Sulmonensi mera Cecropis? Omnia Græce,  
Cum sit turpe magis nostris nescire Latine?*

— æmus tamen ista puellis.

Si quis autem a me sciscitetur, privatim ne, ac domi suæ, an  
publice puellæ apud Romanos erudiri solerent; minime dubitem,  
aliud apud alios usitatum, respondere. Cum enim ex Fabio, (b)  
qui, utrum utilius sit, quærit, intelligamus, pueros etiam priva-  
tim domi erudiri, aliquibus placuisse; cur secus de puellis censuisse  
omnes, existimabimus? Quemadmodum senior Cato filios suos,  
quam aliis tradere, ipse maluit erudiendos suscipere, teste Plutar-  
cho (c); ita etiam Ovidius Perillam suam pater poeticis literis in-  
formare voluit (d).

*Hoc (Perillæ ingenium) ego pegasidas deduxi primus ad undas,  
Ne male fecundæ vena perires aque*

Fundani etiam filiam, cujus meminimus, privatim domi præcepto-  
res habuisse, dixerim, cum videatur Plinius eos, qui in familia erant,  
numerare, nutricibus, ac pædagogis præceptores jungendo (e): *ut  
nutrices, ut pædagogos, ut præceptores pro suo quemque officio diligebat.*  
Extabant tamen puellis erudiendis publice ludi apud Romanos. Hoc  
luce clarius ex Livio, qui cum refert, Virginiam illam, quam ma-  
ximo suo malo Claudius X-Vir deperibat, adultam jam, ac Icilio  
desponsam in forum processisse, ne mirum, & a fide alienum vide-  
retur, id ausam pudicissimam virginem, causam subicit his verbis  
(f): *ibi namque in tabernis literarum ludi erant.* Vides autem, cum  
aliud nihil addat historicus, hinc manifestum fieri, in more hoc po-  
situm fuisse, ut puellæ literarum ludos frequentarent. Est locus apud  
Horatium (g), in quo explicando, præterquam illis, qui intactum  
relinquunt, hæcisse omnibus aqua, mihi videtur.

— Demetri, teque, Tigelli,

*Discipularum inter jubeo plorare cathedras.*

Id ipse proprie dictum, arbitror, neque confugiendum aut ad mi-  
mas,

(a) Sat. 6. v. 185. (b) Instit. l. 2. cap. 2. (c) Cat. Maj. (d) I. c. v. 15. (e) I. c.  
(f) l. 3. c. 44. (g) l. 1. Sat. 10. v. 90.

mas, quæ cathedris, de quibus suo loco, minime deferebantur, aut ad Demetrii, Tigellique, eorumque discipulorum mollem animum, & mores effeminatos. Vere illos *discipularum* fuisse doctores puto, puellisque docendis ludos aperuisse.

Cæterum cur tam raræ extiterint Romæ mulieres, quæ literarum laude floruerint, id in causa fuit, ne tardius sæminarum ingenium infimulem, quod non multum ultra primas literas progrediebantur sicut Fundani filia memorata, de qua nihil amplius refert Plinius (a), quam *studiose, & intelligenter lectitasse*, & cum tenera ætate nuberent, statim studia dimittere, atque familiæ procurandæ, educandisque liberis operam dare cogeantur. Quamquam vero fortasse ad severiores disciplinas sæminæ vulgo non admittebantur; non defuisse nihilominus præter Corneliam, Læliam, Hortensiam illas ob eloquentiæ laudem a Quintiliano (b) prædicatas, plurimas alias etiam, quæ Grammaticos, Rhetoras, Dialecticos audissent, Juvenalem legentibus persuasum facile erit. Ad poetas tamen, ad rerum amatoriarum scriptores, aliosque id genus, ut illinc, quod poterant, eruditionis sexui conveniens, haurirent, omne studium plerasque contulisse, mihi videor posse affirmare. Hujusmodi sane deliciis dedita illa (c).

— *quæ cum discumbere cepit,*  
*Laudat Virgilium, peritura parcit Elise,*  
*Committit vates, & comparat inde Maronem,*  
*Atque alia parte in trutina suspendit Homerum.*

Neque alios ex Græcis, ac Latinis scriptoribus proponit sæminis legendos Ovidius (d).

*Sit tibi Callimacbi, sit Coi nota poetæ,*  
*Sit quoque vinosi teja musa senis.*  
*Nota sit & Sappho* —  
*Et teneri possis carmen legisse Propertj,*  
*Sive aliquid Galli, sive, Tibulle, tuum,*  
*Et profugum Ænean, altæ primordia Romæ,*  
*Quo nullum Latio clarius extat opus*

Propterea cum hujusmodi scriptoribus amatoriiis oblectatos dicat Horatius Hermogenem illum Tigellum, ac Demetrium, namque hi (e)

*Nil præter Calvum, & docti cantare Catullum,*  
 quos nequaquam, ut advertere etiam alii, ut malos poetas, neque enim

(a) *loc. cit.* (b) *Inst. l. 1. c. 1.* (c) *Juven. sat. 6. v. 434.* (d) *de Art. l. 3. v. 329.*  
 (e) *Horat. l. c. v. 19.*

enim potest, sed ut molles illis obicit; hinc validius, quam supra attuli, conjecturam firmo, eos scilicet vere puellarum præceptores fuisse.

Ita aut dulci (a) cum matre sedentes, aut inter libros *Pieridesque suas*, adolecebant Romanæ puellæ non sine magna virginei pudoris cura. Hinc cum probrosis mulieribus omne commercium illis a parentibus vetitum. Egilius ille puellarum more jocatus Opimii joci respondit (b): *matrem vetuisse ne ad famosas mulieres accederet*. Cum fidicina consuetudinem omnem filia interdicit pater ille Plautinus, altero id probante (c).

— *Pe: cave sis cum filia*

*Mea copulari banc; neque conspiceri: jam tenes?*

*Divortunt mores virgini longe ac lupæ.*

*Ap: Docte ac sapienter dicis. N. n. nimis potest*

*Pudicitiam quisquam suæ servare filia.*

Matris ideo lateri perpetuo adhæsisse, colligi potest ex versibus Catulli, ubi quam ægre eæ, quæ nuberent, a matre divellerentur, significat (d):

*Hesperæ, qui cælo fertur crudelior ignis?*

*Qui natam possit complexu avellere matris,*

*Complexu matris retinentem avellere natam?*

Omnibus modis servatas a matribus virgines probat etiam illud ejusdem poetæ de nova nupta (e):

*Tu fero juveni in manus*

*Floridam ipse puellulam*

*Matris e gremio suæ*

*Dedis. O Himenæe Himen.*

Donec nuberent, a conviviis virorum verecundiæ gratia arcebantur: prodibant tamen in publicum, ac, nisi adesset mater, aut cum patre, ut Voconii filia, in quas jocatum. Tullium, refert Plutarchus (f): aut cum nutrice, ut Virginia apud Livium (g): aut cum matrona aliqua, quam propinquitate contingerent, ut ea, quam in quoddam sacellum deductam ab ejus matertera Cecilia Metelli, legimus apud Ciceronem (h).

Plenis annis nubles, sicut pueri crines Apollini cum virilem togam sumpturi erant, sic puellæ *pupas*, imagunculas scilicet illas, quibus infantilibus annis luserant, Veneri dicabant, tamquam

O 2

vir-

(a) Ovid. Trist. lib. 3. el. 7. v. 3. (b) Cic. l. c. (c) Epid. aff. 3. sc. 2. v. 19.

(d) carm. 61. v. 19. (e) carm. 60. v. 65. (f) Cicero. (g) loc. cit. (h) de Divin. lib. 2. cap. 104.

virginitatis insignia, & ad spem fausti matrimonii votum. Persius [a].

— *Veneri donata a Virgine pupæ.*

Sub Veneris enim tutela, ac potestate virgines erant, quam *Fortuna Virginalis* nomine colebant, eique sacra faciebant, imputabantque, si quid mali accidisset, cum contra matronæ, *Fortunam muliebrem*, hoc est Junonem venerarentur. De vestitu, & ornatu Virginum alius erit dicendi locus. Sua grandiusculis non deerant artificia ad voluntates adolescentum alliciendas, sibi que optatas nuptias conciliandas. Vide matris studium in ornanda filia ad eum, cui desponsandam sperat, capiendum, apud Claudianum [b]:

*Ac velut officis trepidantibus ora puella  
Spe propiore tori, mater solertior ornat,  
Adveniente proco, vestesque & cingula comit.  
Sæpe manu, viridique angustat jaspide pectus,  
Substringitque comam gemmis, & colla monili  
Circuit, & baccis onerat candentibus aures.*

Quæ ad nuptias spectant, cum occupata sint, missa faciam. Quæres hæc a Brissonio, aliisque, qui de Nuptiis, earumque ritibus scripsere. Nuptias autem magno apparatu adornari solitas, discas ex Terentio, ubi callidissimus servus, quod apparati nihil viderat, minime futuras nuptias conjectat [c]:

— *introduire neminem*  
*Video, exire neminem, matronam nullam in ædibus:  
Nil ornati, nil tumulti: accessi, introspecti.*

Ratio tunc civilium officiorum necessitatem quamdam nitore teste Plinio [d], ideoque magnarum impensarum imponebat. Propterea Quintiliani filia Junio Celeri nupturæ quinquaginta ille millia nummum contulit, ut [e] secundum conditionem mariti veste, & comitatu instrui posset. Eadem de causa Fundanus cum filiam egregio juveni destinasset, dicitur [f] fuisse multa erogaturus in vestes, margaritas, gemmas.

CA.

[a] *Sat.* 2. v. 70. [b] *de Sens. Conf. Honor.* v. 523. [c] *Andr. aff.* 2. sc. 2. v. 26. [d] *l. 6. epist.* 32. [e] *ibid.* [f] *l. 5. epist.* 26.

## C A P U T IV.

*Nubentium ætas. Conjugum concordia. Uxorum duogenera. Puella, etiam nupta. Cæsa, Domina, Mater familias, Matræna.*

*Tres mulierum Romanarum ordines.*

**Æ**Tate admodum tenera nuptui dabantur puellæ Romanæ, cum Græci non nisi maturiores, atque utero ferendo pares in matrimonium collocarent. Nondum annos quatuordecim impleverat Fundani filia, & jam destinata erat egregio juveni, ait Plinius (a), jam electus nuptiarum dies. Sed duodecim etiam annos natas nupsisse, testis est Plutarchus (b), quin nondum viro maturas aliquando, colligi potest ex veteri jurisconsulto (c): quod vir ei, quæ nondum viripotens nupsisset, donaverit, ratum futurum existimo. Octavianus Augustus, referente Svetonio, (d) privignam Marci Antonii Claudiam, Fulviæ ex P. Clodio filiam, duxit uxorem, vix dum nubilem. Non nego tamen, aliquas fuisse Jove averso ortas, quæ tardius, & prope ætate vergente nupsissent. Plautus: (e)

*Quam maxima possum tibi, frater, dote dare:*

*Sed est grandior natu: media est mulieris ætas.*

Consuetudo autem hæc, quæ ex veteri Numæ instituto Romæ obtinebat, acerbis adhuc virgunculas collocandi, sociandis conjugum animis, ineundæque conjugali vitæ maxime utilis videtur Plutarcho (f). Quis enim dubitet, quin ea ætate ductam propria suæ quisque domus disciplina viri instituerent, atque ad voluntatem molles illos annos velut fingerent? Livius (g): perinde uxor instituta fuerat, liberique instituebantur. Hinc dicto audientes viris, conjugali amore unanimis, placidæ, industriæ fuere Romanorum uxores, quod Plutarchus (h) improbarum exemplis probari affirmat: sicut enim apud Græcos memoriæ mandant historici, qui primum sanguinem civilem fuderint, aut arma fratribus inulcrint, aut extiterint parricide; ita recensens Romani, principem nuncium uxori nullo exemplo Sp. Calvilius remisisse anno ab urbe condita tricesimo trecentesimo: primam Pinarii uxorem, Thaleam nomine, jurgia habuisse cum socro Gegania, Tarquinio regnante superbo. De illius nomine, qui primus uxori libellum repudiî misit, deque anno, quo missus, variant auctores, ac probabilius est non

(a) l. 5. epist. 16. (b) comp. Lye. & Num (c) Labeo l. 65. ff. de Dona inter virum, & uxorem (d) Aug. cap. 62. (e) Aul. adl. 2. sc. 1. v. 36. (f) l. 6. (g) l. 3. cap. 44. (h) l. 6.

non nisi post quingentesimum urbis annum id accidisse . A. Gellius hæc habet (a) : *Memoriæ proditum est , quingentis fere annis post Romanam conditam , nullas rei uxoriæ neque actiones , neque cautiones in urbe Romana , aut in Latio fuisse , nullis etiam tunc matrimonii divertentibus .* Licet autem annis vententibus hæc exempla frequentiora esse cœperint , virorum etiam disciplina in pejus versa , nihilominus sæpe videmus in lapidibus conjugalis concordiaæ argumenta , cum tot occurrant uxoribus positi a maritis , qui longam ætatem asserunt , cum iis vixisse nulla læsione : sine ulla querela : sine ullo discrimine : nulla animi læsura : de iis nihil doluisse præter mortem & quæ alia hujus generis sunt . Quoniam vero fieri non poterat , ut nullus unquam esset inter virum , uxoremque querelæ locus , quam cito & facile in gratiam redirent , audi ex Valerio Maximo (b) : *Quoties vero inter virum , & uxorem aliquid jurgii intercesserat , in sacellum Deæ Viriplacæ , quod est in palatio , veniebant : & ibi invicem locuti , quæ voluerant , contentione animorum deposita concordēs revertebantur .* Dea nomen a placandis viris fertur asseuta . Conjugalem tamen hanc tantam unanimitatem præfertim fuisse viris puto cum uxoribus , quas virgines duxerant , non viduas , aut ab alio repudiatas . Colligi forte id potest ex cippis , ubi anni numerantur , quibus cum viris suis vixerant . Virginem duxisse debuit etiam Macrinus , (c) cum qua vixisse dicitur triginta novem annis sine jurgio , sine offensa .

Quæ vel repudiatæ erant , vel a marito discesserant , minus probabili fama vulgo erant , & seu inconstantia , seu morositatis , sæpius etiam impudicitiaæ suspitione laborabant , ut licet contra leges , quæ id permittebant , nihil peccarent , novas subinde condiciones quærendo , attamen contra rationem , pudoremque peccare viderentur , & legum permissu velut adulteras fieri . Martialis (d) :

*Quæ toties nubi , non nubit , adultera lege est .*

Ideo Tiberii ævo , cum capienda Vestalis esset (e) , Fonteï Agrippæ Filia Pollionis Filia prælata est non ob aliud , quam quod mater ejus in eodem conjugio manebat . Sed ad divortia quæ spectant , ab aliis petenda sunt .

Verum non eæ solum minus probæ putabantur , quæ vivo marito , alii nuberent , sed etiam quæ , extincto . Hinc Dido apud Maronem (f) .

*Sed mihi vel tellus optem prius ima debiscat ,*

*Vel pater omnipotens adigas me fulmine ad umbras ,*

*Pallentes umbras erebi , noctemque profundam ,*

*Ante , pudor , quam te violem , aut tua jura resolvam .*

*Ille*

(a) l. 4. c. 3. (b) l. 2. c. 7. (c) Plin. l. 2. epist. 5. (d) l. 6. epigr. 7. (e) Tac. l. 2. ann. c. 35. (f) Æn. l. 4. v. 24.



*Ille meos primus, qui me sibi junxit, amores*

*Abstulit, ille habeat secum, servetque sepulcro.*

Constat hoc etiam ex Plutarcho, qui virgines, ait (a), publicis festis non nubere, viduas nubere ob hanc forsitan causam, quod pudori suo melius consulerebunt viduæ, si, ludorum celebritate detentis plerisque, pauciores essent, qui ad ejus nuptias convenirent. Propterea e Furia gente Fæminas laudat ex hoc capite Sanctus Hieronymus (b), quod exinde a Camillo vel nullam, vel raram ejus familie scriptum est secundos novisse concubitus. Apparet autem, quanta fuerit fæminis laus uno contentas matrimonio fuisse, cum eæ, Valerio Maximo (c) teste, corona pudicitie honorarentur. Hanc coronam pudicitie, Carolus Paschalius videtur credere, (d) fuisse pineam. Ut meam tamen & ipse opinionem interponam, donec inveniam, quo tempore, quoque loco coronam hanc gestaverint fæminæ univiræ, potius crediderim, Valerium improprie loqui, nihilque coronæ nomine aliud significari, quam pudicitie gloriam, & laudem.

Uxorum duo fuisse genera, earum alterum, quæ matrimonii causa in mariti manum convenirent, alterum earum, quæ in matrimonium tantummodo convenirent, dubitari amplius non potest, postquam veterum, novorumque auctorum testimoniis id evicit alias laudatus Græpæ Traët. de Uxore Romana (e). Uxor autem prioris generis ipsi est (f), quæ non in matrimonium tantum, sed simul in mariti potestatem, tamquam filia in patris conveniebat. Pluribus enim ostenderit (g), quod in liberis patri, id fere marito juris fuisse in hujusmodi uxorem. De modis, quibus conventio hæc uxoris in mariti manum, mancipiumque fiebat, hunc consule (h), qui tres eos facit, Confarreationem, Coemptionem, & Usus. At uxorem, quæ non in manum convenisset, & uxor tantummodo esset, ita idem definit (i): quæ intercedente connubio ducta. Quamquam & ad hujusmodi connubia nuptiarum solemnia, & legitimi ritus adhibebantur; hæc tamen minime erant necessaria, cum per solum conjugum consensum in nuptias esse connubium posset, ut cum uxore, quæ non in manu esset, sed uxor tantum, matrimonium constaret, ac patrem liberi sequerentur: contra ut uxor in manu esset, & viri potestate, solemnia confarreationis, aut coemptionis, aut forma usucapionis abesse non poterant. Hæc a Græpæ (k), a quo etiam placet exscribere (l) utriusque generis uxorum jura, quæ ipse ex Francisco Hotomanno (m) refert. Uxoris in manu hæc jura fue-

(a) *Quest. Rom.* 105. (b) *epist.* 47. *alias* 10. (c) *l. 2. c. 1.* (d) *Coron. l. 6. c. 28.*

(e) *c. 1.* (f) *c. 2. §. 4.* (g) *ibid. §. 1. & seqq.* (h) *c. 4. & seqq.* (i) *c. 7. §. 2.*

(k) *ibid. §. 6.* (l) *ibid. §. 7.* (m) *ad tit. Instit. de SC. Terulliano*

fuere: ut in viri familiam transires, ut ejus bona tacito jure in maritum transirent, ut in viri familia jura suitalis, & consanguinitatis nancisceretur, ut maritus ei intestata heres fieret, ut viro sacrorum, & bonorum socius esset. At uxoris, quæ non in manu, sed uxor tantum, hæc fuisset jura censent: si filias familias esset, ut sacrorum, suitalis, & consanguinitatis jura in patris familia retineret, ne liberi ei intestata succederent, sed patria potestas ejus hereditatem tamquam peculium absorberet, ut plenum jus in bona sua omnia, atque adeo in dotem, administratione excepta, retineret, si morto patris vel emancipatione sui juris fieret, mater familias dici inciperet, & tum de sua dote, & reliquis bonis testari posset. Cætera, quæ huc spectant, a civitatis auctoribus petenda sunt. Nobis pro instituti nostri ratione satis multa.

Matrimonio junctas cum puellas vocitatas audis, ne minus honestas credas. Nomen hoc amatorie blandientium sæpe est, nonnunquam tamen viridiorum solummodo ætatem significat. Horatius (a):

— laborantes utero puellas.

A. Gellius (b) de puerpera, puellamque defessam labore, ac vigilia somnum capere cognovit. Proprie tamen, quæ nupserant, *Cajæ*, *Domine*, *Matres familias*, *Matrone*, *Matres appellabantur*.

*Caja* velut titulus fuit Romanis mulieribus communis, quo ipso nuptiarum die vocabantur. Nova enim sponsa, cum viri domum pervenisset, ante fores interrogabatur, quænam esset? illa ominis causa se *Cajam* esse respondebat, inquires: *ubi tu Cajus, ego Caja*. Omen autem inde captum est, ut Plutarcho (c) placet, quod *Caja* Cæcilia honesta, & proba matrona fuerit Tarquinii Prisci, ut multi putant, uxor, cui in Sanci templo statua antiquis temporibus posita fuerat cum sandaliis, & fuso, quæ domi adæ vitæ, industriæque erant signa. Ritus autem hic in nuptiis cujuscunque generis adhibebatur, ut frustra sint qui ducti fortasse loco quodam Ciceronis illum inter solemnia coemptionis tantum referendum putant, ut Grupen etiam (d) advertit. Locum Tullii accipe (e): *quia in alicujus libris id nomen inveniant, putarunt omnes mulieres, quæ coemptionem facerent, Cajas vocatas*, quo exemplo ridentur a Tullio jurisconfuti, ac forte ne de illa quidem coemptione, per quam in manum conveniebatur, sermo est, ut citato Grupen visum.

Omnes igitur nuptæ sive in manum aut per confarreationem, aut per coemptionem convenissent, sive uxores tantummodo essent, *Cajæ* dici voluerunt, ut jam *Caja* idem sonaret, ac *domina*, ut idem Plu-

(a) l. 3. od. 22. v. 2. (b) l. 12. c. 1. (c) *Quæst. Rom.* 30. (d) *de Us. Rom.* c. 3. §. 4. & 5. (e) *pro Mur.* c. 27.

Plutarchus (a), & *materfamilias*. Offendi nuper doctissimum auctorem (b), qui de hoc nomine verba faciens, obiter affirmat, non nisi ingenuas sponfas *Cajas* esse dictas. Ipse tamen nomen hoc, atque ex illo omen ne libertinis quidem inviderim, cum iustæ uxores essent, quamquam scio minime necessarium fuisse in omnibus nuptiis omnes ritus adhiberi, cum hoc, ut censet Grupen (c), a nubentium arbitrio penderet. At nihil hinc contra libertinas. Libertas fane ostendere possum cum *Cajæ* prænomine (d):

C. TITIA. C. L. GLYCERA

Hanc tamen justam fuisse matremfamilias, affirmare nequeo, alteram fuisse, nemo inficiabitur, cui maritus lapidem erexit: (e)

DIS. MANIBUS

C. JULIAE. IOLES

JULI. UMBRI. LIB

CN. SEIUS. CRISPUS

CONJUGI. SUAE. BENE

MERENTI. FECIT

Sed his *Cajam* prænomen proprium fuisse, forte respondebunt, non illud commune, de quo loquimur. Verum si libertini matresfamilias generis *Cajæ* dictæ proprio prænomine, cur & communi *Cajas* dictas negabimus? præcipue post leges Juliam, ac Papiam, cum jam haud raro ipsas & patrono suo nupsisse certissimum est. Quin & libertinas meretricio quæstui deditas per quamdam vocis abusionem aliquando *Cajas* vocitatas, ajo. Vidi enim apud Gruterum lapides aliquos, in quibus ii, qui ex conventitiis patribus nati erant, non solum matris filii, proprio ejus nomine eam appellando, dicuntur, quemadmodum ille (f):

BRUTO. GINTUSSAE. F. AN

LXXXV

sed etiam communi *Cajæ* nomine (g).

C. TERENCEIUS. C. F.

CHILO. V. S. F.

In lapide etiam, quem Magistri Vicorum erexerunt Imperatori Adriano, legitur (h), C. VALERIUS C. F. FELIX, quem Scaliger ait, fuisse Valerium *Cajæ* filium, idest naturalem.

*Dominas* post decimum quartum annum puellas Romanas vocatas, asserit Tiraquellus (i), qua ratione ductus, alii viderint. Catullus

P

Domi-

(a) *J. e.* (b) *J. Ant. Ursatus not. ad epist. 12. Sertor. Ursati* (c) *e 7. §. 5.* (d) *Grut. pag. DCCCCXCI n. 11.* (e) *pag. DCCCCLXXIX. n. 2.* (f) *pag. DCCLXIV. n. 4.* (g) *pag. DCCXXIV. n. 5.* (h) *pag. CCL. col. ult.* (i) *ad leg. 5. Connub. c. 11.*

Dominam vocat ipso nuptiarum die. Ita enim Hymenæum alloquitur (a):

*Ac domum dominam voca*

*Conjugis cupidam novi.*

Quare statim ab inito matrimonio, non a servis tantum, sed etiam a marito ita dictas, probabilius puto. Frequentius certe *Dominæ* nomine blanditiarum causa venit amica, sicut tamen viri ab uxoribus *Domini* vocabantur, ut Collatinus a Lucretia apud Ovidium (b):

*Mittenda est domino (nunc nunc properate puellæ)*

*Quam primum nostra facta lacerna manu;*

ita etiam uxorem suam *Dominam* vocat idem poeta (c):

*Nunciet hic aliquis dominam venisse, resurgam,*  
*iterumque (d).*

*Nec dominæ lacrymis in nostra cadentibus ora.*

Martialis de hortis sibi ab uxore Marcella in Hispania paratis (e):

*Munera sunt dominæ, post septima lustra reverso*

*Has Marcella domos, parvaque regna dedit.*

Imo cum patres etiam a liberis domini aliquando vocati fuerint, ut patet ex Martiale (f):

*E servo scis te genitum, blandæque patris,*

*Cum dominum appellas, Sosibiane, patrem.*

matres quoque sic dictas a liberis, cur dubitabimus? sed vulgo etiam ab alienis *domina* pro *matrona* usurpatum. Plinius (g): *Insersa margaritarum pondera e collo dominarum auro pendentia.*

*Matris familias* nomine aliquando significatur scæmina juris sui, sive nupta, sive innupta (h), ac opponitur *filie familias*, quæ in manu, & potestate erat patris, sæpius tamen *materfamilias* accipitur pro uxore, quam ita distingui a *matrona* aliqui volunt, ut *mater familias* ea sola sit, quæ in mariti manu, mancipioque erat, aut in ejus, in cuius maritus, manu, mancipioque esset, quoniam non in matrimonium tantum, sed & in familiam quoque mariti, & in ejus hæredis locum venisset; *matrona* vero, quæ in matrimonium tantum cum viro convenerat. Sed Cicero ipse, qui ita matrem familias a matrona distinxit in Topicis (i); alibi alteram cum altera confundit (k): *matrem familias secus quam matronarum sanctitas, postulat, nominamus.* Servius ad illud Virgilii (l)

*Quæ te sola, puer, multis ex matribus ausa,*  
aliud videtur discrimen noscere, cum inquit: *ex matribus hoc est nobilibus*

(a) car. 60. v. 31. (b) *Fall.* l. 2. v. 745. (c) *Trist.* l. 3. eleg. 3. v. 23. (d) *ibid.* v. 41.

(e) l. 12. epigr. 28. (f) l. 1. epigr. 82. (g) l. 33. c. 3. (h) *Grup. de Ur. Rom. cap. 1. §. 7.* (i) c. 3. (k) *pro Cal.* c. 32. (l) *Æn.* 9. v. 117.

libus. Nam matres non nisi nobiles dicimus: unde & matrona dictæ sunt: Verum matres non nobiles tantummodo, sed natu grandiores mulieres omnes vocatas, apparet ex Plauto (a): *jubemus te salvere, mater*. Ita etiam viri grandævi patres dicti. Terentius: (b) *sic hoc, dicens: asperum, pater, est*. Ut crederem autem matronas idem esse, ac mulieres nobiles, & summo loco natas, plusquam Servius, moverat me locus ille Livii (c): *nec matronis solum, sed omnis ordinis fœminis*. Verum quid Tullio opus dicere (d): *matrona opulentæ optimatæ*: quid Plauto (e):

*Ubi istas videas summo genere natas*

*Summates matronas;*

si matronarum nomine opulentæ tantum, optimates, & summates intelligendæ sunt? Sed quodcumque discrimen inter hæc vocabula sive apud Grammaticos, sive apud jurisconsultos sit; certe *matrisfamilie*, seu *matrisfamilias* nomine uxor simpliciter communi loquendi consuetudine significatur. Livius (f): *& cum tibi viro liceat purpura in veste stragula uti, matrem familie tuam purpureum amiculum habere non fines?* Sed clarius id liquet ex alio loco, ubi *justa matrisfamilias* idem est ac *justa uxor*, si pellici opponitur: (g) *hunc justa matrefamilias, illum pellice ortum esse*. Ne vero dubites uxorem etiam, quæ in manum non convenit, fuisse justam uxorem, adi Græpen sæpius citatum (h). *Matrona* etiam pro uxore generatim sumitur a Plauto (i):

*quibus matrona moribus,*

*Quæ optima sunt, esse oportet?*

Juvenalis pariter (k)

*Si tibi contigerit capitis matrona pudici.*

Est alia quoque acceptio & *matrisfamilias*, & *matronæ*, quarum utraque promiscue significat fœminam sive nuptam, sive innuptam, notæ auctoritatis, ut ait auctor de Uxore Romana (l), scilicet honestam, & quæ honestatem profiteretur, cujus insigne erat stola, quam propterea *matronalem* vocat Valerius Maximus (m). Juvat exscribere pulcherrimum testimonium Ulpiani (n): *matremfamilias accipere debemus eam, quæ non inhoneste vixit, matrem enim familias a cæteris fœminis mores discernunt, ac separant; proinde nihil intererit, nupta sit, an vidua, ingenua sit, an libertina: nam neque nuptiæ, neque natales faciunt matremfamilias, sed boni mores*. Haud aliter ipse *matronam*, ac

P 2

ma-

(a) Rud. act. 1. sc. 5. v. 5. (b) Heaut. act. 3. sc. 1. v. 49. (c) l. 10. c. 23. (d) Fœmil. l. 7. epist. 6. (e) Cispell. act. 1. sc. 1. v. 26. (f) l. 34. c. 7. (g) l. 39. c. 53. (h) c. 7. §. 4. & 5. (i) Stich. act. 1. sc. 2. v. 48. (k) Sat. 6. v. 49. (l) c. 1. §. 6. (m) l. 6. c. 1. (n) l. 46. §. 1. d. V. S.

*matremfamilias*, quam pro *fœmina honesta* accipiam, cui jus sit *Ro-  
læ ferendæ*.

Quare tres tantum facio mulierum Romanarum ordines, & ve-  
lut classes cum Horatio (a), *matronarum*, *ancillarum*, *togatarum*, seu  
*meretricum*.

————— *quid inter*

*Est in matrona, ancilla, peccetque togata?*

Mihi quidem de matronis agere dumtaxat institutum est; attamen  
quædam etiam ad alios ordines spectantia attingere necesse erit.

## C A P U T V.

*Matronarum pudicitia. Lanificium.*

**P**rima Romanarum matronarum laus pudicitia fuit, quam reli-  
giosissime coluisse, certissimum est. Hinc in cippis sepulcrali-  
bus sæpissime occurrunt illa *Conjugi castissima: sanctissima: pudicissima:*  
aliaque id genus. Cicero etiam sanctitatem matronis tribuit; hancque  
earum propriam, velut ex omnium sensu videtur asserere (b): *petulantior  
facimus, si matrem familias secus, quam matronarum sanctitas postulat,  
nominamus*. Quam porro jura ipsa matronarum pudorem vererentur,  
testatur Valerius, qui refert (c), in jus vocanti matronam ejus  
corpus tangere non permissum. Magna autem erat omnibus erga  
matronas reverentia, quod constat ex Ovidio (d):

*Ecquid ab hac omnes rigidas submovimus arte,*

*Quas stola contingi, vittaque sumpta vetat,*  
ubi planum est ex stolæ, & vittæ insignibus matronas significari.  
Discimus etiam ex Plauto probro fuisse viris honestas mulieres in  
fraudem illicere (e):

*Num tu pudica cuipiam insidias locas?*

*Aut quam pudicam oportet esse? Phœ: nemini.*

*Nec me ille finit Jupiter. Pa: ego item volo.*

*Ita tuum conferto amare semper, si sapias,*

*Ne id quod ames, populus si sciat, tibi sit probro.*

Quoniam vero neque eadem omnibus verecundia, neque idem re-  
cti amor omnibus; scimus, a maritis custodes adhibitos, ut repudii,  
vel alius pœnæ metu a violanda conjugali fide uxores detererentur.  
Custodes memorat Horatius (f), sed clarius morem hunc tangit O-  
vidius (g):

*Nupta*

(a) l. 1. sat. 2. 63. (b) *pro Cal.* c. 32. (c) l. 2. c. 1. (d) *Trist.* l. 2. v. 251. (e) *Com-  
cul. act.* 1. sc. 1. v. 25. (f) l. 1. sat. 2. v. 98. (g) *de Art.* l. 3. v. 613.

*Nupta virum timeat: rata sit custodia nuptæ.*

*Hoc decet, hoc leges, jusque, pudorque jubent.*

Custodiendis uxoribus præficiebantur liberti, aliquando servi, & Nafonis tempore, quod ex ipso satis constat (a), etiam eunuchi. Tutior tamen custodia focrus, a nurus latere nunquam discedens, siquid suspitionis oboriretur, quemadmodum se mater Cæsaris Aurelia gessit (b) erga Pompejam, quamquam hæc tamen omnem custodiam sefellerit. Sed major adhuc procacioribus fœminis metus ab Ædilibus, a quibus constat, non semel matronas ad populum stupri damnatas.

Nulli quidem fœminæ vulgari se viris permiffum, at ne vetitum quidem; idque impune omnibus erat, modo apud Ædiles plebis professæ essent. Ædiliū plebis enim, quemadmodum fuit cura ab antiquo fornicum, ganearum, hisque similibus locorum, fuit etiam nosse hujusmodi prostibulas, earumque nomen in suas tabulas referre, ut, extra eum numerum si quam invenissent, in eam lege animadverterent. Libertinæ autem, & infimæ ex plebe fortis mulieres, quibus nec publici, nec privati decoris magna cura, nullus tam infandæ professionis pudor, quæstusque corporis vitæ sustentanda, huic militiæ nomen apud Ædiles edebant. Fuere quidem plurimæ libertini generis mulieres, quæ civi alicui Romano, quin nonnunquam ipsi patrono suo, legitimis nuptiis junctæ erant; plures tamen adhuc quasi id sibi jure suo sumebant, ut vinculo omni solutæ quæstum corpore facerent. Hinc classis libertinarum est Horatio classis meretricum (c)

*Tutior at quanto merx est in classe secunda,*

*Libertinarum disco.*

Infamem hanc vitam ingressas, statim nomen mutasse, discimus ex Plauto (d):

*Namque bodie earum mutarentur nomina,*

*Facerentque indignum genere quæstum corpore.*

Hinc meretricia illa nomina *Cbloë, Lyde, Lycoris, Corinna, Cynibia, Glycere*, multaque alia, quæ etiam in fornice suis quæque cellis inscribebat, ut hoc titulo, quæ singulis cellis prostraret, appareret.

—— *titulum mentita Licisca* (e).

Si quæ autem aliquando turpem ejurabant professionem, hæc meretricio nomine rejecto, liberum iterum, suumque nomen sumebant. Talis forte videri volebat mima illa M. Antonii amica, quam, ac si ju-

(a) l. 2. *Amor. eleg.* 2 (b) *Plutarch. Jul. Cæs.* (c) l. 1. *Sat.* 2. v. 48. (d) *Poa. lib.* 5. sc. 3. v. 20. (e) *Juv. sat.* 6. v. 123.

si iusta materfamilias facta esset, homines [a] honesti, non nota illo, & mimico nomine, sed matronali Volumniam consalutabant.

Nec libertinæ conditionis earum pleræque omnes solummodo erant, quæ *villum* vulgo quærentes, ut ait Terentius [b], aut omnibus *obvia* noctu, ac interdum ante stabulum prostrabant impudentissime, ideo prostibulæ dictæ, aut *deviæ*, quemadmodum eas Horatius [c] appellat, a publica via semotæ degebant paucioribus expositæ, sed etiam illæ, quæ *vulgus a se segregantes*, ut apud Terentium pariter [d], uni tantum mercede, aut ad certum tempus, aut in totam vitam erant additæ, quem *berum* vocabant [e].

— *Atbenis domus, & bernus.*

Quæ autem uni aut pretio, aut officio ita deditæ erant, ut iustæ uxoris loco haberentur, *conjuges* appellatas ab amatore, amatoremque *conjugem* appellasse, dubitari non potest Tibullum evolventibus. Delia enim, seu Plautia, quam Poeta amabat, libertina certe erat, quod ille plane significat, cum ait [f]:

*Sis modo casta doce, quamvis non vitta ligatos*

*Impediat crines, nec stola longa pedes;*

attamen ille, cui addita erat, ejus *conjux* esse dicitur, ac ipsa *conjugem* habere, nimirum quod amico iustæ conjugis loco erat, ideoque ab eo custodiebatur, ac servabatur. Eadem elegia sic Deliæ amicum Tibullus alloquitur [g].

*Quid tenera tibi conjuge opus?*

Alia, ita Deliam ipsam [h]:

*Nec tamen huic credes conjux tuus.*

Ovidius etiam hunc Deliæ amatorem ejus maritum vocat. Ita enim de Tibullo [i].

*Denique ab incauto nimium petit illa marito.*

Quamquam vero Valerius Maximus refert [k], a Q. Antistio Vero conjugem repudiatam, quod illam in publico cum quadam *libertina vulgari secreto* (seorto emendarem) loquentem viderat; ex illius tamen anus Plautinæ querela de matronarum erga meretricium ordinem superbia intelligimus, turpè non fuisse matronis a libertinis adiri, & coli: quin etiam sæpe matronas, quamquam secreto hujusmodi pestes execrarentur, illis tamen palam blandiri solitas, ac sub patrocinio, ac tutela, ut patronis erga libertas conveniebat, easdem habuisse [l].

No-

[a] *Cic. Philip.* 2. c. 58. [b] *Heautostim.* act. 3. sc. 1. 1032. [c] *l. 2. ed.* v. 21.

[d] *Heaut.* act. 2. sc. 4. v. 6. [e] *Plaut. mil. act.* 2. sc. 5. v. [f] *l. 1. el.* 7. v. 73.

[g] v. 39. [h] *l. 1. el.* 2. v. 41. [i] 2. *Trist.* v. 457. [k] *l. 6. c. 3.* [l] *Cicell. act.* 1. sc. 1. v. 32.



*Nostra copia nihilo voluit nos potesse,  
Suique omnium rerum nos indigere,  
Ut sibi finis supplices; eas si adeas,  
Abitum, quam aditum malis. Ita nostro ordini  
Palam blandiuntur: clam si occasio usquam est  
Aquam frigidam subdole suffundunt.*

Matrona autem nulla per plura sæcula inventa est, quæ tam flagitiosam vitam apud Ædiles profiteri vellet, multamque, & exilium timere, si qua libidinibus abripi se sineret, maluit, quam in tam infamem meretricularum album referri. Professæ enim meretricium quæstum matrona loco, dignitate matronarum excidebat, ornamentis, ac insignibus matronarum exuebatur. Ita matronalis pudicitia diu tuta fuit Romæ. Cum vero aliquando ita profligata verecundia inventæ essent aliquæ, ut satis contentæ, si legum pœnas evasisent, nullo pudoris fræno, & lenocinium, & stuprum apud Ædiles profiterentur, cautum est novis legibus, ne id matronis liceret ulla ratione, prohibitaque nobiliores præcipue, ne hac fraude pœnas effugerent. Narrat enim Tacitus (a), cum Vistilia prætoris familia genita licentiam stupri apud Ædiles vulgasset, statim gravis Senatus decretis libidinem fœminarum coercitam, *cautumque ne quæstum corpore faceret, cui avus, aut pater, aut maritus Eques Romanus fuisset.*

Minus hæc credibilia videri poterunt forsitan, cum adverterimus, nihil prius obijcere matronis juvenalem (b), quam impudicitiam. Sed ipse de disciplina loquor, qua mulieres continebantur, melioribus reipublicæ temporibus, non vero de illa quæ corruptis jam non fœminarum modo, sed & virorum moribus, cum tot aliis malis in rempublicam investa est. Scio equidem Livii sæculo aram pudicitia tum patriciæ, tum plebejæ (c) in oblivionem venisse, neque aliter laudatas aliquando fœminas, quam eas antiquioribus conferendo. Ita Romani vulgo uxorem Germanici Agrippinam *unicum antiquitatis specimen* (d) appellabant: ita Plinius, Macrinum, ait (e), *amisisse uxorem singularis exempli, etiam si olim fuisset.* Idem de Plotina Trajani uxore (f): *quid sanctius? quid antiquius?* Dionysius (g) scribit, contra adulteros legem latam jam inde a Romulo fuisse. Sunt tamen, qui putant primam de adulteriis legem Juliam esse ab Augusto latam in viros, de pudicitia in fœminas. Legem Juliam aliæ consecutæ sunt ab aliis Imperatoribus latæ. Hoc satis probat, non

(a) *ann. l. 2. c. 15.* (b) *sat. 6.* (c) *Liv. lib. 10. c. 23.* (d) *Tac. ann. lib. 3. cap. 1.*  
(e) *l. 8. ep. 5.* (f) *paneg. c. 83.* (g) *l. 1.*

non antequam eversa esset respublica, a sœminis licentiæ habenas immissas ad ea usque tempora satis pudore coercitis. Nihilominus quis credat ea, quæ univêrse poeta exprobrat sœminis, univêrsarum propria fuisse? Imo ego puto, singularum vitia univêrsis affingi. Novimus satirarum morem. Nonne idem sanctissimæ matronæ Cornelix tamquam nimis superciliosæ, & superbæ mulieris exemplum (a) affert, cujus tamen tantam, scimus, fuisse virtutem, ut se mori Gracchus, quam illam maluerit? Rem notam asserere non vacat. Verum si Q. illa Claudia, cujus pudicitia deducendæ in urbem matris Deum ministerio, clarior facta est, *dubia fuerat fama*, Livio teste (b): si Tullius ait: (c) *perpaucos famam potuisse effugere Roma in tam maledica civitate*, minime ipse negaverim, posterioribus temporibus vulgatos sæpe de immerentibus rumores, unde satiricis exercendi styli occasio, cum & maledicendi licentia effusior, & matronæ ipsæ sibi multa nova, & sexus verecundiæ nequaquam consentanea, ut videbimus infra, indulgendo, majorem etiam suspitioni locum darent. Quidquid sit tamen, integræ famæ, laudatæque pudicitix, ut Romanæ disciplinæ honor suus sit, plures ego matronas, si hoc mihi proposuissem, enumerare possem, a Lucretia illa *Romana pudicitix duce*, ut Valerius (d) appellat, ad Aniciam usque Faltoniam Probam, Romanarum ultimam, si placet ita appellare, quam alter lapis (e) *sanctissimam, castissimam sœminam*, alter (f) *docendæ castitatis exemplum* vocat, progrediendo; plures inquam enumerare, quam alii impudicas, & profligati pudoris, ut a Romuli parente Ilia incipientes per omnia Augustorum & Augustarum flagitia singulari Romani Imperii ætates percurrant.

Velut nova quædam præjudicia pro matronarum Romanarum pudicitia hæc insuper addam. Primum quod Plinii adhuc tempore, cum Virgines Vestales vi morbi attrito Vestæ cgebantur excedere (g), jussu Pontificum, *matronarum curæ custodiæque mandabantur*: deinde quod hoc in usu erat apud Romanos (h), ut cum mariti peregre redirent, quam ex improviso nec opinantes deprehendere, cum nulla earum fidei suspicio aliter unquam suaderet, aliquem de via præmittere malebant, qui uxoribus adventum nuntiaret.

Tanta autem, erat vitæ, morumque securitas, ut in Romanorum ædificiis nulla essent solis mulieribus destinata cubicula, ut apud Græcos remota a virorum aspectu gynæconitis, sed sœminæ teste Cornelio

---

(a) *sat.* 6. v. 169. (b) *lib.* 29. *cap.* 14. (c) *pro Cal.* *cap.* 38. (d) *lib.* 6. *cap.* 1. (e) *pag.* CCC LII. 6. (f) *ibid.* 5. (g) *lib.* 7. *epist.* 19. (h) *Plutarch. quæst. Rom.* 9.

nelio Nepote (a), *primum locum tenebant ædium, atque in celebritate versarentur*. Sed qui primus iste ædium locus? Atrium nimirum, quod Livius, nisi locus mendosus est, (b) *medium ædium: Lucretiam in medio ædium sedentem, Horatius aulam vocat* (c):

— *lectus genialis in aula est?*

Lectus enim genialis, ut nemini non notum, in atrio sternebatur. Ideo Arnobius (d) *matres familias vestrae in atriis operantur domorum, industrias testificantes suas*. Verum cum ex Nepote audis, matronas in celebritate versatas, ne credas, apertis eas foribus, ac patente domo in atrio inter hominum cœtus degisse. Celebris ideo ille locus, quod ibi, quot quot ingrediebantur, primum subsistebant, matronasque, atque ancillas statim operis suis deditas offendebant. Hinc videmus, nihil esse mirum, quod tradunt sacri Evangelistæ, scilicet in atrio Principis Sacerdotum, quo, cum Christus Dominus tractus fuit, Judæi confluxerant, alius odio, alius misericordia, alius alio studio ductus, ancillas versatas, quæ Sancto Petro Christi discipulatum exprobrarunt. Sicut enim devictarum gentium aliquando in urbem, ita victoris populi mores in provincias semper investiti sunt. Cæterum cum sæpe apud Comicos legamus pulsatas ædes ingressuris, ac exeunte aliquo fores crepuisse; satis constat, obserari Romanorum ædes solitas, nec paruisse, nisi opus esset. Ab Antiphila Terentiana, quæ, quod unius amatoris erat, honestarum vitam, ac mores imitabatur, discimus, qua diligentia nuptiarum ædes servarentur (e):

*Ubi ventum ad ædes est, Dromo pulsat fores:*

*Anus quædam prodit: hæc ubi aperuit ostium,*

*Continuo hic se conjecit intro: ego consequor:*

*Anus foribus obdit pessulum, ad lanam redit.*

Matres familias igitur jam a primis reipublicæ temporibus in atrii domorum lanificio operam dabant. *Telas*, inquit Asconius (f), *quæ ex veteri more in atrio texebantur diruere*. Lucretiam deditam lane inter lucubrantem ancillas in medio ædium sedentem describit Historicus (g). Sedisse autem in lecto adverso [hic lectus est, qui genialis nuptiarum tempore, postea adversus dictus] matronas, cum operas suas edebant, probat (h) Lipsius ex Propertio (i):

*Sederit & nostro cantu noverca toro,*

ac luculentius ex Laberio apud A. Gellium (k):

*Materfamilias tua in lecto adverso sedet.*

Adde tu & Ovidium, ubi Lucretiam lanificio deditam describit (l)

Q.

Ante

(a) pref. (b) l. 1. c. 37. (c) l. 1. epist. 1. v. 37. (d) l. 2. (e) *Heautonim. act. 2. sc. 3. c. 34.* (f) in *Milonian.* (g) *Liv. l. 6.* (h) *Blæth. l. 1. c. 17.* (i) *l. 4. eleg. 2. v. 12.* (k) l. 16. v. 9. (l) *Fæst. l. 2. v. 742.*

*Ante torum calatibi, lanaque mollis erat.*

Hujus moris conjecturam facio etiam ex Plauto, ubi Antipho, non ubi filix sedebant, sed in subsellio sessurum se, ait, eoque magis, quod in subsellio sessuro pulvini opus esse dicitur, cujus opus non erat, si, ubi filix, in lecto nimirum pariter sedisset: [a]

— Pi: *asside hic, pater.*

Ant: *Non sedeo istic, vos sedete, ego sedero in subsellio.*

Pi: *Mane pulvinum.*

Sedebant igitur in lecto matronæ, ante lectum calathi cum lana, circum ancillæ, quibus vel ipsa domina pensum partiebatur, vel alia ancilla huic muneri præfecta, quæ *libraria* dicebatur, cujus meminit Juvenalis [b].

Cum autem plurimum opera necessaria esset ad lanam exercendam, telam texendam, vestem conficiendam, quæ omnia in atrio a feminis edebantur; matres familias, nisi forte minus delicatas aliquas, aut pauperculas excipimus, nendo solummodo occupatas fuisse, ancillas vero non nevisse solum, sed & cætera, quæ ad texturam, ac futuram spectat, obiisse, existimo. Si enim delicatiores quoque ancillæ, cum laboriosis operibus impares, nihil aliud, quam pensum faciebant [c]:

*Laboriosi nihil tibi quidquam operis imperabo.*

*Possin' tu, si usus venerit, subtemen tenuere?*

*Si tenuere scis, scio te uberius posse nere,*

inquebat ille ad ancillam; multo magis dominas hoc solum sibi sumpsisse, crediderim, ut nendo exercerentur. Lucretiam itaque, quam deditam lanæ affirmat [d] historicus, nevisse duntaxat, constat ex Ovidio: [e]

*Inde cito passu petitur Lucretia: nebat:*

*Ante torum calatibi, lanaque mollis erat.*

Animadvertite etiam, novæ sponiæ, non radios ad texendum, non ad fuendum acus, sed colum cum lana tantum prælatam: Caxæ illi Cæcilix, a qua boni ominis ergo nuptæ omnes Caxæ dictæ, statuam [f], positam fuisse cum fuso: Egiliam, seu Egilium invitatum ab Opimio [g] cum lana, & colu: Murthinam etiam apud Comicum [h], cum vicinam adiret, *colum sibi ferri* jussisse. Nebant igitur solum dominæ, ac dominarum filix, ut pauperculam fuisse Antiphilam Terentianam, vel eo appareat, quod texens [i] offenditur.

Ve.

[a] Stich. act. 1. sc. 2. v. 35. [b] Sat. 6. v. 476. [c] Merc. act. 3 sc. 1. v. 9. [d] Liv. l. c. [e] fab. J. s. v. 742. [f] Plutarch. quæst. Rom. 32. [g] Cic. de orat. l. 2. c. 277. [h] Plaut. Cas. act. 2. sc. 2. v. 4. [i] Heautontim. act. 2. sc. 3. v. 44.

Ecce autem tibi ex Divo Hieronymo (a) singula, quibus se in lanificio fœminæ nobiles exercebant: *Habeto lanam semper in manibus, vel flaminis pollicis fila deducito, vel ad torquenda subiegmia in alveolis fusa vertantur: aliarum neta aut in globum collige, aut texenda compone: quæ texta sunt, inspicere, quæ errata repræbende, quæ facienda constituere.*

Cætera ancillæ præstabant, quæ tamen cum ab aliis vacarent, pensum quoque trahebant. Lanam pectere, & carminare ancillarum fuisse, ostendit Plautus (b):

*Inter ancillas sedere jubeas, lanam carere?*

Textrina etiam inter ancillarum ministeria ab eodem recensetur (c):

*Nihil opus ancilla, nisi quæ textat, quæ molat.*

Cajus etiam l. & ancillar. de pecul. inter vulgaria artificia, quibus tamen servæ commendantur, texendi peritiam enumerat: *Maxime si qua sarcinatrix, aut textrix erit, aut aliquod vulgare artificium exerceat.* Fullonicam facere pariter, ac lanas variis coloribus inficere ad servas spectabat, ut indicat Silius, apud quem serva cuidam donatur (d),

*— albentes invertere lanas*

*Murice Getulo docta.*

Suere etiam non nisi ancillarum fuit. Inter vulgaria, ac servilia artificia hoc etiam recensuit Cajus loco supra laudato: *Maxime si qua sarcinatrix: Sed quot occurrunt apud Gruterum lapides servæ alicui Sarcinatrici erecti? Quid vero si per illud Juvenalis (e):*

*— admotaque lanis*

*Emerita, quæ cessat, acu,*

cum multis dicamus, ancillam significari, quæ hebeti ob ætatem oculorum acie, a suendo cessaverit, & nere cum domina cæperit? Scio alios mordicus pugnare, ut crinalis acus ibi intelligatur; at tamen sicut illis hoc persuadet, quod ea de ornatu capitis consultur, ita aliis fortasse primum, quod ab acu ad colum transisse dicitur.

Ut evincant aliqui, matronas Romanas non colu dumtaxat exerceri solitas, afferent Svetonium, qui ait (f), Augustum non temere alia veste, quam domestica usum esse, ab uxore, sorore, & filia, neptibusque confecta. Verum cur ab illustribus illis matronis dici non potuit confecta vestis, ad quam nento lanam paraverint? Sed tantam illis erga Augustum caritatem, & reverentiam fuisse, putent, ut

Q 2

non

(a) *epist.* 97. *alias* 8. (b) *Monac. lib. III* § *se.* 2. v. 46. (c) *Mercat. aff.* 2. *sc.* 3. v. 62. (d) *l.* 16. v. 569. (e) *sat.* 6. v. 497. (f) *Aug.* c. 73.

non ancillarum, sed sua opera uti voluerint ad vestem ipsi texendam, ac consuendam; non contra pugno. Mater etiam Euriali, quæ Priami de gente vetusta (a), filio ob caritatem vestem texebat apud Maronem (b). Quod ad hunc locum spectat, hoc maneant, matronas, quo magis pudicæ, ac frugi erant, eo magis assiduas domi suæ opificio intentas vitam egisse. Hinc Amonime quædam ad cæteras pietatis, pudicitiae, frugalitatis laudes *domiseda* dicitur in lapide apud Fabretum (c), hoc est domi sedens. Quid igitur, inquires, sibi volunt verba illa Columellæ (d), ubi mulierum sui temporis luxum, & inertiam conqueritur? Nunc vero cum pleræque sic luxu, & inertia defluant, ut ne lanificii quidem curam suscipere dignentur, sed domi sedentes confectas vestes fastidio habeant. Curam lanificii suscipere non dignantur, quæ tamen domi sedere dicuntur? Num domi sedere vitio vertitur? Præterea quid est *fastidiro vestes confectas*? Si id mihi permetterem, ita emendandum locum dicerem: domi sedendo, aut domi sedentibus confectas vestes fastidio habeant, ut essent eæ vestes, quas Tranquillus, ut supra vidimus, domesticas appellavit (e), hoc est domi confectas, & elaboratas. Etenim nihil aliud queritur Columella nisi quod in plerisque matronis defecerit suis temporibus muliebris sedulitas, qua domi sedendo, nentes ipsæ, & ancillis texentibus invigilantes, sibi, maritis, totique familiæ vestes conficiebant.

## C A P U T V I.

*Fœmina Romana per urbem. Earum locus in Amphitheatro, & circo. Conviviis intererant. Vinum ipsi interdicitum.*

**I**Nter tot reipublicæ tempestates, labascente cum imperio Romanorum etiam virtute, cum omnium mores in deterius vergerent, minus industriæ, minusque pudicitiae sequiori sexui fuisse, non dubito. Propterea solitudinis tædere plerasque cepit, ac domo contineri, ut non amplius hominum cætus, turbas, ac publicum vererentur. Catullus, cum Camerium quæreret, per omnia urbis frequentissima vagatus loca, nusquam non fœminas offendit (f):

*Te quæsiimus in minore campo,*

*Te in circo, te in omnibus tabernis,*

*Te*

(a) *g. Æneid. v. 324.* (b) *Æn. v. 476.* (c) *Inscript. pag. 252.* (d) *l. 12. pref.*  
(e) *Aug. c. 73.* (f) *cæm. 55. v. 3.*

*Te in templo Supero Jovi sacro  
Te in Magni simul ambulatione.  
Fæmellas omnes, amice, prendi  
Quas vultu vidi tamen serenæ,  
Hæc te sic tantum ipse flagitabam,  
Camerium mihi, pessimæ puellæ.*

Ubi cum audis omnes a poeta *pessimas puellas*, amatorculorum more etiam per convicia blandientium, appellari, intellige, licuisse existimare non probas, quæ vagæ per urbem offendeabantur. Propterea alter Catullo etiam nequior, foras prodire eas jubet, quæ amatores quærerent: (f)

*Utilis est vobis, formosæ, turba, puellæ.*

*Sæpe vagos ultra limina ferte pedes.*

Hac de causa, melioribus saltem temporibus, repudiari uxor poterat, quæ, viro imprudente, domo egressa esset (b):

*Uxor viro si clam domo egressa est foras*

*Viro fit causa, exigitur matrimonio.*

Ideo P. Sempronius Sophus, ut Valerius Maximus refert (c), conjugem repudii nota affecit, nihil aliud, quam se ignorante ludos ausam spectare.

Nunquam tamen convenire cognatas, & amicas, ac festorum dierum celebritatibus interesse, etiam pudicissimis morem non fuisse, liquet ex Terentio (d):

*Tum tuas amicas te, & cognatas deferere, & festos dies*

*Mea causa nolo. So: nil pol jam istæ res mihi voluptatis ferunt:*

*Dum ætatis tempus tulit, persuncta satis sum: satias jam tenet*

*Studiorum istorum.*

Verum omnes porticus, omnia templa, ac fora fæminis aliquando repleta Romæ fuisse, testem dare Nasonem (e) possum; ad ludos tamen, & spectacula, in theatrum, in circum, in arenam itabant frequentiores, ut ex eodem patet (f), & quod pejus est, (g)

— *lati juvenes, mixtaque puellæ.*

Hinc peccandi magister: (h)

*Proximus a domina, nullo prohibente, sedeto.*

Lege Roscia quidem, cum discreti spectatorum loci, suis & fæminis adtributus est seorsim a viris in theatro, sed adhuc in circo, ac amphitheatro promiscue mares, ac fæminæ spectabant. Plutarchus

(a) Ovid. de Art. l. 3 v. 417. (b) Plaut. Merc. act. 4. sc. 6. v. 3. (c) l. 6. c. 3. (d) Hec. act. 4. sc. 2. v. 16. (e) l. 1. de Art. a v. 67. (f) Ibid. a v. 39. (g) Ovid. de Art. l. 1. v. 217. (h) de Art. l. 1. v. 39.

chus (a) : *spectaculum gladiatorum erat . Locis autem ad spectandum nondum tunc discretis , sed mixtim sedentibus viris , fœminisque , accidis , ut propter Sullam sederet mulier quæpiam facie , & genere honesta .* Sustulit tandem pessimum morem Augustus , ut Tranquillus narrat (b) : *Fœminis ne gladiatores quidem , quos promiscue spectare solemne erat , nisi ex loco superiore spectare concessit . Vestales quidem ad podium (c) loco senatoribus , magistratibus , ac sacerdotibus concesso , in amphiteatro spectabant , aliæ autem cujuscumque ordinis fœminæ (d) in summa cavea , ac supra viros , omnes tum in circo , tum in arena , tum in theatro .* Hinc Propertius : (e)

*Colla cave inscëlās ad summum obliqua theatrum ,*  
ne scilicet suspicias supremum , & altissimum locum , ubi fœminæ .

Sed & convivii fœminæ Romanæ cum viris intererant : *Quem Romanorum ,* inquit Nepos (f) , *pudet uxorem ducere in convivium ?* Bene ait , *ducere* , extra domum scilicet , & ad extraneos , nam ad convivium propinquorum adhiberi fœminas , & in Græcia , eodem Nepote teste (g) , usitatum . Romanas vero alienorum etiam cœnas frequentasse , constat ex Tullio , qui , ait , (h) esse , qui dicerent , *uxores suas a cœna redeuntes attrectatas a Cælio* . Nulli matronarum tamen extraneorum convivia contra viri voluntatem , aut eo ignorante , licuit adire , alioqui repudiari poterat , juxta l. consensu C. de repud. Non eodem , ac viri tempore , mensæ accumbere ceperunt mulieres , quæ , quamquam in lectis discumbere cœnatis mos esset , viris tamen accumbentibus , mensæ assidebant . Testis luculentus Valerius Maximus (i) : *Fœminæ cum viris cubantibus sedentes cœnitabant , quæ consuetudo ex hominum convivii ad divina penetravit . Nam Jovis epulo , ipse in lectulum , Juno , & Minerva in sellas ad cœnam invitabantur .* Quod genus severitatis ætas nostra in capitolio , quam in suis domibus servavit . Priscam hanc consuetudinem expressisse Apulejum , aliqui credunt , ubi Milonis uxor (k) , viro discumbente , *pedes assidebat* . Verum non antiqua consuetudo auctoris animo observata , sed hospitis avaritia , & paupertas , siquidem cum in uxoris locum jubetur Lucius ipse assidere , hanc reddit causam Milo : *Asside istic , nam præ metu latronum nec sufficientem suppellectilem parare nobis licet* .

A Pompei autem ætate , putat Hieronymus Mercurialis (l) , cœpisse fœminas quoque cum viris discumbere , quod verum fortasse esse po-

(a) Sull. (b) August. c. 44. (c) Lins. de Ambit. c. 11. (d) Lins. ibid. c. 14.  
(e) l. 4. eleg. 2. v. 77. (f) prof. (g) ibid. (h) pro Cælio c. 20. (i) L. 2. c. 1. (k) Metamorph. l. 1. (l) Ari. gymn. l. 1. c. 11.



potest de matronis, nam multo ante Pompei ætatem, scilicet Cætonis Majoris tempore saltem amicas accubasse dicendum est, si vera narrat Livius ex Antiæ (a): *illam* [famofam mulierem Placentiam] *infra eum* (L. Quintium) *accubantem negasse*, ac paulo post: *ad spectaculum scortii procacis in sinu consulis recubantis*. Quin ante bellum punicum secundum accumbebant fœminæ saltem hujus ordinis, ut ex Plauti *Asinaria*, *Bacchidibus*, *Mostellaria*, *Perfa*, *Sticho* liquido apparet. Sed quocumque id cœperit tempore, ad sinistram ejus, qui in medio cubabat, accumbebant mulieres, qui locus inferior, infra eum propterea dictæ discumbere, cum loco superiore, aut summo, seu supra accumbere diceretur, qui dexter erat. Sic Livius (b): *infra eum accubantem*, sic Cicero (c), *Cyberidem*, ait, *infra Eutræpe- lum accubuisse*. Plutarchus (d) credere videtur, ideo inferiorem locum uxoris, aut liberorum fuisse, quod is, qui supra, ut par erat, tribui debebat convivarum honoratissimo. Sed facilius crediderim, hanc ideo indutæ consuetudinem, quod quæ supino sinistra erat, eadem in ventrem prono, qua ratione discumbebant (e) pulvinis innixi cœnæ initio Romani, dextera erat, ac propterea patebat sive viri, sive amatoris amplexibus. Cicero (f): *accubantes in conviviis amplexi mulieres impudicas, vinolanguidi*. Propterea infra recumbere idem est, ac in sinu recumbere. Livius (g): *illam infra eum accubantem*, mox, *ad spectaculum scortii procacis in sinu consulis recubantis*. Vide quid arguerit inferior locus sororibus, summus uxori a Caligula assignatus. Svetonius (h): *cum omnibus sororibus suis stupri consuetudinem fecit, plenoque convivio singulas infra se vicissim collocabat, uxore supra cubante*. Quare quod ait Mercurialis (i), certa quadam figura a viris aliquo pacto diversa, quasque sedentes, & nulli alteri rei cubitis innixas mulieres discubuisse, libenter de illis matronis accipio, quibus major honestatis, & dignitatis cura. Cæteras, quas in sinum virorum recipi non pudebat, eadem, ac viri, ratione discubuisse, dubitari non potest.

Quod ad rem convivalem spectat, fœminas bibere solitas Romæ, atque in Latio loram, passum, murrinam, & quæ id genus sapiant, potu dulcia, asserit A. Gellius (k). Vinum certe, vel ab initio urbis fœminis interdictum, præter alios testatur luculenter Plinius: (1) *Non licebat id fœminis Romæ bibere. Invenimus inter exempla Egnatii Mecenii uxorem, quod vinum bibisset ex dolio, interfectam fusti a marito, cumque a Romulo absolutum. Fabius Pictor in annalibus suis scripsit, matronam,*

quod

(a) l. 39. c. 43. (b) l. c. (c) *famil.* l. 9. *epist.* 26. (d) *Quæst. conviv.* 3. l. 1.

(e) *Mercurial.* l. c. (f) *Cæcilin.* 2. c. 10. (g) l. c. (h) *Calig.* c. 24. (i) l. c.

(k) l. 10. c. 32. (l) l. 14. c. 13.

quod loculos, in quibus erant claves vinaria cella, resignavisset, a suis inedia mori coactam. Cato ideo institutum ait, propinquos fœminis osculum dare, ut scirent, an temetum olerent. Posterioribus etiam temporibus, cum exoleverat hæc tanta fœminarum sobrietas, turpe tamen fuisse fœminis vinosiores videri, conjici potest ex Martiale, ubi eas irridet, quæ ad animæ ex vini potu graveolentiam tollendam Cosmi pappos [a], aut Lauri folia [b] mandebant. Consuetudinis autem cognatos osculo excipiendi etiam Plutarchus hanc rationem affert [c], ut nimirum deprehendi possent, quæ vinum bibissent. Moris hujus vestigia videmus apud Plautum, ubi adeuntem patrem statim filia ad osculum invitat [d].

Quando cœperit frequentius uti vino uterque sexus, non ausim divinare. Puto tamen antequam vulgari alia vitia cœpissent, mulieres vino jam assuevisse. Haud ita longe a Romulo urbis, atque legis conditore, fuere, quæ vino, coque impune, minime abstinerent, nisi hujus legis ignarus dicendus sit Naso, qui de Tarquinii Superbi nura cecinit: [e]

———— fufis per colla capillis

*Inveniunt posito pervigilare mero.*

Anus multibiba non una est apud Plautum. Sed ejusdem Ovidii ætate citra ullius admirationem existimo matronas plerasque vinum bibisse. Senecæ vero temporibus gulæ adeo deditæ aliquæ inveniebantur, ut non vino dumtaxat oblectatas dicat, sed in multam noctem cum viris cœnasse, cumque ipsis voracitate contendisse: [f] non minus pervigilant, non minus potant, & oleo, & mero viros provocant: atque inuitis ingesta visceribus per os reddunt, & vinum omne vomitu remetuntur. Hoc stomacho mulier esse debuit, quam describit Juvenalis (g):

———— tandem illa venit rubicundula totum

*Cenophorum sitiens, plena quod tenditur urna*

*Admitem pedibus, de quo sextarius alter*

*Ducitur ante cibum rabidam facturus orexim.*

[a] l. 1. Migr. 72. [b] l. 5. Migr. 4. [c] Quæst. Rom. 6. [d] Stieb. ad. 1. sc. 2. v. 34. [e] Fast. l. 2. v. 739. [f] Epist. 95. (g) Sat. 6. v. 425.

C A P U T VII.

*Balnea muliebria. Palæstra mulierum: Earum pugne in arena.*

**A**NTE cœnam balneorum usus non viris solum, sed etiam fœminis a priscis temporibus communis fuit. Initio autem cum aut nulla, aut angustissima publice extarent balnea, privatim quamque domi suæ laviſſe, certum est. At unquam ne promiscue, & simul cum viris? Id plane nego, sive publice, sive privatim, manente adhuc cum republica Romanæ disciplinæ severitate, unquam factum, neque video, cur de hoc ambigat Mercurialis, qui ex Varronis, & Gracchi locis hanc sibi suboriri suspensionem fatetur (a). Primum enim quid ad hanc corruptelam significandam faciunt Gracchi verba? En illa apud A. Gellium (b). *Nuper Teanum Sidicinum consul venit: uxor edixit, se in balneis virilibus lavari velle: quæstorj Sidicino a M. Mario negotium datum, ut balneis erigerentur, qui lavabantur.* Balneorum virilium cum sit mentio, apparet, balnea non fuisse promiscua. Quod vero consulis uxor in iis lavari voluerit, non probat promiscue lavari voluisse cum viris, imo contrarium manifestum est, si ii qui lavabantur, statim e balneis exacti. Quin ne maritus quidem consul interfuit, cum uxor lavaretur. Pergit enim narrare Gracchus: *uxor renunciat viro, parum cito balneas traditas esse, & parum lautas fuisse.* Ex his Gracchi verbis Marlianus in Romæ topographia (c) hoc solum infert, mulieres aliquando lavari solitas in balneis virilibus. Ipse ex Graccho potius inferendum dico, nunquam in balneis virilibus mulieres laviſſe, sed tantum hoc sibi sumpsisse uxorem consulis, vel quod nulla Teani muliebria publice balnea, vel quod noluerit Sidicinis fœminis misceri matrona Romana, aut, cum omnes deberent ex balneis hac de causa exigi, magno voluerit sudare tumultu (d), qui semper gratissimus hujusmodi beatulis mulieribus. Certe videtur hoc singulare superbæ, & imperiosæ fœminæ fuisse.

Varro (e) autem tradit, in balneo conjuncta fuisse ædificia bina; unum ubi viri, alterum ubi mulieres lavarentur. Si bina ergo erant ædificia ex Varrone, quæ suspicio hinc Mercuriali? Mares ac fœminæ suo quique ædificio lavabantur; ideoque neque eodem lavacro, neque eadem cella, licet binis ædificiis muliebris cella virili conjuncta esset. Cum pudor itaque non pateretur, utrumque sexum simul lavari,

R

vari,

(a) de Art. gymn. lib. 1. cap. 10. (b) lib. 10. cap. 3. (c) l. 4. cap. 7. (d) *suu.* sat. 6. v. 420. (e) L. L. l. 8.

vari, lavacra autem conjungi commoditas desideraret, nimirum ut idem hypocauftum, aquarium, vasarium utrisque inserviret; discretis, sed continentibus cellis, & pudori, & commoditati consultum. Utrumque respexisse puto, Vitruvium, cum præcipit (a), uti caldaria (caldaria hic cellæ sunt) muliebria, viriliaque conjuncta, & in iisdem regionibus sint collocata, sic enim efficitur, ut in vasaria ex hypocaufto communis sit usus eorum utrisque. Ita in privatis balneis, de quibus hic Vitruvium scripsisse, puto, nihil mihi occurrit, quod illam deceat Romanorum gravitatem, apud quos, Valerio (b), & Cicero (c) testibus, neque cum parentibus filii puberes, neque cum foceris generi lavari auri sunt.

Cum autem publice ad octingenta extitisse Romæ balnea, memoræ proditum sit, fuisse inter hæc aliqua, ita discretis lavacris, ad usum marium, ac fœminarum, neque affirmare audeo, neque negare. Peculiaria pro fœminis fuisse aliqua, haud temere suspicatur Mercurialis (d), & forte ea, quæ Agrippinæ dicebantur, ab Agrippina Neronis matre ædificata, nec non quæ Olympiadis vocabantur in suburra, & quæ Ampelidem, & Priscillam trans tiberim habuisse, forsitan ad evitandum hominum conspectum, legimus. Ad publicas autem thermas, ac balnea virilia fœminas impudicas accedere solitas, videtur indicare Seneca, (e) ubi ait, juvenes voluptatem querere circa balnea, & sudatoria, & loca ædilem metuentia.

Dilapsa tamen severitatis Romana disciplina, eo devenit muliebris impudentia, ut eodem labro mares, fœminæque lavarentur. Pessimum morem Adrianus sustulit, deinde & M. Aurelius. Helagabalus pro ingenio suo restituit, sustulitque iterum Alexander Severus, ac repudiandas, doteque multandas sanxit, quæ secus viderent.

Cum hæc scriberem, incidi in quamdam Octavii Ferrarii dissertationem de balneis nuper editam a V. Cl. Joanne Fabricio (f), in qua eruditissimo auctori persuasum videri potest, usque ab Ovidii temporibus promiscuas balneas viris, ac fœminis fuisse. Probabile id mihi nequaquam est. Primo enim non adeo distat a Cicerone Ovidius, ut cum Ciceronis ætate neque filii cum patribus, neque cum foceris generi lavarentur; hac tanta verecundia subito in maximam impudentiam versa, Ovidii ætate fœminæ lavarentur cum viris. Deinde quis dicet, sub Augusto publice iisdem balneis utrumque sexum usum, cum ex Vitruvio ejus temporis scriptore appareat, etiam privatum virilia

(a) l. 5. c. 10. (b) l. 2. c. 1. (c) Offic. 1. c. 129. (d) l. c. (e) de Vit. Beat. c. 7. (f) Helmstedii 1720.

ria caldaria a fœmineis discreta? Demum hoc non evincunt Ovidii versus (a), quos Ferrarius citat:

*Cum custode foris tunicam servante puella.*

*Celent furtivos balnea multa jocos,*

seu melius viros, ut alii emendant. Hinc colligi quomodo potest promiscue fœminas cum viris lavisse, cum pateat in earum balnea ne ingressos quidem viros, nisi forte aliquis furtim irreperet? At ne Juvenalis quidem tempore pudicas, aut quas esse pudicas oportebat, fœminas unquam lavisse cum viris, certissimum puto. Quis enim sibi persuadeat, poetam tota contra fœminas satira id tacere voluisse? Virorum ministerio aliquas in balneis usas, neque unctorum, ac aliptarum oculos, manusque expavisse, ex illo discimus (b); pejus quid, atque obscenius ausas, cum id ille minime referat, non credam. Quare cum ex Martiale (c), qui Juvenalis æqualis fortasse fuit, vel saltem eo paulo inferior, constet, fœminas aliquas cum viris lavisse; id ab impudicis aliquibus solum ea ætate usitatum arbitror, quod tamen ne Senecæ quidem ævo rarum. Quamquam vero publicis tantum prostibulis id in usu esset, vetitum tamen a Trajano, cui castitas ingenta, & innata, si Plinio (d) fides, ideoque magnus verecundiæ amor, fœdissimum morem non dubito. Liquet enim ex Xiphilino in Adriano promiscuas balneas ab hoc Imperatore sublatas. Tantum vero abest, ut publicæ lupæ aut Trajani, aut successoris Adriani editis a pessimo more cohiberentur, ut sensim etiam ad matronas eadem impudentia transierit; quin post ipsa etiam Alexandri Severi tempora inter Christianos quoque promiscuas fuisse balneas, Ferrarius planissime ostendit. Sanctus Cyprianus pessimum morem ita execratur (e): *Quid vero, quæ promiscuas balneas adeunt, quæ oculis ad libidinem curiosis, pudori, ac pudicitia corpora dicata prostituunt; quæ cum viros atque a viris nudæ videntur turpiter, & videntur, nonne ipsæ illecebras vitiis præstant.*

Hoc cum aliquando non erubescerent fœminæ Romanæ, quis mirabitur fœmineum ceroma (f), ac in gymnasiis Spartanarum more ipsas viris immixtas, ac sese exercentes? Palæstræ, aliisque exercitationibus deditas describit Juvenalis (g), quamquam idem fatetur alibi paucarum hoc fuisse (h):

*Luctantur paucæ, comedunt colipbia paucæ.*

Magis adhuc contra mores illud, quod aliquando primates etiam matronæ in arenam descendere, & gladiatoriam pugnam vere pugnarunt.

R. 2

(a) de Art. 3. v. 640. (b) sat. 6. (c) l. 11. epigr. 76. (d) paneg. cap. 20. (e) de disc. & hab. virg. (f) Juven. sat. 6. v. 246. (g) l. c. (h) sat. 2. v. 53.

runt. Tacitus: (a) *fœminarum illustrium, & senatorum plures per arenam sædatis sunt*. Svetonius (b): *venationes, gladiatoresque & noilibus ad lychnuchos dedit, nec virorum modo pugnas, sed & fœminarum*. Frequentius ex iis temporibus esse hoc cœpit, cum, Severo Principe, S. C. cavendum fuerit, ne fœminæ ad gladium depugnarent. Vide de his Lipsium (c).

## C A P U T VIII.

*Matrona carpento vestis. Lætica. Sella.*

**P**Riscis, & primis temporibus Romanas matronas pedibus inces-  
sisse, asserendum est, cum eo, quod Valerius Maximus (d) refert, ob Coriolanum exoratum, sanxisse in honorem matronarum Senatum, ut fœminis semita viri cederent, tum eo maxime, quod clare historici referunt, quo tempore, & qua de causa illis indultum sit, ut carpento veherentur. Post Vejoes enim captos, cum auri copia Romæ non esset, quo voti a Camillo facti religione se populus solveret; *matrone*, inquit Livius (e), *cætibus ad eam rem consultandam habitis, & communi decreto pollicite tribunis militum, aurum, & omnia ornamenta sua in ærarium detulerunt*. Grata ea res, ut quæ maxime Senatui unquam fuit: honoremque ob eam munificentiam ferunt matronis habitum, ut pilento ad sacra, ludosque, carpentis festo, profestoque intererent. Amisere ex eo tempore usum pedum locupletiores quidem, & honestiores, vehiculisque junctis usæ sunt, artificio etiam, & materie insignibus, quæque magno empta, oportuit. Indicat Plautus; (f):

————— *eburata vehicula, pallas, purpuram*

*Nihil moror, quæ in servitutem sumptibus redigunt viros.*

Auræ carrucæ meminit etiam temporibus suis Martialis (g). Subigebant autem non equos ad currum, sed mulos, mulasque, quod nullo tempore non usitatum. Idem Plautus (h):

*Ancillas, mulos, muliones, pedisequos,*

*Salutigerulos pueros, vehicula, qui vebat.*

Varro etiam (i) memorat, rhedarias mulas, ac de mulis hæc alibi (k) habet: *hisce enim binis conjunctis omnia vehicula in viis ducuntur*. Quamquam ex iis, quæ sequuntur, apparet nonnullos etiam  
usos

(a) ann. l. 15. c. 32. (b) Demis c. 4. (c) Saturn. l. 2. c. 4. (d) l. 5. c. 2. (e) l. 5. c. 25. (f) *Autul. adl.* 2. fr. 1. v. 46. (g) l. 3. epigra. 62. (h) *Autul. adl.* 3. fr. 5. v. 27. (i) de R. R. l. 3. c. 17. (k) *ibid.* l. 2. c. 2.

ñfos equis ad veſturam . Adde tamen & Martialem , qui longo eſt poſterior tempore (a) :

*Aurea quod fundi pretio carruca paratur ,*

*Quod plaris mula eſt, quam domus empta tibi .*

Neque uno nobiliores matronæ contentæ erant vehiculo . Namque vel alia aliis pretioſiora , vel cum plura inventa eſſent vehiculorum genera , quæ aut numero rotarum diſſerrent , aut varie eſſent figurata , & conformata , *carpenta* , *rbeda* , *carruca* , *eſſeda* , *petorita* , & alia id genus , fieri potuit , ut ſingula ſaltem ſingulorum generum ſibi parari vellent . Plautus , qui ſub initium belli ſecundi punici floruit (b) :

*Nunc quoque venias , plus plauſtrorum in ædibus*

*Videas , quam ruri , quando ad villam veneris .*

In medio ardore ejuſdem belli punici C. Oppius tribunus plebis legem tulit , qua matronarum luxus coercitus , atque inter cætera vetitum (c) , *neu juncto vehiculo in urbe , oppidove , aut propius inde mille paſſus , niſi ſacrorum cauſa veberentur* . In melius tamen verſo reipublicæ tempore viginti poſt annos lex Oppia magnis contentionibus abrogata eſt , redditusque mulieribus prior ornatus , iterumque vehi per urbem permiſſum . Enim vero univerſis dolor , & indignatio erat , inquit Livius (d) , *cum ſociorum Latini nominis uxores viderent vebi per urbem , ſe pedibus ſequi* . Unde colligitur , in Latio quoque eundem fuiſſe vehiculorum uſum .

Haud ita multo poſt , Aſia deviſta , ut autumat Lipſius (e) , cœpit uſus leſticarum , quæ nihil aliud , quam modicus leſtus , ubi jacentes in pulvino ſingulæ mulieres ( ita etiam in leſticis ſuis viri ) ſervorum humeris ferebantur . Poſitus hic corporis clare deprehenditur ex Ovidio (f) :

*Interea ſive illa ſoro reſupina feretur ,*

*Leſticam domina diſſimulanter adi .*

Leſticis extra urbem primum geſtabantur omnium ordinum viri , ac fœminæ , deinde ſub tempora Julii Cæſaris etiam per urbem . Hic tamen rerum potius vetuit leſticis uti , quæ nec viros , nec liberos haberent , minoresque eſſent annis quadraginta . Verum regnante Auguſto ita ſequentari cœpit leſticarum uſus , ut tandem ſub Tiberio nulla mulier carpento veheretur , niſi ſorte ſacrorum cauſa , quod & per Oppiam legem olim licuit . Idcirco Agrippina altius viſa ſuum ſaſtigium extollere , quod carpento capitoliū ingrediebatur ,  
more

(a) l. c. (b) l. c. v. 31. (c) Liv. l. 34. c. 1. (d) l. 34. c. 7. (e) *Ellel.* l. 1. c. 19.  
(f) *de Art.* l. 1. v. 486.

more sacerdotibus, & sacris antiquitus concessio. Ita Tacitus(a): *sum quoque fastigium Agrippina extollere altius, carpens capitolium ingredi, qui mos sacerdotibus, & sacris antiquitus concessus, venerationem augebat fœmine.*

Lecticas autem testas, cum & apertæ aliquæ essent, potissimum in usu matronis pudicioribus, credo, quæ contra aspectum hominum clausæ, undique munitæ erant pelle, & velo, opere arcuato, cum finestris ad prospectum, quæ velo, sive linteo tegebantur, ut Liplius (b) descripsit. Viros etiam lecticis testis usos monstrat ille dives, cui (c)

— *facit somnum clausa lectica finestra.*

Servos ad lecticam matronæ locupletiores quærebant proceros, & boni habitus, quibus succollantibus altiores supra vulgus, cæterasque extollerentur.

— *longorum vebitur cervice Syrorum (d).*

Hi enim potissimum ex Syria, Cappadocia, Germania, Liburnia etiam, Liburnus enim apud Juvenalem est lecticarius (e):

— *tarde venisse Liburnus*

*Dicitur*

Tenuiores fœminæ angustiori lectica a duobus tantum, vel quatuor fervis gestabantur, summates vero & hexaphoro, & octophoro, quo viri, nisi desides, & molles, vehi numquam solebant. Itaque Suetonius de Caligula (f): *interdum adeo segniter, & delicate incescit, ut octophoro veberetur.*

Sed & aliud erat gestatorii genus tum viris, tum mulieribus, *Sella*, quæ alia certe a lectica, cum Martialis utramque distinguat (g):

*Lecticam, sellamque sequar, nec ferre recusor.*

Diversam tamen aliquo pacto fuisse muliebrem sellam a virili, indicat satis Tranquillus, qui de Othone ait (h): *tunc abditus prope muliebri sella.* Laxioribus certe, & ornatoribus sellis oblectatas matronas locupletiores, liquet ex Seneca, & quam quaterni, ac seni gestarent homines, cum viri, & tenuiores fœminæ arcta, & minutula contentæ essent, quam duo tantum ferrent. Ita Seneca (i): *quam refert, quantum habeas, quot lecticarios, quam laxam sellam.* A lectica sella differebat, quod sella ita erat compacta, ut sedentes gestarentur, ideoque in sella nullus pulvinus, sed capiti reclinando tantum cervical.

Ut

(a) *ann. l. 12. cap. 9.* (b) *l. c.* (c) *Juven. sat. 3. v. 242.* (d) *Id. sat. 6. v. 351.*  
(e) *Juv. sat. 6. v. 477.* (f) *Caj. cap. 43.* (g) *l. 10. epigr. 10.* (h) *Oib. cap. 8.*  
(i) *de Tranq. VII. l. 2. c. 16.*



Ut spectes ludos, conducit Ogulnia vestem,

Conducit comites, sellam, cervical (a).

Cæterum & sellæ aliæ apertæ, aliæ clausæ erant, clausisq; mulieres, saltem verecundiores utebantur.

Offendit vacuum, & clausam pro conjuge sellam (b).

Tertullianus propterea leſticis, ac sellis ait (c), in publico quoque domesticas, ac secretas habitas. Integrum locum dabo infra.

Deferebantur in theatrum, ac circum matronæ sella minutula, atque in ea sedentes spectabant. Calphurnius (d)

Venimus ad sedes, ubi pulla sordida veste

Inter fæmineas spectabat turba cathedras.

Cathedræ enim appellatæ etiam sunt hujusmodi sellæ muliebres. Ita Martialis (e);

Inter fæmineas tota qui luce cathedras.

His etiam in ludum delatas puellas, ac in iis sedentes doctorem audiisse, credi potest ex illo Horatii (f):

Discipularum inter jubeo plorare cathedras.

Sic etiam servi ad sellam cathedralicæ diſti sunt. Martialis (g).

Cum cathedralictos portes tibi rbeda ministros,

quod tamen alii aliter interpretantur. Digniore fuisse sellam leſtica, Lipsius (h), a quo exſcripſimus, quæ de leſtica, ac sella allata sunt, arbitrat, eique libenter assentior ea potissimum de causa, quod magis decuisse matronalem gravitatem mihi videtur, sedentes, quam jacentes, supinasque gestari. Ideo post inventas sellas, paulatim leſticarum usum deſuisse puto, Sellas autem non in collum atrollebant servi, sed manibus gestabant, qui ex eunuchis erant, postquam frequentiores hi esse in matronarum familia cœpere. Utrumque probant Divi Hieronymi verba (i): fæmina nobilis, quæ prius eunuchorum manibus portabatur,

Probrosas fæminas usu pedum a matronis semper distinctas, affirmare non dubito, quamquam dicturus minime sum, ita matronis verum ambulare, quemadmodum vehi meretriculis. Ovidius utrumque usitatum matronis, videtur significare cum ait (k).

Interea sive illa toro resupina feretur;

Leſticam domina dissimulante adit;

Sive vagis illi pedibus spatiosa teretur

Porticus; hic socias tu quoque junge moras.

Plautus etiam matronarum esse inquit (l):

ut

(a) Juv. sat. 6. v. 352. (b) id. sat. 1. v. 124. (c) de pall. c. 4. (d) eclog. 7. v. 26.

(e) l. 3. epigr. 63. (f) l. 1. sat. 10. v. 91. (g) l. 10. epigr. 13. (h) l. c. (i) Epist. 16. alias 27. (k) l. 1. de Ars. v. 486. (l) Stich. act. 1. sc. 2. v. 36.

— ut per urbem cum ambulent,

Omnibus os obturent.

Ex satirico autem satis liquido apparet, minus locupletes matronas pedibus incessisse, cum locupletiores vehi lectica solerent (a):

*Tamque eadem summis minimisque libido est,*

*Nec melior, pedibus silicem quæ conterit atrum,*

*Quam quæ longorum vebitur cervice Syrorum.*

Sed meretricibus assero, perpetuum fuisse pedibus ingredi, neque aliter permixtum, cum clare senatusconsultum matronis tantum, ut supra innuimus ex Livii auctoritate (b), carpentum indulserit. Sed præterea constare id puto ex Plauto, qui cum tot sæpe enumeret, quibus querendis amatores suos hujusmodi harpyiæ despoliabant, nullum unquam verbum de aliquo vehiculi genere facit, contra vero vehicula inter matronarum supellestem recenset.

Post inventas lecticas pariter inter ea, quæ ad matronas aditum furtivis amatoribus intercluderent, meminit Horatius lecticæ (c):

*Custodes, lectica, cinisones, parasitæ,*

*Ad talos stola demissa, & circumdata palla.*

Idem sentit Tertullianus loco statim laudando, unde ego tam propriam matronarum lecticam puto, quam stolam, & pallam. Neque te moveat, quod scortillum quoddam sibi ad lecticam homines commodari postulat a Catullo (d):

*Quæso, inquit, mihi, mi catulle, paulum*

*Istos commodita; volo ad Serapin*

*Ferri mane.*

Etenim si utendos ab aliis petit, illi neque lecticarii erant, neque lectica. Præterea serapidis templum extra urbem erat, ut Lipsius (e) admonet, neque extra urbem diffitebitur ullus, nullo discrimine omnium ordinum fœminis lecticas in usu. Concurstante etiam M. Antonio Italiæ municipia, *aperta lectica* (f) *mima ejus amica portabatur*, quam tamen impudentiam in urbe ostentare ausam, minime legimus. Verum inclinata in dies magis disciplina, tardius aliquanto, at consuevere tamen & hujusmodi pestes per urbem lecticis ferri, ideoque, Svetonio teste (g), Domitianus usum lecticarum probrosis fœminis ademit. Sed suis temporibus queritur Tertullianus (h), cum cæteris matronalis dignitatis insignibus usum quoque lecticæ, ac fellæ a matronis dimissum, ut facilius ab amatoribus possent adiri. *Indices, & custodes dignitatis habitus, ut lenocinii factitandi*

(a) *Juven. sat. 6. v. 349.* (b) *l. 5. c. 25.* (c) *l. 1. sat. 2. v. 98.* (d) *car. 10. v. 25.*  
(e) *l. c.* (f) *Cic. Philipp. 2. c. 58.* (g) *Demis. c. 4.* (h) *de pall. c. 4.*

di impedimenta, sedulo quædam desuescecerant. At nunc in semetipsas lenocinando, quo planius adeantur, & stolam, & supparum, & crepidulum, & calicndrum, ipsas quoque jam lectileas & sellas, quæ in publico quoque domesticæ, ac secretæ habebantur, ejurare.

Ubi vero de meretricibus est sermo, cum sellam audis, gestatoriam sellam, cavetis, intelligas. Meretricum enim sella ea est, cui insidebant diobolares, ac vilissimæ ante fornices, quæ sicut prostibulæ dictæ sunt, quod ante stabulum starent, ita etiam sellaria, aut profeda a Plauto, quod ibi etiam sedere solerent (a).

Quæ tibi oleant stabulum, statumque, sellam, & sessibulum merum.

C A P U T IX.

*Pedisequæ. Amicæ in matronarum comitatu. Servi, & ancillæ fœminis ad varia officia. Favea.*

**H**OC Romæ fœminarum omnium proprium, nec matronarum, & virginum tantum, sed meretricularum etiam fuit, ut nunquam sine pedisequis in publicum prodirent. Terentianus senex (b):

— accedo ad pedisequas,

Glycerii nempe. Anus Plautina de novo amatore (c):

*Vult placere sese amicæ, vult mihi, vult pedisequæ.*

Quæ infami mercimonio ditiores, eæ servulos, & ancillas plures domi alebant:

— quot ancillæ sunt jam?

*Quine etiam super adlucæ, quæ mihi comedint cibum?* (d)

& cum plurium comitatu foras prodibant:

*M nime mirum: adeo impeditæ sunt: ancillarum gregem*

*Ducunt secum.* (e)

Quæ pauperiores unam alebant ancillam. Antiphilæ illi (f)

— una ancillula

*Erat: ea texebat una pannis obfita.*

Unam etiam contentæ pedisequa contentæ, qualem se simulabat meretrix illa Augusta (g)

— comite ancilla non amplius una.

Una etiam mediocres matronæ pedisequa contentæ, quæ tamen non adeo eleganti forma, quamque ipso oris, corporisque habitu facile

S

a pro-

(a) *Plaut. Pen. act. 1. sc. 2. v. 56.* (b) *Andr. act. 1. sc. 1. v. 96.* (c) *Afin. act. 1. sc. 3. v. 31.* (d) *Plaut. Trucul. act. 2. sc. 6. v. 52.* (e) *Terent. Heautonim. act. 2. sc. 3. v. 4.* (f) *Terent. ibid. v. 52.* (g) *Juv. sat. 6. v. 119.*

a procacibus procacis heræ ancillulis dignosceres. Ita Domipho apud Plautum de ancilla, quæ nimis eleganti forma (a):

De: Neque illa matrem satis boneste tuam sequi poterit comes,  
Neque sinam. Ch: qui vero? De: quia illa forma matrem familias  
Flagitium fit, si sequatur,  
ac paulo post: (b)

ego emero matri tuæ:

Ancillam viraginem aliquam non malam forma mala,  
Ut matrem addecer familias, aut Syram, aut Ægyptiam.

De hoc multo magis infrequentibus temporibus sollicitæ fuere Christianæ sœminæ, ideoque Demetriadi suæ divus Hieronymus: (c) *enueborum tibi, & puellarum; ac servulorum mōres magis elegantur, quam vultuum elegantia*. Etenim ut idem alibi ait: (d) *animus dominarum ex ancillarum habitu judicatur*. Id certum est, nullam unquam sine comite prodire solitam, idque cujusque ordinis matronis ita religiosum fuisse, ut Ulpianus testetur, non levem injuriam matronis fieri ab iis, qui comites earum abducunt. Propterea Alcmena apud Comicum (e):

Jubere mi ire comites. — si non jubes,  
Ibo egomet, comitem Pudicitiam duxero.

Verum illæ, quæ divitias, fortunæque suas ostentare vellent, servorum, ancillarumque agmen secum trahebant, ut quoties prodirent, castra (f) moveri vere crederes, adeo magno tumultu ingrediebantur. Sanctus Hieronymus etiam hujusmodi comitatum exercitum appellat (g): *noli in publicum procedere spadonum exercitum præeunse*. Singularis itaque Plotinæ Augustæ laus fuit, quod parca comitatu (h) cum silentio incederet.

Nec servi solum & servæ prodeuntes locupletiores sœminas sequebantur, sed etiam amicæ, quas tenuiores e plebe matronas fuisse, puto. Ideo Juvenalis (i):

Ut spectet ludos, conducit Ogulnia vestem,  
Conducit comites, sellam, cervical, amicas

Item Martialis (k):

Omnes aut vetulas babes amicas,  
Aut turpes, vetulisque sœdiores:  
Has ducis comites, trabisque tecum  
Per convivium, porticus, ibeatra.

Cum

(a) *Merc. act. 2. sc. 3. v. 96.* (b) *v. 79.* (c) *epist. 97. alias 8.* (d) *epist. 47. alias 10.*  
(e) *Amphis act. 3. sc. 2. v. 48.* (f) *Juv. sat. 6. v. 419.* (g) *epist. 47. alias 10.* (h) *Plin. pan. c. 33.* (i) *sat. 6. v. 352.* (k) *l. 8. epigr. 79.*

Cum autem Horatius in matronarum comitatu, & *parasitas* videatur enumerare (a):

*Custodes, lectica, cinisfones, parasite,*  
has ego crediderim non alias esse, quam quas alii vocant amicas. Sicut enim clientuli principes viros, ita e plebe matronas honestas quidem, sed tenuiores fuisse puto, quæ principes fœminas in publicum deducerent, domumque reducerent, idque cibarium spe, ideoque *parasite* dictæ a poeta, quibus non sportula, sed recta cœna forsan dabatur. Eunuchi qui posterioribus temporibus frequentissimi in familia, ac comitatu matronarum, ut ex multis Sancti Hieronymi locis colligitur (b), rariiores aliquando fuere, ac non nisi opulentissimarum. Terentius (c):

— eunuchum porro dixti velle te,

*Quia sola utuntur his regine: repperi.*

Cum autem tantus esset Romanis divitibus servorum numerus, ut Pedanio Secundo quadringentos, Tacitus (d), Plinius (e) C. Cæcilio Claudio Isidoro servorum quatuor millia centum sedecim, alicui ad viginti millia aliqui tribuant, quot servos, quot ancillas uni dominæ operam impendisse credis? Singulis singulos servos, aut ancillas muneribus, vel potius deliciis, & ineptiis præpositas, discas ex inscriptionibus, ubi sæpe servæ *ornatricis, sarcinatricis, a mundo muliebri, a catella* etiam occurrit mentio. Sed cui rei non peculiaris servus, aut ancilla ob heræ delicias destinata? Omitto rudiores, & deformiores, quæ ad tetrinam, quæ ad totius familiæ bonum procurandum, ædes verrendo, cibum coquendo, ligna cædendo, cæteraque laboriosa opera edendo adigebantur, earum, eorumque, qui luxui, ac deliciis unius dominæ inserviebant, accipe aliquorum nomina ex Plauto (f):

*Vestipacæ, unstor, auricustos, flabelliferæ, sandaligerulæ,*

*Cantrices, cissellatrices, nuncii, renuncii.*

Quin etiam hominum monstra aliquibus in deliciis: (g)

*Non ne, ubi mibi dixti, cupere te ex Æthiopia*

*Ancillulam.*

Inter tot ancillas semper etiam aliqua fuit, quæ honestius a domina habita, mentis, & consiliorum ejus, ac, si opus esset, flagitiorum, conscia erat. Hujusmodi ancillam volebat videri habere se Ogulnia illa, ideoque eleganti forma, & rutilis capillis conduxerat

S 2.

fla.

(a) lib. 1. sat. 2. v. 98 (b) ep. 97. alias 8. 47. al. 10. 18. al. 22. 86. al. 27. (c) *Eunuch. act. 1. sc. 2. v. 87.* (d) l. 14. ann. 643. (e) l. 33. c. 10. (f) *Trinum. act. 3. sc. 1. v. 21.* (g) *Terenti. Eunuch. act. 1. sc. 2. v. 60.*

— *flavam, cui dei mandata, puellam* (a).

Nisi hic mavis cum aliquibus legere *Faveam*, namque ajunt hujusmodi elegantes ancillulas *Fabias*, alii *Faveas* appellatas, credo, quia eis præ cæteris heræ favebant. Gloss. *Favea παύσις*: Faveus παῖς. Ideo Scaliger Plauti locum dubiæ sanitatis ita legit (b):

*Quasique hunc annulum Faveæ suæ dederit,*  
quæ tamen lætio omnibus nequaquam arrisit.

## C A P U T X.

*Mulierum munditiæ. Fæminarum luxui fræna nequidquam  
sepius injecta.*

VEnio nunc ad munditias, cultumque muliebrem, cujus omnī ætate magna curiositas, sequioribus sæculis modum omnem, & fidem excessit. Mulierum ingenio, & maritorum indulgentiæ id ascribendum. Illæ rebus omnibus cum privatis, tum publicis agendis parum idoneæ cæteris omnibus ornatum corporis prævertere. Non magistratus, ait Livius (c), nec sacerdotia, nec dona, aut spolia bellica his contingere possunt. Munditiæ, & ornatus, & cultus hæc fæminarum insignia sunt: his gaudent, & gloriantur, hunc mundum muliebrem appellaverunt majores nostri. Mariti, ut quid esset, quod imputare iis possent, ac ad cætera morigeras, dicto audientes, præsertim vero fidei servantissimas haberent, obsequentes se his uxorum studiis præstare maluerunt. Ut non tristis, Valerius Maximus inquit (d), earum, & horrida pudicitia, sed honesto comitatis genere temperata esset, indulgentibus maritis, & auro abundanti, & multa purpura usæ sunt, & quo formam concinniores efficerent, summa cum diligentia capillos cinere rutilarunt. Amœnioris cultus curiositas cæpit itaque cum Romanarum fæminarum pudicitia, ut non dubitem, omnium primas, hoc est ipsas Sabinas, initio urbis ad propagandam sobolem raptas, pro ut ea ætas tulit, in sese ornandis diligentia aliqua usas, & mundi-  
usculas suo more extitisse. Imo cum alia multa raptis illis primos Romanos, ad patriæ, parentumque desiderium levandum, injuriæque dolorem minuendum, indulgisse certum sit, hoc quoque statim permisisse puto, ut quam scite possent colerentur. Ad Coriolani tamen tempora majoris luxuriæ originem refer. Tunc enim, teste Valerio Maximo (e), *Senatus matronarum ordinem benignissimis decretis*  
ador-

(a) *Juven. sat. 6. v. 354.* (b) *Mil. aff. 3. sc. 1. v. 202.* (c) *lib. 34. cap. 7.* (d) *l. 2. c. 2.*  
(e) *l. 5. c. 2.*

adornavit. Namque vestis aurum (c) cinium emendat Liplius, ut infra dicemus) insignibus novum vittæ discrimen adjecit: permissis quoque bis purpurea veste, & aureis uti segmentis. Hinc paulatim crevit licentia. Captis a Camillo Veiis plurimo matronæ auro abundasse dicendæ sunt, cum tantum in publicum ærarium detulerint (a), quanto urbis, agrique Vejentani decima pars æstimata erat. Neque totum exhaustum credas. Paulo etiam post redempturi sese a Gallis Romani, cum in publico deesset aurum (b) quo summa pæctæ mercedis Gallis conferret, a matronis collatum acceperunt, ut sacro auro abstineretur? Sub bellum punicum secundum, quam excrevisset mulierum luxus, cum ex multis Plauti locis colligi potest, tum præcipue ex eo, ubi artificum recensio fit, qui aut concinnandis, aut inficiendis vario colore earum vestibus, ac mundo muliebri instruendo operam locabant. (c)

*Stat fullo, pbrigio, aurifex, lanarius,*

*Canpones, petagiarii, indusiarii,*

*Flammearii, violarii, carinarii,*

*Aut manulearii, aut murrbobasbrarii,*

*Propolæ, lineones, calceolarii,*

*Sedentarii sutores, diabatbrarii,*

*Solearii astant, astant molocbinarii,*

*Petunt fullones, sarcinatores petunt.*

*Trecenti cum stant phylacista in atriiis*

*Textores, limbolarii, arcularii ducuntur: datur*

*Æs. jam bosce absolutos censeas,*

*Cum incedunt insectores crocotarii;*

*Aut aliqua mala crux semper est, quæ aliquid petat.*

Quænam fuerit singulorum ars, pete a Plauti interpretibus, quorum alii aliter divinant. Id in plano est, poetam his sumptus, & rei familiaris dispendia significare, quibus matronarum ornatus stabat.

Neque nullo inter se singularum certamine coli solebant matronæ Romanæ, quin ne meretriculæ quidem. Plautus (d):

*Satis nunc lepide ornata credo, soror, te tibi viderier:*

*Sed ubi exempla conferrentur meretricum aliarum, ibi tibi*

*Erit cordolum, siquam ornata melius fore conspexeris.*

Hanc fæminis naturalem æmulationem significavit etiam Cato, cum pro Oppia lege diceret (e). Ideo, quæ ob egestatem ornamenta fi-

bi

(a) Liv. l. 5. c. 25. (b) Id. l. 5. c. 30. (c) Anst. æt. 3. sc. 5. v. 34. (d) Plaut. æt. 3. sc. 2. v. 24. (e) Liv. l. 34. c. 4.

bi parare non poterant, ne minus quam alix spectarentur, aut minoris essent, ea illæ certo pretio in singulos, vel plures dies conducebant. Matronas etiam loquor, qualis Ogulnia (a), de qua alibi mentio fuit. Mulieres autem illas, quæ mundum muliebrem accepto pretio locabant, dictas *Lavinias*, aliqui putant, ducti quodam Plautino versu (b), qui tamen aliis desperatæ sanitatis videtur, unde tamen illis hoc nomen inditum, non satis explicant.

Ut ad tributa omnes promptiores essent, cum modus supervacuis sumptibus imponendus videretur, ardente bello punico, C. Oppius Tribunus plebis, Q. Fabio, Tib. Sempronio Coss. legem tulit (c), *ne qua mulier plus semuncia auri haberet: ne vestimento versicolore uteretur.* Anno post vicefimo, annitentibus summa animi contentione matronis, & populi suffragia eblandientibus, abrogata lex fuit. Post Philippum regem Macedoniæ devictum, ac præcipue post Manlii triumphum de Gallis, qui Asiam incolebant, ab exercitu asiatico peregrinæ luxuriæ origine in urbem inducta (d), sine lege, & sine modo vires sumpsit insita hæc mulieribus curiositas, quas & imbecillitas mentis, ut inquit Valerius Maximus (e), & graviorum operum negata affectatio omne studium ad curiosorem sui cultum hortatur conferre. Prudenti itaque consilio Cato, cum censuram gereret, cohibere mulierum, totiusque civitatis luxum conatus est. *Ornamenta enim (f), & vestem muliebrem, & vehicula, quæ pluris quam quindecim millium æris essent, in censum referre viatores iussit, proque iis omnibus ternos in milia æris attribuit,* hoc est tributi nomine pendi iussit. Aliquando etiam huic tanto malo, tantisque virorum dispendiis de frænis injicientis & sub Imperatoribus (g) actum est. Sed frustra semper fuit licentiam, quæ immensum proruperat, velle revocare.

Quoniam vero hunc ludum ludimus, atque in iis inaniis laboramus, singulas mulierum arculas, & pixides, quantum fieri poterit, perscrutemur, ac universum mundum muliebrem excutiamus. Primo de vestibus, tum de auro, & gemmis, deinde de ornatu capitis, denique de fingendæ venustatis arte differemus.

C A.

(a) *Juven. sat.* 6. v. 302. (b) *Truc. aff.* 2. sc. 2. v. 20. (c) *Liv.* 1. 34. c. 1. (d) *Liv.* 1. 39. c. 6. (e) *Id.* 1. 9. c. 3. (f) *Liv.* 1. 39. c. 44. (g) *Tac. ann.* 1. 3. c. 11.



## C A P U T X I.

*De vestibus mulierum. Prætexta puellarum, matronarum stola,  
& palla, toga meretricum.*

**A**ntiquissimis temporibus toga communiter usos Romæ mares, ac fæminas; nemo jam negat. Tunc vero honestiores matronas in prætexta incessisse, Ferrarius (a) probabile putat, videturque affirmare Festus: *togam, qua mulieres utebantur, prætextam clavo aureo*. Quamquam autem deinde marium propria facta est toga; utriusque tamen sexus puerilem ætatem prætexta honestari, & sacram velut esse, voluerunt. Pueros in prætexta incessisse, non est cur probem, puellas autem quoque prætextatas fuisse, probat locus ille Ciceronis (b): *cripiēs igitur papillæ togam prætextam?* Luculentius etiam illud Propertii (c):

*Mox ubi jam facibus cessis prætexta maritis.*

Prætexta itaque vestis erat innuptatum tantummodo, cum nuptæ, toga deposita, stolam sumerent, ac pallam, quæ matronales vestes fuere.

Principio quidem unam tantum tunicam gestarunt mares, fæminæque, mox duas habere cæperunt. Interior altera brevior, & corpori propius adhærens, quæ ideo minime cingebatur, *subucula* appellata est, quæ marium erat, *intusium*, aliis *indusium*, quæ fæminarum. Subuculæ tunicam mares, intusio fæminæ stolam superinducebant. Stolæ autem jus nulli prorsus, nisi matronis, ut proinde stolæ nomine, tamquam proprio insigni, matrona, & matronarum ordo significetur. Valerius Maximus (d): *confessus plus salutis reipublicæ in stola, quam in armis fuisse*, nec non alibi (e): *te custode (Pudicitia) matronalis stola censeatur*.

Erat stola tunica longior, quæ ad plantas fluere, Horatius ideo (f):

*Ad talos stola demissa,*

atque ultra humerum per brachia tota ad manus manicis pertineret. Effæminatos hinc Cicero (g) significat asseclas Catilinæ, quod *manicatis*, ac *salaribus tunicis essent*. Credo, ut ad opus expeditos sese ostenderent, brevibus tunicis, & citra humerum desinentibus initio uti viros cæpisse, fæminas autem, ut pote inertes, manuleatis

tu-

(a) *de Re Vest.* p. p. l. 1. c. 25. (b) *in Ferr.* l. 1. c. 113. (c) *l. 4. eleg.* 11. v. 33. (d) *l. 5. c. 2.*  
(e) *l. 6. c. 1.* (f) *l. 1. sat.* 2. v. 99. (g) *Catilin.* 2. c. 22.

tunicis, ac talaribus impediri, pro nihilo habuisse. A. Gellius pudori, ac pudicitiae inventum hoc tribuit (a): *femini solis vestem longe, lateque diffusam decorum existimaverunt, ad ulnas, cruraque adversus oculos proiecenda*. Hoc certe praestitit stola, ut a facie ad imos pedes induta matronae, ac tectae essent, ac propterea Horatius (b):

*Matronae praeter faciem nil cernere possis.*

Quamquam aliquando aliqua non defuit, quae breviusculo vestitu impudentius uteretur, cujusmodi Catia illa, quae Horatii tempore una videtur id sibi licentiae sumpsisse.

*Matronae praeter faciem nil cernere possis,*

*Cetera, ni Catia est, demissa veste regentis.*

Stolae manicae confui ab humeris ad manus solebant, ad luxum vero aliquae, ut ex Aeliano doctissimus Ferrarius refert (c), fibulis aureis potius, aut argenteis necebant, & constringebant.

Ad extremam stolae oram adfuta erat instita, seu limbus, aut fascia, quae stolam ipsam honestabat, & fortasse ne plicis implicaretur pedibus, impediabat. Horatius (d):

*— talos subsuta tegit instita veste.*

Unde apparet, stolam subfutam institae, non institam stolae, ut putarunt aliqui.

De stolae colore, ac segmentis aureis mox, nunc de palla, quam praecinctae zona stolae superne injiciebant matronae, sicut tunicae viri togam. Hinc liquet, falsum esse Anselmum Solerium tractatu de Pileo (e), cum ait, Romanas feminas stola caput operuisse. Neque enim vestis ad medium praecincta, aliisque subiecta revocari in caput poterat. Deceptus autem Solerius fuit ab Isidoro, quem patet, cum stolam definit (f), *matronale operimentem, quod cooperto capite, & scapula a dextro latere in laevum humerum mittitur*, patet, inquam, stolam a palla minime distinxisse. Sed de capitis operimentis suo loco. Palla autem erat pallium muliebre, cujus partem in humerum sinistrum rejiciebant, alteram sinistro brachio subducebant.

Aliquando vero non pallam stolae superimponebant, sed amiculum. Certum est autem amiculum genus fuisse pallii, siquidem Cicero, quod prius amiculum dixerat, pallium deinde vocat (g): *Alciades paulo ante interitum visus est in seminis amicae esse amictus amiculo*. Is cum esset projectus inhumatus, ab omnibusque desertus jaceret: *amica corpus ejus texit suo pallio*. Ideo & virorum amiculum fuit apud

Græ-

(a) l. 7. c. 12 (b) l. 1. sat. 3. v. 94. (c) p. p. l. 3 c. 17. (d) ibid. v. 29. (e) c. 6. (f) Or. l. 19. c. 24. (g) de divina l. 2. c. 143.

Græcos, siquidem Nepos de Cimone (a): cum aliquem offensum fortuna, videret minus bene vestitum, suum amiculum dedit. Flammeum etiam quo nova nupta velabatur, quod Festus modo vestem (b), modo vestimentum (c) generice vocat, amiculi nomine alibi significat (d): Corollam nova nupta de floribus, verbenis, herbisque a se lectis sub amiculo ferebat. Pætereā amiculum pallium quoddam fuisse, liquet, eo quod nisi sustineretur, fluebat, ac trahebatur. Plautus (e):

Gy: Amiculum hoc sustolle saltem: Si sine trabi, cum egomet trabor, atque alibi (f):

— age sustolle hoc amiculum.

Aut igitur palla, aut amiculo pro libito induebantur. Neque aliud fuisse puto inter pallam, & amiculum discrimen, quam quod facebatur etiam Ferrarius (g), nempe quod amiculum palla brevius, seu pallium erat breve. Isidorus (h) amiculum dicit, esse meretricium pallium lineum. Falsissime. Namque constat ex Livio, cujus loca infra adducam, non solum matronas Romanas (i), sed & reginas (k) amiculum gestasse.

Hæc matronarum indumenta, neque alia novimus. Sic enim cum stola, & palla, sive amiculo honestæ omnes mulieres incedebant, nam de meretriculis nondum sermo, quæ quidem pauperrimæ non erant. Sicut enim homines ingenui fuere Romæ, qui quod togæ emendæ non erant, tunicati tantum incedebant; ita etiam e scæminis ingenuis, & honestis, quæ pallam sibi parare non poterant, stolatæ incedebant, cum tunica scilicet tantum matronali, hoc est talari, & manicata. Dubium tamen aliquod Ferrarius injecerat de pauperularum stola. Cum enim ille quemdam Plinii locum interpretaretur, stolam minime concessisse honestis e plebe mulierculis, mihi videtur. Ita Plinius (l): Etiam ne pedibus induitur (aurum) atque inter stolam, plebemque, hunc medium scæminarum equestrem ordinem facit. Ad hæc Ferrarius (m): quemadmodum in viris aurum in annulis distinguebat a Curia, & a plebejo ordine equites, atque medium ordinem faciebat; ita in mulieribus aurum periscelio, compedeque gestatum distinguebat libertinas a stola, id est matronis honestis, & a plebe inope, sicque veluti medium quemdam equestrem scæminarum ordinem faciebat: Hinc potest colligi, putare Ferrarium aut in plebe inope nullam honestam, aut honestam aliquam sine stola. Neutrum autem dicendum videtur. Honestatis enim curam & pauperibus fuisse, probat satis Phanium Terentiana (n). Quid ergo hæc inducæ?

T.

Togam?

(a) in Cim. (b) l. 3. (c) l. 6. (d) l. 3. (e) Cissell ad l. sc. 1. v. 117 (f) Pæn. ad l. sc. 2. v. 136. (g) ibid l. 3. c. 19. (h) l. c. (i) l. 34. cap. 7. (k) l. 27. cap. 4. (l) l. 33. c. 3. (m) pp l. 3. c. 17. (n) Phæn. ad l. sc. 2. v. 63.

Togam? tunicam virilem? ancillarem? Quod perisceliis care-  
rent, hoc solo a meretricibus discernebantur? Nequaquam, si hone-  
stæ erant. Quare probo quidem satis acutam, quaque meliorem ne-  
mo attulit, Ferranii interpretationem, sed puto Plinio, dum frigi-  
diusculè hic argutatur, plebem, quam stolæ opponit, inopes, &  
diobolares meretriculas esse, ideoque optime dictum, stolam primum  
mulierum ordinem, ac velut senatorium, nuptarum scilicet, & ma-  
tronarum constituere, periscelia divitum libertinarum alterum ordi-  
nem, ac velut equestrem, cum in tertium plebejo similem scortila-  
la, atque id genus mendicabula rejecta essent. Sicut enim viri in Se-  
natum & populum discreti, populus in equites, & plebem; ita fœ-  
minæ in stolatas divisæ, ac libertinas, libertinæ in duplicem iterum  
ordinem, divitum scilicet, quæ aurum pedibus induebant, & pau-  
perum, quibus horum ornamentorum nullum erat.

Quæres nunc, quomodo stolam, & pallam dicamus, fuisse solum-  
modo mulierum vestimenta, cum senex Plautinus tot vestium gene-  
ra enumeret [a]?

*Quid erat induta? an regillam induculam, an mendiculam,  
Impluviatam? ut istæ faciunt vestimentis nomina.*

deinde: [b]

*Tunicam rallam, tunicam spissam, linteolum cæscium  
Indusiata, patagiata, caltulam, aut crocotulam,  
Supparum, aut subminiam, ricam, basilicum, aut exoticum,  
Cumatile, aut plumatile, cerinum, aut melinum. gerra maxuma.*

Cani quoque etiam ademptum est nomen. Ep: qui? Pe: vocant Laconicum.  
Singularum vocum interpretationem invenies apud Nonium: id scias  
nunc, non hæc esse nova vestium genera, sed nova nomina, quod  
idem senex etiam indicat [c]:

*—vesti quotannis nomina inveniunt nova.*

Ajo itaque, singulis his nominibus sive tunicam, sive pallam semper  
significari, variam tamen alteram ab altera, seu colore, seu mate-  
ria, seu texturæ artificio, seu forma etiam, & figura, quæ tamen  
omnes, cum ex tunicarum genere erant, manicas haberent, & ad  
talos demitterentur, quod solum muliebres tunicas a virilibus, &  
matronales a meretriciis, & ancillaribus distinguebat; ac ad pallii  
muliebris genus referrentur, si vestes erant exteriores. Idem iudicium  
esto de cois, tyriis, sericis, bisfinis, aliisque, quæ non genus aliud  
vestium, sed harum, quas memoravimus, aliam materiam, alium  
colorem significant.

Sed

[a] *Epid. ant.* 2. sc. 2. v. 39. [b] v. 46. [c] v. 45.

Sed jam de stolæ, ac pallæ colore dicendum est. Putat Ferrarius (a); stolæ tyrias fuisse, hoc est purpureas, ac auro segmentatas. Cerrum est, matronas Romanas purpura usas, ac vel tum ab exorato Coriolano, ut supra vidimus, senatus Consulto, matronis indultum; ut purpureis vestibus, aureisque segmentis uterentur. Sed si licet, quod sentio, in medium proferre, cum purpura ipsis indulta dicitur, cum vetita, cum in tyriis incessisse matronæ dicuntur, crediderim potius, purpuream fuisse pallam, quam stolam, idemque de segmentis ajo, pallæ potius ea fuisse, quam stolæ. Quoad purpuram primum, quæ me movent, hæc sunt. Romæ præcipue usos purpura viros legimus in veste exteriori, toga scilicet prætexta, toga pīsta, trabea, deinde etiam, crescente luxu, lacernis, & abollis. Martialis (b)

*Ut luulenta linat tyrias mibi mula lacernas.*

Seneca (c): *lacernas improbi coloris*, purpurei scilicet, ut interpretantur. De abolla Svetonius (d): *convertisse hominum oculos fulgore purpureæ abollæ*. Toga etiam tota ex purpura regum fuit. Masanißæ enim refert Livius (e) *togam purpuream, & palmatam tunicam*, ac Ptolomæo (f) *togam, & tunicam purpuream* a Senatu missa. Ferrarius ipse civium Romanorum tunicas ex purpura non fuisse, ostendit (g) contra Manutium. Quis credat igitur fæminas beatiores pretiosius interius, quam exterius ornari voluisse, cum secus viri facerent? Ne ipse credam facit etiam, quod in comædiis, ex quibus privatæ vitæ consuetudines præcipue elucet, video a fæminis magni factam pallam, tunicæ vero, quocumque nomine, & cujuscumque generis sit, vix mentionem fieri. Pallam uxoribus præbendo mariti, amicis amatores commendantur. Sed aliquid, quod non tantum conjectura sit, videtur mihi posse colligi ex Valerii verbis, matronarum causam contra legem Oppiam tuentis (h): *matrem familie tuam purpureum amiculum habere non sines?* Ubi apparet, amiculi potius, quam pallæ, vel utriusque simul, nam utraque exterior vestis, ut supra vidimus, mentionem usurpatam oratorio artificio, ut cum brevius sit palla amiculum, ipsa rei diminutione major confietur in adversarios invidia. Sed alibi etiam Livius, *amiculum purpureum* (i) Cleopatra Senatu dono missum, refert. Quid aliud autem objicit Cicero Verri, quam mores effeminatos vestitumque muliebrem? (k) *Stetis solatus Prætor P. R. cum pallio purpureo, tunicaque salari*. Sed sit malorum testium instar Tibullus (l):

T 2

Urit,

(a) *ibid.* c. 17. (b) *l. 9. epigr.* 23. (c) *Epist.* 114. (d) *Cajac.* 35. (e) *l. 31. c. 12.* (f) *l. 24. c. 4.* (g) *ibid.* c. 10. (h) *Liv. l. 34. c. 7.* (i) *l. 27. cap. 4.* (k) *in Verr.* l. 5. c. 26. (l) *l. 4. carm.* 2. v. 11.

*Urit, seu tyria voluit procedere palla.*

Ergo in tyria palla Romanæ matronæ, eaque aureis *segmentis* ornata :

—— *pallam signis, auroque rigentem* (a).

Cum enim purpuræ ornamenta addenda essent, ex quo alio adderentur, quam auro? *segmenta*, & purpuram conjungit Ovidius (b) :

—— *Non vos, segmenta, requiro,*

*Nec quæ bis tyrio murice, lana, rubes.*

Hæc autem *segmenta* particulæ erant ac limbi ex auro, quibus aut opere Phrygio insutis, aut opere Alexandrino intextis purpura vermiculatim variegabatur. Hinc palla picta, cujusmodi erat, quæ cum amiculo purpureo Cleopatæ (c) missa fuit. Vide, Phrygionis esse concinnare pallam (d) :

*Pallam illam, quam dudum dederas, ad Phrygionem ut deferas,*

*Ut reconcinnetur, atque ut opera addantur, quæ volo.*

Stola autem, cujus coloris erat? Ejus, qui singulis gratior esset. Neque cum dixi, pallam purpuream fuisse, excludo stolam itidem purpuream, nam & viris cum purpurea toga purpurea etiam tunica aliquando in usu, regibus præcipue ac triumphantibus, ut mirum non sit, quod eodem ornatu de maritorum patientia vellent etiam feminae triumphare. Clavi etiam tunicarum sive lati, sive angusti ex purpura maribus erant. Dubium ideo mihi nullum, quin aliquæ pallam purpuream, & segmentatam nonnumquam stolæ itidem purpureæ, aureisque segmentis præter institam variegatæ superinduxerint. Verum hoc stare volo, cum purpura dicitur fœminis concessa, cum vetita, id de palla potius intelligendum esse, quam de stola. Interdixit autem usum purpuræ primum lex Oppia, qua abrogata nullum ejus gestandæ modum fuisse, puto, donec Cæsar a certis tantum, ac per certos dies gestandam statuit. In desuetudinem tamen hoc etiam abierat, cum Nero eandem fœminis omnibus interdixit. Nulla ex eo tempore in tyriis fœmina, donec iterum Aurelianus huic sexui usum purpuræ indulxit. Cum vero purpura uti permittum sit semper, nunquam imperatum, omnibus fuisse temporibus aliquas, quæ ab ea gestanda abstinuerint, arbitror, vel quod gestare paupertas prohibebat, vel quod formam, cui præcipue consuetum fœminæ volunt, dedecere videbatur, vel quod aliis etiam coloribus uti volebant ad copiam ostentandam. Tibullus loco laudato :

*Urit,*

(a) *Virg. Æn.* 1. v. 652. (b) *de Ars.* 1. 3. v. 169. (c) *Liv.* 1. c. (d) *Plant. Men. ast.* 2. sc. 3. v. 72.

*Urit, seu tyria voluit procedere palla,*

*Urit, seu niva candida veste venit.*

*Talis in aeterno felix Vertumnus Olympo*

*Mille habet ornatus, mille decenter habet.*

Ovidius (a) :

*Quos nova terra parit flores, ———*

*Lana tot, aut plures succos bibis : elige certos,*

*Nam non conveniens omnibus unus erit.*

Meretricibus purpuræ usum interdictum semper, utique in toga, crediderim. Nam Meretrices nec stolam, nec pallam ferebant. De stola dubium erit nemini cum ea matronarum præcipuum insignè fuerit. Pro stola igitur tunica breviori, sine instita, sine manicis, quales virorum erat, utebantur. De palla, & amiculo injiciat nemini suspicionem Plautus. Cum enim ille palliatas doceret, quamvis in cæteris Romanos mores depinxerit, aliter tamen non potuit mulieres suas, sive honestas, sive probrosas ornare, quam palla. Quæ igitur apud Ediles professæ erant, toga induebantur.

————— *quid inter* ———

*Est in matrona, ancilla, peccesve togata (b).*

Hinc matronæ stupri damnatæ, cum dignitate matronali exciderent, insignia etiam matronalia ponentes, togam sumebant.

————— *Corfinia talem*

*Non sumet damnata togam (c).*

Togæ matronas etiam usas in sacrificiis, Ferratius (d) advertit, sed in hoc non immoror.

Alia etiam a toga fuisse meretricum vestis videbatur interpreti cuiusdam Martialis, nimirum palliolum. Ad illud enim poetæ : (e)

*Hanc volo, quæ facilis, quæ palliolata valetur,*

*non togata, ait, non stolata, sed ancillari habitis vestita.* Sciendum est tamen, quæ palliolatæ incedebant, non minus togatas fuisse, quam cæteræ. Palliolum namque erat tantummodo capitis tegmen, ideoque cum toga etiam sumebatur, sicut simul cum prætexta valetudinis causa sumptum a Claudio, Ferrarius ostendit (f). Dicendum itaque, aliquas in toga quidem, sed capite cooperto incessisse, cooperuisse autem caput, vel ne agnoscerentur, vel alia de causa, vilissimas, quod ex allato epigrammate satis patet. Ad hoc vero aliæ palliolo, aliæ cucullo utebantur.

*Sumere nocturnos meretrix Augusta cucullos (g).*

An-

---

(a) *de. Art. l. 3. v. 185.* (b) *Hor. l. 1. sat. 2. v. 62.* (c) *Juv. sat. 2. v. 69.* (d) *p. p. l. 1. c. 25.* (e) *l. 9. epigr. 33.* (f) *p. p. l. 1. c. 11.* (g) *Juv. sat. 6. v. 118.*

Ancillares vestes, suspicatur sæpe laudatus Ferrarius (a), fuisse tunicas breviores ad medium crus pertinentes, cui nulla instita adsuta, qualis etiam erat meretricum. Inter eas autem discrimen erat, quod meretrices togatæ, ancillæ tunicatæ tantum erant. Contra ipse minime pugno. Adverto tamen, has ancillares tunicas adeo breviculas non fuisse, siquidem Chrysis illa (b) *conlegit alius tunicas, flexitque se in eum daphnona, qui ambulationi hærebat.*

Addenda aliqua adhuc restant de pedum indumentis. Primum dico, non omnino insolitum fuisse fœminis calceos gestare, qui nescio tamen, an ad medium crus pertinerent, ut calcei viriles, ac potius puto, fuisse sandalia superne testæ, quæ aliquando in usu fuisse, refert Balduinus de calceo (c). Ovidius (d):

*Pes malus in nivea semper celetur aluta.*

*Alutam* autem pro calceo sumit etiam Juvenalis (e), sicut pro eodem Horatius *pellem* (f). Verum est tamen, constatque etiam hoc Ovidii ad eas, quibus pes malus, consilio, vulgo fœminas eo pedum indumento usas, quod superne apertum, ac fenestratum erat, cuiusmodi erant *soleæ, sandalia, phœcasia, crepidæ*, & his similia, nomine magis, quam re diversa. Adde etiam *cothurnos*, qui e soleatum genere erant, sed altiores, & alto subere sufferti: Nam & cothurnis usas fœminas docet satyricus (g):

*breaviorque videtur*

*Virgine Pygmæa, nullis adiuta cothurnis.*

Inter alia vero ea, quæ *sandalia* vocabantur, videntur fuisse majori elegantia, & pretio, cum & diligentius certis repositoriis servarentur, & eorum cura ancillis *sandaligerulis* mandaretur. Huiusmodi muliebria calceamenta, cum superne perforata, & aperta essent, & pedum tantum plantas infime tegerent, vinculis quibusdam, seu terebribus habenis, & obstragulis superiori pedis parti obstringebantur.

Sed præter id genus calceos *soccas* pedibus induisse fœminas, probat Balduinus (h), hisque cum pedes contexissent, tum soleas induxisse. Erant autem *socci*, ait ipse, *tenues, & humiles, ut non multum pedes impedirent, etiamsi essent superne contexti*, ideoque aliis omnibus calceorum speciebus inferi poterant. Neque ii calceorum virilium instar medio crure tenuis extendebantur, sed tantum ad eam partem, qua tibiæ pes conjungitur. Gestasse mulieres *soccas*, confirmat clarissimus auctor verbis Svetonii (i): *A Messalina petiit, ut sibi præberet*

(a) *ibid.* l. 3. v. 23. (b) *Petron. satir.* (c) *cap.* 12. (d) *lib.* 3. *de Art.* v. 271.  
(e) *sat.* 7. v. 192. (f) *lib.* 1. *sat.* 6. v. 28. (g) *Juv. sat.* 6. v. 505. (h) *e.* 16.  
(i) *Visuell. c. 2.*



*ut pedes excalecandos, detractumque focculum dextrum inter togam, & tunicam gestavit assidue.* Insertos autem fuisse eosdem soleis, ideoque sub ipsis pene totos latentes, colligit ex Plinio (a), qui uniones indignatur non solum obstragulis, sed focculis etiam a mulieribus addi, non alia sane de causa, quam quod focci sub obstragulis late-  
rent. Avorum ætate cum hic Venetiis summates matronæ cothur-  
nos gestabant, sive illos miræ altitudinis, qui trium pedum altitudi-  
nem superabant, sine humiliores alios, quos descendentes paulatim  
ex pegmate illo deinde sumpserunt; induebant prius quoddam foccu-  
lorum genus, commutatis tamen nominibus cothurnos ipsos *zoccoli*,  
foccos autem, *scarpe alla Romana* vocabant, utrum quod illius tem-  
poris Romanæ matronæ, an quod antiquiores illis uterentur,  
quis divinet? Verum nunc tandem ex cothurnis omnino descen-  
dere, quamvis adhuc calcei muliebres paullo altiores sint, quam  
viriles.

C A P U T XII.

*De auro fæminarum. Utrum meretricibus aurum interdictum.*

*Varia ex auro, & gemmis fæminarum ornamenta.*

**A**ntiquissimum Romæ fuit in mundo muliebri aurum, quo et-  
iam in ærarium collato, honores a Senatu matronas meritas,  
supra vidimus. Quæsitæ deinde sunt etiam uniones ad inaures, &  
monilia, smaragdosque pariter, sardonychas, beryllos, aliasque gem-  
mas ad annulos, ac alia ornamenta. Auri plus semuncia habere lex  
Oppia aliquando vetuit, sed cito abrogata fuit: pretiosi lapides,  
quorum causa, agebat ille (b), *pecunie nostræ nil externas, aut hostiles*  
*gentes transferuntur, ut prohiberentur, contendere aliqui, Tiberio*  
*regnante, sed frustra.* Divi Hieronymi ævo præcipuum fuisse gem-  
mis locum in mundo muliebri, apparet ex ejus verbis: (c) *Ut ta-*  
*ceam de inaurium pretiis, candore margaritarum rubri maris profunda*  
*testantium, smaragdorum virore, cærauniorum flammis, biacynthorum pe-*  
*lago, ad que ardent, & insaniant studia matronarum.*

Quærit Ferrarius (d), utrum æque togatis ac stolis auri, ac  
gemmarum usus esset, & jus. Rem incertam reddunt auctores. A-  
pulejus (e) ex hujusmodi ornamentis matronam agnoscit: *aurum in*  
*gemmis, & in tunicis, ibi inflexum hic intextum matronam profecto con-*  
*sue-*

(a) l. 9. c. 35. (b) Tac. ann. lib. 3. cap. 11. (c) epist. 97. alias 2. (d) p. p. l. 3. c. 14.  
(e) Metam. l. 2.

*fitabantur*. Horatius (a) smaragdos, & uniones solis matronis tribuit:

*Nec magis huic (matronæ) inter niveos, viridesque lapillos.*

Juvenalis etiam (b) tamquam earum propria hæc videtur significare, de nuptis enim loquitur, cum ait:

*Nil non permittit mulier sibi, turpe putat nil,*

*Cum virides gemmas collo circumdedit, & cum*

*Auribus extensis magnos commisit elenchos.*

Contra Ovidius dum puellas hortatur, ne cum gemmis, & auro prodeant, eas hæc habuisse, significat (c):

*Vos quoque non caris aures onerate lapillis,*

*Quos legis in viridi decolor Indus aqua.*

*Nec prodite graves infuso vestibibus auro.*

Cloe itidem quædam apud Martialem (d):

*Indos sardonychas, Scythas smaragdos*

habebat, cum hos Luperco donaret. Gellia etiam apud eundem (e) uniones habet siquidem

———— *juras per uniones*

*Hos amplectitur, hos deosculatur.*

Quare conciliandi inter se ita auctores videntur, ut dicamus, ideo ex auro, gemmisque matronas sæpius significari, quod ex libertinis haud ita multæ essent, quæ id genus ornamenta gestarent. Cum enim is erat ipsis quæstus, unde ea parare sibi possent, gestasse illas quoque, minime dubium est. Ex Plauto, cum nondum lapilli pretiosi in usu essent Romæ, libertinas auro usas, clarissime patet. Philomatium illa (f):

*Agedum contempla aurum, & purpura, satin' hæc me deceat,*  
*Scapha*

Paullo post Scapha (g):

*Nam amator meretricis mores sibi cmit auro, & purpura.*

Martialis gemmis etiam oblectatas indicat (h):

———— *me poscat amica*

*Aut virides gemmas, sardonychasque pares.*

Sequioribus sane sæculis sublatum omne inter matronalia, ac meretricia ornamenta discrimen, queritur Tertullianus (i): *Quæ minus habens infelicissime ille publicarum libidinum victimæ, quas si quæ leges a matronis, & matronalibus decoramentis coercerant, jam certe sæculi*  
*im-*

(a) l. 1. sat. 2. v. 80. (b) sat. 6 v. 457. (c) de Art. l. 3. v. 129. (d) l. 4. epigr. 28.  
(e) l. 8. epigr. 31. (f) Mosell. lib. 1. sc. 3 v. 125. (g) v. 124. (h) l. 11. epigr. 28.  
(i) de cult. fem. c. 12.

improbitas honestissimis quibusque fœminis usque ad errorem dinoscendi coequavit. Itemque alibi (a): aspice lupas, publicarum libidinum nundinas, aspice vel sublimis, jam matronas videbis. Sed singillatim in manus quædam ex hujusmodi ornamentis sumenda sunt, ut appareat verissime scripsisse Isidorum (b): Nunc præ auro nullum fœminis leve est, atque immune membrum.

Margaritis caput coluisse, iisque discrevisse crines primi fastigii matronas, ex nummis Augustarum discimus, quam autem sine modo, discere ex Plinio (c): Lolliam Paulinam, quæ fuit Cæii Principis matrona, nec serio quidem, aut solemnæ ceremoniarum aliquo apparatu, sed mediocrium etiam sponfalium cæna, vidi smaragdus, margaritisque operam, alterno textu, fulgentibus, toto capite, crinibus, spiris, auribus, collo, manibus, digitisque. Inter capitis ornamenta recenset citatus Isidorus (d) diadema, hoc autem definit ornamentum capitis matronarum ex auro, & gemmis contextum. Recenset, & reticulum. Reticuli autem aurati meminit Juvenalis (e), suum vero ex obrusso dicebat esse Fortunata illa apud satiricum (f).

Inaures bacca pendula, raræ aliquando magnitudinis, neque una tantum aliquando, quas ideo poeta (g) vocat magnos clenchos, fenestris leviter auribus suspendebant. Senecam audiamus (h): Video uniones non singulos, singulis auribus comparatos (jam enim exercitiæ aures oneri ferendo sunt) junguntur inter se, & insuper alii bini supponuntur. Non satis muliebris insania viros subjecerat, nisi bina, ac terna patrimonialia singulis auribus pendissent. Morem hunc stomachatus inquietabat ille (i): plane, si filiam haberem, aurículas illi præciderem. Inaures velut matronarum proprium insigne suspicari possumus ex Valerii Maximi auctoritate, ubi refert (k): Senatui ad matronarum honorem vetustis aurium insignibus novum vitæ discrimen adjecisse. Sed locus iste varie torqueri solet, cum alii aurium, alii inaurem, Lipsius satis acuta conjectura crinium legat. Quare non satis ad movendum hoc puto, ut inaures meretriculis negemus, cum præcipue & earum ancillæ gestarent, teste illa apud Comicum (l):

————— inaures da mihi

*Faciundas pondo duum nummum stalagmia.*

Sunt autem *Stalagmia* inaures oblongæ ex bacca pendula, ut interpretes ajunt.

V

Mo-

(a) de pall. cap. 4. (b) Orig. lib. 19. cap. 31. (c) lib. 9. cap. 35. (d) ibid. cap. 31. (e) sat. 2. vers. 96. (f) Petron. in fragm. Trag. (g) Juven. sat. 6. v. 459. (h) de Benef. lib. 7. cap. 9. (i) Petr. in fragm. Trag. (k) l. 5. c. 2. (l) Menach. act. 3. sc. 3. v. 17.

Monilia collo ornando sive ex auro tantum erant, sive auro insertis margaritis (a):

—— colloque monile

*Baccatum*, —

aut smaragdis (b):

—— *virides gemmas collo circumdedit.*

Nullam fuisse sceminarum puto, quæ non gestaret. Quin ne cubitum quidem ituras pretiosissima monilia exuisse aliquas, testatur Luculunte Plinius (c): *in secreto margaritarum sacculi e collo dominarum auro pendeant, ut in somno quoque unionum conscientia adsit.* Huc forsan spectat illud Martialis (d):

*Credit cui Postumilla dives*

*Gemmas, aurea, vina, concubinos,*

ut concubini hi sint uniones, in quos jocatur poeta, tam cari Postumillæ, ut cum iis dormiret. Alii hoc sensu legunt *concubinas*, & ad gemmas, quod præcessit, referre malunt.

Sed ubi non aurum, ubi non gemmæ?

—— *Viridique angustat jaspide pectus,*

ait Claudianus (e): Plinius vero (f): *discurrant catenæ (ex auro scilicet) circa latera.* Spinther armillæ genus, auctore Festo (g), *muliæres antiquæ gerere solebant brachio summo sinistro*, at utroque brachio armillas, sic proprie dictas. Plautus spintheris meminit (h):

*Menæchme, amare ais te multum Erotium,*

*Ut hoc nunc una opera ad aurificem deferas,*

*Atque huic ut addas auri pondo unciam,*

*Jubeasque spinther novum reconcinnarier.*

Erotio tamen præter spinther, & armillæ erant, siquidem Menæchmus (i):

—— *ubi illæ armillæ sunt, quas una dedi?*

Annulos in omnium digitis invenies. Præter nuptas enim puellulas anulum gestasse, constat ex Plauto, ubi Epidicus in comedia cognomine eum virgini attulisse, refert (k)?

*Non meministi me auream ad te afferre natali die*

*Lunulam, atque anellum aureolum in digitum?*

Gestarunt etiam publicæ luxæ nam de hujusmodi sceminis (l):

*Speciandum ne cui anulum des.*

Et

(a) *Virg. æn.* 1. v. 658. (b) *Juv. sat.* 6. v. 458. (c) *lib.* 33. cap. 3. (d) *l.* 12. epigr. 49. (e) *de sent. conf. Hon. vers.* 526. (f) *lib.* 33. cap. 3. (g) *lib.* 17. (h) *Menæch. act.* 3. sc. 3. v. 1. (i) *ibid.* v. 13. (k) *act.* 9. sc. 1. v. 33. (l) *Plaut. Apm. act.* 4. sc. 1. v. 33.

Et virgines, & meretrices gestare confirmat etiam Bacchis apud Terentium (a):

*Dicitque se se illi (virgini) annulum detraxisse,*

*Eum hæc cognovit Myrrhina in digito modo me habentem.*

Cruribus etiam, & pedibus aurum induebatur. *Periscelidis* enim, quæ & compedes aliquando dicuntur, hoc est circulis aureis crura circumligabant: soleas, ac sandalia ligulis, ac vinculis aureis vinciebant. Clarum est ex Terulliano (b), aurum pedibus etiam indutum: *pedes domi figite, & plusquam in auro placebunt*. Addebant etiam uniones, nec crepidarum tantum obstragulis, teste Plinio (c), sed focculis totis, quos auro ornatos discimus etiam ex Divo Hieronymo (d): *candidæ vestis, & aurati focci depositione*.

*Periscelia* alio loco Ferrarius videtur solis togatis concedere, alio & stolatis. Alicubi enim (e), *cas aureas compedes*, ait, non a matronis, sed alibertinis gestatas, illud argumento est, quod matronæ fluente stola velatæ non crura modo, sed & pedes veste contectos habebant. Alibi vero (f): *aurea matronarum* (matronæ ipsi sunt tantum mulieres nobiles) *argentea plebejarum periscelia erant*. Sed pretiosa *periscelia* & a matronis gestata, certissimum ipse puro. Neque enim movet, quod illæ longiori tunica usæ eadem ostentare non possent. Verissime enim Divus Hieronymus (g): *φιλόκοσμον genus fœminum est, multasque etiam insignis pudicitia, quamvis nulli virorum, tamen sibi scimus libenter ornari*. Cum ideo ornamentorum suorum sola conscientia satis gauderet, ut in secreto etiam gestarent, ac cum gemmis cubitum irent, ut ex Plinio supra monuimus, ac Scintillæ illi (h) tantumdem esset crotalia auribus appendere, ac capsellæ inclusa e collo pendentia gestare; non dubito, quin & pretiosarum *periscelidum*, quamquam videri a nemine poterant, conscientia velent oblectari. Legimus gestatas a Fortunata (i) Trimalchionis uxore, quæ licet libertina genere, erat tamen iusta mater familias. Vide sis etiam, quam sibi in iis placeret, cum *periscelides resolveret*, ut miranti amicæ ostenderet. Accidit autem huic, aliique etiam matronæ accidere poterat, ut *periscelides* etiam apparerent, non modo phæca sia: *Venit ergo galbino succinea cingillo, ita ut infra cerasina adpareret tunica, & periscelides tortæ, phæcasiæque inaurata*. Ne credas vero, hanc ornatam meretricum more, ideoque indutam *periscelia*, existimes. Hæc enim cum domi suæ esset in tunica tantummodo,

V 2

ac

(a) *Hec. act. 3. sc. 3. v. 31.* (b) *de cult. fam. c. 13.* (c) *l. 9. c. 35.* (d) *ep. 85. alias 9.*  
(e) *de R. V. p. p. l. 3. c. 17.* (f) *Analeth. c. 21.* (g) *epist. 93. alias 12.* (h) *Petron. in fragm. Trag.* (i) *ibid.*

ac diligentis matris familias, curiosius etiam, quam par erat, officio fungi videri vellet, ut huc illuc discurrendo, familiam, eaque, quæ ad convivium a marito adornatum necessaria erant, procuraret, tunicam altius succinxerat. Hinc apparebant periscelides, quas tamen, & cum non apparerent, gestasse minime dubium est. Sed & Tertulianus periscelii meminit, cum de honestis certe sœminis verba facit [a]: *nescio an crus de periscelio in nervum se patiatur aritari.*

## C A P U T XIII.

*De capitis ornatu. Vittæ virginum, ac nuptiarum. Cirri, cincinni, crines. Matronæ capite detestlo. Crines flavi etiam matronarum.*

**C**apitis ornatus præcipue cordi Romanis sœminis fuit. Eo patet, quod tanta laus erat peritæ Cosmetæ, seu ornatricis, nam *Ornatrici* nulla alia proprie est, quam ea, cujus erat dominæ capillos comere, & ornare, ut clarum ex Festo [b]: *Acus dicitur, qua sarcinatrix, vel etiam ornatrici utitur*; Hinc *ornatus* non raro apud auctores per excellentiam habitum capillorum significat, quemadmodum apud Virgilium [c]:

*Visa ( nefas ) longis comprehendere crinibus ignem,  
Atque omnem ornatum flamma crepitante cremari,  
Regalesque accensa comas, accensa coronam  
Insignem gemmis.*

Sed accipe ornatricum elogium. Ovidius de Nape [d]:

*Colligere insertos, & in ordine ponere crines  
Docta, nec ancillas inter habenda Nape.*

Idem de Cipasside [e]:

*Ponendis in mille modis perfecta capillis,  
Comere sed solas digna, Cipassi, Deas.*

Quod autem primum sœminei capitis ornatum intuentibus occurrit, vittæ sunt. Vittas definit Isidorus [f], *que crinibus innectuntur, quibus fluentes religantur capilli, & vittæ dictæ, quod vinciunt.* *Tania* autem est vittarum extremitas dependens diversorum colorum. Gestabant vittas, nam Sacerdotum vittæ extra rem nostram sunt, virgines, & nuptæ, verum non sine discrimine. *Aliæ*, inquit Turnebus [g], *crant*

uu-

[a] *de cult. Fam. cap. 13.* [b] *l. 1.* [c] *Æn. 7. v. 73.* [d] *Am. lib. 1. eleg. 11. v. 7.* [e] *Am. lib. 2. eleg. 8. vers. 1.* [f] *Orig. lib. 79. cap. 31.* [g] *Advers. lib. 29. cap. 4.*

nuptarum, alie virginum vitta sed utraque tamen ingenuarum. De virginali vitta Flaccus Argonaut [a]:

Ultima virginis eum flens dedit oscula vittis:  
de maritali Propertius [b]:

Vinxit & accepit altera vitta comas,  
Hinc collige discrimen inter virginalem vittam, & maritalem. Vitta enim virginum una erat, una & altera nuptarum. Per alteram enim vittam nihil aliud intelligi hic a Propertio, quam secundam, interpretatur Bernartius ad quemdam Statii locum [c], ubi ex adducto Propertii versu, virgines habuisse quidem vittam, probat, sed simplicem, matronas duplicem, quæ Bernartii sententia probatur etiam Theophilo Raynaudo [d]. Vittam rectam nuptarum fuisse, notat vir eruditissimus in suo ad poetarum amatoriorum trigam satis cæteroqui accurato indice [e], per inde ac virginum vitta obliqua fuisset. Sed non oscitanter Propertium legentibus patet, non rectam vittam datam apud ipsum significare tantummodo, ominosum aliquid in nuptiis accidisse, quo appareret nuptias iratis Diis celebratas. En Propertii versus [f]:

Quæ mibi deductæ fax omen prætulit; illa  
Traxit ab everso lumina nigra rogo,

Et stygio sum sparsa lacu, nec recta capillis

Vitta data est: nupsi non comitante Deo.

Vittæ igitur inter nuptas, & innuptas discrimen, quod attulimus, sed aliud etiam ab habitu capillorum.

Ita enim vitta simplici capillos virgines religabant, ut adhuc cirros deferrent, quemadmodum pueri, ideoque ut Persio [g] cirrati sunt pueri:

— Ten' cirratorum centum distata fuisse,

ita Ammiano [h] cirratæ puellæ sunt: & licet quocumque oculos flexeris, affatim multas spectare cirratas, quæ si nupsissent, per ætatem ter jam nixus poterat suppetere liberorum. Cirrorum in virginum cultu Lipsius [i] admonuit, cui tamen minime assentior cirros cum cincinnis confundenti, quorum inter se non leve discrimen, cum multis arbitror, fuisse, quum cirri nulla arte crispati, & compositi, secus cincinnati. Cirratæ igitur virgines, quæ nulla arte capillos comebant, non acu discernebant, non curiose torquebant, & componebant. Favet Tertulliani locus a Lipsio etiam laudatus, unde liquere puto, hoc

[a] l. 8. v. 6. [b] l. 4. eleg. 12. v. 34. [c] Thebaid. l. 5. v. 668. [d] de pileo scilicet 6. [e] Catullus &c. ex recens. J. Ant. Vulpii. Patavii 1710. [f] l. 4. eleg. 3. v. 13. [g] sat. 1. v. 29. [h] l. 14. [i] ad Tac. l. 3. ann. c. 20.

hoc virginum proprium fuisse, ut curiosius studium capillis figurandis non adhiberent [a]: simulque se mulieres intellexerunt, versunt capillum, & in acu lasciviorē comam sibi inserunt, crinibus a fronte divisis, apertam professæ mulieritatem.

Contra meretricibus cincinni tribuuntur, qui nimirum arte crispi, & contorti, & industrie compositi.

Hinc Stratilax Astaphio [b].

*Jam ego istos fidos, compositos, crispas cincinnos tuos*

*Unguentatos usque ex cerebro expellam.*

Maxima igitur meretricibus capillorum cura, quare illa [c]:

*Suo quisque loco vident' capillus satis compositus est commode?*

Ita autem componebant, ut quamquam in vertice in corimbion extollerent, aut aliter disponerent; inferne tamen per collum adhuc effunderent, & fluere sinerent: *crines ingenio suo flexi*, ait ille [d], *per totos se se humeros effuderunt*. Hinc discimus, facile fuisse Magdalenzæ Christi Domini pedes capillis tergere. Etenim cum post Pompei tempora in Judeam etiam Romanorum mores investiti essent; hæc, quæ peccatrix erat, crines fluentes gerebat, iisque facile ad hoc officium uti poterat. Neque mirum propterea est, quod adpositivum harum fœminarum capillamentum & maribus aptari potuerit, quemadmodum Gitonis, & Eumolpi capiti Triphenæ corimbion apratum [e] legimus. Quamquam vero vitta nulla uterentur libertinæ; non dubito, quin & ipsæ nodo aliquo, si luberet, capillitii licentiam coercerent. Horatius [f]:

*Dic & arguta properet Nœra*

*Myrrheum nodo cobibere crinem.*

Alibi etiam [g]:

*Quis devium scortum eliciet domo*

*Lyden? eburna dic, age cum lira*

*Maturet in comptum Lacena*

*More comam religata nodum.*

Religabant igitur & mulieres probrosæ capillos, sed in morem mulieris Laconicæ, ita nimirum puto, ut nequaquam colligerent; & in fectas complicarent, sed post cervicem simpliciter constrictos, ut commodum, demitterent. Hunc comarum positum Ovidius comparat comis Diane [h]:

*Altera succinctæ religetur more Diane,*

*Ut solet, ætonitis cum petit illa feras.*

Alius

[a] de vol. virg. c. 12. [b] Plaut. Trucul. act. 2. sc. 2. v. 32. [c] Plaut. Metell. act. 1. sc. 3. v. 97. [d] Petron. [e] Petron. [f] l. 3. ed. 14. v. 21. [g] l. 2. ed. 11. v. 21. [h] de Art. l. 3. v. 143.



Alius ideo matronis comarum habitus, quo ab innuptis, togatisque satis discernebantur. Nuptiarum enim erat non solum vittam duplicem gerere, sed & crines. *Disli autem crines* inquit Isidorus (a) *quod vittis discernantur*. Hoc a Festo videtur accepisse, qui pariter: (b) *crines a discretionem, disli, quam Græci κριον* (Aldus edidit *κριαριον*) *appellant*. Nam iidem eos *κρινιδας* vocant, seu melius, ut emendat Scaliger: *ideo eos crines vocant*. Ita vero comam crinibus discernabant, ut e crinibus, & vittis velut fertas efficerent, eosque non fluentes, sed collectos in cervicem, aut verticem gererent, ut ex statuis, & nummis clarum. Hoc modo crines figurare dicebatur *capere crines*, aut *habere crines*, qua utraque locutione *nubere*, & *nuptiam esse* significatur.

*Soli gerundum morem censeo, & capiundos crines* (c), hoc est, nubendum, ex consequenti antecedens, seu ex signo rem signatam significando, nam quæ nubunt, crines capiunt. Eadem ratione: (d)

*Utiq; eam huc ornatam adducas matronarum modo.*

*Capite compto, crines, vittasque habeat, assimuletque se  
Tuam esse uxorem.*

Nam iustæ uxores crines, & vittas habebant. *Senis autem crinibus*; ait Festus, (e) *nubentes ornantur, quod is ornatus vetustissimus fuit: quidam quod eo Vestales Virgines ornentur*. Ad quæ Scaliger: *seni crines dicuntur in capite matronæ Romanæ sex fertæ crinium, vitta, & crinibus ipsi implexæ, quas vulgo trecias vocat*. Ad hunc morem post Scaligerum alii (f) etiam retulere illud Martialis (g):

*Portabat uxor rufa crinibus septem.*

Verum ego malim cum eruditissimo Nacerio credere (h), his irrideri fœminæ calvitie, quam additum septimum capillorum fasciculum significari.

In fingendis vero, & figurandis crinibus, eorumque habitu componendo a nostræ ætatis mulieribus minime victas antiquas, crediderim. Nullæ curæ parcebant iis crispandis, adeo ut *cinerarios*, qui & *cinifiones*, haberent, quorum erat calefactis calamistris crinem torquere, & vibrare. Ornatrices vero, quæ in ordinem capillos digerere, & variare debebant, sæpe pœnas cum sibi domina minus placeret, dedisse, ab Ovidio, Juvenale, Martiale accepimus. Cæterum si varios capillorum positus, quibus ornatum variarunt matronæ Romanæ, vellemus afferre, nimium operæ in re nihili infumendum esset.

Non

(a) l. 11. orig. c. 1. (b) l. 3. (c) Plaut. *Mossell. act. 1. sc. 3. v. 69.* (d) *id. Mil. act. 3. sc. 1. v. 196.* (e) l. 17. (f) *Cerd. in Tertull. de vel. virg. c. 12.* (g) l. 12. *epigr. 32.* (h) *ad Fest. l. c.*

Non si de togatis solum, sed & de stolis si agatur, verissime poeta inquit (a):

*Sed neque ramosa numerabis in ilice glandes,  
Nec quot apes Hible, nec quot in alpe feræ;  
Nec mihi tot positus numero comprehendere fas est,  
Adjicit ornatus proxima quæque dies.*

Statuas, & nummos insipientibus occurrunt aliæ multis ordinibus, & compagibus capite ædificato, ut ille ait (b), aliæ capillis complanatis, ut ita dicam: nonnullæ circum cervicem, ac tempora collectis crinibus, nonnullæ secus aures longioribus cincinnis demissis, quos ancias Isidorus (c) ait vocari: solis quædam digestis, & inspiras circumactis crinibus, quædam adscitis seu mitra, seu reticulo, aut diademate, aliisque id genus ornamentis, quæ inter se distinguere, & singula suis nominibus appellare, nisi digito aliquis monstret, ignorare me, fateor.

Quod ad mitram singillatim attinet, eam inter capitis muliebris tegmina recensitam voluit Solerius (d), non inter nuda ornamenta. Inter capitis operimenta recenset mitram & Theophilus Raynaudus (e). Caput mulieres mitra texisse eo modo, quo nostris temporibus impediunt potius, quam tegunt nostræ mulieres illis suis seu lineis, seu sericis ornamentis, idemque fuisse illis mitram, ac nostris *la cuffia*, *la scuffia*, cujus exemplar a veterum cultu desumptum patet, ego quoque arbitror, nec plus mitræ concedo, idemque sentiendum puto de diademate, reticulo, crepidulo, caliendo, si hæc quoque ornando capiti adhibebantur, aliisque id genus ornamentis. Favet Tertullianus loco mox afferendo.

Quod vero iidem clarissimi viri Solerius, (f) ac Raynaudus (g) ajunt, omnes Romanas mulieres velato capite in publicum processisse, nescio, an omnibus probaverint. Hæc ita pronum mihi est credere, numquam aliter factum in ea urbe, ubi viri capite nudo incedebant. Non ita enim omnia pudicitie danda arbitror, ut nihil femineæ levitati demus. Sed certa ab incertis primum distinguenda sunt.

Cum quærimus, utrum Romanæ formine capite tecto in publicum prodirent, nobis sermo nequaquam est de mitra, seu alio ex supra recensitis capitis ornamentis. Ipsa enim mitra tegenda est, cum caput dicimus regi, cujus si appareat ornatus, illud nemo testum dicet. Ridet Tertullianus (h) eas, quæ mitra, & linteolis se satis velatas

(a) Ovid de Art. l. 3. v. 149. (b) Juven sat. 6. v. 302. (c) Orig. l. 19. c. 31.

(d) de pil. cap. 6. (e) de pil. scil. 6. (f) r. 5. (g) scil. 5. (h) de Virg. Vel. cap. 17.

latas putant. *Mitris & lanis quadam non velant caput, sed conligant, a fronte quidem protecta: qua proprie autem caput est, nude. Aliæ modo dice linteolis, credo ne caput premant, nec ad aures usque demissis, cerebro tenuis operiuntur. Velari itaque caput est ipsum caput cum toto ejus ornatu, quin & cervicem ipsam velari.* Subdit Terullianus (a): *Quantum resoluti crines occupare possunt, tanta est velaminis regio, ut cervices quoque ambiuntur.* Ita Venetiis aperto capite esse dicimus nobiles mulieres, quæ linteolis tantum, suisque illistæniis caput tegunt, cooperto autem cæteras, quæ linteolis ornato capiti superinjectum sericum velamen nigri coloris a fronte per verticem ad totos humeros demittunt. Hac ratione velantur apud nos puellæ quoque nobiles omnium ordinum, inter quas, quæ nobiles sunt, ita utrimque a vertice velamen illud demittunt, ut totum sere pectus etiam tegant, ac nisi hinc leviter manibus idem submoveant, qua ingrediuntur, videre minime queant. Hoc quidem a Romanis fœminis flagitet nemo, nisi forte Flaminicæ Diales sint. Flaminicas enim nisi velatas nefas erat conspici. Assidue propterea gerebant illæ amiculum illud suum, stimeum scilicet, quo quia caput cingebant, *cinctas* appellatas, ait Festus (b): *Cincta Flaminica veste velata.* Ad Flaminicæ morem caput nubebant, hoc est velabant, etiam quæ viro tradebantur, nubere ideo dictæ. Idem Festus (c): *Flameo amicitur nubens omnis boni causa, quod eo assidue utebatur Flaminica.* Novis enim nuptis, quemadmodum Martiæ illi,

*Lucan demissos velarum flamea vultus* (d).

Velabantur igitur Flaminicæ, velabantur novæ nuptæ ipso tamen dumtaxat nuptialium ceremoniarum tempore, quæ eorum propriam corollam, eodem auctore Festo (e), *sub amiculo ferebant: detecto capite cæteras Romanas fœminas vulgo prodixisse dicendum est.*

Clarissimis verbis Plutarchus (f): *mulieribus omnino non licebat caput obnubere*, qui etiam refert, Sulpitium Gallum alterum a primo fuisse, qui uxori nuncium remiserit, *quod eam vidisset veste attracta caput tegere.* Quare non est, cur ejusdem auctoritate fulciri sententiam suam, Solerius credat. Primo enim Plutarchus dumtaxat dixerat (g), *usitatus fuisse fœminis obvelatis capitibus progredi*, quibus verbis certe non affirmatur, id universis, semperque usitatum. Secundo id ipsum dixisse statim illum pœnituit, contraque morem, & decorum id a fœminis usitatum asseruit: *mulieribus omnino non licebat caput obnubere.*

X

Scio,

(a) *ibid.* (b) l. 3. (c) l. 6. (d) *Lucan.* l. 2. v. 361. (e) l. 3. (f) *Quæst. R.* 14 τὰς δὲ γυναῖκες οὐδὲ σῶας εἶναι ἐπικαλύπτουσαι τὴν κεφαλὴν (g) *ibid.* συνήθησιν οὖν ταῖς μὲν γυναῖξιν ἐγκυκαλυμμέναις.

Scio, Valerium Maximum, quem pariter Solerius citat, contrarium sentire, ac id fuisse causæ Sulpitio Gallo repudiandæ uxoris dicere, (a) *quod eam capite aperto foris versatam cognoverat*. Sed Plutarcho major habenda hic fides, quam Valerio Maximo mihi videtur, quod ille Sulpitii factum refert, ubi de hac mulierum incedentium consuetudine, data opera, verba facit, Valerius autem, ubi de maritorum severitate, quæ eadem certe est, seu aperto, seu testæ capite incedentem uxorem Sulpitius repudiaverit. Sed quæ præ Plutarcho fides Valerio Maximo, qui utrum Valerius Maximus sit, nescimus? Qui forte Valerium Maximum in epitomen redegit eodem longe inferior auctor, priscorum temporum mores ex suis æstimavit. Cur autem nonliceret honestis sœminis antiquitus caput regere, multæ possunt esse rationes, quæ mihi investigandæ non sunt. Inter meretriculas etiam, supra vidimus, viliores & faciliores (b) habitas, quæ palliolo, aut cucullo operiebantur. Poppæam *velata parte oris* in publicum progredi solitam, refert quidem Tacitus (c), sed ne hicquidem Solerius suffragatur, cum hujus moris, qui illi singularis, causam dicat fuisse, *ne satiare aspectum, vel quia sic decebat*. Decebat autem, interpretor, formam, neque enim sexus verecundiæ, & matronalis dignitatis sic servantem Poppæam fuisse existimo, ut aliquo loco matronale decorum haberet, quæ potius creditur voluisse hoc habitu lenocinium amatoribus adhibere. *Decere* sæpius vel in una Mostellaris scena (d) usurpatur a Plauto, ut significet formæ convenire, & venustiori reddere, ne addam cum aliis Tibullum (e):

*Mille habet ornatus, mille decenter habet.*

Sed Poppæa non caput solum, verum & partem oris velasse dicitur. Hoc autem, quod tamquam aliquid Poppææ proprium, & singulare Historicus refert, frustra est, qui universis sœminis accommodat. Verum probe fallitur vir eruditissimus, si nummos sibi favere opinatur. Rei nummaris scientissimi docent, quæ numismata velato capite Augustarum capita repræsentant, earum apotheciosim significare: quotquot in Augustarum adhuc inter vivos de gentium honorem nummi excusi sunt, eos harum capita detecta referre, crinibus varie positis, varioque ornatu: inter Divas jam relatas detecto capite aliquas inspicere quidem, testæ capite nullam prorsus, quæ, cum nummus excusus, viveret. Quare ut me Solerius conciliem, id certum putare me dicam, sicut viri aliquando caput operiebant, ita operuisse

(a) l. 6. c. 3. (b) *Martial*, l. 9. epigr. 33. (c) *ann. l. 13. c. 45.* (d) *aff. v. sc. 3.*  
(e) l. 4. *sat. 2. v. 14.*

ruisse caput aliquando & fæminas: cæterum quamlibet prout illi placebat, seu potius aliis placitum existimabat, pro ingenio, & studio, aut tecto, aut detecto capite incessisse.

Quæ vero caput tegebant, palliolo, aut cucullo id fecisse ne dicas; si honestæ erant, cum usas his prostribulas supra viderimus, sed parte pallæ superiori in caput revocata. *Astrabentem super caput vestem*, nimirum ut caput tegeret, visam a Sulpitio uxorem, Plutarchus ait (a). Hæc autem vestis non alia esse potuit quam palla. Stola quidem caput operuisse mulieres Solerius dixerat, sed tamen & (b) pallio id deinde tribuit. Stola ipse alibi dixi in caput nunquam revocatam, atque hoc pallæ semper fuisse, modo ajo. Id ut asseram, suadet primum virorum mos, qui non aliter caput operiebant (c), quam togæ superiorem partem in caput revocando: deinde Isidori auctoritas, quem in hoc solum, cum stola cooperuisse caput fæminas ait (d), errasse arbitror, quod pallam cum stola confuderit, stolæ tribuendo, quod pallæ erat: demum & nummi, in quibus cum Pudicitia, aut alicujus sedentis, aut stantis fæminæ effigies integra capite velato inspicitur in averfa parte, apparet exteriorem vestem in caput esse sublatam. Marmora itidem id loquuntur. Sertorius Ursatus quodam fæminæ adolescentis signo, sub quo *Bretie* epitaphium, de quo illi sermo (e), inscriptum erat, ait, fæminam matronali stola cooperientem caput representari. Sed stola præcudubio sumpta illi pro palla, cum stola, iterum dico, in caput minime revocari potuerit, quippe quæ interior, & ad medium præcincta. Novis etiam nuptis corollas *sub amiculo* gestatas, supra didicimus ex Festo (f).

Quid ni modo aliqua dicamus de capillorum colore? Servius ad Virgilium ait (g): *Matronis numquam flava coma dabatur, sed nigra. Didoni ergo (Maro) dat, ut turpi*. Adducit etiam Juvenalis verbum (h):

*Est nigrum flavo crinem abscondente galero,*

ubi videtur Messalina nigrum crinem abscondisse, fastidio galericulo e crinibus flavis, ut matronam dissimularet. Ridet tamen hæc doctissimus Ferrarius (i). Sane omnes matronas nigrum crinem gessisse, ridiculum est arbitrari. Neque solum de posterioribus temporibus loquor, quibus satis liquet flavum capillorum colorem omni arte a fæminis affectatum. Tertullianus (k), *capillum croco vertunt: pu-*

X 2

des

(a) *l. c. ἐφελκυσμένην ἰδὼν παρὰ πρῶτης τὸ ἱμάτιον.* (b) *c. 6.* (c) *Ferr. pp. l. 1. c. 10.* (d) *l. 19. c. 25. Orig.* (e) *Epist. Italica. Patavis 1719 epist. 4.* (f) *l. 3. (g) Æm. 4. v. 398.* (h) *sat. 6. v. 120.* (i) *p. 2. l. 1. c. 20.* (k) *de cul. fam. c. 6.*

det eas etiam nationis suæ, quod non Germanæ, aut Gallie procreatae sunt: ita patriam capillo transferunt. Germanis enim vulgo semper fuit rutilus, seu flavus crinis. Sed & Ovidii temporibus, ut facile ex ejus carminibus colligi potest, uterque color, niger scilicet & flavus in pretio fuit, nam utrumque cum laude memorat (a):

*Seu pendent nivea pulli cervice capilli;*

*Leda fuit nigra conspicienda coma.*

*Seu flavent; placuit croceis aurora capillis.*

alibi (b) idem:

*Nec tamen ater erat, nec erat tamen aureus illis,*

*Sed quamvis neuter, mixtus uterque color.*

Amasse tamen præ aliis omnibus flavum colorem, id argumento est, quod arte utebantur, ut flavos capillos redderent, quemadmodum testatur Cato apud Charisium (c): *Mulieres nostrae capillos ungitabant, ut rutilus esset crinis.* Tradit autem Valerius Maximus, qua ratione rutilum colorem crinibus inducerent (d): *quo formam suam concinniorum efficerent, summa cum diligentia capillos cinere rutilabant.* Verum quid est cinere rutilare? Vel cineris frictionem adhibebant capillis rutilandis. Id enim ad res eluendas, & nitidandas in usu fuisse colligo ex Arnobio (e): *Sordescunt divi, & ad sordes eluendas lavantibus aquis opus, atque adjuncta habent cineris frictione.* Vel cinis hic sumitur pro sapone, qui ex sebo, & cinere id temporis conficiebatur, atque in usu erat, teste Plinio (f) ad hanc rem: *Prodest & sapo. Galliarum hoc inventum rutilandis capillis. Fit ex sebo, & cinere.* Vel cinis lixivium significat. Nam lixivio macerasse saponem, donec in spumam, bullasque abiret, eoque crines unxisse, credo. Martialis (g):

*Et mutat latius spuma batava comas.*

Hæc autem spuma caustica non alia de causa dici posse mihi videtur, quam quod lixivium quamdam velut urendi vim habet (h).

*Caustica Tentonicos accendit spuma capillos.*

Ex his autem cum appareat, a Germanis hoc Romanos sumpsisse, ut crines arte rutilarent, non potuit hoc frequentari apud ipsos nisi tempore Julii Cæsaris post Galliam devictam.

Venetas matronas ad rutilandos crines sulphur medicatum adhibuisse, auctor est Hieronymus Mercurialis tractatu de Decoratione (i). Quomodo hoc medicamine uterentur, æque ignoro, ac quomodo-

(a) l. 2. *Ann. el. 9. v. 47.* (b) l. 2. *Ann. el. 14. v. 9.* (c) lib. 2. (d) lib. 2. cap. 1.

(e) lib. 7. (f)

(g) lib. 8. epigr. 33. (h) *Mart. lib. 14. epigr. 26.*

(i) cap. 21.

modo Romanæ antiquitus croco uterentur, quo tamen usas citatus Tertullianus testatur (a): *capillum croco vertunt*. Id scio, cum Veneritiis mulieres flavos crines efficere vellent, quo colore usque ad avorum ætatem capillos maxime amasse constat, solitas fuisse, sapone lixivii macerato eos in sole lavare, exsiccatosque eodem saponato iterum, sæpiusque saturare. Sed obsolevit jam tanta hæc in re tam levi diligentia, præcipue postquam candido illo factitio pulvere, quem cyprium dicimus, crines inspergere cæpere, mentirique canitiem, cum nondum habent, quam tantum dolent, cum habent. Cæterum id illis dandum, siquidem si flavum colorem diutius affectassent, periculum fuit, ne quando auri ramentis, quod de Vero Imperatore traditur, crines vellent inspergere.

C A P U T XIV.

*De fingendæ venuſtatis artificio. Varia ad id medicaminum genera. Unguenta.*

QUÆ ars inducendæ ex medicinæ præscriptis veræ pulchritudini operam dat, *Cosmeticam* appellari vult Mercurialis (b), *Cosmeticam* vero, quæ fucatæ tantum, & ementiæ pulchritudini studet. Priorem, eodem teste (c), dixit etiam Galenus *exornatoriam*, alteram *comptoriam*. Sed hæc medicis relinquamus, nullumque nobis discrimen inter eas sit. Certe Latini quoscumque servos, & ancillas, qui domini, aut dominx ornatum procurabant, *Cosmetas* dixerunt. *Ponunt Cosmetæ tunicas* (d). *Cosmeticam* itaque nunquam non exercuisse Romanas mulieres dicam, quæ totæ semper fuerunt in pulchritudine aut acquirenda, aut mentiunda, nullique pepercunt diligentia, ut corporis mendas aut corrigerent, aut occulerent.

*Ita est ingenium muliebre,*

*Bene cum lauta est, tersa, ornata, fida est: infesta est tamen* (e).

*Cosmeticæ artis*, nulli dubium, quin fuerit etiam cum capillos componere, tum maxime colorare. Sed de his vidimus, neque id unum fuit muliebris curiositatis opus. Præterea aut totum corpus pingebant, aut partem aliquam interpolabant, dictæ propterea a Plauto (f) mulieres *interpoles*. Primo autem eam amabant corporis habitu-

di-

(a) l. c. (b) *de decor. c. 1.* (c) *ibid. c. 10.* (d) *Juv. sat. 6. v. 476.* (e) *Plaut. Stich. act. 5. sc. 5. v. 3.* (f) *Mossell. act. 1. sc. 3. v. 117.*

dinem, quæ gracilis esset, subdūtoque cibo obefitatem quam maxime cavebant.

*Haud similis virgo est virginum nostrarum: quas matres student*

*Demissis humeris esse, vinelo pectore, ut gracile sicut.*

*Si qua est habitior paulo, pugilem esse ajunt, deducunt cibum:*

*Tameisi bona est natura, reddunt curatura junceas (a):*

Maxima deinde cura impendebatur sordibus eluendis, gravi odori depellendo, toti corpori defœcando, cuti extendendæ, ac dealbandæ. Testis illa apud Plautum (b):

*Nam nos usque ab aurora ad hoc quod dici est*

*Ex industria ambæ nunquam concessavimus*

*Lavari, aut fricari, aut tergeri, aut ornari,*

*Poliri, expoliri, pingi,ungi: & una*

*Bine singulis quæ datæ nobis ancillæ,*

*Eæ nos lavando, eluendo operam dederunt,*

*Aggerundaque aqua sunt viri duo defessi.*

Lacte asinino aliquando erugare cutem, & candidam reddere, aut conservare pleræque omnes studebant. Hoc medicamine usa præcipue Poppæa, quæ in exilium missa quingentas asinas ad hunc usum duxit. Ex ejus itaque invento, cum totum corpus hoc lacte perfunde-  
bant, lavabantque, tum præsertim panem eodem maceratum digi-  
tis pressum in faciem extendebant (c), quod genus medicaminis ideo  
dicitur a poeta Poppæanum (d), eoque incrustatam faciem tan-  
dium ferebant, ut ex eodem patet (e), donec se alicui spectan-  
das præberent. Faciei enim major omnibus, quam cæteri corporis  
cura.

Cerussa etiam & ad totum corpus, & ad faciem præsertim deal-  
bandam utebantur:

*Cedo cerussam, qui malas oblinam (f).*

Ceram pariter ad eundem usum adhibitam, apud Plautum invenio  
(g):

— *cera omne corpus intixti tibi,*  
nec non apud Ovidium (h):

*Scitis & inducila candorem querere cera.*

Ceræ mentio nulla apud Mercurialem, apud quem ne melini quidem,  
cujus tamen meminit ancilla Plautina (i):

*Ne-*

(a) Terent. Eunuc. act. 2. sc. 3. vers. 21. (b) Pan. act. 1. sc. 2. vers. 8.  
(c) Juven. sat. 2. v. 107. (d) Id. sat. 6. v. 462. (e) Ib. (f) Mosell. act.  
1. sc. 3. v. 101. (g) Terent. act. 2. sc. 2. v. 39. (h) de art. l. 3. v. 199. (i) Mosell.  
act. 1. sc. 3. v. 107.



*Neque cerussam, neque melinum, neque aliam offuciam.*

Melinum autem ex Plinio (a) genus est fossilis colore candido, ita dictum a Melo insula, ubi optimum effoditur, dictum etiam terra Melia. Candido colori inducendo in usu fuit etiam *crocodilæ*, hoc est crocodili terrestris fimus, eodem Plinio teste (b), quin & Horatio (c):

*neque illi*

*Jam manet bunnida creta, colorque*

*Stercore fœcatus crocodili.*

Hujusmodi tectoria non solum hic Horatius, sed etiam Martialis generaliter *cretam* appellat (d):

*Crassior in facie vetula stat creta Fabulle.*

Ovidius vocat *alutam*, quasi mollem pellem quandam (e):

*Parvaque sinceræ velat aluta genas.*

Sed præterea fœmina Romana,

*Sanguine quæ vero non rubet, arte rubet* (f).

Genas enim, & labia colorare, & antiquis mos fuit, & præsentibus mos est, Romæ adhuc præsertim, ac Januæ. At ab omni istiusmodi fuco mirum, quam abhorreant mulieres Veneræ cum honestæ, tum etiam probrosæ. Purpurisso ad hoc veteres utebantur.

*Tum tu igitur cedo purpurissum* (g).

Videtur autem Mercuriali (h) purpurissum dici genus omne medicaminis, quod purpureum colorem induceret, ad quod in usu erat etiam *rubrica*.

*Isane erubuiſti? quasi vero corpori reliqueris*

*Tuo potestatem coloris nlli capiendi, mala.*

*Buccas rubrica; cera omne corpus intinxi tibi* (i).

Mitto alia multa, quæ cum alibi, tum maxime carmine de medicamine faciei Ovidius tradit.

Ad hæc vero quanta unguentorum copia, & varietate utebantur?

*Istæc veteres, quæ se unguentis unctitant, interpoles* (k)?

Sua erant unguenta comis, & ciliis, sua genis, & collo, sua manibus, ac pedibus ungendis. Advertit autem eruditissimus Mercurialis (l), nomen unguenti, quod *μύρον* Græci vocant, fuisse apud ve-

(a) lib. 35. cap. 8. (b) lib. 28. cap. 2. (c) *epod.* 12. v. 9. (d) lib. 3. *epigr.*  
(e) lib. 3. *de art.* v. 202. (f) *Ibid.* v. 200. (g) *Plaut.* *Mosell.* *act.* 3. *sc.* 3.  
v. 104. (h) *de Descr.* c. 12. (i) *Plaut.* *Mosell.* *act.* 3. *sc.* 3. v. 37. (k) *Plaut.* *Mosell.*  
*act.* 1. *sc.* 3. v. 117. (l) *l. c.* 129.

veteres potius olei genus, quam unguenti, & si licet, inquit ille, equiparare alicui, fuisse unguenta veterum, quemadmodum nunc sunt olea odorata, quæ a myropolibus venduntur. Quamquam autem unctiores numerantur inter servos mulieribus attributos, & plure extabant in urbe myropolia; tanta nihilominus erat unguentorum pretiositas, ut ex Galeno referat auctor laudatus (a), temperari, ac confici etiam per nobilissimas Romanas matronas consuevisse. Magno emptum aliquod unguentorum genus ostendit monstrum illud hominis Judas, cui prodige perdi visum est illud, quod in caput Christi Domini versabatur.

Unde autem Judæis mos unguenta etiam pedibus adhibendi? A Græcis ne, an a Romanis? Accepimus ab Athenæo (b) id vulgo in Græcia usitatum; Romæ vero tardius, ac sub Nerone tantum morem hunc usurpatum, videtur docere Plinius, ubi ait (c): *vidimus etiam vestigia pedum tingi, quod M. Ottonem monstrasse Neroni Principi ferebant*. Nihilominus Romæ antiquis etiam temporibus saltem fæminis in usu positum pedes ungere haud difficile est credere, cum Plautus *murrhobratbarii*, seu *myrrhatbarii* (d) meminerit, cujus omnes affirmant fuisse muliebria calceamenta variis odoramentis, & unguentis imbuere. Id tamquam novum Plinius refert fortasse, quod non pedes, sed ima pedum pars, *vestigia*, ac solum unguentis tingebatur, ideoque statim subjicit: *Quæso, ut qualiter sentiretur, juvaretque ab ea parte corporis?* Quidquid tamen de hoc sit, certe mulieri illi evangelicæ scimus unguenta alabastriservata, quo ad ea servanda Romani pariter usi, eodem teste Plinio (e): *Hunc aliqui lapidem alabastritem vocant, quem cavant ad vasa unguentaria, quoniam optime servare incorrupta dicuntur*.

CA.

(a) l. c. (b) lib. 15. (c) lib. 13, cap. 3. (d) *Aul. abb.* 3. sc. 5. v. 37. (e) lib. 36. cap. 8.

## C A P U T XV.

*Descriptio pulchritudinis mulieris Romanæ. Nonnulla alia  
ad cosmeticen spectantia.*

**D**utius quidem munditiis muliebribus considerandis Immorati sumus, omnem tamen mundum muliebrem excussisse, totamque antiquorum cosmeticen examinasse nondum me, scio. Aliqua propterea addam, postquam matronæ Crotoniatis, seu potius mulieris Romanæ pulchritudinem omnibus simulacris emendatiorem, ut ille ait, qui eam descripsit (a), oculis vestris subjecero. Nam ad cætera nugamenta & hoc placet adjicere. En illa: *Crines ingenio suo flexi per totos se se humeros effuderant: frons minima, & quæ radices capillorum retroflexerat: supercilia usque ad malarum stricluram currentia, & rursus confinio luminum pene permixta: oculi clariore stellis extra lunam fulgentibus: nares paululum inflexæ, & osculum, quale Præcitateles habere Dianam credidit. Jam mentum, jam cervix, jam manus, jam pedum candor intra auri gracile vinculum positis parium marmor extinxerat.*

Adverte hoc primum, ad elegantissimæ formæ commendationem, qua diligentia satiricus omnem fuci, omnem artis suspensionem tollat. Quamquam enim vidimus, nihil omisisse ad honestandam formam Romanas fæminas, attamen dubitari non potest, quin pluri fieret, quæ natura formosa erat, quamque constabat (b),

*Nulla mala re esse expolitam muliebri.*

Hinc Ovidius etiam (c):

*Non tamen expolitas mensa deprendas amator*

*Pixidas: ars faciem dissimulata juvet.*

Propterea primo statim intuitu animadvertit, capillos minime fuisse calamistro, aut alia arte crispatos, sed ipsius naturæ beneficio flexos, ac ne quis posset dubitare adscitiine essent, eorum radices in fronte apparere dicuntur.

Verum quidem est, præsertim postquam flavos crines adeo amare mulieres ceperunt, quam plurimas fidiitiis comis usas fuisse, quæ potissimum a Germanis mittebantur.

*Nunc tibi captivos mittet Germania crines.*

*Culta triumphatæ munere gentis eris (d).*

Y

Adco

(a) *Perron.* (b) *Terent. Heautontim. act. 2. sc. 3. v. 48.* (c) *de ars. l. 3. v. 219.*

(d) *Ovid. Am. l. 1. eleg. 14. v. 45.*

Adeo autem non pudebat ullam hoc fateri, ut publice emptum micterent.

*Fœmina procedit densissima crinibus emptis;*

*Proque suis alios efficit ipsa suos.*

*Nec pudor est emisse palam; venire videmus*

*Herculis ante oculos, virginumque chorum [a].*

Adscititium capillamentum *galerum*, seu *galericulum* vocatum, ait Ferrarius [b]. Nihilominus certum est, pluris æstimatas, quæ proprios crines haberent, ideoque Ovidius amicam, cui comæ decidebant, satis tristem describit, & consolatur, fateturque pudori ipsi futurum fictitiam comam gestare [c]:

*O quam sepe, comas aliquo mirante, rubebis;*

*Et dices, empta nunc ego merce probor.*

*Nescio quam pro me laudas nunc iste Sycambra*

Sed retroflexæ radices capillorum illud etiam probabant frontem brevem natura esse, non arte. Cum enim pauilla, & angusta fronte olim commendarentur Romæ mulieres, quod adhuc in Gallia, & Hispania, extremis huius temporibus hic etiam apud nos probari ajunt, quæ latiori fronte erant, eam *nimbus* imminere, Arnobio teste [d], consueverant. *Nimbus* dicitur Isidoro [e] *fasciola transversa ex auro assuta in linteis*, quod est in fronte *fœminarum*. Ex auro forte fuere nimbi illis, quæ flavos crines haberent, debuerunt enim ejusdem coloris esse, ac crines, cum maxima diligentia ita fronti aptarentur, ut tamen possent dissimulari. Hinc Milphio ille Plautinus, non nisi sæpius Adelpasium attente inspiciendo, *nimbos* cognoscit [f]:

*Quam magis aspecto, tam magis est nimbat, & nuge meræ.*

Ad quem locum Meursius *nimbos*, eas fuisse fascias sentit, quæ imbuti possent colore eodem, qui esset capillorum. Non omnes tamen Romanas fœminas inter faciei mendas latam frontem habuisse, ideoque ad eam imminuendam non omnes usas *nimbis*, visum est Bernartio, qui Violantillam a fronte quam latissime diducta laudari putavit a Statio, cum hic cecinit [g]:

— *Celsæ procul aspice frontis honores.*

Sed frontem *celsam* quisnam latissime diductam interpretabitur? *Celsam* ego dici credo, quod totius corporis sublimissimo loco eminet, celsissima partium hominis, quem *Dens humo excitatam* [h] *celsum*,

& cre-

[a] *id. de ars. l. 3. v. 165.* [b] *de R. V. p. 2. l. 1. c. 20.* [c] *Am. l. 1. eleg. 14. v. 47.*

[d] *l. 2. l. e.* [e] *Orig. l. 19. c. 31.* [f] *Pan. m. l. 1. sc. 2. v. 135.* [g] *Syl. l. 1. syl. 2. v. 113.*

[h] *Cic. de nat. Deor. l. 2. c. 36.*

& erectum constituit. Celsa propterea frons erat & Circe Petronianæ, cui minima, & Lycoridi illi, quam Horatius dicit (a)

Insignem tenui fronte,  
& cæteris omnibus, quæ breviuscula sive ex naturæ munere, sive ex artis inventis, gaudebant.

Supercilia etiam descriptæ Circes nativæ fuisse, arbitror, non adscita. Supercilia enim non solum fuligine denigrabant, nisi fatis nigra essent, sed, si defluerant, integra fingeant prolata & pixide, ut ille ait (b), qualia Gallæ cujusdam erant apud Martialem (c). Fuligo autem hæc ad denigranda supercilia videtur Mercuriali (d), fuisse calliblepharum, cujus meminit Plinius, quod medicamentum ex floribus rosarum combustis, ex terra ampelitia vocata, & ex medulla bubula. Tertullianus nigrum pulverem vocat (e), modo nigrorem, modo nigrum pulverem etiam Sanctus Cyprianus (f). Ad hoc usus etiam matronas stibio, testis est Sanctus Hieronymus: oculos stibio linis (g): orbes stibio fuliginatos (h).

Sive vera, sive picta commendabantur supercilia, ut hic vides, in confinio luminum pene permixta, hoc est, quæ brevi intercapedine, dubioque divortio sejungerentur. Hinc Juvenalis ait, producta, quæ nimirum invicem distarent (i):

Ille supercilium madida fuligine tinctum

Obliqua producit acu.

Tertullianus modo laudatus similiter ait, nigro illo pulvere oculorum exordia produci, (k), ubi exordia oculorum quæ dicuntur, cilia sunt proculdubio, & supercilia. Hoc idem pariter significat Ovidius (l):

Arte supercilii confinia nuda repletis,

nam confinia supercilii ea sunt, ubi alterum alteri conjungitur, quæ si arte replebantur, patet falli Mercurialem, qui, quod forte nostris temporibus fit, putat (m), antiquitus fæminas supercilia ex longis angustia fecisse. Fallitur etiam idem auctor, dum ait (n), id temporis etiam, quæ flava erant supercilia, arte denigrari solita, namque ex Ovidio clarum alias nigra, alias flava eadem arte finxisse (o):

Nec pudor est oculos tenui signare favilla,

Vel prope te nato, lucide cydne, croco.

Aut igitur favilla, quam hic puto idem esse, ac ea, quæ aliis fuligo, cinere scilicet ex rosas combustis, superciliorum, ac palpebra-

Y 2 rum

(a) l. 1. ad 33. v. 5. (b) Petron (c) l. 9. epigr. 38. (d) de decorat. cap. 11.

(e) de bab. muliere. c. 2. (f) de disc. & bab. virg. (g) epist. 89. alias 47. (h) epist.

47. al. 17. (i) sat. 2. v. 93. (k) l. 6. (l) de Art. l. 3. v. 101. (m) l. 6. (n) l. 6.

(o) de Art. l. 2. v. 103.

rum pilis nigrum colorem, aut flavum croco inducebant, ut falsum sit, omnibus sœminis nigra placuisse supercilia etiam iis, quæ flavæ eadem haberent. Nemo enim putet, ipsa lumina, ipsos oculorum orbes infectos adulterino colore indicari a poeta. Primum enim quis dicat, oculos croceos unquam inter pulchritudinis notas? Deinde quomodo ipsi oculi, quos lubricos natura fecit, ac mobiles, ut ait Tullius (a), ut declinarent, si quid noceret, & tenuissimæ illæ membrænæ, ac pupula manum pati potuissent, ac pingi? Oculos dixit poeta ipsa oculorum tegmenta, & sepimenta, palpebras, ac supercilia. De superciliis itaque optime etiam intelligitur Tertullianus (b), ubi ait: sœminas oculos fuligine continere, ac Arnobius (c), qui eas oculos fuligine obumbrare, ac Divus Cyprianus, qui (d) oculos circumducto nigrore fucare dixit. De palpebris etiam & superciliis capiendus Plautus, ubi frictione manus venustari sibi oculos, fordesque ex iis detergi, poscit quædam (e):

*Viden' tu, pleni oculi sordium qui erant, jam splendent mihi.*

An: *Imo etiam in medio oculo paullum sordet. Ad: cedo sis dexteram.*

An: *Ut tu quidem hujus oculos illotis manibus trahes, ac teras!*

Ad ea quæ de naso, ore, mento, cervice, manibus dicuntur, nihil habeo, quod addam. Quod vero ait Petronius: *jam pedum candor intra auri gracile vinculum positus*, id eruditissimus Ferrarius (f) de perisceliis vult esse intelligendum, probavitque aliquibus Petronii interpretibus. Mihi tamen, quod tanti viri pace dictum sit, placet accipere de ansis, & crepidarum obstragulis. Cum enim satiricus alibi (g) periscelides Fortunatæ commendaverit, quod pondo, & selibram haberent, non video cur periscelides Circes ex gracilitate commendatos velit. Quare aliud est, quod Seneca (h):

*Crua distincto religavis auro;*

aliud, quod Arbuter: *pes intra auri gracile vinculum*. Præterea ansas illas & obstragula satis proprie vincula nemo non dixit. Tibullus (i)

*Vinclaque de niveo detrabet ipse pede.*

Ovidius (k):

*Stringebant magnos vincula parva pedes,*

Idem (l):

*Vincla duæ pedibus demunt.*

Quare hinc colligo, meretrices Romanas, quæ certe sub Circes persona describuntur, soccos vulgo minime induisse, qui propterea matro-

(a) de nat. Deor. l. 2. c. 142. (b) de cult. fam. c. 5. (c) l. 2. (d) de disc. & hab. virg. (e) Pan. alt. l. 2. c. 2. v. 101. (f) Anal. c. 21. (g) in fragm. Trig. (h) Hystor. alt. l. 2. v. 321. (i) l. 1. cl. 6. v. 30. (k) Fast. 2. v. 324. (l) Metam. 3. v. 168.

tronarum propriores erant, sed nudis pedibus soleas, & crepidas induxiffe. Hæ autem cum obſtragulis, vinculiſque aureis arctius obſtringerentur ſuperiori parte: Tibullus (a)

*Anſaque compreſſos colligat arcta pedes;*

facile auro interceptus nudi pedis candor lenocinium quoddam ſpectantibus faſtitabat. Qui mos luparum hujusmodi auro hac ratione pedibus induendi fortasſe Plinii oculis obverſatus, cum ait, (b) auro pedibus induto *inter ſolam*, & *plebem medium libertinarum equeſtrem ordinem*, factum, nec de peritſceliis tum ipſe cogitavit. Quod non adeo perperam arbitratos quosdam, puto, quos Ferrarius ſugillat (c).

Antequam officina ornatoſia egrediamur, juvat Circe iſti Crotoniati caſtigatiſſimum Chriſtianæ ſcæminæ exemplar opponere. Hunc Chriſtianis ſcæminis cultum præſcribit Tertullianus (d): *Prodiſte vos jam medicamentis, & ornamentis extructæ Apoſtolorum, ſumentes de ſimplicitate candorem, de pudicitia ruborem, depictæ oculos verecundia, & ſpiritus taciturnitate, inferentes in aures ſermonem Dei, annectentes cervicibus jugum Chriſti. Caput maritis ſubjicite, & ſatis ornata eritis. Manus lanis occupate, pedes domi figite, & plusquam in auro placebunt. Veſtite vos ſerico probitatis, byſſino ſanctitatis, purpura pudicitia. Taliter pigmentatæ Deum bobebitis amatorem.* Locum hunc Tertulliani eo libentius attuli, non ſolum quod hinc diſcimus, quale eſſe debeat earum ſtudio, quæ ſanctæ potius, quam ſcite & coli, & ornari volunt, verum etiam quod ex eo facile iterum colligimus, qualis cæterarum cura, imo curioſitas eſſet. Novo enim hoc teſtimonio, quod hætenus diſtorum velut compendii loco mihi eſt, ſatis confirmatur, quidquid de candefacienda, ac rubefacienda facie, de pingendis ſuperciliis, de inauribus, de monilibus, de ornando capite, de armillis, de crepidarum auro, de veſtium varia mareria, & colore fuſius per ſuperiora capita diſſeruimus. Quæ ſi in Affrica apud Chriſtianas etiam mulieres Tertulliani ævo nondum exoleverant, multo magis Romæ longe ante viguiſſe neceſſe eſt, unde in provincias urbis dominæ virtutes ac vicia propagata ſunt. Sed Romanas ſcæminas ſeriis magis rebus intentas tandem aſpiciamus.

*Domus procuratio . Filiorum institutio .*

**T**Ocius domus procuratio penes matresfamilias ab antiquissimis temporibus semper fuit. Neque ulli mirum sit, quod matronæ quas tantopere munditiis deditas descripsimus, rei domesticæ cura gravari voluerint. Poeta enim uno, eodemque tempore ipsas sese ornantes, ac a servis operam exigentes repræsentat, idque ita severe, ut administrationem domus cum Siculorum tyrannide conferrat (a):

*Verberat, atque obiter faciem linit, audit amicas,  
Aut latum pictæ vestis consideras aurum,  
Et cadens longi repetit transacta diurni,  
Et cædis, donec lassus cadentibus, exi,  
Inonas horrendum, jam cognitione peracta,  
Præfectura domus Sicula non mitior aula.*

Minus tamen formæ studiosas, quæ magis industres erant, facile sibi quisque persuadebit. Cæterum si Columellæ fides, ætas fuit, cum flagrabat (b) mulier pulcherrima diligentia emulatione, studens negotia viri cura sua majora, ac meliora reddere. In commune conspirabatur ab utroque, ut cum forensibus negotiis matronalis sedulitas industria rationem parem faceret. Parta igitur a marito non tueri solum, sed augere, si fieri poterat, quod probarum uxorū est, nitebantur, universamque rem familiarem, cum opus erat, administrabant. Hinc ille (c)

*Nam ita me absente familiarem rem uxor curavit mea,  
Omnium me exilem, atque inanem fecit egritudinem.*

Hoc autem maximum maritis adjumentum, magnumque solatium fuisse, quis dubitet, cum foris defatigari libentius vellent, omnia domi fartatecta uxoris diligentia inventuri. Domesticus (d) labor matronalis fuit, tamquam ad requiem forensium exercitationum omni cura deposita patribus familias intra domesticos penates se recipientibus. Neque in urbe solum, sed ruri etiam, quæ ad villam spectabant egregie curata aliquando a matronis, aperte testatur Columella (e), qui tamen mos cum non solum exoleverit, eodem teste, sed etiam occiderit, necessario irrepssit villicæ cura, quæ tueretur officia matronæ. Videntur autem

tem

(a) Juv. sat. 6. v. 481. (b) l. 2. præf. (c) Plaut. Stich. act. 4. sc. 1. v. 20.

(d) Colum. l. 2. (e) l. 2.



rem Columellæ tempore Romanæ matronæ non villicarum modo, sed & urbanarum rerum administrationem ita abdicasse, ut luxu tantum, & inertia disfluere. Hoc verissimum putabant omnes, divitiis in immensum auctis, & mutato reipublicæ statu, lapsa jam veteri disciplina. Verum nullo tempore minus probas, minusque industres matres familias non iuventas, fateor, inter locupletiores præcipue. Hinc, regnante Tarquinio, scimus, *regias muros (a) in convivio, luxuque visas cum equalibus tempus terentes*. Neque enim idem semper singulis mulieribus ingenium fuit, ideoque ille ad uxore ducenda abhorrebat, ne parum sedulam duceret, veritus (b):

*Bona uxor si ea deducta est usquam gentiam,  
Ubi eam possem invenire? Verum egone eam ducam domum,  
Quæ mihi nunquam hoc dicat: eme mi vir lanam, unde tibi pallium  
Malacum & calidum conficiatur, tunicaque biberne bone,  
Ne algeas hac hyeme.*

Sordidiora tamen negotia obire ne antiquissimis quidem temporibus solitæ unquam fuere Romanorum matres familias. Ipsi Sabinis arbitraturs Plutarchus (c), id honoris habitum, ne patriæ desiderium illas incesset, ut nec coquendo, nec molendo, aut similia ancillarum munia obeundo, viris famularentur. Obtinuit id itaque semper levi ad venalicias ex Syria, aut Ægypto servas impendio. Cum uxorem itaque ducturum Phormionem, Gera simularet, tenuem quamvis, & pauperrimum hominem, ait nihilominus (d):

*Uxori emunda ancillula.*

En autem laboriosa ministeria, quæ ancillarum propria erant: (e)  
*Nihil nobis opus ancilla, nisi, quæ texat, quæ molat,  
Lignum cedat, pensum faciat, ædes verrat, vapulet,  
Quæque habeat cotidianum familiæ coctum cibum.*

In iis, quæ ad rectam familiæ institutionem, ac gubernationem spectabant, servi, servæque, quamvis in ære domini, heræ imperio subiecti erant. Patet hinc, quod Juvenalis graviter servos plectentem quamdam describit (f):

*hic frangit ferulas, rubet ille flagellis,*

*Hic scutica; sunt quæ tortoribus annua præstent.*

Ancillarum tamen cura specialiter ad dominam pertinebat, neque in illas maritus quidquam sibi sumebat. Id clare viro uxor ingerit in comœdia (g):

Cl:

(a) Liv. lib. 1. cap. 57. (b) Plant. Mil. aff. 3. sc. 1. v. 91 (c) Quæst. Rur. 85.

(d) Terent. Phorm. act. 4. sc. 3. v. 60. (e) Plant. Merc. act. 2. sc. 3. v. 62.

(f) Sat. 6. v. 479. (g) Plant. Caf. act. 2. sc. 3. v. 41.

Cl: Mirum, æstas, te senectâ ætate officium tuum

Non meminisse? St. quid jam? Cl: quia si facias recte, aut commode,  
Me sinas curare ancillas, quæ mea est curatio.

In commune tamen consulebant vir, & uxor, ut liberos probe, ac liberaliter educerent, eisque consularent, ubi opus esset. Quæ uxor propterea dixerat, suam esse curationem ancillarum, eadem & sibi, & viro Filii voluntati consulendum ait: (a)

quia enim filio

Nos oportet opitulari unico

Liberos tamen propriis uberibus alere infantes nimis grave, atque adeo servile visum semper Romanis matronis. Planum hoc ex oratione Phavorini Philosophi apud A. Gellium (b), in qua nobilis matronæ recens enixæ matri graviter conatur suadere, ut velit, eam proprio lacte filium alere, cum mater contra, puellæ parcendum, diceret, ne ad dolores, quos in enitendo tulisset, munus quoque nutritionis grave, ac difficile accederet. Hoc autem numquam non fuit in usu, ut externæ nutrices infantibus adhiberentur, quod Comicus in Menæchmis significat (c):

Ita forma simili pueri, uti mater sua

Non internosse posset, quæ mammam dabat,

Nec adeo mater ipsa, quæ illos pepererat.

Unde intelligis, nutricem quoque matris nomine donari. Discimus autem ex verbis Phavorini laudati, quam fors obulisset id temporis lactentem, eam, cum alia non esset, necessitate adigente, adhiberi solitam, ideoque accidere potuisse, ut ignobili genere, & pessimis moribus, non sine parvuli periculo, & damno, nutrix offenderetur, quod utinam nostris etiam temporibus nunquam accideret. Si ista, inquit Philosophus (d) *quam ad præbendum lactem adbibebitis, aut serva, aut servilis sit, & ut plerumque solet externæ, atque barbaræ nationis, si improba, si informis, si impudica, si temulenta est. Nam plerumque sine discrimini, quæcumque id temporis lactens est, adhiberi solet.* Quapropter si ulla unquam mater inventa est, quæ ipsa suo lacte liberos enutrire vellet, hæc ob tantam in filios caritatem commendari omni jure debuit. Sed rarum hoc exemplum fuisse colligimus, cum dignum sciamus habitum, quod sepulchri titulis inscriberetur. Vide inscriptionem apud Gruterum, ubi viri libertini uxor, libertino & ipsa genere, ut ex ejus nominibus conjectare facile possumus, ex hac in filios cura laudatur. (e)

G R A-

(a) *Plaut. ibid.* v. 44. (b) *lib. 12. cap. 1.* (c) *prol. v. 19.* (d) *A. Gell. l. 1. c.*  
(e) *DCXVIIK 6.*

GRATIAE. ALEXANDRIÆ. COJUGI. DULCIS  
INSIGNIS. PUDICITIÆ. ET. RARI. EXEMPLI  
QUAE. FIL. SUOS. PROPIS. UBERIB. EDUCAVIT  
PUDENS. AUG. LIB. MARITUS. INFEL  
B. M. VIX. AN. XVI. M. II. D. XVI

Quod insuper spectat ad liberos procurandos, certum est, cum in matrimonium collocandæ filiz essent, matrem a marito in consilium adhibitam, neque ea invita quidquam transactum. Celebris est historia de matre, sive ea Æmilia Scipionis, ut Livio placet (a), sive Antistia Claudii fuerit, ut Plutarcho (b), quæ cum marito conquesta est, quod communem filiam, se imprudente, despondisset. Poeta etiam ab utroque parente filiam nuptui dari significat (c):

*Non æquum est pugnare, pater cui tradidit ipse,*

*Ipse pater cum matre, quibus parere necesse est.*

Hinc Amata apud Virgilium furiis acta ob Laviniz nuptias, maternum jus læsum queritur, matresque omnes ad communem causam defendendam excitat: (d)

*Clamat: Io matres audite ubi quæque Læsinæ.*

*Si qua piis animis manet infelicis Amate*

*Gratia: si juris materni cura remordet.*

Auditam etiam matrem, cum filius uxorem ducturus esset, iuculentus testis pater terentianus: (e)

*nam vestrarum nulla est, quin gnatum velit*

*Ducere uxorem; & quæ vobis placita conditio est, datur.*

Nunquam tamen filii in manu matris erant, ne patre quidem mortuo. Itaque Helvidii filiz, quod in nullius manu erat, parente altero extincto, ait Cornutus quidam apud Plinium Juniorem (f), datum se a consulibus tutorem, petentibus matre eius, ac virrico. Nunquam propterea scemina poterant filios adoptare, cum adoptatus in manu ejus esset, qui adoptabat. Servos quidam, ac servas mancipii habebant, ideoque eos poterant manumittere, quod plusquam certum est ex infinitis lapidibus, ubi mulierum liberti hac nota significantur D. L. nam D. inversum Cajam, hoc est Dominam significare supra etiam diximus.

(a) l. 38. c. 57. (b) Græc. (c) Catull. carm. 61. v. 67. (d) Æn. 7. (e) Ter. ad. 2. sc. 1. v. 44. (f) l. 9. epist. 13.

## C A P U T XVII.

*Mulieres in manu, aut tutela alicujus. Lex Voconia. Marius uxori judex. Fæminis nullam Reipublicæ partem attingere permiffum.*

*Earum amor in patriam.*

**M**ulierum nulla apud Romanos sui pleni juris unquam fuit, quippe quæ aut in manu, aut in tutela alicujus esse debebant. Antequam nubere, in patris, post nuptias in viri manu erant, si ex eorum uxoribus genere erant, quæ in manum convenissent; sin autem ex alio, adhuc post nuptias sub patris erant potestate. Nunquam salvis suis exiit servitus muliebris, & ipsæ libertatem, quam viduitas, & orbitas facit, detestantur, aiebat ille (a). Libertinæ vero erant in patroni manu, ideo Livius de Hispala Fecenia (b) post patroni mortem, quia in nullius manu erat. Orbis, & viduis jam libertatem adeptis, tutorem dari oportebat. *Mulieres omnes*, ait Cicero (c), *propter infirmitatem consilii majores in tutorum potestate esse voluerunt: hi invenerunt genera tutorum, quæ potestate mulierum continerentur.* Ad quæ autem necessaria esset auctoritas tutoris mulieribus, explicat Ulpianus tit. ii. Inst. *Fæminis, quæ in manu parentum, aut viroꝝ non essent, tutoris auctoritas necessaria erat in his rebus: si lege, aut judicio agerent, si re obligarent, si civile negotium gererent.* Nihil horum igitur ratum, si id fœmina sine tutoris auctoritate fecisset. Cicero (d): *Hoc non potest, quod mulier sine tutore auctore promiserit, deberi.* Ne dotem quidem poterat vir petere, si nuptura nullo auctore promississet. Idem Cicero eadem oratione (e): *ipsæ nunquam auderet judicare, deberi viro dotem, quam mulier nullo auctore dixisset.*

Tutorem vero non ipsæ sibi sumebant, sed a magistratibus petebant. Livius (f): *tutorem a Tribunis, & Prætoribus petito, quum testamentum faceret, unum Ebusum instituerat heredem.* Potuisse autem a marito uxori testamento tutorem dari, negat Græpæ (g). Neque enim major erat potestas mariti in uxorem, quæ in manu ejus esset, quam patris in liberos. Pater autem liberis tutorem minime da-

(a) *Liv. lib. 34. cap. 7.* (b) *lib. 39. cap. 9.* (c) *pro Mur. cap. 27.*

(d) *pro Cæcin. cap. 72.* (e) *ibid. cap. 73.* (f) *lib. 39. c. 9.* (g) *de Un. Rom. cap. 3. §. 19.*

dabat testamento, nisi pupillis seu maribus, seu fœminis. Cum igitur fœminæ jam puberes, & pupillarem ætatem egressæ suæ essent potestatis patre, aut marito extincto, at nihilominus tamen sub tutela perpetua esse deberent; tutorem sibi dari petebant a magistratibus. Viduæ tamen sapius tutorem ipsæ sibi eligebant, si tutoris optionem, ut fieri a maritis solebat, illis vir testamento dedisset, quod a jurisconsultis inventum ad eludendas leges, & tutelæ vim fuisse, videtur indicare Cicero pro Murena (a). His autem legibus minime tenebantur Virgines Vestales ex Numæ instituto, ipsique, teste Plutarcho (b), testamenta, vel superstite patre, nuncupandi jus erat, & sine tutore, vel curatore liberum rerum suarum arbitrium. Nulli id præter ipsas fœminæ concessum, quibus nihil amplius indulgeri solitum fuit, quam si ob magnum aliquod in patriam meritum, legibus honorificentissimo privilegio solutæ, tutorem sibi optare possent, quod Feceniæ Hispalæ contigisse, testis est Livius (c): *Utique Feceniæ Hispalæ tutoris optio item esset, quasi ei vir testamento dedisset.*

Durius illud quod de exercendis mulierum hæreditatibus cautum fuerat lege Voconia, quam a Q. Voconio Trib. pl. latam Cæpione, & Philippo Coss. suasisse se annos quinque, & sexaginta natum, luxus muliebris perpetuus hostis, Cato major memorat (d). Prohibitum hac lege, ne qui census esset, virginem, aut mulierem hæredem institueret. Complectebatur autem ea etiam utrumque parentem. Clarum ex Tullio (e): *P. Annius Afellus, cum haberet unicam filiam, neque census esset, quod eum natura hortabatur, lex nulla prohibebat, fecit, ut filiam bonis suis hæredem institueret.* Idem paulo post (f): *Annia de multorum propinquorum sententia, pecuniosa mulier, quod census non erat, testamento fecit hæredem filiam.* Vides ideo nulla lege prohibitos Annium patrem, & Anniam matrem scribere hæredem filiam, quod neuter census esset, cum lege Voconia solum qui census esset, teneretur. Censum autem esse idem est, ut Pedianus (g) interpretatur, ac centum millia sestertium possidere. Nam more veterum *censi dicebantur qui centum millia professione detulissent, hujusmodi adeo facultates census vocabantur.* Scimus quidem a Servio Tullo (h), hujus summæ, majorisve rationem habitam, ut in prima classe quis posset censeretur. Si cui tamen hæc non arridet interpretatio, contra quam

Z 2

fa-

(a) l. c. (b) Num. (c) lib. 39. cap. 19. (d) Cic. de sen. et. cap. 14.

(e) lib. 1. in Verr. cap. 104. (f) ibid. c. 111. (g) in orat. Cic. in Verr. de prat. urb.

(h) Liv. l. 1. c. 43.

fateor & mihi scrupulum injectum, quod Annia a Cicerone dicitur pecuniosa mulier, neque tamen censa, aliam etiam assert Alconius (a): Alii sic intelligunt: neque census esset, hoc est neque census ejus in quinquennium illud esset factus, quorum annorum spatium instaurari census solet apud Censores, quorum administratio per lustrum, hoc est quinquennium, extenditur. Sed ut priori interpretationi stemus, quam video a clarissimis viris, qui notas in Alconium scripserunt, non improbari, tenues hæreditates, dicemus, quæque infra centum millium sester-tium summam erant, lege Voconia minime comprehensas. Quin & illis, qui eam summam possiderent, ideoque censi essent, ex quadrante licuisse scæminas hæredes facere, colligit ex Dione Franciscus Hotomannus (b): scribit enim Dio ὡς ἐπὶ τοῦ ἡμισυ μισθιδίας: idest H.S. XXV. quæ pars quarta est bonorum ejus, qui Census auctore Pediano dicebatur. Duo etiam alia legis Voconix capita ex eodem Hotomanno (c) addenda sunt: Ne plus legatis, quam hæreditatibus auferretur. Idest ne plus cuiquam scæminæ legare liceret, quam ad hæredem, hæredesve perveniret. Item, Ne scæminæ ultra consanguineos ab intestato succederent. Alii tamen ne consanguineis quidem potuisse scæminas ab intestato succedere affirmant. Augustum aliquas scæminas his tantis legis Voconix vinculis solvisse, idem Dio auctor est (d).

Maritus, dum uxorem in manu habuit, mulieri iudex pro cen-sore fuit, ut ex Oratione M. Catonis refert A. Gellius (e). Sed uxorem, sive ea convenisset in manum, sive secus, in adulterio deprehensam, aut vinum bibisse compertam, impune maritus occidere ex lege Romuli poterat. Hæc tamen tanta vitæ, necis-que potestas placuit aliquando esse potius penes patrem, quam maritum per legem Juliam, quam Augustus tulit, de adulteriis. Pater itaque filiam adulteram in potestate constitutam patrio jure, filiam vero, quæ eo auctore in manum mariti convenisset, ex potestate legis Julix, si ad eam rem gener socerum adhibuisset, occidere potuit; imo sive in patris potestate, sive in mariti manu esset, occidere debuit, si impune adulterum domi suæ, ge-nerive prehensum vellet occidere. Hæc ex Grupen (f), qui legis hujus hanc afferri rationem ait a Papiniano: Ideo patri, non marito, mulierem, & omnem adulterum permissum est occide-re,

(a) *ibid.* (b) *not. ad Dyem. l. c.* (c) *ibid.* (d) *lib. 56.* (e) *l. 10. cap. 2.* (f) *de Ux. Rom. cap. 3. §. 5.*

ve, quod plerumque pietas paterni nominis consilium pro liberis capis; ceterum mariti calor, & impetus facile decernendis fuit refrœnandus.

Fœminas, quibus nec sua tueri, nec solis privatim quidquam agere permissum ob consilii imbecillitatem, ab omni publicarum rerum administratione exclusas apud Romanos, secus ac apud Lacedemonios, mirabitur nemo. Non magistratus, nec sacerdotia, nec triumphi, nec insignia, nec dona, aut spolia bellica his contingere possunt, aiebat ille (a). Mirari potius illud possumus, quod aliquæ hodie gentes in Europa sunt, ubi fœminæ rerum aliquando potiuntur, cogunturque viri jam non sub rege, sed sub regina degere. Ingressa quidem senatum est Semiamira Helagabali mater, regnante filio, atque inter senatores sententiam rogata; verum post ejus mortem severe cautum est, ne unquam mulier senatum ingrederetur, utque inferis ejus caput dicaretur, devovereturque, per quem id esset factum. Melioribus autem reipublicæ temporibus non modo earum nullam senatum unquam ingressam, legimus, sed etiam quod in publicum prodierint eblandiendis virorum suffragiis pro legis Oppiæ abrogatione, vehementer a Catone castigatas (b). Plutarchus etiam refert (c), cum fœmina aliquando causam pro se in foro dixisset, Senatum Deos consuluisse, ecquid hoc exemplum urbi portenderet. Memorat tamen Valerius Maximus (d) aliquas, quas conditio natura, & vereturndiæ stola, ut in foro, & in judiciis tacerent, cobibere non potuit. Neque plurium tamen, quam trium meminit, Ameliæ, Hortensiæ, & Caiæ Affraniæ, quarum ultima cæteris impudentior ad muliebris calumniæ notissimum exemplar, eodem teste, evasit, adeo ut pro crimine improbis fœminarum moribus C. Affraniæ nomen objiceretur.

Quamquam vero mulieres Romanæ nullam omnino civitatis partem attingerent, mirum, quo in rempublicam amore semper cum viris certarint. Non solum semel, atque iterum aurum in ærarium delatum, publicæque angustię suis ornamentis levatæ id testantur, sed studium etiam illud, quo toties legimus apud historicos Deorum delubra adiisse, aut gratias pro rebus bene gestis acturas, aut difficilibus temporibus eorum iram placaturas. *Matrone* ait

Li-

(a) Liv. lib. 39. cap. 7. (b) Liv. 34. cap. 2. (c) comp. Num.

(d) lib. 2. cap. 3.

Livius (a), quia nihil in ipsis opis erat, in preces, obsecrationesque versæ per omnia delubra vagæ, suppliciis, votisque fatigare Deos. Plura afferre hujusce rei testimonia, super vacuum arbitror. Supplicatum ire, amplexari simulacra, aras cinibus verrere, illis in publicis calamitatibus, nullo etiam jubente, usitatum. Accedit illud earum in patriam caritatis argumentum, quod optime de republica meritos cives publico luctu prosequerentur, quemadmodum annum luxisse L. Brutum (b), ac Valerium Publicolam (c), Livius refert.

## C A P U T XVIII.

*Fœminæ Romanæ superstitiœ. Matronarum funera.*

**P**ropensum ad pietatem sexum, ac imbecillia fœminarum ingenia falsæ religionis error vix dici potest, quanta superstitione imbuerit. Verissime agebat quædam (d),

— *Ut stulte, & misere omnes sumus*

*Religiœ* —

Meretrices ipsæ ludricos sibi Deos finxerant, quos irrisisse potius dicam, quam coluisse, sed nisi ita irriderent, ne turpis quæstus parum procederet, verebantur. Præcipue vero, cum fœmina timidissimum animal natura sit, ostentis, & omnibus facile exanimabantur, ideoque hariolos, hariolatrices, idque genus impostores, & deliras anus in maximo habebant honore, adibantque frequenter, magnisque impendiis juvabant. Vide Juvenalem sub finem satiræ sextæ, ex quo nihil exscribo. Nullo autem tempore ad hæc non propensas Romanas fœminas, discere etiam ex Plauto, apud quem uxor dicitur hæc maritum rogare (e):

— *da, quod dem quinquatribus*

*Præcantatrici, conjectrici, hariolæ, atque aruspiciæ:*

*Flagitium est, si nihil mittetur, quo supercilio spiciat!*

*Tum piatricem clementer non potest, quin munerem.*

Locus hic esset agendi de sacris, quæ fœminæ Romanæ frequentabant, deque Diis, quos impensius colebant. Sed non ego id otii modo nactus sum, ut in hunc campum ingredi possim. Fortasse aliquan-

(a) lib. 27. cap. 30. (b) lib. 2. cap. 7. (c) lib. 2. c. 16. (d) Terent. Heautontimorumenos. act. 4. sc. 1. v. 36. (e) Milius. act. 3. sc. 1. v. 97.



quando & id maritissæ loco brevi huic tractatui adjungam . Modo coronidem imponere operi juvat , neque aliud insuper quærere , quam honores , qui post mortem fœminis habebantur .

Eodem funeris honore elatas fœminas , ac viros , puto , nihilque in exequiarum pompa nobilibus matronis invisum , quod principibus viris concederetur . Imagines majorum in matronarum funere prolatas , satis probat Cæsaris audacia ( a ) , qui in Juliæ amicitæ suæ funere Marii , cui nupta illa fuerat , imagines , quamvis hostis aliquando judicati , præferre non dubitavit . *Earum etiam sicut virorum post mortem solennis laudatio erat* , idque honoris a Senatu matronis additum , refert Livius ( b ) , *quod cum in publico decesset aurum , quo summa pactæ mercedis Gallis conferebat , a matronis collatum acceperat , ut sacro auro abstineretur* . Grandiores tamen natu fœminas duntaxat laudari solitas , narrat Plutarchus ( c ) , novumque propterea fuisse , quod idem Cæsar uxorem suam adolescentiorem funebri oratione laudavit . Primus omnium fuit pariter Cæsar , qui in fœminarum funere gladiatores daret , ita enim Svetonius ( d ) : *munus populo , epulumque in filie memoriam pronuntiavit , quod ante eum nemo* . Vulgus tamen novum morem deinde imitatum , testatur Lipsius ( e ) . Hæc matronarum funera . Verum & in meretricularum exequiis pompam , frequentiam , ploratum , atque omnia honoris plena videbis apud Terentium in Andria ( f ) .

F I N I S .

---

( a ) *Plutarch. Cæs.* ( b ) *lib. 5. cap. 20.* ( c ) *ibid.* ( d ) *Cæs. cap. 26.* ( e ) *Saturn. lib. 1. cap. 8.* ( f ) *art. 1. se. 1.*



# ORATIONES

D E

SANCTISSIMA TRINITATE

HABITÆ IN SACELLO PONTIFICIO

A

CONVICTORIBUS COLLEGII CLEMENTINI.

THE  
JOURNAL OF THE  
ROYAL ANTHROPOLOGICAL INSTITUTE  
OF GREAT BRITAIN AND IRELAND  
VOLUME 100  
PART 1  
1970

D E

## SANCTISSIMA TRINITATE

O R A T I O P R I M A .



Augustissimum TRINITATIS Mysterium, de quo apud te jubeor dicere, BEATISSIME PATER, omnis sentio vim orationis excedere, cum omnis vim fugiat intelligentiæ. Attonito adorandum silentio, quod ideo cognoscimus, non quod claram de Deo notionem, sed quod Deo nulla ratione labefactandam fidem habemus. Audaciæ est id velle dicendo assequi, quod Deo revelante didicimus. Hoc enim tantum Mysterium ut clare nobis aliquando aperiret (a), nequaquam per Prophetarum oracula Deus ad nos descendit, ut plura alia detecturus, ad quæ mentis acies evadere nulla poterat; sed ipse inter nos versatus ore suo prodidit æternus Filius. Quod cum nobis innotuerit, gaudere quidem bono nostro debemus, sed magis adhuc, quod ita Dei ipsius gloria cumulatissime aucta sit. Quæ enim præclarior laus excogitari unquam potest ipsi deferenda, quam si HOMOUSSION TRINITATEM confitemur? Tunc de Deo digna sentimus, cum ea prædicamus, quæ inaccessiblei menti nostræ intelligimus. Mundi conditorem, ac gubernatorem cum dicimus, ea celebramus, quæ vel muta ejus opera diserte satis enarrant; cum vero divinam illam Verbi generationem, Amorisque spirationem colimus, ea prædicamus, quæ Deus unus testari poterat, qui unus noscit. Quis autem dubitet, majorisne gloriæ sit, has Cælorum semper vertentium Sphæras, hunc terrarum stantem globum ab ipso esse fabrefactum, an Parenti æqualem Filium, spiranti æqualem Spiritum ante sæculorum exortum in ipso extitisse? Sapienter Cyrillus (b): *In Deo majus est esse Patrem, quam Dominum, quia ut Pater genuit Filium sibi æqualem, ut Dominus creavit creaturas, quæ in infinitum minores sunt Filio.* Eo præclarior itaque, Deoque dignior laus est TRINITATEM simplici animo fateri, quam ipsam Omnipotentiam ornare verbis, quo magis suis ipse Deus operibus præstat. Magna enim gloria ipsius est quod ea possit, quæ non intelligimus; longe tamen

A a 2

ma-

(a) D. Thom. c. gent. lib. 4. c. 1. (b) Lib. 7. Theof. c. 6.

major, quod is sit, quem possit nemo intelligere. Facundum nobis fuisse, grandis est amoris significatio; at sibi facundum esse, ineffabilis naturæ argumentum. Omnipotentem ideo & Ethnici Deum falsi sunt, in una vero natura Trinum Orthodoxa tantum fides factus. Sicut enim æquum erat, ne totus omnes lateret, ita etiam, ne totus pateret omnibus. Si nulli passus fuisset ulla ratione cognosci, conditos a se homines contemnere visus esset; omnibus vero æque cognitus, amicos negligere dictus fuisset, quibus plura danda erant caritatis argumenta. TRINITATEM itaque tunc hominibus innotescere voluit, cum impensius cepit homines diligere, quod inter ipsos & Filius censebatur. Tunc primum prodita hæc divina fecunditas, non quæ in creaturas, tanquam exundantis fluminis exigua stilla derivatur, sed quæ alii Personæ, non alii Deo totam imperitur Deitatem. Austam vero, ut par erat, Dei gloriam testatus est & Dominus Christus (a), cum ipso docente in manifesto cepit esse nomen Patris, non illud, ut inquit Augustinus (b), quo vocabatur Deus, sed quo ejus Pater vocabatur. Quod quidem nomen cum nobis significasset, tunc opus suum absolvisse professus est (c). Adeo hanc Paternitatem declarari ipsius divinæ gloriæ intererat, ut mitti inter homines æternum Filium decuerit, vel ut hoc unum ignorare per ipsum liceret nemini. Hoc enim magnum est illud consilium, teste Chrysostomo (d), ad quod aperiendum legatus est ad homines Filius Dei. Magni consilii Angelus, ait ille, dicitur Filius Dei, & aliorum quæ docuit gratia, & principaliter quod Patrem hominibus annuntiavit. Ita etiam sub nostra latitans humanitate, TRINITATIS gloriam amplificavit Filius. Cujus quidem imitatus exemplum, qui vicarias in terris ejus vices geris, eandem gloriam non tueri modo, sed cumulare si fieri potest, niteris, cum TRINITATIS festum diem tua præsentia ornans, iterum omnibus testari videris, quod ipse testatus fuerat. Si quis autem ita esset audax, ut dubicaret, an Christi Vicarium geras Petro successor datus; hoc ejus audaciæ refellendæ satis videretur argumentum, quod TRINITATEM, quam Christus nobis prior prodidit, non profiteris modo, sed publica pompa celebrans, Christi maximum opus, aut instauras, aut persequeris.

O R A -

---

(a) *Evang. Jo. c. 17* (b) *Aug. in Jo. trall. 106.* (c) *Evang. Jo. c. 27.* (d) *Homil. 80. ex 17. Joan.*

## O R A T I O II.

**S**upremo, BEATISSIME PATER, illius Sapientiæ consilio, sine quo factum est nihil (a), ita comparatum est, ut præcipua divinæ largitatis beneficia menti nostræ observari nunquam possent, quin illa etiam ineffabilis, quæ Dei est aliquid supra Deum, TRINITAS personarum occurreret. Totum se, quantus est, Deus nobis tum maxime prodidit, cum dignum se opus hominis muneribus augendi suscepit, ut devinctus tanta beneficentia homo, eum, quem collatis donis optimum fatabatur, maximum satis ipsi soli comprehensa, & percepta natura religiosius coleret. Clarius itaque nunquam unam tribus Personis communem naturam declaravit, quam eum & primo hominem condidit, & eundem rursus per lavacrum regenerationis (b) reparavit. Ultimo enim, ideoque nobilissimo intentus operi, faciamus, ait (c), hominem ad imaginem, & similitudinem nostram. Solitudinem, cæteris, quæ nusquam erant, jussis existere, ut ita dicam, simulavit; hominem vero ex luto excitaturus loquitur ad coopificem Filium, & sanctum Spiritum (d), & Trinum se proficitur. Ita (e) non solum jubentis sermone, sed consilio Sanctissimæ Trinitatis, & opere majestatis divinæ creatus homo, quadam etiam TRINITATIS Imagine honestatus est, ut assiduus in oculis author vel se ipsum respicienti esset. Anima enim præditus, quæ licet unius nature (f), tres tamen in se dignitates habet, idest intellectum, voluntatem, & memoriam, quantum fieri potest, refert ipsam conditoris sui naturam, quæ una cum sit, una tamen hypostasi non circumscribitur. Hoc si (g) cernimus, cernimus TRINITATEM, nondum quidem Deum, sed Imaginem Dei. Attende, & audi, o homo (h), & qui ita conditus es, ut se tibi totum opifex tuus detegeret, tibi clarissimam sui Imaginem inscriberet, bonorem (i) similitudini divinæ nobilitate morum, exercitio virtutum, dignitate meritorum habere contende. Verum quoniam, ubi lapsus est homo (k), deposuit Imaginem Cælestis, sumpsit terrestris effigiem, non minori usus est caritate Deus, ut tantam jacturam repararet, & qui illum ad similitudinem suam (l) in primo Adam mirabiliter condidit, mirabilis in secundo reformavit. Ecce iterum

(a) Joan. 1. (b) Ad Tit. 13. (c) Genes. 1. (d) Chrys. serm. de Trinit. (e) Amb. de dign. cond. hum. cap. 2. (f) Ambros. ibid. cap. 2. (g) August. 14. de Trinit.

(h) Deuter. 27. (i) Amb. de dign. cond. hum. cap. 3. (k) Id. Hezum. lib. 6. cap. 7.

(l) Idem de dig. cond. hum. cap. 3.

rum *Spiritus Domini super aquas* (a). Ecce iterum clarissimo testimonio TRINITATIS nobis mysterium aperitur, dum abluendus Christus *aquas sanctificat* (b), & purificatione sui purificat fluentia illa, quæ tangit, ut *secuturis postmodum populis lavacri gratia ministretur*. Ergo (c) *descendit in aquam Christus, & Spiritus Sanctus, sicut columba descendit*. Pater quoque e Cælo locutus est: *Habes præsentiam TRINITATIS*. Sicut itaque, cum primum e luto fingeret, ita etiam Trinum se planissime significavit, cum iterum non de terra componens (d), sed alio nos elemento, idest per aquarum naturam progengerat. Non alio ideo nomine oportebat nos ad aquas illas admitti, quam in nomine Patris, & Filii, & Spiritus Sancti (e), ut tandem sentiremus, ejusdem esse opus, quod e peccatis possemus emergere, cujus fuerat, quod, qui non eramus, aliquando extiterimus. Sicuti vero, cum primum inter ea, quæ erant, censeri incepimus, præclarissima TRINITATIS imagine ornati sumus; ita cum Cælestibus aquis abluimur, mirabili illo triplici Virtutum dono conformamur (f) TRINITATI. Sic ad eandem imaginem transformamur a claritate in claritatem sicut a Domini spiritu (g). Per Fidem enim, Spem, & Caritatem ultimo fini assequendo optime constituti, quem per Fidem agnoscimus, speramus; agnoscentes, & sperantes diligimus. Triplex itaque virtutum nodus eodem simul una tendentium novam quandam TRINITATIS imaginem in nobis iterum adumbrat. Tantorum igitur beneficiorum memor ea, qua par est, reverentia Augustissimum TRINITATIS Mysterium homo colat, & ab ipsa conditus, ab ipsa reparatus, ejusdem imagine bis donatus, sentiat etiam se triplici nomine illi devinctum. Hujus admonemur in Evangelio, ubi dicitur (h): *Diliges Dominum tuum ex toto corde tuo, ex tota anima tua, ex tota mente tua, idest ex toto intellectu, & ex tota voluntate, & ex tota memoria, ut in quantum intelligitur, diligatur, & quantum diligitur, semper in memoria habeatur*.

## ORA-

(a) Genes. 1. (b) Amb. serm. de Bapt. Domini. (c) Id. de Sacr. Tib. 1. cap. 5.  
 (d) Chrys. hom. ad Baptiz. (e) Matth. 28. (f) De Thom. 3. dist. 13. qu. 1. art. 5.  
 (g) 2. Cor. 3. (h) Amb. de dign. cond. hom. c. 2.



## O R A T I O III.

**I**Nani deterremur metu, BEATISSIME PATER, ne ad divinorum Mysteriorum abditissimos contendamus recessus ineffabile scrutaturi Sanctissimæ TRINITATIS arcam, cum omne genus hominum Deus fecerit, inhabitare super universam faciem terræ, quæ-  
rere Deum, si forte attrectent eum [a], & inveniant. Plenus quidem periculi modus est; ipsa vero supremæ veritatis investigatio necessaria: & qui vetamur plus sapere, quam oportet, sapere ad sobrietatem [b] jubemur. Ideo se nobis Deus videndum nunc dedit per speculum in ænigmate [c], ut spe excitati eo facilius aspi-  
reamus, ubi illum tandem facie ad faciem intueamur. Ipsi autem, super quos signatum est lumen [d] vultus divini, ad Dei imaginem, & similitudinem [e] facti, & speculum sumus, unde imago elucet, & enigma [f], obscura sane, aliqua tamen cum eo, quem referimus, similitudine intercedente. Non una enim ratione TRINITAS increata indidit [g] creaturæ suæ TRINITATIS qualia-  
cunque vestigia, ut per cognitionem nostrum valeamus pervenire [h] ad cognitionem Dei. Quantum namque in cognitione nostrum proficimus, tantum ad cognitionem Dei accedimus. Facti sumus ad TRINITATIS imaginem, qui ab ea facti sumus in animam, iterumque ad similitudinem, qui facti sumus in animam viventem. Illud est sublimissimum naturæ donum, hoc vero sanctissimum præclaræ naturæ opus: veteris illud hominis, hoc novi, qui renovatur in agnitionem [i] secundum imaginem ejus, qui creavit illum. Quod facti simus ad imaginem, ait Damascenus [k], intellectualem ostendit, & liberæ voluntatis, arbitriique potestatem: quod autem ad similitudinem, ostendit per virtutem (quantum homini possibile est) assimilationem. Quid TRINITATIS imaginem alibi quæris, qui eam, quam ipse præfers, ignoras? Audi Bernardum [l]: Mens imago Dei est, in qua sunt tria, idest memoria, intelligentia, & voluntas. Per memoriam [m] Patri similes sumus, per intelligentiam Filio, per voluntatem Spiritui Sancto. Disce tamen, qui ad imaginem TRINITATIS creatus es, jussu quoque te, ei per virtutem, operumque fecunditatem similem fieri. Si enim, inquit Leo [n], creationis nostræ intelligamus exordium,

[a] *Alt. A. 17.* [b] *Ad Rom. 13.* [c] *1. Corinth. 13.* [d] *Psalm. 2.* [e] *Gen. 1.* [f] *Ex Aug. 135. de Trin. c. 8 & 9.* [g] *Ex Fulg. de Trin. c. 7.* [h] *Ex Bern. in medit. c. p. 11.* [i] *Ad Cor. 3.* [k] *Jo. Damasc. Orb. Fid. l. 2. c. 12.* [l] *Bern. in medit. c. 1.* [m] *Ibidem.* [n] *Leo serm. p. de Jesu. dec. mens.*

dium, invenimus hominem ad imaginem Dei conditum, ut imitator sui esset auctoris. Qui igitur facti sumus in animam viventem, secundum interioris hominis trinitatem [a] vivamus, & præclarissimæ naturæ dono ne abutamur, quæ si minus suas [b] exequitur partes, quod reliquum habet natura in nobis totum turbabitur, totum quasi quædam vetustatis operietur rubigine. *Hæc enim trinitas mentis*, Patrum testimonio [c], non propterea Dei imago est, quia sui meminit mens, & intelligit, ac diligit se, sed quia potest etiam meminisse, & intelligere, & amare, a quo facta est. Una hæc ratio carissimis filiis, quæ Dei possint esse imitatores, si ambulent in dilectione [d]. In hac enim & illa duo [e] consequenter intelliguntur, quia nemo diligit, cujus non meminit, & quod penitus nescit. Proh quam facile est, cum in his omnibus certissimas videamus trinitates [f], quia in nobis fiunt, vel in nobis sunt, instructos caritate, & omnibus divitiis [g] plenitudinis intellectus ascendere in agnitionem mysterii Dei Patris, & Christi Jesu. Quisquis ejus meminit [h], eumque intelligit, ac diligit, cum illo est. Nostræ adscribamus cæcitati, quod videntes [i] non videamus, & audientes non intelligamus TRINITATEM, quamvis non longe sit ab unoquoque nostrum [k]. In Patre enim sumus [l], in Filio vivimus, in Spiritu Sancto movemur, & proficimus. Recordemur itaque Patris, in cujus ditione sumus: vivamus in Filio, in Fide viventes [m] Filii Dei, qui dilexit nos, & tradidit semetipsum [n] pro nobis: moveamur in Spiritu Sancto, operante Fide per caritatem [o], quæ diffusa est in cordibus nostris per Spiritum Sanctum, qui datus est nobis. Ita, quod testatur Apostolus, non solum [p] imago Dei erimus, sed & gloria: imago, mente præditi tam sublimi; gloria [q] vero, ei, qua licet, imitatione similes effecti, & de gloria creationis in gloriam justificationis per eandem imaginem [r] transformabimur. Ante omnia autem [s] in nobismetipsis caritatem continuam habeamus. Si enim amor in nobis desideretur [t], totius imaginis notæ mutatæ scilicet erunt.

## ORA-

[a] Ex Aug. de Trin. 1.13. c.20. [b] Ex Bern. serm.83. sup. Cant. [c] Aug. de Trin. 1.14. c.12. Et Ber. in medis. c.p. [d] Ad Ephes.5. [e] Ex Aug. de Trin. lib. 14. cap.14. [f] Ex Aug. de Trin. 1.15. c.6. [g] Ad Colos.2. [h] Ber. medis. c.p. [i] Luca 2. [k] All. Apost. c.17. [l] De Bapt. Christi inter cunct. Cypriano adscripta. [m] Ad Gal.2. [n] Ad Gal.5. [o] Ad Rom.5. [p] 1. ad Corinth. 11. [q] Ex Aug. de Trin. 1.15. c.8. [r] 2. Corinth. 3. [s] p. Petri 4. [t] Ex Greg. Nyss. de bon. episc. c.5.

## O R A T I O IV.

**C**elebratis reparationis humanæ, insidentisque discipulorum vertici Spiritus Sancti mysteriis, non alio, quam eo, quod desuper immittitur, illustrata sapientiæ lumine Ecclesia Mater ineffabilia TRIADIS arcana continenti sacrorum serie colenda proposuit. Cum enim tot extiterint sacrilega Hæreticorum capita, quibus dum sapere plus optant, quam oportet, crux Christi, & Sancti Spiritus missio impiorum fuit errorum occasio; æquum erat, ut postquam & Filium sublatum in crucem, & delapsum in discipulos Spiritum venerati sumus, ejusdem cum Patre naturæ Personas omnes continuo profiteremur. Quod augustius nequaquam fieri poterat, quam si, instituto universæ TRINITATIS cultu, distinctionem Personarum singulis recurrentibus mysteriis confessi, individuum earum solemnibus ceremoniis celebraremus naturam, & qui in cælo apud se unum sunt (a), inoffensa regula veritatis, a nobis tandem non separarentur in terris. Id vero quod fidem firmat, mirum etiam, quam caritatem nostram inflammat. Usurpata enim singulorum beneficiorum memoria, simul universa iterum menti subjiciuntur, ut tantum pietas nostra augeatur, quantum cæteris juncta singula acquirunt magnitudinis. PATREM, FILIUM, & SPIRITUM SANCTUM submisisse vocantibus facile quidem occurrit, quot nominibus obnoxii Deo sumus, cum Patris omnipotentia conditos nos, cum non essemus, forma accepta servi vindicatos a Filio in libertatem captivos, diffusa per Spiritum Sanctum caritate in cordibus nostris impios sanctitate donatos meminimus. Quæ quamquam non fatetur nemo, Ecclesiæ tamen fuit sollicitæ de filiorum erga tantam largitatem animo parentis, rursus velut compendio quodam per unius celebrationem mysterii universa recolenda proponere. Ex quo & illud simul factum est, ut intelligamus, quæ a singulis divinis Personis homini collata sunt, ea nos toti debere Sanctissimæ TRINITATI (b): quæ inseparabiliter operatur. Quis enim ita audax, ut nos dicat soli Patri debere, quod creati sumus? Ipsius quidem, qui principium (c), & origo est substantiæ universorum, asserimus omnipotentiam; sed cum cælos ejus Verbo firmatos (d), & Spiritu oris ejus omnem

Bb

co-

(a) *Max. hom. de exp. Symb.* (b) *Fulg. cons. (iv. Fastid. c. 2.* (c) *Amb. Hex. li. c. 5.*  
(d) *Psal. 33.*

eorum esse virtutem, audimus, uni Deo, TRINITATI augustissimæ, acceptum referendum admonemur, quod nos, quod nobis cætera creavit. An vero reparatus, & e ruinis suis iterum excitatus homo ita unius Filii misericordiæ, qui unus caro factus est, adscribi debeat, ut nulla aspergatur laude universa TRINITAS, a qua (a) facta est illa caro? Gratiæ Filio agendæ, qui obtulit semetipsum (b) pro nobis: agendæ Patri, qui sic dilexit mundum (c), ut Filium suum unigenitum daret, ut verissimum sit, illam incarnationem, & ex Virgine nativitatem (d), in qua Filius intelligitur missus, una eademque operatione Patris, & Filii inseparabiliter esse factam; non utique inde separato Spiritu Sancto, de quo aperte dicitur: inventa est in utero habens de Spiritu Sancto. At cum invisibilis descendit in nos Spiritus ille, qui spectantibus omnibus quondam supra capita discipulorum consedit, mitti a Patre in nomine Filii scimus, & Sanctissima TRINITATE corda nostra inhabitante, nos iustitia augeri, & sanctitate. Non enim fallit is, qui pollicitus est: apud eum veniemus, & mansionem (e) apud eum faciemus. Dum lapides vivi ædificamur (f) in domum spiritalem, per Filium (g) cõdificamur in habitaculum Dei in Spiritu. Sapientissime dictum propterea est (h), sanctam naturalem unitatem, & æqualitatem, & caritatem TRINITATIS, quæ unus solus, & verus est Deus, unanimitate sanctificare, quos adoptat. Publico itaque, solemniq; cultu, statim a celebratis distinctarum Personarum mysteriis, unam eandemque in triplici hypostasi naturam, hoc tamquam symbolo, & tessera contra Fidei hostes usi, dum veneramus, TRINITATEM unum Deum (i), ex quo omnia, per quem omnia, in quo omnia, enixe obtestemur, ut omnes tandem homines velit sibi in Ecclesia magna (k) confiteri.

ORA.

(a) *Fulg. loc. cit. cap. 19.* (b) *Eph. 5.* (c) *Joan. 3.*

(d) *August. de Tr. lib. 2. cap. 5.* (e) *Joan. 14.* (f) *p. Petri 2.*

(g) *Eph. 2.* (h) *Fulgen. ad Moan. lib. 2. cap. 11.* (i) *August. de Doctrina Chr. c. 5.*

(k) *Ex psal. 34.*

## O R A T I O V.

**Q**UAE ab explicando Sanctissimæ TRINITATIS Mysterio deterere debuissent, BEATISSIME PATER, maximum errantis periculum, & maximus investigantis labor, ea animos faciunt, & timidissimum quemque ad orationem hortantur. Cum uno hoc Religionis nostræ summam contineri, eoque cætera Fidei mysteria tamquam fundamento inniti, mecum tacitus confidero, non alicubi periculosius errari, facile intelligo. Dei vero scientiam (a) mirabilem adeo ingenii nostri vires exsuperare, ut nemo ad eam pervenire possit, minime ignorans, fateri ultro cogor, nihil laboriosius quæriri, quam Dei scientiam nostram (b) vincentis naturam. At non alia de causa existimarim, nihil (c) fructuosius hujus tanti mysterii cognitione inveniri, quam quod, nec periculosius alicubi erratur, nec laboriosius aliquid quæratur. Tantum enim errantis periculum hujus mysterii cognoscendi necessitatem: tantus quærentis labor ejus ostendit excellentiam. Quid autem majori cum fructu invenietur, quam id, quod ita magnum, ut inveniri necesse sit, & adeo excellens est, ut latere non debeat? Qui negligens renuit quærere, non, ut par est, de tanta excellentia cogitat: qui laboris impatiens non invenit, ejus plane ignorat necessitatem. Si quæras, periculis quidem occurris, at nisi inveneris, in eum incidisti errorem, quem metuebas. Loquamur igitur nullo timore de Sanctissima TRINITATE, & quod quærentes de illa tandem invenimus, in medium profertamus. Ne vero se existimet nihil invenisse, qui (d) quam sit incomprehensibile, quod requirebat, potuit invenire. Una enim hæc ratio tanti Mysterii citra erroris periculum inveniendi est, cum diu quæsieris, nihil invenisse. Sublimissima veritas, quæ investigantes fugit, credentibus proditur, frustra que intellecturus homo laborat, ipso teste Spiritu Sancto (e), nisi credat. Væ Prophetis (f) insipientibus, qui sequuntur Spiritum suum, & nihil vident. Cælestis Spiritus gratia, ejusque invisibilis unctio docet (g) nos de omnibus, nec aliis dici potest, quod omnia, quæ ad unam in triplici hypostasi naturam pertinent, probe norint, præter illos, quibus vere dici potest, vos unctioem (h) habetis a Sancto. Caligate enim necesse est primum, deinde in errores maximos ruere, qui lucem illam (i)

B b 2

inac-

(a) *Psalm. 138* (b) *Job. 36*. (c) *August. de Trin. l. p. cap. 3.* (d) *August. de Trin. l. 15. cap. 2.* (e) *Isai. 7.* (f) *Ezech. 13.* (g) *Jean. ep. p. cap. 2.* (h) *Ibidem.* (i) *p. Timæ. 6.*

inaccessibilem, ab omni nempe rationis judicio semotam, quam Deus inhabitat, intueri satagentes, id volunt percrutari, quod credere jussus discutere (a) permissum non est. Hebetis ingenii vires confusus noli altum (b) sapere, sed time, ne cum extolli nimium cupis, provolaris in præceps: time, ne cogaris ejus magnitudinem sentire supplicio, quam nulla unquam scientia comprehendens. Dementis est, rationi potius nostræ de Deo, quam ipsi credere, qui nostram nisi intelligentiam vincit, nullus est. Tunc ejus naturam intelligimus, cum intelligi non posse cognoscimus: tunc intelligimus, cum tremebundi ejus nomini procumbimus, ejus numen reveremur. Deum enim aliquatenus, quantus sit potest is cognoscere, (c) qui per Spiritum collatum discit timere. Quid David? Nonne alto defixus timore, & horrore multo correptus clamabat, confitebor tibi (d), quia terribiliter magnificatus es? Quid Seraphin ipsi? Nonne velata facie (e), Dei scilicet non sustinentes aspectum, unam eandemque Trium Personarum sanctitatem fatentur? Jure propterea Petrus, qui ex Trinitatis confessione meritis est Christi Vicarius renunciari, ideo Filii divinitatem cognoscere Apostolos asseruit, quod (f) credebant: & nos credidimus, & cognovimus, quia tu es Christus Filius Dei. Huc igitur spectent quærentium labores, ut nihil invenisse contenti tandem quiescant. Id unum qui de Augustissimo TRINITATIS Mysterio invenerint, id unum qui intellexerint, tota animi securitate confessi sciant, se omne errandi periculum evasisse, magnumque suorum cepisse laborum fructum. Mihi sane absolutissima scientia sit illud Bernardi (g) usurpare: Fidenter dixerim, æternam, beatamque TRINITATEM, quam non intelligo, credo, & Fide teneo, quod non capio mente.

## O R A T I O VI.

**A** Udaciæ plenum opus, BEATISSIME PATER, videri possit de ineffabili TRINITATIS mysterio aliquid fari, & quod intelligentia assequi potest nemo, id verbis velle explicare. Neque illud nobis ore suo detexit Deus, neque Ecclesia colendum proponit solemniter hac die in ejus honorem indicta, ut illud quispiam inani studio scrutari audeat, aut fide mortua tantum, hoc est sine bonis operibus confiteatur; sed ut ejus aliquando videndæ majestatis desiderio omnes inflammemur, quam nec completi verbis, nec ratione

(a) *Ambr. de Fid. ad Grat. l. p. cap. 2.* (b) *ad Rom. 2.* (c) *Tertul. de Trin.*  
 (d) *Psalm. 138.* (e) *Isai 6.* (f) *Joan. 6.* (g) *Ser. 76. in Cant.*

tionem comprehendere satis possumus. Qui enim scimus hanc esse vitam æternam, ut cognoscamus unum verum Deum, & quem misit (a) Jesum Christum, qui novimus, tunc demum beatos nos fore, cum eum facie ad faciem intuebimur, quem nunc videmus per speculum (b) in ænigmate, numquam debemus non eo votis aspirare, & operibus ad eam cumulatissimam felicitatem contendere, quæ ineffabilis æque est, ac Trinitas illa divina, unde emanat. Per fidem itaque ambulemus (c), ut, quia credimus, videre mereamur, atque ad speciem per fidem perductos esse aliquando gaudeamus. Nullus major haberi potest Sanctissimæ Trinitati honor, major nulla laus inveniri, quam si ejus, quo par est, amore capi tandem incipiamus, ac beantis illius faciei desiderio teneri. Perditus ille, qui secus faciens ad eos accedere videtur, qui cum cognovissent Deum (d), non sicut Deum glorificaverunt. Invocemus eum (e), & honorificabimus eum: Patris Omnipotentiam, Sapientiam Filii, Caritatem Spiritus Sancti invocemus, ut unum Deum in Trinitate, & Trinitatem in unitate, Filii scientia illustrati, amore Spiritus accensi cognoscere, & diligere possimus. Quod quidem cum & debitum, & facile est omni tempore, tum hodie potissimum, cum ante ipsam consistere datum est Ecclesiam cum Capite suo visibili hic coactam, tanta confessus majestate, quæ una, si ulla in terris dari potest, qualem qualem Cœlestis aula, cui adsunt Angelorum millia imaginem refert, cum illam Trinitatis aspectu beatam Civitatem adumbrat Jerusalem hæc nova, de Cœlo a Deo ut Sponsa ornata descendens. Sed præter terrenam hanc, corporisque oculis subiectam cœlestium rerum imaginem, quidquid nos ad æternam quærendam felicitatem potest excitare, id omne mentibus nostris felicissima hæc dies exhibet. Colitur Ecclesiæ Matris instituto Sanctissima Trinitas, cujus aspectus una est beatitudinis æternæ ratio: Proponuntur nova, eaque luculenta, infallibili supremi Magistri, ac Doctoris oraculo cœlestes Sanctissimis hominibus honores decernente, virtutum exempla, quæ una sunt consequendæ beatitudinis æternæ via. Quid enim beatam animam faciet (f), nisi meritum suum, & præmium Domini sui? Quale autem requiratur meritum, novorum Sanctorum exempla satis declarant, quale futurum sit præmium, ipso audito Trinitatis augustissimæ nomine facile cognoscimus. Sapientissime propterea ita hæc comparata dicam, ut simul & præmii magnitudo, & meriti facilitas mentibus nostris occurrat. Trinitati exhibitus honor

(a) Joan. 17. (b) Cor. p. c. 13. (c) Aug. l. 14. de Trinitate c. 2. (d) Rom. 1. (e) Psalm. 49. (f) Aug. de Trinit. l. 14. c. 15.

## 198 *Orationes de Sanctissima Trinitate.*

nor id efficit, ut eam aliquando cognoscere, sicuti & (a) cogniti sumus, ardentissime optemus: eorum exempla, quos Cœlitibus adnumerandos accipimus, ut quadam cum ipsis æmulatione excitati, quod desideramus, id assequi conemur. Cum enim elegerit nos Deus in Christo (b), ut essemus sancti, & immaculati in conspectu ipsius in caritate, quis morum sanctitatem servare nolo in terris, quam non adeo difficilem esse, ut prophani jactitant, novis his exemplis docemur, ut aliquando sancti esse in conspectu ipsius Trinitatis velimus, quam confitemur & colimus? Quoniam vero obviam habemus hodie gregem Prophetarum (c) descendantium de excelso, fore speramus, ut insiliat in nos Spiritus Domini, & prophetemus cum eis, & mutemur in viros alios. Faxit itaque Sanctissima Trinitas Sanctorum suorum intercessione, ut eis moribus, eaque simus vita, qua possimus aliquando ejus aspectu beari, & clare ejus facie fruamur, quam modo nec satis oratione explicare, nec perfecte possumus intelligere.

---

(a) *Corint.* p. c. 13. (b) *Ephef.* 1. (c) *1. Reg.* 10.



**ORATIONES  
FUNEBRES.**

1. The first part of the paper is devoted to the study of the properties of the function  $f(x)$  defined by the equation

$$f(x) = \frac{1}{2} \left( f\left(\frac{x}{2}\right) + f\left(\frac{x+1}{2}\right) \right)$$

IN FUNERE  
JOANNIS BAPTISTÆ  
NICOLOSII  
EQUITIS,

*Magni Venetæ Reipublicæ Cancellarii.*

O R A T I O.



**S**I quid pertinet ad præclarissimos viros, qui vita cesserint, honestissimi funeris pompa, Serenissime Princeps, eo rerum, verborumque honore, Joannis Baptistæ Nicolosii Equitis, Magni Reipublicæ Cancellarii exsequias celebramus, ut se uberrimos actæ vitæ fructus consequutum, tantus vir sentire jam possit. Magnificentissimum apparatus, sublimem cænopathii molem, inaximam hanc cereorum funeralium vim, hanc tantam funus prosequentium celebritatem, quin maximam pompæ partem Principem ipsum miretur nemo. Hæc omnia Magno Cancellario, debentur fortunæ potius, quam virtutis argumenta; illud Joanni Baptistæ Nicolosio defertur, quod funestæ familiæ luctus, universæ Reipublicæ dolor, omnium generum, atque ordinum lacrymæ extincto parentant. Quid enim præclarius viro in illustri familia nato, quam non prolatis majorum imaginibus accepti splendoris, sed frequenti posteritate, principis, & alterius ordinis flore, funus non sine lacrymis comitante, fidem fieri ejusdem amplificati? Quid civi maximis, clarissimisque muneribus perfundito ad gloriam uberius, quam amplissimos Magistratus, totumque Senatum funeris mærore bene administratæ reipublicæ testimonium dare? Quid illi splendidius, qui sibi nunquam, sed aliis vixit, quam omnem ætatem, omne genus, omnem ordinem, patronum, parentemque conclamantes, qua funus processit, funeri accedere, ut totius civitatis humeris efferri videatur? Verum hæc omnia ille fortasse negligit nova longe maximæ gloriæ,  
Cc ut

ut fas est credere, possessione audus, cum eadem interim ipsi, quisque secum, quisque cum eo, qui propior est, reputantes, alter alterius invicem dolorem augeamus, neque ullum patiamur unquam memoriam dimittere, quem, quantumque virum amisimus. Inter tot dolendi causas exasperaturum me tam grave omnium vulnus, probe scio, si illi ullam adhibere medicinam vellem. Quamquam quæ inveniri posset leniendi doloris ratio, nisi me prævaricari velitis, qui Magni Cancellarii funus debita laudatione prosequi iussus sum? Etenim cum ipse tanti viri laudes dicere, ejusque virtutes oratione completi aggrediar, novam addere me dolendi causam necesse est, ejus desiderium reficantem. Quoniam itaque fieri non potest, ut, quod maxime vellem, fræna injiciam omnium dolori; quominus novos ipsi stimulos addam, nulla ratione prohibebor, magnique viri ita laudationem instituam, ut omnes intelligere velim, justissimam esse causam dolori suo. Quisque, me dicente, suscepti Joannis Baptistæ Nicolosii interitu damni magnitudinem æstimate. Amisisti, generosa familia, omnium maximum ornamentum; amisisti egregium unice civem, Respublica Serenissima: virum ad omnium utilitatem natum omnes amisimus. Faveo dolori vestro, auditores, dum illi ostendo inesse rationem: faveat dolor vester dicenti paulisper coercitus, & breve silentium largioribus mox lacrymis, & majoribus rependendum gemitibus sui juris jacturam ne credat.

Magnificum quidem initium fumeret oratio mea, si veteri, illustrique prosapia virum laudaturus, eum dicerem, ita clarissimum nomen sustinuisse, ut nunquam vinci rerum gestarum gloria a majoribus suis potuerit. Ampliora tamen mihi de Joanne Baptista Nicolosio dicenda sunt, cujus tanta fuit laus, ut quod nomen clarissimum a majoribus accepit, posteris suis longe clarius reliquerit. Obscuraverat omnino ille, salva pietate, avorum omnium imagines, nisi nova quadam luce conspiciendæ essent, postquam non ex avis nepos, sed ex tanto nepote incipient avi, atavique omnes nominari, sive qui Venetiis, sive qui Patavii floruerent. Patavio enim, ubi inter nobiliores, & vetustiores censebatur, huc Nicolosii gentis pars tribus abhinc sæculis commigravit, quæ statim ad rempublicam admota est, atque in eum clarissimum ordinem cooptata, cui uni secretiora consilia respublica credit, & mandat perficienda. Cum vero huic ordini adscripti Nicolosii egregiam reipublicæ operam domi navarent, qui Patavii in veteri majorum sede subsisterant, eorum exemplo accensi sunt ad paria fidei, caritatisque in Principem argumenta militiæ prodenda. Sæculum exhibat, quo Joannes Nicolosius primum, mox Nicolaus filius Veneti Senatus arcanis

con.

consiliis interfuerant, mire Patribus uterque carus, cum Sebastianus Nicolosius inter centum illos genere nobiles, impigros animo juvenes, Patavinæ civitatis decreto Venetis copiis auxilium bello Cyprio mittendos, ut conscriberetur, rogavit, vorique compos pro Famaugustæ muris fortiter pugnans mortem oppetiit honestissimam. Hæc tanta virtus ita Nicolosios conciliavit Patavinis, ut haud ita multis ab hinc annis extinctæ, quæ apud ipsos magno in honore fuerat, familiæ damna reparaturi, alteri huic gentis ramo, qui altas jecerat Venetiis radices, Patavinæ nobilitatis jura iterum ultro restituerint, magnum civitati suæ ornamentum accessurum rati, si ex suis essent, qui in summa hac republica versarentur consiliorum omnium participes, & gravissimis rebus præpositi. Quamvis autem tam claræ imagines posteros facile oneraturæ viderentur, ea tamen extitit semper apud minores virtus, ut majorum gloria minime contenti eam ad nepotes cumulationem transmittere conati sint. Ne vetustiora persequar, quis nostrum quatuor magno animo, magno ingenio, magna industria fratres miratus non est, Nicolosii, ac Verdizzoti generis, quo nomine jam inter patricios illustri erat mater, gloriam amplificare simul aggressos? Singulis vero Cancellariæ adscriptis, quæ una est alterius ordinis civibus accedendi ad rempublicam via, cum eadem omnibus eundem esset, timor omnibus fuit, ne in honorum curriculo alter alteri esset impedimento. Hoc primum fuit inter ipsos virtutis certamen, quo quisque vinci cupiebat, donec cæteri Angelo natu maximo velut decedentes, ultroque gloriæ, quam sibi præripere poterant, spem abdicantes ita inter se compararunt, ut se totum ille reipublicæ dederet, suæque ac familiæ laudi potissimum serviret. Cessit hoc tamen aliquando in maximam gloriæ segetem Joanni Baptistæ, qui parum putasset majores omnes, in quibus magnum paterno, maternoque generi decus fuit, vincere, nisi & fratrem vincere sibi proposuisset, quem non fuisset nemini extrema laus exæquare. Deteruisse profecto alium quemvis poterat a capessenda republica Angelus ordinis sui præclarissimum lumen, universo Senatui, ac præcipuè excelso X-Virum capitalium collegio, supremoque III-Virum optimo civitatis statui tuendo præpositorum tribunali unice probatus, cujus sanctioribus, ac secretioribus consiliis per duos & quadraginta annos adfuit, summa fide, summa in agendo dexteritate, summa in promovendis negotiis prudentia. Hic, qui inter Veneti Archicancellariatus candidatos paucissimis punctis superatus aliquando ab illustri competitore fuerat, visus erat Nicolosiam familiam eo provexisse, ut nulli esset sui ordinis secunda. Verum, eo extincto, Joannes Baptista, qui magnam sui expectationem

aliis muneribus præpositus jam excitaverat, caput enixius honorum culmen appetere, brevique eo pervenit, ut jam maximus familiæ splendor unus sit, majoresque omnes, ac fratrem post se longo intervallo reliquerit. X. Virum enim collegio arcanis excipiendis datus, per decennium ita difficillimam provinciam obtinuit, ut cumulum tot in rempublicam officiis addidisse visus, præclarissimam Magni Cancellarii dignitatem, insignibus, & honorificis titulis satis illustrem, & equestri magis auctam gradu tandem in veterem familiam attulerit. Antiquiora propterea æque, ac recentia ornamenta in posterum Nicolosii minime jacent: quam imaginem ostentent, ea sit Joannis Baptistæ: hic unus dignitatis, nobilitatisque auctor prædicetur: hic equestri torque, hic Magni Cancellarii purpura familiam unus honestasse memoretur. Quam vobis itaque justa est dolendi causa, Joannis Baptistæ, Constantine, frater, Joannes, & Angele, Bernardi alterius fratris filii, tanto amisso familiæ vestræ ornamento? Aspectu venerabilis senis recreari non amplius licet, non amplius in ejus ore, verbisque conquiescere. Unius mors solitudinem in vestra domo fecisse vobis videtur, gloriamque totius gentis extinxisse, postquam illud invidit familiæ lumen, unde tantus omnibus splendor. Minus tamen dolendum putaretis, si privatim tantum dolendum esset; publice egregii civis morte vobis præcipue dolendum est, quos idem exemplo suo, suisque hortationibus ad patriæ caritatem mirifice finxit.

Magnum est, quod dico: per annos unum & sexaginta egregia Joannis Baptistæ Nicolosii opera usa respublica ejus tamen nuper extincti non affligiari desiderio non potest. O maximum sane virum nunquam agendo defatigatum, cujus mors seni perquam matura, adhuc reipublicæ immatura est! Plurimos novimus, qui urbanarum curarum fastidio reipublicæ administratione sponte dimissa in literis, aliave otii oblectatione intra privatos parietes senescere maluerunt, nonnullos etiam, quibus non petentibus ob eam, quam nimia assiduitas asferre solet in oculis semper viventium satietatem, a reipublicæ administratione velut honesta missio concessa est. Nicolosius Joannes Baptista unus fuit, quem ab ineunte adolescentia ad gravissimam senectutem nunquam pertæsum est reipublicæ, cujus nunquam rempublicam pertæsum est. Ejusne amorem in patriam mirer, an in rebus agendis solertiam? Supra fidem ille, qui effecit, ut nulla res eum a republica divellere posset; hæc supra modum, qua factum est, ut nunquam illum a se dimittere respublica voluerit. Urbanis plerumque muneribus præfectus, cum amplissimis primum magistratibus, universo deinde Senatui, mox gravissimo X. Virum collegio,

legio, quæ sui ordinis, ac muneris erant, omnia officia præstitisset, quamvis publicas ædes, comitium, curiam per tot annos quotidie premeret, Principis Solio, Senatorum subsellis, maximorum judicium tribunali quotidie adesset; ipsa in dies gratior assiduitate, eoque majori apud omnes gratia, quo magis hæc in oculis posita erat, honorum curriculo confecto, majoribus comitiis, maximo omnium favore, & consensu Magnus Cancellarius renuntiatus est. Subeat quæso recordatio, quem habuit in dignitatis petitione competitorum, clarissimum virum scilicet, optime eundem de republica meritum civem, qui obeundis publicis negotiis apud maximos Europæ Reges, & Respublicas diu, ac sæpe Venetiis absuerat. Qui tunc fuerit civitatis sensus, quam suspensi animi, cum utriusque par esset in rempublicam meritum, multa, & magna utriusque in Principem officia, probe meministis. Hujusmodi autem erat omnium sermo: ut nihil unquam offenderit apud ullum Nicolosius, incertum, an sui fastidium, satietatemque superaverit. Nimius fuit in oculis omnium: multa petiit, plurima adeptus est: sæpe suffragia sibi eblanditus, sæpius aliis. Maximorum, quos pro republica suscepit, laborum testes sunt oculi nostri, at testes etiam collatorum honorum. Gravior ille solet oculis esse, cui minus assueverunt. Prælatum nihilo minus alteri est Nicolosius, & quod optime etiam de republica merito fore credidimus, ut obesset, id illi potissimum profuit assiduum in omnium oculis fuisse. Tanta ejus fides, tantus in patriam amor, tanta in obeundis muneribus solertia, & vigilantia, ut plus ad conciliandam omnium gratiam operæ assiduitas, quam frequens oculorum consuetudo ad satietatem afferendam potuerit. Joannes Baptista autem Nicolosius, cum primum Archicancellarius designatus est, non honoris fine amplissimam dignitatem æstimavit, sed eo lætissimus inivit, quod nullis temporibus circumscripta, nec nisi cum vita dimittenda, non alium quoque agendi, præstandæque Principi operæ finem faciebat, quam vitæ. Hanc diligentæ conscientia illi securitatem pepererat, ne, quam in oculis habitans gloriam consequutus fuerat, vel si æternum habitare pergeret, amisurum se unquam, dubitaret. Ut vitæ satietatis, quam effugere ne clarissimi quidem viri aliquando potuerunt, laus major appareat, artificiose præterire me fortasse creditis, quod non domi solum, sed peregre etiam gravissimarum rerum procuracionem suscepit. Atqui non ego ita sum insipiens, ut hac eum nova laudis messe fraudatum velim. Desiderarunt aliquando oculi nostri Joannem Baptistam Nicolosium, sed ut ad ejus gloriam uberrimum fuit, quod carissimi civis aspectu, quem alio ad maximarum rerum momenta curanda proficisci jusserrat,

rat, patria nonnunquam caruerit; ita ad sui fastidium declinandum, si ab hoc metuisset, parum illi fuisset breve patriæ desiderium futurum. Numquam opus fuit, gloriam, quam sibi domi Nicolosius peperit, ab ea, quam foris collegit, sustentari, atque defendi: utraque se ipsa tuetur, neque altera alterius indiget ope, ne intereat. Mitto illud, quod bello Cretico, ut viam sibi ad munera honestissima muniret, honorum velut tirocinium in navi prætoria posuit supremi rei maritimæ Præfeti a secretioribus epistolis; postquam in patriam rediit, ita cæpit in hac reipublicæ luce versari, ut semel, atque iterum dumtaxat a curia gravissima negotia abstraxerint. Cum Serenissimus Franciscus Maurocenus quarto classi cum summo imperio præfectus esset; in Turcas proficiscentis Principis iter, quod nostris temporibus novum, & a priscis tantum reipublicæ sæculis repetitum, ut splendidius redderent Patres, novam etiam ipsius ministerio instituendam decreverunt dignitatem, novæ autem dignitati ornandæ inventus est Joannes Baptista Nicolosius, & Magno Pro-Cancellario (hoc novæ dignitati nomen inditum, quod in omen maximæ sui ordinis dignitatis illi aliquando conferendæ statim acceptum) jussus paludatum Principem sequi. Quantæ fuit gloriæ, quod ille potissimum delectus sit, qui ejus expeditionis non ultima pars esset, cujus nunquam memoria interibit, qui ducem suæ ætatis clarissimum haud impar minister sequeretur, cujus litteris nunciari tantum Senatui possent, quæ factis paria facturum Principem nostrum sperabamus. Excusasset nihilominus ille facile navigationis incommoda, valetudinem excusasset, nisi patriæ caritas sui, suorumque amorem vicisset, & ut patria carere vellet, patria ipsa effecisset. Magnum sane fuit, virum togæ, urbiq; assuetum maris, martisque alex committi, id præcipue munus obiturum, qui nulla ex bellico pulvere gloria colligenda promittitur, omnia belli pericula denunciantur. Fortitudinis laudem Joanni Baptistæ Nicolosio, nemo est, qui tribuat: fortissimum tamen ipse prædicabo, cui non ad pulcræ mortem animus, sed occasio, ac reipublicæ imperium defuit, cum quæ urbis sunt officia, quæ inter pacis otia discimus, inter pacis otia exercemus, ea inter armorum strepitus præstaret fortissimo Duci, ad omnia maris discrimina, bellorumque casus satis impavidus. Abrepto fatorum importunitate Principe, cum statim abdicasset Nicolosius honorem, quem post ipsum nemo sumeret, sospes ad patriæ rediit amplexus. Illuxit deinde spes pacis: iter terra ingredi tunc jussus est Joannes Baptista, Viennamque viro genere, & virtute clarissimo reipublicæ Oratori Senatus mandata deferre, Viennæque deinde cum eodem ad Hungariæ fines, ubi fœdera-



derati omnes ad pacis conditiones viſtis dicendas convenerant, proficiſci, unusque eſſe, cui ſecretiora conſilia crederentur. Suam ad omnia dexteritatem, acce ingenium, neque hebetiorem linguam amicorum, hoſtiumque oratoribus facile ille probavit, Veneto vero, atque adeo univerſam reipublicæ impigram etiam operam, & ſummam fidem. Hæ viri tantæ virtutes, hi ſuſcepti pro republica labores, hic tantus in patriam amor, quo graviffimo in ejus morte vulnerẽ porcuſſa reſpublica ſit, ſatis declarant: hæ efficiunt, ut quamvis illo per longum tempus uſa ſit, virum tamen reſpublica adhuc deſideret, qui difficillimis temporibus, ſi opus eſſet, ac Senatus juberet, Magnus Cancellarius, non inaudito exemplo, vel his effætis viribus, & ætate inter Turcas publicis rebus agendis verſaturus eſſet. Quoniam vero licet nemini eſſe immortalĩ, ita doleat reſpublica ipſum abreptum, ut plures eſſe gaudeat, quos illi ſufficere poſſit egregiam æque operam navaturos. Sed recentem adhuc dolorem lenire temere contendimus, cum publicum luctum augment lacrymæ ſingulorum, ut ſi nullus eſſet publici vulneris ſenſus, adhuc, dum ſuo quiſque privatim dolet, univerſam affligi rempublicam, necelle ſit.

Ea enim in ſingulos comitate, ea beneficentia fuit Joannes Baptiſta Nicolofius, ut non ſibi, ſed aliis natus videretur. Graviffimis quamvis ſemper negotiis implicitus, publiciſque curis in varia diſtractus, numquam tamen adcurrentibus difficilis, omnes complexus eſt, ut vacare crederes, cum tam multi propter ejus apud ampliſſimos magiſtratus auctoritatem ad illum sæpe confugerent. Ecquando neceſſariis officiis erga patricium diligenter obſervatum ordinem deſuit? Plurimas licet ex patriciis familiis, eaſque clariffimas paterno, maternoque genere complecteretur Nicolofius; ita ſemper ampliſſimum ordinem coluit, ita obſervavit, ut non ſuarum neceſſitudinum rationem haberet, ſed ipſius dignitatem, majeltatemque ſuſpiceret, nihilque ex tot, tamque claris propinquitatibus ſibi ſumeret, niſi ut ſe pluribus, & arduioribus vinculis reipublicæ obſtrictum crederet. Quem vero ſe erga honeſtiſſimos ſui ordinis homines præſtitit? Quem eorum conſilio, opera deſtituit? Tam illi omnes carum, quam ille omnibus. Cum ex iis, qui nondum ad ſecretiora cancellariæ munera admiſſi, deligeret Magnus Cancellarius adoleſcentiores, qui ſenatoriis Magiſtratibus operam præſtarent, eorumque eſſent a ſecretis, cui unquam vel viribus graviorem provinciam, vel minorem viribus dedit? cui non eam, quæ eſſe poſſet quam latiffima ad gloriam captandam, ad Patrum gratiam ineundam via? cui non eam, quam ſibi quiſque petiſſet, ſi peti a ſe quidquam Nicolofius, quam ultro

ultra ipse largiri maluisset? Qui animus semper ipsi erga bonos omnes, ut a se nunquam opem implorari passus sit, cum tam multis quotidie ferret. Sed hac tanta beneficentia non homines solum, verum etiam ipsa urbis tecta visus est, sensusque expertia ædificia completi. Etenim cum nulla sit vis, quæ satis hæc contra temporis injurias tueri possit, qua ratione tamen sisteret ipse futuras eorum ruinas, secum agitans, sacras, prophanasque ædes, & maximi pretii tabulas, quarum tanta apud nos copia, statuit chalcographiæ opera in æs incisas ab interitus metu vindicare. Hoc primum ille privatim apud se fieri curaverat, conductis artificibus, magnisque impendiis factis, verum cum initum consilium lentius procederet, nec gravioribus ipse occupatus curis omnes ad id cogitationes conferre posset; homini industrio auctor fuit unus, ut opus perficiendum suscipere vellet, & publici juris facere. Stabunt igitur vel post ruinas sublimia hujus urbis tecta Nicolosii beneficio, nec sedibus suis avulsa, ubique gentium tamen conspicientur, benefactorisque sui nomen nullis nec temporum unquam, nec locorum angustiis sinent includi. Quam vero majorem gratiam inanima ædificia non possunt, habeamus nos, quicumque natale solum amamus, habeant exteri, qui magnificentissimorum operum aspectu domi suæ frui poterunt, habeat universa, quam late patet, graphice, quæ hinc mirifice proficiet, & propagabitur. Sed inferiores artes licet æquum sit Joanni Baptistæ gratiam habere, hanc tamen eas reposcere, liceat nemini. Quid enim interest, vultus lineamenta, & canitie verendum caput in æs incisum, aut coloribus expressum posteris tradere? Vos alumnæ, benefactorique vestro, vos gratiam refertæ, Musæ, & monumentum ære perennius, rerum gestarum memoriam ad posteros transmittite. Multa ille quidem vobis debuit, unde ipsi tanta in dicendo facundia, tam sublimis in scribendo perspicuitas, unde tot animo virtutes, tanta nomini suo claritas, pluris ea tamen adhuc sunt, quæ vobis contulit, decus scilicet, & præsidium. Meministis, cum amplissimis Lycei Patavini Moderatoribus, rei literariæ III-Viris adestet, adfuit autem per plures annos, qui ejus in adolescentium studiis promovendis labor, quæ in ornandis professoribus cura, qui in utrosque favor, quæ voluntas. Ad eum sæpe confugisse vos, meministis, nec per alium quemquam commendari tutoribus, ac patronis vestris, præstantissimis Senatoribus, voluisse. Aut nimis ego litterarum, earumque studioforum malis afficior, aut verissimum est, Joanne Baptista Nicolosio e vivis sublato, non minus detrimenti rem litterariam accepisse, quam omnes hujus civitatis ordines, imo collecta simul omnium damna Musas sentire, quæ lacrymas a

fin.

singulis ordinibus divisa exprimunt. Observantissimum sui, & ad omnia officia promptum amisit, Nicolosio extincto, patricius ordo? eum amiserunt Musæ, qui eas colebat summo studio, ac venerabatur. Lumen suum, atque ornamentum, exemplumque ad imitandum propositum amisit alter egregius Civium ordo? decus, & lumen suum amiserunt Musæ, eumque, qui suo exemplo omnes ad literarum amorem accenderet. Perfugium boni omnes amiserunt? perfugium etiam, suamque aram Musæ, quo se, si qua ingrueret calamitas, tutæ, lætæque reciperent. Qui autem nullis palam deerat erga Musas officiis, quomodo illas secreto haberet, accipite, auditores. Intra Nicolosias ædes magnificum ipsis cubiculum dicaverat, quo illas a gravissimis curis vacuus ad aliquam otii oblectationem quærendam remotis arbitris adiret. Cum vero solidam ferme diem respublica sibi posceret; noctis tantummodo spatium sibi reliquum, ad corporis, animique levamentum intelligens, ibidem & lectum sternendum, & instructissimam bibliothecam parandam curavit. Candidissima totum obeunt holoserica, armaria autem, abaci, librorum thecæ, trapezophora, sellæ, fulcralia, universa demum, si ve quæ ad usum, si ve quæ ad ornamentum supellex, omnia miro artificio scilicet margaritarum conchis variegata, emblematis distincta, & tenuissimis earundem concharum segmentis vermiculata. Quamquam totus hic studii & literis honor; hac tamen ratione domo ornari Dominus potest, postquam tanta ejus magnificentia domus ornata est. Quid huc Curios vocas, in (a) quorum domo nihil splendidum, nihil ornatum fuit præter ipsos? Majus aliquid est splendidissima domo splendidior Dominus. Cui enim hætenus licuit in tam egregio opere aut materiæ, aut manus pretium mirari, cum inter tot visu jucundissima unus omnium oculos, omnium admirationem eo oris habitu, ea comitate, & humanitate, ea suavissima sermonis gravitate Dominus in se averteret, ut omnium animos magna jucunditate defixos detineret? Haud sæpe tamen facta alicui est huc ejus conveniendi copia, quo sese a reipublicæ pulcherrimis muneribus requiescens abdebat, non ut aliquando solus esset, sed ut ne unquam soli liceret illi esse, & otioso, neque ut homines exosus eorum tædio solitudinem capraret, sed ut in solitudine tempora omnia, regiones, universa rerum naturæ opera peragraret, aliquando etiam constitutis a natura rerum finibus egrederetur. Neque enim ille æmærioribus solum litteris oblectatus, sed severioribus etiam philosophicis, ac mathematicis disciplinis eo jucundius operam dabat, quod

D d

inge-

(2) Cicero parad. 3.

ingenii sui conscium ipsa indoles animi ad altiora, & magis imper-  
via ducebat. O virum non negotio tantum, sed & otio prædican-  
dum! O haud sibi unquam absumilem Joannem Baptistam Nicoloso-  
sum, aut aliis, aut sibi viveret? Quamquam vel tum maxime aliis  
vixisse, cum sibi vivere videbatur, satis constabit, si lucem unquam  
aspicient otii opera illa, illarum maximarum rerum commentationes,  
quas non contentus cogitando consequi, litteris etiam mandabat.  
Adeo subcissiva, si qua incurrebant, tempora non modo sibi, sed ne  
nobis quidem perire patiebatur, ut, cum vacare credebamus, non  
suarum tantum ipse, sed futurarum etiam ætatis bono consuleret, neque  
alia de causa solitudinem quæreretur, nisi ut inde ea prodirent aliquan-  
do munera, quæ non suis civibus solum, verum etiam exteris qui-  
busque gentibus prodesse.

Sed progredi ultra non possum, auditores, & dum publica, pri-  
vataque damna & cogitatione complector, & verbis æquare contendo;  
pro vestro omnium dolore ita haud possum dicere, ut diutius  
ipse lachrymas teneam, quas mihi, Præclarissima Familia, Respu-  
blica Serenissima, omnes civitatis ordines, excutit vester fletus. Ve-  
rum id timeo, ne tanto nomini injuria fiat, si ultra flere velimus:  
invidere illius bonis videbimur, si diutius nostra mala reputare, ob-  
stinemus animum. Quod vidimus, omnes flere, quod audivimus,  
omnibus iustissimam esse dolendi causam, omnes jam debemus fletus  
abstergere, & dolorem tandem sedare. Quantus vir fato cesserit, ex  
omnium lachrymis cognoscimus: magnum virum offendimus, si  
mortuum dolemus. Dolendum est eorum morte, qui cum nihil  
egregie fecerint, toti moriuntur, quorum nomen simul cum corpo-  
re interiit. Superstes morti suæ Joannes Baptista Nicolosius, Eques,  
Magnus Venetæ Reipublicæ Cancellarius non aliter efferendus est,  
quam si triumphantem prosequeremur. Immortalitatem nominis,  
quam sibi meritus est tot virtutibus, tam egregia in patriam opera,  
tam sublimi dignitate, inire nunquam poterat, nisi moreretur. Li-  
cuit antiquissimo Poetæ (a) dicere:

*Nemo me lachrymis decoret, nec funera fletu*

*Faxit. Cur? volito vivu' per ora Virum;*

illi prohibere a funere suo lachrymas non licebit, cujus imago Ma-  
gni Cancellarii purpure insignis nunquam obscurabitur, cujus nomen  
tot virtutibus illustre nulla ætate delebitur, cujus memoria, tot tan-  
tisque rebus præclare gestis æternitati commendata nunquam interi-  
bit? Pensanda sunt damna nostra ejus bono, nec dolendum magis,  
quod

---

(a) Ennius.

quod nos orbat tanto viro sumus, quam leniendus dolor, quod ille immortalitate auctus est. Quamquam si mentis aciem, quam recens dolor hebetat, acrius intendimus; majora in speciem damna, quam re, querimus. Neque enim ille familiæ suæ nobilissimæ totus occidit, cujus imago excitandis ad imitationem posteris religiose servata ad majorum simul, nepotumque decus ostendetur. Non totus reipublicæ, non totus ulli occidit, cum in ornatissimo fratre, in lectissimis fratris filiis superet adhuc, quibus eundem amorem in patriam, eandem in bonos omnes voluntatem ipse suo indidit exemplo, easdem animi, ingenique vires natura largita est. Venerabili seni honestam a gravissimis curis missionem illi tandem natura debitam si gratulandum non ducimus, ac saltem mortem non immaturam seni, magno viro non exitialem æquo animo feramus.

# IN FUNERE CLETI CASPII

ABBATIS S. GEORGII MAJORIS

*Congregationis Casinensis .*

O R A T I O .

**Q**UAE oratorem erigere , animumque addere dicenti solet , frequentissima præstantissimorum virorum corona , hodierna luce ea me apud vos , Patres Religiosissimi , dicturum ita vehementer perturbat , ut si maxime velim , non timere tamen minime possim . Præterquam quod enim intelligo , quam difficile sit , vobis probabilem ullum oratorem videri , qui omni litterarum genere optime exculti germanam eloquentiam cum vera sapientia conjungitis ; in eo est mihi argumento versandum , in quo ne disertissimus quidem vobis satis probari forsitan possit . Dicendum est enim de laudibus Reverendissimi Præsulis Cleti Caspii , hujus præclarissimi Cœnobii Abbatis , cui iusta persolvimus , ac apud vos dicendum , qui ejus virtutes longa consuetudine sæpius inspectas , & singulas admirati estis , & totas æstimare facile potuistis . Vel aliquid igitur præteribo , quod in maxima optime factorum copia facillimum , & tamquam malignus dissimulator vix effugiam invidiam vestram , qui singula meministis , vel omnia raptim exponam , quod in tanta copia necessum est , & impar suscepto oneri vobis videbor , qui eadem mutuis inter vos sermonibus sæpius usurpata , veris laudibus exæquare consuevistis . Accedit quod vestro isto fletu non affici ipse quoque non possum , consternatque me tantus iste mœror , quo amissum parentem optimum doletis . Fingere itaque animo mihi liceat , non vobis , sed Cleto Caspio probanda esse , quæ de ipso dicam . Hæc una forte ratio est , qua vobis , placere possim , si persuasum vobis sit , suavissimum parentem , ac maxime per totam vitam observatum Præsulem , si mihi obtigisset apud viventem dicere , id laudationis meæ genus æquis auribus , animoque accepturum fuisse . Nihil itaque modo de extincto dicam , quod sine gularis viventis Præsulis pudor gravari tunc potuisset , & cum nimium

ne

ne sim, ac ne quid affectatius quæsiisse videar, animum dumtaxat advertero, hanc percusso malis vestris animo veniam peto, ut cætera, quæ artis sunt, dicendorum partitionem, respondentem ordinem, exornationem magnificam negligere liceat.

Cum plurima sunt, quibus inter se bene constituta civitas, ac optimis legibus firmata religiosorum virorum familia conveniunt, cum id præcipue, quod sicut in civitate aliis privati homines, aliis magistratus, ita in religiosa familia aliis moderatores, aliis reliquus cæteris virtutibus indigent. Ita enim varia sunt utrorumque officia, ut, quamvis satis sit cæteris bonis esse, moderatores dumtaxat bonos ne bonos quidem ducamus. Nihilominus hoc longa experientia compertum est, qui egregia cum laude sibi aliquando vixit, eo aliis vivere, ac præesse cæteris melius neminem. Sinite igitur, missa ea omnia faciam, quæ inferioris adhuc subsellii Cænobita gessit Cletus Caspius, seu anxiiis implicitus curis modo hujus cænobii res curaret, modo amplissimo cænobii Præfuli ipsius ab epistolis suam præstaret sedulitatem, seu curis omnibus solutus monastico hoc in secessu ita lateret, ut ipsi cum Cœlicibus solum commercium esset. Nullas ei tunc laudes defuisse, intelligunt omnes, cum nullis ajo, virtutibus eum caruisse, quæ ab optimo Monachorum moderatore expetuntur. Qui optima aliorum regendorum auctoritate usus est, hunc necesse est, regendi sui potestatem alteri prius totam tradidisse: qui commisso sibi gregi carus fuit, hic carus æque Pastoribus antea non fuisset non potuit: qui nunquam est publicis curis defatigatus, hunc ne privatæ quidem fregerunt unquam, aut debilitarunt. Nihil itaque debuit collatæ dignitati Caspius, nisi quod illa, quantus esset, clarior ostendit.

Neque enim virtutum fastigium subito ascensu tenere potuit, cum ad summum honoris gradum evehctus est: eo jam olim nixus, per arduam, & impeditam vepribus semitam longo labore pervenerat. Una enim fuit Caspio via (quæ autem alia esse potest in Casinensi tam bene temperata Congregatione?) ad dignitates virtus, quæ jam ab ejus adolescentia ita inclaruerat, ut nunquam annalis legis terminos prætergressæ illæ sint, aliquando etiam, soluto eo legibus, præverterint. Illis autem viris sapientissimis, qui minores, majoresque honorum gradus Cleto detulere, ita facile fuit animo præsumere, quantus esset ipse in honoribus futurus, quemadmodum nobis modo conjectura assequi, quantus ante delatos honores fuerit. Tenebant enim illi, sicut nos quoque nuper tenebamus, quam non fucatæ, quam solidæ essent ejus virtutes, quippe quæ veræ in Deum caritati, quæ omnium fundamentum est, innitebantur. A primo enim ejus in præclarissimam hanc

hanc Religionem ingressu usque ad vitæ exitum constantem hunc vitæ tenorem servavit, ut nihil antiquius duceret, quam nullius rei sibi conscium esse, nihil ageret, quin severiora evangelii, ac benedictinarum legum monita consuleret. Orationi vero, qua una alitur animus, & spiritalis vita sustentatur, ita deditus fuit, ut nihil mirum sit, cum numquam Deo mente non adhæreret, nullum fere unquam ipsi nisi de Deo sermonem, nullam illi aliarum rerum curam fuisse.

Singularis autem ejus in Deum pietas ea sollicitudine præsertim enituit, qua templa, quæ manifeste Deus insidet, non nitere solum, sed magnificentissime ornari semper optavit. Nullum est cœnobium, cui præfuit, ejus sacra supellex ejus cura aucta non sit; hoc vero, parvo etiam illo ære, si quod ejus usui indultum fuit, cum bona eorum, ad quos spectat, venia pro viribus locupletavit. Nimirum quid Deo non daret, qui se totum illi dederat? Cur autem hoc præcipue templum non ornandum curaret, ubi se nuncupatis votis Deo primum addixerat? Multa sunt, quæ huic Cœnobio beneficia Caspius contulit, quæ ejus memoriam nunquam interire sinent, sed pulcrum est, eum id cavisse, ut rem divinam tractantibus ejus memoria præcipue occurreret. Vos alia monumenta ex ære, aut marmore ejus nomini excitabitis, quæ illi erunt perhonorifica; ipse non aliud vobis relinquere studuit, quam quod vobis esset in primis utile. Noluit vos posse Caspii meminisse, nisi statim divina menti obversarentur. Latifundia alius protulerit, magnifica peristyllia erexerit, bibliothecas instruxerit, Caspius sacram supellectilem auxit. Non damnandi illi quidem, sed magis laudandus Caspius, quod sanctiorem sumptum in ipso Dei sinu, ut ita dicam, collocavit. Id genus monumenta minus quidem, quam cætera conspicua, cum non semper patere soleant, sed ideo & Deo gratiora, & Caspio, qui Deo soli placere optaverat, & cui satis fuit, si alumni sui ad aram litantes ejus meminissent. Sed quamquam nullum oculis vestris monumentum sui reliquisset, remaneret tamen ad omnes virtutum studio inflammandos inixa omnium animis ejus pietatis memoria, quæ eo magis per totam vitam eluxit, quo magis eam ipse tegere conatus est.

Hac vero cum virtutis indole statim ac Abbas renunciatus est, dubium fuit nemini, quantum ipse honori decus additurus, ac quantum, eo Abbate, res monastica incrementum acceptura esset. Itaque certatim singula cœnobio optare, ut, sibi moderator daretur, idque ab ipso, id ab universa Congregatione enixe petere cœpere. Primum tamen visum est iis qui ad clavum sedebant, cum Cœnobio San-



Sancti Andreæ de Busco præficere , cujus regiminis legitimo confecto curriculo , eoque cum magno Monachorum mœrore dimisso , insigne hoc Sancti Georgii Majoris monasterium gubernandum suscepit. Diligebat ille quidem præ cæteris , ac maximo in honore habebat cœnobium hoc , cum ob debitam alumni caritatem , tum præsertim ob eximiam ipsius dignitatem , qua præclarissimorum nulli concedit . In amœnissima enim hac suburbana insula Venetorum Principum munificentia extructum , & egregiis prædiis dotatum , & totius terrarum orbis præstantissimam urbem ob oculos habet , & est ipsum in tantæ urbis , totiusque tantæ Reipublicæ oculis . Quamquam nec loci natura , neque ædium magnifica , magnificentiori templi substructio , ac medio in salo viuentes horti tam movebant Cletum , ac delectabant , quam magnorum virorum recordatio , ac numquam delenda tot patricii generis hominum , ac plurium tantæ hujus Reipublicæ Principum vestigia , qui huc terrenis omnibus abdicatis secesserunt , præcipue vero late diffusus sanctimoniæ odor , quæ per Beatum Joannem Maurocenum investa , a Sancto Gerardo Sagredo diligentissime exculta , per tot sæcula ceu recens nata numquam non floruit . Hic propterea optarat Cletus post regiminis exitum , brevi cellula sibi parata , uni huic curæ vacare , ut curis solutus Deo interserviret . Paruit tamen , cum alia esset Congregationis mens , quæ indefessi , ac vigilantissimi Præfulis operam efflagitabat , atque ad Bergomenses Monachos Sancti Jacobi de Pontida regendos profectus est . Illinc iterum ad hujus San-georgiani cœnobii gubernacula , manifesto numinis consilio , ut quando illi erat publicis curis immoriendum , optatamque quietem illi virtus sua invidebat , in patrio solo , ubi naturæ , atque in eo cœnobio , ubi Deo vivere inceperat , moreretur .

Optat fortasse vestrum aliquis de Caspii solertia in re monastica administranda nonnihil a me distinctius accipere . Quamquam publice , privatimque omnibus prospicere solitum , quamquam commodis moribus , ab omni studio alienum , comem , prudentem , sanctum Cœnobiarcham fuisse , hinc facile intelligi potest , quod viri hi sapientissimi , justique rerum æstimatores ejus ad eos reditum avidissime optarunt , sollicitis votis poposcerunt , tandemque redeuntem cum maxima animi lætitia exceperunt ; juvat tamen satis vobis perentibus facere , nec amplius conjecturis licet certissimis , sed brevi factorum serie rem clarius transfigere . Duo præcipue egregium Abbatem commendant , rei familiaris cura , & monasticæ disciplinæ custodia . Namque & cum labat disciplina , dispergi rem familiarem , & hac accisa , ruere disciplinam necesse est . In utraque sic se gessit Caspius ,  
ut ne-

ut neque diligentiorē res familiaris administratorem, nec severiorē disciplina custodem quæreretur.

Primum enim, quis eo attentus magis, ac consideratus, ne cœnobii res minus bonæ, se Abbate, fierent? quas etiam augeri si fieri poterat, parsimonia optabat, a se ipso orlus, sibi quē supervacuis omnibus interdictis. Quo animi sensu officii sui sæpe eos admonebat, ad quos accepti & expensi rationem inire, ad quos locare prædia, universasque soli res curare spectat? His vero difficillimis reipublicæ temporibus, quando grande æs alienum confluendum fuit, ut Veneto religionis causam contra Turcas propugnante, sacrum æs ad sacrum bellum conferri posset, in quot partes distractus animus, quot sermones habiti, quoties prudentes viri consilio adhibiti, ut quam minimum detrimentum cœnobium caperet? Invitus quidem hæc omnia faciebat, quippe qui cœlestia & æterna procuraret libentius, quam hæc terrena, & fluxa, sed eo magis laudandus, quod ne suo unquam officio deesset, nec curam hanc, quamvis levissimam duceret, negligebat, nec quamvis sentiret molestissimam, declinabat. Cætera tamen parsimonix, religiosæque paupertatis maxime amicus, hoc uno liberalitate effusissimus videri potuit, quod numquam parci cœnobii patrimonio voluit, cum levandæ alienæ paupertatis se obtulit occasio. Nunquam, hoc Monasterii præside, pauperulorum agmen ex ædibus depulsum, licet eas nullo non tempore obsideret: pauperi colono necessaria defuere nunquam: pauperum nulli debitorum intentata lis, nullus vi ad solvendum adactus. Pluribus ille pensunculis solveret, integram hic solutionem differret: indultum est omnibus, donec solvendo essent. Hanc tamen tantam ejus erga pauperes misericordiam Deus largitate sua pensasse dicendus est, cum tanto uberiores proventus quilibet annus tulerit, quanto effusiores fiebant sumptus, omnibusque circumundique temporum inclementiam inculcantibus, & cœnobarum necessitatibus, & novis ob recens bellum nominibus, & pauperum subsidio res abunde sufficeret.

Jam vero quem putatis Cletum fuisse in custodienda monastica disciplina? Qualem nimirum decebat esse eum, qui a puero sanctissime illam excoluerat. Orandi studium, psallendi assiduitatem, silentii consuetudinem, servandæ modestiæ curam eam voluit omnes præstare, quam ipse præstiterat. Levissima quæque, unde sæpe in majora lapsus, & sanctissimis cœnobiis ruina extitit, haud impune admitti patiebatur, principiisque obviam eundum, dicebat, ne mala ingravescerent. Quemadmodum sponte currentes magis magisque incitare solitus fuit, ita si quis ob imbecillitatem subsisteret, hunc ad progrediendum impellebat, identidem admonens, ne Casinensis fami-

liæ

miliæ decora, ne majores suos oblivisceretur, totque sanctorum Præfulem, ac cœnobitarum exemplis, velut domestica laude, omnes ad virtutem inflammabat.

Sed nullum acriores stimulos addebat exemplum, quam ejus, qui aliena ad imitandum proponebat. Ita enim exemplo ipse vel tironibus præibat, ut nihil unquam faciendum præceperit, quod idem ultro non faceret. Hac etiam affecta ætate, imo postquam gravissimo illo morbo, quo vobis ereptus est, tentari cæpit, licet medicorum consilio sæpe deterritus, ita gnaviter, ac si firma valetudine, integra ætate ac viribus esset, cum Monachorum cætera munia obibat, tum præcipue nocturno, diurnoque precum divinarum penso absolvendo nunquam inter primos non aderat. Hæc validissima est præcipiendi ratio, si quæ præcipis, ipse præstas. Frustra aliis plerumque imperat, qui eadem sibi non imperat. Cum in Caspii vitam, & facta inspiceret, ejus dicto non parere nemo unus poterat. Si quis autem forte inventus unquam fuit, ut sunt hominum ingenia satis infirma, qui facientis imperium leviter detrectaret, quanto erratis irator, tanto errantibus mitior, ita illa increpabat, ut horum pudori diligentissime parceret. Quantum est, eadem eum olim inter cæteros Monachos magna animi alacritate subiisse, majori etiam cæterorum Antistitem subire, ac tanta nihilominus morum lenitate, tanta oris verborumque suavitate in succedentes segniter oneri fuisse. Tolera-verat eadem, ac tolerabat, nec tamen immitior erat. His omnibus factum est, ut tantum a suis amaretur, quantum suos ipse amabat: ita vero singulos pari caritate, omni favore vacuus amabat, ut cum omnibus versari, colloqui, ac si quid laxamenti animo dandum erat, cum cæteris, & inter cæteros capere vehementer gauderet. Cum autem quisquis optimum Præfulem maximo amore prosequeretur, ipse singulari benevolentia quemque amplecteretur, singulos inter se fraterno studio conjungi necesse erat, hoc unum metuentes, ne carissimum parenti filium vel levissimo verbo violarent. Quam vero quilibet sollicitus, ne ulla labecula aspergeretur, quam ut novas, clariioresque sibi virtutes pararet! Certabant omnes Præfuli placere, qui illis adeo placebat, nec magis ullus aliquid unquam timuit, quam ne amantissimi, ac amatissimi Antistitis gratiam minus demereretur. Quot, & quanta hac morum suavitate ille consequutus est, cum pauciora nemo unquam imperavit.

Pro quantum virum, quam dignum Præfulem, quam bonum parentem amisistis, auditores præstantissimi! Non obsecundare dolori vestro non possum, & vulneris vestri magnitudine, quæ tota, quanta est oculis meis, cui pariter sub moderatoribus vivere desuper

E c

datum

datum est, obversatur, vehementissime ipse quoque commoveor. Quandoquidem mori Cletus debebat, cur mitior saltem illi mors non contigit, quæ totum statim aggrediretur, nec per singulos artus succederet? Antequam vestram orbitatem doleretis, nimis diu pro vestro in eum amore longos ejus cruciatus dolere debuistis. Attonito dolore, nec opinantes vos acerbissima illius mors nequaquam defixit; sensim vos exanimavit, cum sensim illum occiderit. Sensistis eum mori, & quod acerbius erat, se mori sentientem vidistis. Quamquam autem ægro assidentibus solatio erat illa tam longa patientia, qua maximos corporis cruciatus, & nulla arte viam ægritudinem toleravit, tamen non dolere non poteratis, quod mortis duritiem hac tanta virtute non flecteret, qua una immortalem hic vitam promereri potuit, nisi hac longebeatorem promeritus esset. Cujus quidem securus Cletus hanc caducam vitam non solum, sed suos etiam alumnos, sibi vita ipsa cariores, numquam timuit relinquere. Reliquerat imo libens, ultroque, nondum ab illis morte divulsus, siquidem postquam singulos amplexatus, si quid offendisset, venia petita, ac singulis bona omnia precatus fuerat, velut soluto mentis cum corpore commercio, ad æterna se totum converterat, in hæc una oculos, animumque intenderat. Quis vestrum lacrymas tenuit, cum ea audiret colloquia cum Deo, ac Deipara habentem, quæ haud leviter amantium esse solent? Quis, cum intueretur cruci oscula figentem, hanc unam querentem oculis, hanc unam languenti, ac moribunda voce poscentem?

Verum hæc dum memoro, sentio levare dolorem meum, auditores optimi, & quam mihi unam opto, felicissimam Christiano, ac religioso viro dignissimam mortem non possum illi amplius invidere. Quin vestros vos quoque questus tandem abrumpitis? Quin a lacrymis temperatis? Cletus Caspius, Antistes vester, optime de vobis meritis Præful, extinctus est? naturæ debitum solvit. Magnifico funere ejus exuvias efferendas curastis? amplissimæ dignitati debebatur. Alte animis vestris ejus imago defixa est? quod ejus erat, vestra in eum caritas tulit. Quas sibi partes importunissimus hic dolor sumit? Nec de vobis queri licet, quibus adeo bonis, in hac præsertim optimorum virorum tam feraci Congregatione, optimus Præful, ac parens numquam est defuturus, nec de illo, qui securissimam immortalitatem, si qua est ex inoffensæ vitæ cursu, atque ex hoc mortis genere prudens conjectura, est consequutus.

# I N F U N E R E FORTUNATI BALLEONII

ABBATIS S. GEORGII MAJORIS,

*Congregationis Casinensis*

O R A T I O .

**R**ecenti adhuc dolore percussi novam durio remque calamitatem accipitis, Patres Religiosissimi, quæ & ipsamet animum vehementer afficiat, necesse est, & prioris etiam sensum vehementius irritet. Amissi parentis optimi interitum, æquene bono dicam, an meliori? vobis divinitus concessio, datum fuerat reparare, cum, vix anno circumacto, nova iterum orbitas, repetito vulnere, dolorem amarissimum cumulat. Hoc acerbissimum itaque gravissimo, vel si solum æstimetur, Reverendissimi Patris Fortunati Balleonii funeri accedit, quod vos continenti veluti luctu & ipsius cogit, qui optimum Præfulem restituerat, & restituti per ipsum nuper optimi Præfulis iterum orbitatem deslere. Pulcrum quidem præclarissimæ Casinensi Congregationi, quod tanto floreat optimorum Præfulum numero, ut quem optimo sufficiat, nunquam defuturus sit, sed idem acerbissimum optimos tam frequenter amittere. Quapropter idem ego, qui ex pullato hoc suggestu alias conatus sum accepti, alterius Præfulis obitu, vulneris dolorem oratione lenire, præsentem hunc verbis sedare luctum, qua ratione possim, minime invenio, nec, si possem, auderem. Dolori enim, quem nondum medicinæ patientem existimo, obsecundare satius duco, ac ex tot, tantisque Abbatis vestri Reverendissimi, Fortunati Balleonii laudibus, de quibus dicere me apud vos jubetis, ea tantum mihi excerpta statuo, unde facile appareat, quam publice, quam privatim, eodem extincto vobis dolendum sit. Cum enim non ad vestrum singulos dumtaxat hæc tanta clades, sed ad universam Casinensem Congregationem pertineat, non singuli privatim tantummodo damnum, sed omnes etiam publicum, oportet, lugeatis. Utroque vehementer affici singulos puto, utrumque tamen mihi ante vestros, omniumque audientium oculos subjiendum est. Quandoquidem enim dolorem vestrum minime levare concessum est, & vos ipsos, doloris tanti magnitu-

Ec 2

gnitudine fortasse attonitos, & cæteros omnes, qui magnificentissimo Præfulis vestri funeri interfunt, intelligere, æquum est, quam justa vobis sit dolendi causa.

Si omnia, quæque sibi Fortunatus Balleonius, quæque fortunæ debuit, ornamenta commemorare mihi propositum esset; majorum ejus ac clarissimorum in primis fratrum laudes præterire nequaquam vellem. Genitus enim est honesto per plura sæcula apud nos genere, quod etiam extremis hæc temporibus singulari Principis munere longe honestius est, atque illustrius. Cum enim gens Balleonia omnium divitiarum copia jam ab remotissima origine satis affluens magnam auri vim ad sacri, quod in Turcas ardebat, belli subsidia sponte in publicum contulisset; gratissima Respublica eam inter patricias magno omnium ordinum gaudio, magno totius civitatis favore, in tantæ liberalitatis testimonium, cooptavit. Alienum autem minime esset, quamvis Fortunatus vester hujusmodi decora religiosæ humilitati ultro posthabuerit, in ipsum tamen clarissimæ familiæ laudes derivare. Aspergi enim Balleoniæ familiæ laudibus & hi possunt religiosi viri, qui eas abdicarunt, cum hoc Balleoniæ familiæ proprium sit, quod eos ediderit viros, qui licet paternam domum cum sæculo abdicaverint, iis tamen & virtutibus floruerint, & eniruerint dignitatibus, ut maximo familiæ ornamento sint. Servabit sane, ac magno cum gloriæ incremento universa Balleoniorum posteritas & Fortunati Casinensis Abbatis, quem laudaturi sumus, & Joannis Antonii ejus fratris ostendit imaginem, qui pares insulas inter Canonicos Regulares Sancti Salvatoris consecutus, universæ mox Congregationis rebus in Romana Curia procurandis præpositus, tandem nobilissimi Ordinis supremum regimen, dignitatemque adeptus est. Plura itaque de Balleoniæ gentis laudibus Fortunatum Balleonium laudaturus dicerem, si aliud de ipso mihi dicendum proposuissem, neque ostendere vellem dumtaxat, grave publice, privatimque ejus obitum Casinensi Congregationi fuisse. Desiperem enim profecto, si hoc persuasum vellem alicui, splendoris aliquid Casinensi Congregationi ademptum esse, quod Præful patricia gente, Venetaque nobilitate clarus extinctus est. Etenim quis ignorat, si ex nobili alumnorum genere splendor aliquis religioso cœtui unquam exiit, maximam hinc lucem benedictinis cœnobii nullo non tempore affulsisse, quæ & tot principes viri modo incolunt, & olim potentissimi Reges, ac Imperatores incoluere. Desinamus itaque hæc de Fortunato apud vos commemorare, quæ ne commemorari quidem, si rara inter vos essent, Fortunatus, cæteras etiam laudes, quæ verius suæ, filere solitus, ac fileri jubens, unquam voluisset.

Gra-

Gravissimo vulnere istam dico Casinensem Congregationem, quod; Fortunato extincto, altissimarum rerum scientia instructum, maxima in Deum pietate inflammatum, in re domestica procuranda diligentissimum Præfulem amisit. Quamvis enim alii sint ipsi pares in hac Congregatione Præfules; nihilominus nunquam non grave est hujusmodi viris orbari, per quos non stat solum res monastica, sed viget, ac floret. Cum autem, si morum sanctimoniam demas, quæ tota in Deum caritati innititur, singulis cœnobitis non solum, sed & aliis æque necessariam, cætera necessaria singillatim sint nemini; omnia tamen in eo conjungi opus est, qui omnia aliorum bona curare, consulere omnibus debet. Omnibus itaque animi ingeniique dotibus cum Fortunatum præstare sapientissimus ille Præfulem Casinensium conventus, ad quos spectat, probe nosset, eum in ordinem suum cooptavit, ut toti jam præluceret Congregationi, eamque cum ipsis moderaretur. Verum quam cito, quam haud suo, haud vestro tempore lumen hoc extinctum est! Nisi per minores gradus ad hunc tantum honorem ascendens, luculentum animi sui specimen cunctis dedisset Balleonius, vix sciri posset, quibus Abbas virtutibus excelluisset. Quamquam haud vera memoro, cum, licet immatura morte de honoris fastigio dejectus, ea tamen brevi tempore ediderit virtutum suarum argumenta, ut antea vitæ conjectura ad egregium in primis Abbatem noscendum, opus minime sit.

Ut enim ab iis incipiam, quæ minus eminent, quamquam haud minus necessaria sunt, qui Præsul Fortunato vestro in re domestica administranda solertior? Quis peritior? Testis est Bergomense Sancti Paulli cœnobium, cui intra unius anni fines, quibus ipse circumscribi regimen suum voluit, allata utilitas ad omnes, quibus cœnobium stabit, annos pertinebit. Testis est nobile hoc Sancti Georgii cœnobium, cui ampliores redditus, & res longe lautior. Non dicam, quam fideliter, quam sancte ejus bona per plures annos Cellerarius administraverit, eam tamen ab ipso, quamquam per unum dumtaxat annum Abbate, mirifice auctam, vobis affirmantibus credendum est.

Verum qui rei familiaris procurationi adeo intentum Fortunatum Balleonium auditis, hunc ne putetis minus rei litterariæ studiosum. Ita enim semper rem familiarem administravit, ut nunquam litterarum studia intermiserit. Certum jam est, exemplis, ac validissimis rationibus firmatum, studia non solum Monachos non dedecere, sed decere plurimum, quodque ab antiquis rei monasticæ parentibus factitatum semper fuit, pulcrum esse, atque utile, si ab aliis nunc quoque fiat. Cum vero aliæ sint Monachis magis propriæ litteræ, minus aliæ, ad ea se studia contulit Balleonius, quæ susceptæ vitæ instituto magis propria, non mentem solum sublimissimarum rerum scien-

scientia ditarent, sed eandem earum desiderio erigerent, earum alerent amore. Rebus enim Theologicis mirifice addictus, divina mysteria pari semper humilitate ac diligentia scrutatus est, & quantum homini licet, intelligentia complexus. Cum autem quantum ipse utilitatis ex omnium litterarum studiis hauserat, tantumdem & alios haurire, Abbas cuperet; instructissimam hujus cœnobii bibliothecam, quæ tanta magnificentia extructa, tantaque librorum copia referta est, ut non cœnobio solum, sed universæ civitati ornamento sit, pretiosissimis insignium auctorum monumentis ex Gallia, Germania, Hollandia magno impendio devestis magis adhuc jussit locupletari. Adibitis propterea in posterum lætiores vos, Patres Religiosissimi, adibimus nos etiam bibliothecam illam, cujus pro vestra humanitate omnibus copiam facitis, & Balleonii optimum in augenda literaria suppellectile judicium, Balleonii in literas amorem, earumque promovendarum studium, dum literæ erunt, laudabimus.

Quomodo autem literas, sacras præcipue, ipse non amaret, amarique ab aliis vellet, qui quantum ipsis deberet, intelligebat, per illas ea in Deum pietate auctus, qua maxime commendabatur. Di-tata templa, sacramque tum Bergomensis, tum hujus Veneti cœnobii ædem nova, pretiosaque suppellectile instructam liceat præterire: Exundantis quidem in Deum caritatis argumentum est curatus templorum nitor, & splendor, verum clarius eam arguit secretioris templi, nostri scilicet pectoris, quo visus nemini Deus illabitur, mundities, & cultus. Balleonium quisquis dicit, sanctissimum ille Præfulem dicit, cujus tota vita ita cæteris prælucebat, ut non sanctiores, qui in Præfulis facta inspicerent, fieri Monachi non possent. Nihil hic singulatim commemoro, cum nihil singulatim in ejus vita ita emicuerit, ut cæterorum gloriam obscurarit, neque unum commemorare possim, quin cætera injuria præteream. Hoc dixisse sufficiat, nulla unquam ejus mores labecula aspersos, nunquam non omni virtute clarissimos, sive quæ Monacho, sive quæ Monachorum Abbati magis necessaria videretur.

Publice igitur quam dolendum sit Patribus his Congregationis suæ amantissimis, intelligitis, auditores. Cum tanto viro omnibus muneribus pari aliam ex alia, supremamque tandem dignitatem deferendam præfagiret universa Congregatio, pro dolor! tantum virum amissit. Habet illa quidem alios rei domesticæ administrandæ gnaros, litterarum scientia illustres, pietate insignes Præfules, sed Fortunatum Balleonium amplius non habet. Quos cœnobiis suis præficiat cum rei familiaris bono, studiorum, ac virtutum incremento alios habet, sed Fortunatum Balleonium amplius non habet.

Sed



Sed quamquam tam iusta est universis publico nomine lugendi causa, Fortunato Balleonio extincto, non minus fortasse iusta privatim ejus mortem dolendi singulis est. Seniores commilitonem suavissimum, juniores tirocinii sui moderatorem optimum, omnes amantissimum Præfulem desiderant. Obliviscine unquam poterunt illi suavissimæ consuetudinis, qua Monachus inter Monachos utebatur? Quam facilis omnibus morem gereret, quam alienis oneribus sæpe ad alios levandos succederet, quam nullius laudibus unquam inviderit, quam nullius moribus, si quos minus commodos offenderet, adversatus unquam sit?

Vos vero, quibus, cum primum sacræ huic militiæ nomen dedistis, contigit, hoc moderatore, tirocinium ponere, quo animo ejus mortem ferre potestis? Scio, eam fuisse illi in tironibus exercendis suavitatem, ut longum etiam post tempus tam ipsum alumni sui amarent, quam ab ipso & amatos se meminerant, & amari adhuc sentiebant. Difficillimam provinciam hanc, ac omnium maxime gravem Monachos e delicatulis pueris, ut ita dicam, fingendi, per plures annos in hoc cœnobio gessit Fortunatus, tanto Congregationis bono, ut ne unum quidem e sacra illa sua palestra emiserit, qui statim exercendis ipse tironibus præfici non posset. Tenellam illam ætatem qua caritate complectebatur? Rudes rerum cœlestium pueros, qua patientia altissimis mysteriis ad solitudinis amorem, sæculi contemptum, monasticæ disciplinæ studium informabat? Tardiusculos quosdam ad progrediendum qua verborum, animique lenitate excitabat? Cum tot ex illis, qui adsunt, tanta Balleonio debeant, alii quod in proposito perstiterint, alii quod alacriores facti sint, omnes vero eas, quibus ornantur, religiosis viris dignas virtutes, quomodo lacrymas, eo extincto, tenere poterunt?

Sed si qui etiam sunt, qui non illo commilitone, non tirocinii moderatore sint usi, ferrei ne adeo erunt, ut tam carum caput sibi ablatum non doleant, tam egregium Antistitem cum magno doloris sensu non desiderent? Si liceret arcana numinis consilia scrutari, hunc aut nunquam huic cœnobio Abbatem dandum fuisse dicerem, aut nunquam subripiendum. Quem alium vidistis unquam, qui ita Præfulem cum Monacho temperaret, ut tum maxime Monachum crederent omnes, cum Abbatem ipse se gereret? Quis ita severitatem clementia miscuit, clementiam severitate, ut condonasse errata videretur, cum castigare, castigare, cum condonabat. Neque enim illi remissior & mollis illa clementia, quæ errandi sensum sæpissime auferit, sed quæ errantibus parcendo, errandi tamen metum incuteret. Cum omnia ipse Monachis indulgeret, nemo sibi aliud indulgebat,

cer-

certumque apud omnes erat non e monastica esse disciplina id per-  
mitti, quod Abbas non permisisset. Nunquam enim ille religiosos  
viros metu coercendos existimavit, sed virtutis amore in officio con-  
tinendos. Hinc factum est, ut, cum quisque contineri etiam in offi-  
cio velleret, sibi quisque moderator esset, nec Balleonius aut sibi, aut  
aliis ceterorum moderator videretur.

Plura si persequar, vereor ne dolorem vestrum ita exasperem, ut  
ne temporis quidem beneficio sanari amplius possit, præcipue cum  
tam cari Præfulis mors acerbissima tota in oculis vestris adhuc sit.  
Dignissimus enim immortalitate Abbas, diuturno morbo afflictatus,  
acerbissimos dolores perpeffus longam mortem sustinuit. O averso nu-  
mine huc appulsum nequissimum hominem, qui haud multis abhinc  
annis artem, quam ignorabat, plenis buccis venditans, Fortunatum  
calculorum valetudine laborantem eo induxit, ut sibi medicas has, seu  
potius hostiles manus admoveri, & novum sectionis genus sibi adhi-  
beri pateretur. Ex eo tempore mori ille cepit, cum, eruto quidem  
majori calculo, sed faucibus intestinis, affligari gravissimis doloribus  
cepit, donec latius interiore ulcere serpente, novis etiam calculis suc-  
crescentibus, confectus est. Hoc genus mortis ideo vestram etiam a-  
cerbius memoriam subit, quod eo indignus vobis Præful videbatur,  
qui tanta illud patientia non sustinuit solum, sed etiam vixit.

Ecce vobis igitur publici, privatique luctus causa justissima. Tantum  
mœrorem solari ipse, iterum dico, neque possum, neque si possem,  
vellem. Fore tamen spero, ut tanto huic dolori levando satis sit,  
cum vestrum omnium, quæ nullis unquam calamitatibus infringi po-  
test, tum etiam Fortunati Balleonii satis cognita virtus, cujus non  
solum memoriam jucundissimam moriens nobis reliquit, sed præmia  
ipse beatorum in patria, ut fas credere, æternum victurus consequutus  
est.

I N F U N E R E  
A N G E L I Z O N I.  
E Q U I T I S,

*Magni Reipublicæ Venetæ Cancellarii.*

O R A T I O.

CUM ad civitatem constituendam, quæ omnibus post se futuris civitatibus exemplo esset, Serenissime Princeps, alia plurima a Græcis, & Romanis sapientissimi hujus Serenissimæ Reipublicæ conditores sumpserunt; tum illud etiam, quod præclaros viros, qui ob magna in patriam merita ad altissimum honorum fastigium eveſti sunt, efferri vita fundos non sine publica laudatione voluere. Hoc autem mortuorum ne, an viventium gratia faciendum jusserint, incertum. Mortuis quidem hoc debetur, ne eorum nomen una cum vita exstinguatur, sed cum venturis omnibus sæculis oratorum monumentis comparetur: viventibus vero exemplum tradi oportet, & proponenda merces, quo aspirare si velint, quæ illam peperit virtus, eam tota animi contentione sedentur. Mirum enim, quam homines ipsius naturæ instinctu immortalitatis apperentissimi ad virtutem inflammentur, si sentiant, partam per virtutem gloriam nullius sæculi finibus circumscribi. Si unquam propterea eum me esse oratorem optavi, cujus opera posteritati mandata totius posteritatis admirationem in se converterent; id mihi modo optandum est, cum præclarissimi viri Angeli Zoni, Equitis, Magni Serenissimæ Reipublicæ Cancellarii, immatura satis morte nobis abrepti, laudes oratione prosequi debeo ad posteros omnes itura, quæ & gloriam ejus apud omnia sæcula tueatur, & viventes, ac viſtuos ejusdem ordinis cives, proposito tantæ gloriæ exemplo, ad parem vitam accendat. Sed præterquam quod non id mihi virium ab ingenio, nihilque mediocri studium, & haud ita frequentem dicendi exercitationem brevis adjuvat dicendorum meditatio hac temporis caritate, qua tantum non ex tempore dicere jussus sum; consequi quod vellem minime possum pene obrutus eorum, quæ dici possent, copia, & cum tot animo dicenda oberſentur, singula se te

F f

mu-

mutuo mihi videntur impedire, ut qui omnia dicere minime possum, nec quid dicendum, nec quid prætereundum sit, facile inveniam. Laudandus enim mihi vir est secretis, & manifestis, privatis, & publicis virtutibus insignis, domi, forisque æque clarus, qui plurima naturæ, plura sibi debuit, qui operam omnem, & ingenium ad Reipublicæ ministrandum contulit, amplissima præmia a Republica consecutus est. Verum ut Magni Cancellarii exsequias celebrari omnes intelligant, hominis alias virtutes præteribo, atque ut appareat, qua ratione Angelus Zonus hanc tantam dignitatem promeritus sit, qua ratione gesserit, alacritatem, qua difficillima ministeria sibi a Republica delata suscepit, assiduitatem, qua suscepta difficillima ministeria exercuit, solertiam, qua in exercendis ministeriis usus est, brevi oratione complectar. Pergratam hanc illi laudem futuram puto, si ad eum amplius laudes nostræ pertinent, quæ tota ex ejus in patriam fide, & caritate gignitur: hac certe scio laude exemplum satis luculentum proponi sui ordinis civibus, ut amplissimam dignitatem si minus omnes consequi, omnes certe possint promereri.

Parum fortasse laudare virum amplissimum videbor, si alacrem dixerò ad injuncta sibi ministeria capeßenda, cum hæc magno aliquando ambitu peti soleant, ornarique se existiment, ac præmii loco ducant plurimi, si quid sibi a Republica mandetur. Verum præterquamquod non idem est omnium sensus, segnioresque multi ea declinant, quæ videntur appetenda; alii alia ducti causa, ne ab instituto vitæ, honorumque curriculo discedant, in ea sæpe, unde pudor est diffugere, inviti trahuntur. Singularis Angeli Zoni laus est, aut certe communis cum paucis, quod ob suum in patriam amorem, promissamque, cum primum ad Rempublicam accessit, fidem, non solum difficillima quæque mandanti paruit, sed magno animi studio ita exsequenda suscepit, ut una in patriam pietas cæteras omnes nunquam non vicerit caritates. Ab ineunte adolescentia per singulos ætatis suæ annos si ire vacaret, Angelo Zono difficillima haud semel imposita munia, difficillima quæque munia summa animi alacritate semper ab ipso suscepta, facile ostenderem. Quæ in urbe gerenda erant, haud tantæ virtutis ducamus, prompto ad ea animo fuisse. Plena & illa quidem laboris, & alæ, sed quæ nisi iners, patriæque inutiles esse velis, amplectaris necesse est. Magnum illud fuit, quod adhuc adolescens, ut futuræ vitæ tirocinium poneret, non timuit se dubiæ navigationi committere, jonio, ægæoque mari se credere, supremo rei maritimæ præfecto, secretioribus & dandis ad Senatum epistolis, id enim illi muneris injunctum fuerat, seduli-

ta-

tatem omnem inter armorum strepitus præstiturus. Hinc facili conjectura consequi quisque potuit, quam omnia patriæ posthaberet, quam unice eam diligeret, quo animo futurus esset, cum maturiori ætate, atque ingenio graviora etiam ipsi munia demandarentur.

Venit itaque dies, cum ut apud Insubriæ Gubernatorem publica negotia curaret, eo Residentis, ut vocant, nomine ire iussus est. Erat hic Angelus Zonus in oculis omnium, probatus omnium ordinum hominibus, gloriæ & honorum securus; proponebantur ante oculos maxima pericula, cum difficilissimis totius Europæ temporibus pronius esset existimatione hominum excidere, quam in hominum famam assurgere: nostræ vivendi rationi, huic cultui parabili, & nostratibus moribus duntaxat assuetus erat; alio mittebatur, ubi alienis moribus vivendum, splendidiore apparatu, ac numerosioribus servitiis utendum: præterea plurium liberorum parens rei domesticæ procurandæ animum intenderet, oportere, intelligebat, ut tueri locum suum ipse, posterique aliquando possent; ut alio migraret, vel a carissimis pignoribus, conjugē, ac liberis divelli necesse erat, vel secum ea ducenda, quorum neutrum sine magno rei familiaris detrimento, eaque prope accisa, fieri unquam poterat. Quis ipsi non ignosceret, si tot incommoda, ac difficultates excusasset, ut injunctum onus detrectaret? Nunquam tamen lætiôr visus est, quam cum amplissimorum Patrum suffragiis designatum se apud Insubriæ Gubernatorem Residentem sensit. Ne tantisper quidem dubitavit, imposcitur ne onus subiret, sed quamvis acerrimo ingenio vir omnia prospiceret, & jam non patrisfamilias tantum, sed & Residentis onera cogitatione præciperet, extemplo tamen patriæ, qua illi nihil erat antiquius, parendum statuit. Statim conjugi, ac liberis indictus ab urbe discessus: statim magnificus cœptus apparatus, ne aut suum, aut patriæ decus apud externos negligere videretur: statim necessaria ad iter comparata. Cui mirum propterea esse potest, quod hilari semper animo per octo continuos annos ita munus illud exercuit, ut non negotiorum difficultatibus fatigari, non maximis rei domesticæ dispendiis affligari, non ipsius patriæ desiderio premi visus unquam fuerit? Idem animi vigor, eadem alacritas semper in ministerio illo gravissimo sustinendo, qua minime potuit a suscipiendo deterreri.

Quo cum animo meministis Mediolanum pergentem, eodem cum ad cætera quoque promptum, & alacrem, eodem cum ipsum Archicancelliaratus honorem dicam, an onus? subiisse, credite. Quamquam enim hanc tantam dignitatem, sui ordinis supremam, Respublica optime meritis viris confert, non otium tamen ulli hac pa-

rat, sed sollicitiorem operam exigit, ut quo in illustriori gradu hominem collocat, eo majora ab illo & postulare, & poscere videatur.

Promptum ad Reipublicæ imperata capeffenda Angelum Zonum audistis; audite jam in faciendis imperatis assiduum. Quæ pauci, cum vivimus, advertunt, ea tandem, cum esse desimus, tota æstimantur. Quantum est, hominem per totam vitam, ita semper patriæ, ita sibi nunquam vixisse, ut ne satis quidem naturæ vivacem potuerit? Ideo enim immaturo funere elatum nunc querimur Angelum Zonum, quod quotidiana, quam præstitit Reipublicæ, opera, laborumque assiduitate confectus, non publicis, privatisque curis prius affligi desiit, quam vivere. Alia ex aliis semper illi munera injuncta, & cum probata fide, ac diligentia nunquam uti nollet Respublica, tandiu solum deferendo novo ministerio expectatum est, donec ille susceptum procurare desiisset. Rediit e navigatione haud prima juventute, cui se prima adolescentia commiserat; gravissimorum statim magistratuum secreta illi credita; gravissimis magistratibus operam per plures annos navaverat; ab universo Senatu in consiliorum conscientiam sumptus. Hoc jam auctior honestissimo ministerio, cum primum maximis Reipublicæ negotiis curandis par visus est, statim in Insubriam missus. Nondum illinc in patriam revocatus fuerat, cum senatusconsulto deletus est, ut sapientissimo X-Virum collegio, statim ac se in urbem recepisset, arcanorum omnium particeps adesset, donec tandem universo ordini suo majoribus comitiis præpositus, ac Magnus Cancellarius renunciatus, honestæ etiam aliquando obtinendæ missionis spem abruptam sibi intellexit. Eo devenit, ut otii etiam desiderio capi contra Rempublicam esse duceret. O virum non sibi, sed patriæ natum! O virum nullis laboribus unquam fractum, qui, si eum tot curis parem, ut animo virtus finxerat, ita corporis quoque viribus natura finxisset, tam nunquam finiendis laboribus fuisset oblectatus, quam laboribus nunquam dohuit acerbius vitam finiendam. Ita decuit hominem honestissimo genere natum, qui a majoribus suis amplissimam gloriæ hæreditatem acceperat, qui nullam domi avorum imaginem inspexit non multis titulis præstitæ Reipublicæ operæ insignem: ita decuit plurium liberorum parentem, qui quos patriæ genuerat, iis esse voluit exemplo, ut patriam se ipsis cariorem ducerent.

De Angeli Zoni in implendis muniis solertia, quam postremo loco docturum me promiseram, verba ulla amplius facere supervacuum puto. Quis enim adeo rerum expertus, qui non solerterem, & industrium hominem credat, quo per totam vitam Respublica in tanto eorum numero, qui peracti pollent ingenio, usi voluit?

Cum

Cum illum dico per totam vitam gravissimis negotiis pene obrutum nunquam defuisse Reipublicæ, cum illi dico nova semper, atque alia ex aliis Rempublicam demandasse, miram in agendo dexteritatem, in explicandis maximis negotiorum nodis solertiam, industriam, sedulitatem dico. Qui enim unquam sapientissimi Patres tot illi onera imposuissent, tot gravissimas illi res iterato commississent, ac tandem ad tot curis obnoxiam dignitatem universæ Reipublicæ non favor, sed judicia evexissent, nisi eum prius versatili ingenio, mente perspicaci, animi vigore, orationis etiam, sive voce, sive stilo opus esset, ubertate tot sustinendis oneribus, tot, tantisque negotiis obeundis parem probassent?

Verum ne solis videar conjecturis rem agere, quandoquidem quæ in curiæ penetralibus, ac X-Virum sacrario fiunt, in publicam lucem effert nemo, revocemus in memoriam eorum temporum, quibus Zonus Mediolani cum publicis mandatis substitit, calamitatem. Tota continenti prope internecini belli incendio Europa flagrabat, quod cum ad cæteras potentissimorum Regum provincias, tum præsertim ad Venetæ ditioni conterminam Insubriam pertinere videbatur. Una hæc Venetorum Respublica Serenissima, injeستا desuper mente, omni partium studio vacua, media inter tot populorum motus, in tanta rerum omnium perturbatione, suorum otia tuebatur, & dissidentium inter se Principum animos debitis erga singulos amicitiae officiis excolebat. Verum probe nostis, quam pronum sit, ut is, qui utrique parti studet, apud utramque aliquid offendant, & qui partium nulli immisceri vult, dum utrisque vult esse amicus, utrisque inimici loco sit. Difficillimis his temporibus Reipublicæ causam tueri, ejusque negotia obire Angelo Zono contigit apud Insubriæ Gubernatorem. Uno dicam verbo, quæ ejus fuerit in agendo dexteritas; & Reipublicæ suæ, & Insubriæ Gubernatori probatus fuit, neutri unquam suspectus, cum inter non satis certæ fidei amicos esset velut medius. Neque defuere aliquando, in quas incidere, salebræ. Cum via per Venetos fines utriusque Principis copiis pateret, & hinc e Germania in Insubriam contendentibus, & illinc ex Insubria occurrentibus, bellicue tandem sedes Veneta ditio videretur; ita tamen Zoni consilio, & solertia omnia comparata sunt, ut dum prælia inter partes in Venetis agris miscentur, amicitia cum Venetis sanctissime servata, eorum pax ne leviter quidem tantam unquam sit. Sin autem militum insolentia aliquando, ob corruptam potius castrorum disciplinam, quam ullo ducum in nos odio, non satis coerceri potuit; si quæ nostris illata damna sunt, ut ea statim repararentur, Zonus petit, & cum petit, nunquam non  
evi-

evicit. Tantam dicendi vim bona causa Angelo suppeditavit: adeo orationem ipsam morum suavitas, ac dexterrimum ad omnia ingenium semper adjuvit, ut uno ipso inermi Venetos fines velut propugnante, nulla pestis ex Insubria in Venetas terras irruperit, & ex nulla parte minor nobis, quam illinc, timor fuerit. Si tunc præcipue promeritum illum Magni Cancellarii fastigium dixerō, minime fortasse fallar: certe illud brevi post recenti adhuc tantæ virtutis recordatione est consequutus. In hoc autem quam sui similis adhuc fuerit, quam in alio negotiorum, & curarum genere, qui ad omnia factus videbatur, solers, & industrius, non est, cur memorem. Testes omnium ordinum homines habeo, qui hoc tanto ob ejus interitum luctu, quam bene Zonus Magni Cancellarii munere functus sit, fidem faciunt.

Plura de tanto viro quo minus dicam, etsi copia suppetit, temporis caritate prohibeor. Quæ pauca tamen dixi, si non satis ad ejus laudem, satis certe esse possunt ad cæterorum exemplum. Pergrate igitur, quotquot eodem, ac Zonus, ordine censemini, honestissimi cives, pergrate, quod facitis, promptam, assiduam, industriam operam tantæ Reipublicæ præstare. Eadem, quam Zonus consequutus, vos quoque manet merces amplissima. Viam monstrare vobis ad gloriam, qui jam illam ingressi estis, mihi amplius non licet: hæc tamen quam certa, quam apta sit, proposito Angeli Zoni exemplo, ostendere licet.

Vobis vero, vos enim tandem appello, dulcissima Angeli Zoni pignora, succrescens clatissimæ familiæ soboles, luculenta Reipublicæ spes, digni tanto parente liberi, qui suavissimum caput fatorum acerbitate abreptum vobis restituere non possum, ejus, quibus per tempus, & ingenium licuit, coloribus expressam imaginem exhibeo. In hanc inspicite, & hinc vobis sumite exemplar. Plurimæ domi vestræ avorum imagines sunt, quæ, quantus fuit parens vester, totum fecere: ut singulos imitemini, unum vobis opus parentem, quem ore & vultu refertis, moribus etiam referre. Zonum quidem genus ac nomen ab antiqua origine illustre, hac tempestate ob parentis vestri virtutem ac dignitatem longe illustrius factum est. Quam gloriam a majoribus accepit, eam ad vos longe auctiorem ille transmittit, ut magis adhuc amplificatam posteris mandari a vobis necesse sit, si patris exemplum sequi velitis. Non solum nobis, ac Reipublicæ reddi a vobis Angelum Zonum volumus; reddi Magnum Cancellarium volumus. Non aliter augeri familiæ vestræ splendor potest, nisi Magnorum Cancellariorum imagines multiplicentur. Quod cum ab animi vestri indole fu-



futurum spero , tum maxime a te quoque , Camilla Angeli Zoni , quæ communes liberos in sinu tuo educis , eisque non aliud traditura es , quam quod tradentem ipsis amplissimum virum toties audisti . Habes quidem clarissimos fratres , qui sororis filios veluti alteri parentes amant , habes in Zuccata familia , unde egressa es , habes in Zona in quam nupsisti , quos plurimos liberis tuis ad imitandum proponas . Sed Angeli Zoni filios unum parentis exemplum satis ad virtutem informabit . Ipsa interim filiorum tuorum bono diu vivas , & spem Reipublicæ , spem familiæ ita educes , ut dubium aliquando sit , utri parentum plus filii debeant , illine , qui tantarum virtutum exemplum reliquisse , an illi , quæ ad tantum exemplum eosdem instituisse prædicabitur .

# I N F U N E R E P E T R I B A R B A D I C I

P A T R I A R C H Æ V E N E T I A R U M & c.

O R A T I O.

**Q**UOD vulnus amplissimi Præfulis, Petri Barbadici interitu accepimus, Serenissime Princeps, hoc tam magnum, tam grave est, ut vix tempus illi diuturnitate mederi posse, facile putem. Amisimus orbi fili parentem optimum, qui tam nobis carus erat, quam nos illi caros esse sentiebamus: amisit sponsum sui amantissimum vidua Ecclesia, qui omne studium, curas omnes, seque totum ad ejus præsidium, atque ornamentum impendit. Hac autem jactura ut gravius percuteremur, mortis etiam malignitas spem nobis ostendere visa est, ut acerbius ludificaret. Quamquam enim cum primum viridi adhuc ætate, inter viri, senisque confinia, gravissimo morbo tentari cepit, statim pro nostra in eum pietate, tantoque ejus periculo maximus omnes timor incessit; mox nihilominus, vi morbi deservescente, certa vitæ spes injecta est nobis, auditumque fore, ut brevi convalesceret. Verum haud diu nobis licuit lætis esse. Statim enim iterum rumor de ingravescente morbo vulgatus: sed iterum etiam illius vim remissam, nunciatum est. Fuimus ita per aliquot dies alternis spe, metuque suspensi, ac solliciti, donec remedia omnia vincente morbo, naturæ coactus est concedere, ut qui nos vivus omnibus bonis cumularat, eosdem immortali sui desiderio extinctus affligeret. Proh Superum fidem! Siccine terris sua bona invidisse dicendi sunt, eorumque singulare donum, optimum Præfulem? At quo meo, vestrumque omnium dolore abripi me sinam, minime sentio? Committere haud debeo, ut recrudescat, me dicente, vulnus, cui aliquam potius, si ullius patiens est, adhibeam medicinam, oportet. Mittamus igitur ejus mortem lamentari, cum uberrimam, & vobis, mihiq; jucundissimam ipsius virtutes præbeant dicendi materiam. De his propterea dicere aggrediar, & laudationem meam ita instituam, ut, quod meo maximo, omniumque damno perculsum decet, simplici, nullisque ornamentis fucata oratione, totam tanti Præfulis vitam nitar comprehendere. Id autem eo libentius mihi faciendum est, quod quamvis nun-

numquam opranda fuerit, amplissimi tamen Præfulis, qui vivus laudibus suis semper intercessit, laudandi occasio non sine quodam animi ardore amplectenda est.

Cum ad argumentum, in quo versaturus sum, magnitudine sua satis amplum, suo splendore satis illustre nullius artis subfidiis opus esse intelligam, ita quæ a Patriarcha nostro gesta sunt, exponam, ut non alium, quam temporum ordinem sequi velim. Adolescentem itaque Petrum Barbadicum primum nostra spectet oratio. Summam statim initio dicendi videbor occupasse, cum dixerò, manifesto Dei consilio ab ea ætate ad hujus Ecclesiæ infulas vocatum. Ille enim ex eo tempore ad tam illustre sacerdotium vocavit, qui tunc temporis eam mentem iniecit, ut sacerdos vellet inaugurari. Natus erat præclarissimo genere, de quo apud vos verba facere non nisi tempore aburentis esset, cum ea sit Barbadiæ gentis splendidissima nobilitas, ut suo se lumine omnium oculis prodant. Cum autem magnorum virorum exemplo, qui domi forisque rem Venetam cum magna nominis sui gloria gesserunt, ad rempublicam capessendam invitaretur; non ille clarissimos duces, qui honestissimam pro patria mortem obire, non duos illos Serenissimæ Reipublicæ Principes, aliosque innumeros in proximo dignitatis fastigio collocatos, non ipsum Hieronymum patrem, senatorem præstantissimum, ac maxima pariter senatus lumina, patruos Peirum, Ludovicum, atque Augustinum imitandos sibi proposuit, sed quam desuper immissum lumen monstrabat, viam ingressus, sacris initiari, ne delibatis quidem patriæ reipublicæ honoribus, voluit. Ut vero intelligatis, quo consilio hoc vitæ genus inierit, in quod nonnulli sæpe casu incidunt, alii spe aliqua trahuntur, quidam etiam a terrenarum rerum fluctibus velut in portum sese recipiunt, subeat animum, qua id temporis sanctitatis fama longe lateque florerent adhuc inter vivos, Petri gentiles, Cardinales Barbadii, Venerabilis memoriæ Gregorius, quem cum summa animi religione nomino, ac Marcus Antonius, qui non magis a Gregorio distabat, quam soleat ab exemplari, quod ab eo scite deducitur. In hos cum Petrus inspiceret, vel si spe amplissimas Ecclesiæ dignitates præsumpsisset, non alio animo potuit sacræ huic militiæ nomen dare, quam ut omnes ecclesiastico viro dignas virtutes sibi festandas, omnia ecclesiasticorum officia implenda sibi proponeret. Noverat satis, nihil illis præcipue temporibus fuisse turpius futurum, quam profanis moribus e gente Barbadiæ sacerdos. Qui itaque minime sustinuisset, se eum dici, qui unus inter suos patriam rempublicam non egregie gereret, si ad illam accessisset, sustineret idem sua gente indignus inter suæ gentis sacerdotes videri?

G g

Quan-

Quantus autem futurus esset aliquando, his domesticis exemplis ad omne virtutum genus inflammatus adolescens, præfensisse, ea cælesti vi, qua tot futura prospexit, Venerabilem Gregorium puto, cum ultro ipsum in Cathedralis suæ Patavinæ Ecclesiæ insigne Canonicorum collegium ascripsit. Hoc tanti viri iudicio novum ad virtutes calcar additum ipsi, haud mirum. Accessit etiam, quod ipse statim, vestigiis Marci Antonii Cardinalis, qui aliquando eodem, quod ille tunc consequutus, sacerdotio potitus fuerat, insilendum sibi intellexit, a quibus nisi degenerem se professus, recedere nunquam posset. Tum primum itaque, tum maxime ad gentilium suorum sanctitatem niti certum illi fuit, ac satis, si eos exprimeret, contentus, hunc honorum sibi finem statuit, Deoque, ac sibi cæpic impensius vivere. Omni vacuus ambitione, quæ sui muneris erant, quam sancte procurabat, quam totus in iis erat, quæ ad religionem quæ ad mores formandos, quæ ad eas virtutes, quibus propius ad Deum homines accedunt, assequendas spectant. Hinc factum est, ut dum honores suos Patavino sacerdotio finiri vult, minime advertens, neque unquam id opinatus, illud honorum initium fecerit. Dum enim sibi ita sancte vivit, apparuit dignum esse, ut viveret aliis, ac aliis præluceret, egregiasque animi dotes, quæ latebant, in publicum tandem efferret.

Per gradus tamen Deus illum voluit ad totius hujus urbis supremum sacerdotium evehi, nec nisi probatum nobis Pontificem dari. Haud ita magno propterea, sed satis illustri præpositus gregi, ab acerrimi iudicii Principe, Serenissimo Silvestro Valerio, basilicæ suæ Primicerius renunciatus est. Miretur nemo, quod nihil eorum desiderari in novo Primicerio potuit, quæ a regiæ basilicæ Antistite postulari solent. Ad hanc quoque dignitatem evecto Barbadicum nomen non oneri ad sustinendum gravi, sed subsidio fuit, ut ieius splendorem latius diffunderet. Successor enim datus est Eminentissimo Joanni Francisco Barbadico, quem modo inter purpuratos Ecclesiæ Patres colimus, cum ille has Marcæ basilicæ insulas ponere coactus est, Veronensis Episcopus creatus. O divinæ Providentiæ consilia! His domesticis exemplis, apparet, Deum, ne bonus unquam esse non posset, quamdam Petro recte agendi necessitatem imposuisse. Nec divinis consiliis restitit Petrus, qui dum in gentilium suorum exempla inspicit, jam non optimus solum Marcæ basilicæ Antistes, sed optimus universæ Ecclesiæ Venetæ Pontifex facile evasit. Cum enim hanc tantam dignitatem abdicasset Eminentissimus Cardinalis Baduarius, statim dignus habitus est Petrus Barbadicus, qui amplissimorum Patrum suffragiis tanto viro sufficeretur. Manifestis indicis pro-

prodidisse se numen, ineuntibus suffragia Patribus, atque hunc inter cæteros, quorum ratio habita fuerat, palam velut a suffragatoribus poposcisse, tunc est creditum: tam bene postea procuratus Patriarchatus haud temere id esse creditum, probavit. Quam enim expectationem statim ac inauguratus est, excitaverat, hanc non implevit modo, sed vicit. Prolixior, quam loci, ac temporis ratio postulat, fluere oratio, si omnia vellem, quæ Patriarcha gessit, non dicam ornare verbis, sed assequi numerando. Itaque cursim summa rerum capita attingam, quæ satis vobis erunt ad singulorum recordationem, posteris vero, si ad posteros forte mea pertinebit oratio, ad luculentissimam eorum, quæ præteribimus, conjecturam.

Quod primum occurrit, id omnium maximum est, ac eorum omnium, quibus eximius quilibet Præsul commendari possit, velut fundamentum, orthodoxæ scilicet religionis studium, quæ in Episcoporum fidem, ac tutelam se nisi recipiat, amittere candorem suum, & errorum maculis aspergi facillime potest. Nihil quidem huic timere a suis Patriarcha vigilantissimus poterat, qui in ipsius Fidei sinu feliciter educti, quam religionem illibatam a maioribus suis acceperunt, hanc sanctissime colunt, sanctissime servant, & omni diligentia tuentur. Verum in urbe, quæ terra, marique omnibus patet, nihil etiam a confluentibus huc omnium regionum hominibus timendum erat? Imo timendum fuit, ac pestis, seu clam irrepsisset, toto animi nisu ex hujus religiosæ urbis finibus exturbanda, aut obex prætendendus, ne irreperet. In nulla æde, ut ut advenis tantum, ac maritimis hominibus propria, Petro Barbado Patriarcha, sacra ab iis, quorum non omnino integra, ac sincera Fides, sunt procurata, eidemque Patriarchæ ascribendum, quod nunquam posthac procurabuntur. Ea mihi referre contingit, quæ vobis notiora sunt, quibus narro, quam mihi, qui narro. Illud tamen omnibus notissimum est, hoc tam impensum religionis studium, quo amplissimus Præsul incensus, hanc tantam in ea custodienda vigilantiam, hunc imperterritum in ejus causa sustinenda animi vigorem meruisse, ut non solum gravissimorum Serenissimæ hujus Reipublicæ magistratuum honestissimis testimoniis commendaretur, magisque, promisso, ac præstito, quo opus erat, subsidio, animaretur, sed etiam Pontificis Maximi, qui tunc inter vivos degebat, Clementis XI. literis hac de re ad ipsum datis, extolleretur, & præmiis cohonestaretur. Quam mercedem a Deo consequutum Petrum Barbadicum, credendum est, qui hæc ab hominibus, quod Dei causam propugnasset, consequutus est.

Quidquid post hæc dixerò, frigere orationem necesse est. Dicenda

da tamen sunt omnia, quæ si non tauta sunt semel facta, at majora fortasse erunt, quod toties repetita, nisi etiam semel facta dicere malimus, quæ nunquam interrupta, continenti exercitatione ita facta sunt, ut a prima, qua Patriarchatum iniit, die ad ultimum vitæ terminum pertineant. Hujusmodi fuit in sibi commissum gregem impensus amor, cujus semper, alimenta etiam præstando, se parentem præbuit. Vidimus pauperulorum agmina ædium suarum fores semper obsidentia, tacita illa quidem, quæ noverant, idem esse optimo parenti ostendi, ac ab ipso juvari. Vidimus honesti loci viros, feminasque, paupertate pressos ad illum, cujus minime pudebat, quotidie accedere, ubi jam ipsi non sibi pauperes, sed sua potius apud ipsum deposuisse videri poterant. Et si autem plura videre concessum nobis nunquam fuerit, ignotumque omnibus sit, quot puellæ dotatæ, quot ære alieno levatæ familiæ, quot ejus sustentatæ impensis; hæc omnia tamen comprehendere ratione licuit, cum Præsulem nostrum videremus, hoc sacerdotio divitem, nihil ad rem, quod dubium unquam fuit nemini, attentum, non splendidiori cultu, atque victu, non pluribus, quam pro officii dignitate, servitiis ulum proventibus tamen parcere. Nimirum ea cogebat, quæ statim in pauperum sinum effunderet.

Idem illi tota vita studium, eadem nunquam intermissa sollicitudo ad Clerum, qui potior gregis sui pars, ad severiores Ecclesiæ canones instituendum. Præmiis, & quod boni plusquam præmium optant, singulari amore, & laudibus promeritos prosequutus, si quos minus dignos novisset, primum castigare verbis, deinde ab iis se adiri non amplius pati, ac demum inflictiis pœnis in ordinem redigere illi solemne. Præcipue vero ab ea, qua Patriarcha salutatus est, die, per undeviginti annos animum in id semper advertit, ne quem in Clerum allegeret, ne quem majoribus, aut minoribus sacris initiaret, qui moribus, ac literarum studio probatus, teste ipso ac iudice, non fuisset. Hæc gregi mala omnia cavendi vera ratio est, ne ovis ulla morbida sese insinuet in septa, si cures. Unica apud ipsam sacerdotii candidatis commendatio, castigati mores, & literæ. Frustra aliquis ad principum virorum preces, frustra ad interpositas consanguineorum obsecrationes confugisset, cum apud tam comem aliquin, ac facilem Præsulem, ubi de initiandis clericis agebatur, gratia, aut auctoritate valeret nemo. O dignum Pontifice pectus! O virum Deo carum, cui nihil Deo carius unquam fuit. Nobilissimas affinitates domus sua complectebatur: habebat carissimum fratrem, Joannem, Senatorem amplissimum, quem honoris causa nomino; unice fratris filios diligebat, quos ad patriæ honores adolescere, futu-

turos

turos aliquando maximum suæ gentis ornamentum, ex eorum indole sperabat; mutuis officiis sibi, ac suis, ut est civitatis conditio, ubi alterni cives innituntur, & invicem ab iis, quos sustinent, sustententur, quamplurimos devincire poterat, nihil tamen emendandi Cleri desiderio antiquius unquam habere voluit, & Pontificis officia omnibus præferenda necessitudinibus numquam non duxit.

Fateor equidem, ut non semper homines æqui sunt rerum æstimatorum, aliquibus difficilem, &, ut libere loquar, duriusculum visum fuisse. Hac tamen tanta morum severitate opus fuerat, ut id, quod unum in votis erat, consequeretur, opusque a clarissimis præcessoribus affectum tandem perficeret, ac sacerdotum collegia in hac præclarissima urbe pro nominis dignitate, non probis tantum, sed ornatissimis moribus aliquando essent. Ecquis autem id non Præsuli concederet, qui nihil sibi indulgebat, ut esset in alios severus? Ecquis non hoc illi daret, ut quam sui simillimos minores vellet sacerdotes? Debuerat quidem unum ipsius exemplum ad omnium mores formandos satis esse. Verum si quis nequaquam intellexit, cum in Pontificem suum intueretur, quid ab ipso Pontifex vellet, hic admonendus officii sui, ac metu etiam in ordinem cogendus. Hanc tantam animi constantiam, hanc tam assiduam curam exitus rerum satis probavit. Veneta diœcesis sacerdotibus tandem floret, sanctimoniz, ac literarum gloria ubique commendatis. Libere id, ac elata voce ad immortalem Petri Barbadici, Patriarchæ gloriam dicendum est, quod uno ore non cæteri solum homines fatentur, sed ipsius supremi Ecclesiæ Pastoris, ac Doctores oraculo confirmatum scimus. Nunciatum est enim nuper publicis Excellentissimi Veneti apud Sanctam Sedem Oratoris ad Senatum literis, universi Christiani gregis Pastorem, Benedictum XIII. hunc tam disciplinæ ecclesiasticæ studiosum Pontificem, cum hoc anno Jubilæi, quampluribus e Veneta ditione honestissimis viris ejus pedes adeuntibus, idem, qui hanc veniam illis a Summo Pontifice impetrarat, Orator Venetæ diœceseos inter ipsos sacerdotem digito monstrasset, composito ad sacrarum legum præscripta vestium, & totius corporis habitu oblectatum, compertum sibi, dixisse, Venetum Clerum eum jam esse, qui aliarum ecclesiarum sacerdotibus exemplo esse possit. Hoc debet Præsuli suo Venetus Clerus, ut a tanto Pontifice laudari meruerit, qui non a suis tantum, sed ab ipsis etiam veræ religionis hostibus adeo laudatur, & suspicitur. Audiit hæc paululum, antequam e morbo decumberet Patriarcha, & tanti Pontificis, ad emendandos, si usquam opus est, universi Cleri mores divinitus dati, testimonio lætus, bene impleti officii jam certus, tamquam fidem suam libera-

set,

set, nihil amplius sibi esse, cur viveret, intellexit, ac Deum tunc forte honestam a vita, ac tot laboribus missionem rogavit. Brevi certe ereptus nobis est, ut curarum, ac laborum præmium, quod jure credimus, in cœlis consequeretur.

Verum ita me ejus mortis, in quam hic casu incidi, mentio iterum perculit, ut memoria exciderint, quæ alia plurima de tantoviro dicenda erant, & dicenda mihi proposueram. Finem itaque dicendi faciam, cum præcipue mihi timor sit, ne se prodens dolor meus, qui lacrymas tenere vix possum, dolorem vestrum magis incendat, & exasperet. Salve tu, cœlo recepte, ut par est credere, Petri Barbadici spiritus, atque æternum nos gregem tuum amare desuper perge. Nos quidem pro nostra in te observantia, pro tuis in nos meritis una tui nominis recordatione recreabimur. Quoties dies hæc, quo magis acerba, eo semper honorata magis recurret, justa ad tumulum tuum persolvemus, & quibus licebit officiis, quam alte animis nostris tuarum virtutum, tuique nominis memoria defixa sit, nunquam non ostendemus.



I N F U N E R E  
MICHAELIS ANGELI  
G A S P A R E N I

*Congregationis Camaldulensis*

ABBATIS S. JOANNIS DE JUDAICA.

**S**I quantum rerum multitudine, & varietate ampla, nobilisque materies fuit ad dicendum proposita, laudatio scilicet Reverendissimi Patris Michaelis Angeli Gaspareni, hujus cœnobii Abbatis, suprema universæ præclarissimæ hujus Congregationis Camaldulensis paucis abhinc mensibus præfectura, hesternæ vero luce gloriosa etiam vita defuncti, tantum mihi temporis, ut me ad dicendum compararem, datum fuisset; spes quidem vobis esse posset fore, ut verborum copia, & sententiarum gravitate argumenti dignitatem exæquarem. Cum vero homini mediocri tantum aliquando exercitatione, nunc autem longa & scribendi, & dicendi desuetudine prorsus imparato circumscriptum paucis horis spatium ad tantum opus concesseritis; neque diu meditati aliquid, nec longa cura expoliti a me expectare quemquam fas est. Hoc tamen neque ipse, neque vos ægre ferre debemus, cum vestri Præfulis laudes oratore non indigeant, qui eas satis per se claras eloquentiæ luminibus illustret, ac se ipsis maximas dicendi artificio in majus extollat. In has propterea temporis angustias redactus, statim hoc animo constitui, ut silentio tanti viri virtutes præterirem, ne quæ ornare verbis minime possem, ea brevi oratione complexus detrivisse viderer, & dicendo obscurasse. Quæ virtutes omnium vestrum sermonibus celebrantur, prudens quisque assequetur cogitando, & judicando expendet, cum primum vestræ Camaldulensis Congregationis in ornando Gaspareno studium, deinde singulare in vestram Congregationem Gaspareni officium breviter ostendero.

Cum in ornando, augendoque Abbate suo Gaspareno mirificum Camaldulensis Congregationis studium declaraturus sim; summa velut facta, omnia in unum contulisse videri potero, si eo ad supremi honoris fastigium evecto, nihil ipsam sibi reliquum fecisse dicam, quod

quod ad ejus dignitatem amplificandam aliquando adderet. Est tamen aliquid, quod pluris æstimetis. Satis quidem suam erga tantum virum voluntatem Camaldulensis Congregatio significavit, cum ei supremo collato magistratu se totam in ejus fidem commisit: verum cum ante sibi probari ipsum voluit, quam supremum magistratum illi manderet, voluntatem suam erga tantum virum longe planius significavit. Magnum est, quod supremam præfecturam Gaspareno detulit, majus tamen quod eam longis laboribus demerendi locum præbuit. Quem enim honestiorem honoribus suis facere constituerat, hic, oportuit, suffragantium judicio, non partium studiis honorum omnium maximum deberet, cum adipisceretur. Apparebat in Michaele Angelo etiam tum juvene ea virtutis indoles, quæ magnum aliquid portendebat, ac pollicebatur, prodebatque se se ad ardua quæque capeßenda comparatum ingenium, ut statim eum ad rempublicam admovendum omnes dicerent, quo citius virtute id ambire inciperet, quod nunquam esset ullius favore captaturus. Minorem itaque magistratum, quamquam si cœnobii, ubi illum gessit, nomen & dignitatem pensare velitis, verbo quidem minorem, sed multorum cœnobiolorum majoribus re præferendum dicetis, Prior cœnobii Classensis ad Ravennam gesserat, cum Florentiam ad Angelorum, cœnobium minor pariter magistratus discedere jussus est. Adhuc ibi Priorem agebat, cum par gravissimis ministeriis jam visus, summo omnium plausu, haud ita vulgari exemplo, altero nondum Prioratu absoluto, Abbas renunciatur. Creditum fidei suæ ac vigilantiae monasterium Sanctæ Mariæ, quod appellant, de Follina statim accessit. Parum tamen in mediocri illo agri tarvisini cœnobio delituit, ubi magno illius animo impar theatrum, & exigua gloriæ seges, in rebus haud ita magnis curandis, ejus prudentiæ ac sedulitati subnasci poterat. Insigne propterea in beatis hisce æstuariis Sancti Michaelis de Muriano cœnobium, totius Ordinis Camaldulensis olim caput, quod licet ab omni continente disjunctum, ad omnes tamen terras, quo præclarissimæ Congregationis nomen pervenit, famæ celebritate pertinet, non tam amœnissimis hortis, magnificentissimis ædibus, instructissima bibliotheca, quam tot alumnorum literis ac pietate illustrium frequentia insigne, gubernandum suscepit. Hinc facto velut gradu ad Fabrianensis, cui cætera omnia, ob servatum ibi Sancti Camaldulensium institutoris ac parentis corpus, concedant, necesse est, a Fabrianensi ad Bononiensis Sancti Cosmæ cœnobii regimen profectus est. Quæ ubique præclare gesserit, missa hic facio, cum non quam bene de Congregatione ipse meritus sit, sed quam de ipso Congregatio, modo dicendum sit, quæ postquam tam illustrium

strium cœnobiorum insulis eum decoraverat, Bononia ad Romanam curiam universæ Congregationis negotiis procurandis, quæ difficillima, eademque splendidissima provincia est, evocavit. Hoc fundus gravissimo munere quidni ad suum Murianense cœnobium insulatus rediret? Redit ille quidem, & fortasse ut rediret, ab eis, ad quos spectabat, petiit. Quid enim illi petere non licebat statim ab expleta Romæ generali Congregationis procuratione? Aut quid aliud peteret sibi magis honorificum atque jucundum, quam illustre illud, suumque cœnobium? Petiit autem id temporis, ut quanti ejus dignitatem faceret, quantumque illud amaret, tunc ostenderet, qui ea erat animi moderatione, ut postquam abiisset suprema præfectura, cui se omnium votis destinari intelligebat, cum sibi illud jure suo sumere licuisset, alii esset sponte relicturus. Omnia ut animo præsumpserat, non sine numinis consilio accidere. Cum enim habita essent, quo tempore ipse Murianense regimen dimisurus erat, generalia Congregationis comitia, communi omnium gaudio, unanimi suffragantium consensu Generalis creatus, quod summum ea dare poterat, a vestra Congregatione non accepit solum, sed ejusdem beneficiis per longum tempus omnibus probatus, omniumque judicio meritis accepit.

Jam vero qui audistis, quo eum studio, quot amoris, existimationis, ac judicii sui argumentis Congregatio demerita sit, accipite tandem, qua diligentia vicissim in Congregationem officii sui partes impleverit. Ut quæ Gaspareni Reverendissimi propria sunt, fusiori aliquanto oratione prosequi possim, libens prætereo, quæ Abbatum nulli in hac tam bene temperata Congregatione non communia esse scimus, fidelem regularis disciplinæ custodiam, fidelem rei familiaris administrationem, quæ bonum quidem cœnobiorum Præsulem, non tamen magnum virum declarant. Verum ne ex illis quidem animi magnitudinem, qua Gasparenus præditus fuit, æstimetis, velim; quæ ipsius propria sunt, quod ædificia instauraverit, bibliothecas instruxerit, publica chartophylacia ordine digesta commodioris usus fecerit. Quamquam hoc postremum, quod antiquitatis reverentiam, & posteritatis utilitatem præsefert, & præteritorum simul, ac futuro- rum curam complectitur, quiddam est, quod præ cæteris dignum videtur, ad quod magno animo Abbas cogitationes suas aliquando conferret. Plurima sunt in Monachorum præsertim archivis, quæ factam, prophanamque eruditionem illustrare mirifice possunt, quæ non bonorum tantum curator evolvat, sed multo attentius, qui veterum temporum disciplinam expiscatur. Accedit quod ad animum virtutibus informandum multa ex antiquis monumentis, quæ illic

latent, exempla depromuntur, & non sine grati animi sensu, quod virtutis pariter est, antiqui benefactores suis vocantur nominibus, & quæ ab illis oblata donaria, quæ cœnobitis legata, cum maxima voluptate ab iis, qui veteres illas scrutantur tabulas, deprehenditur. Hæc autem longissimæ vetustatis velut promptuaria, nullus dubito, quin apud vos cum monasticæ, tum etiam totius rei litterariæ damno, aliquando interitura fuissent, nisi non quæ modo ætatem integra tulerant, sed semel etiam chartulas, in scriniis suis disponi diligenter posthac servanda tantus Abbas iussisset, operamque etiam ipse suam ad id nonnunquam contulisset.

Sed venio ad illud, quo uno quantum Congregationem vestram Michael Angelus Gasparenus amaverit, quo animo erga ipsa, erga bonos omnes fuerit, satis intelligitur. Aderat tempus, cum exacto jam legitimo supremi magistratus curriculo dandus erat Gaspareno successor, seu potius eligendus a Gaspareno erat, qui sibi succederet. Cum enim legibus suis, qui jus ferendi suffragii creando Generali habent, prohiberentur, quo minus prorogarent ipsi præfecturam, quod maxime eo rectore perquam contenti voluissent, palam profitebantur, alium nullum se illi suffecturos, nisi quem ipse suffici sibi mandasset. Coguntur comitia: nihil turbatum partibus, nihil fluctuantibus animis incertum: Gaspareno deferuntur omnium obsequia: ipse officii sui munere comitiorum Præses, ipse ob nominis sui reverentia comitiorum arbiter. Laude quæso sua in hac tanta voluntatum, studiorum, sententiarum consensione suffragatorum virtutem ne fraudetis; futurum fuisse tamen intelligite, ut levitati potius, quam virtuti hæc tanta voluntatum consensio imputari posset, nisi integer aliquis, ac magnus vir, ab omni partium studio vacuus, nisi Gasparenus fuisset, in quo uno tuti ac læti conquiescerent. Hic vero non eo bonus gubernator visus, quod navim tranquillo egit, sed in procelloso comitiorum mari secundis eo ventis usus est, quod bonus erat gubernator. Quotus enim quisque vel Monachorum, namque homines sumus omnes, cum de successore sibi dando disceptatur, si minus eum sibi optet dari, qui comparatione deterrima præcessoris desiderium exstingui non sinat, saltem eum sibi dari nolit, qui clarioribus virtutibus præcessoris gloriam obscurare possit? In admodum paucis Gasparenus est, qui iudicio aliquando creatus, iudicio non studio creari velit, qui suum in locum succedat, non se minorem, non sibi obnoxium proponat, qui petitorum pensari virtutes, qui Dei honorem, ac Congregationis bonum unice a suffragantibus quæri, jubeat. Cum autem hæc ab eo uno omnes expendi velle se dicerent, quem idem supremo magistratui parem sibi videri signi-

significaverat, statim consentientibus omnium suffragiis designatum, Reverendissimum Petrum Cannelum supremum universæ Congregationis moderatorem ipse Præses, animo vultuque gestiens, nobilissimi voti compos renunciat. Nondum tamen satis suo in Congregationem officio fecisse sibi visus est. Eundum iterum est Patribus in suffragia, creandique Visitatores. Reverendissimus Abbas Guido Grandus, auctore omnibus Gaspareno, primus Visitator creatus. Qui hos tantos viros novit, novit autem quicumque bonas literas amat, viros in tota literaria republica celeberrimos, atque optime de eadem meritos, & quæ dico, & quæ nequaquam dico, assequitur intelligentia. Neque melius aliquid, neque gloriosius accidere poterat Camaldulensi Congregationi, quam quod ab iis regi debet, quibus literator, aut melior apud eam nemo. Petrus Cannelus is est, qui in nullo literarum genere hospes, sublimissimam rerum divinarum sapientiam cum sacra, prophanaque eruditione miro nexu conjungit, quem multa moliri scimus in lucem aliquando emittenda, unde veteri disciplinæ lux splendidissima accedet. Guidonem vero Grandum, totius Italiæ nostræ decus, literatorum nulli tota Europa secundum, severioribus, atque amœnioribus literis, altissimarum atque abditissimarum rerum scientia, æque ac eruendæ ex remotissima antiquitate cujusque veritatis studio clarissimum, sua scripta omnium juris facta satis commendant. Gratulor vobis, religiosissimi Patres, quod nihil jam sit, cur majoribus vestris aut Ambrosium, cui vitæ institutum Camaldulensi cognomen fecit, invidetis, quem Cannelus vester, dum quæ ille literis mandavit in deliciis habet, tam bene & studiorum similitudine & morum sanctimoniam refert, aut Petrum Delphinum, suæ ætatis doctissimum, aut alium quemlibet majorem, minoremve Præfulem, cujus nomen annalium vestrorum monumentis celebratur. Hæc autem dum memoro, quid præstiterit Congregationi suæ Michael Angelus Gasparenus, satis apparet. Illa enim dum Reverendissimos Petrum Cannelum, & Guidonem Grandum Gaspareno debet, debet ipsi, quod literarum gloriam apud nationes omnes suo sibi jure jam vindicat, quod a literatis omnibus, omnibusque viris principibus gratiam iniit, qui dum honores illis mandatos audiunt, quos amant & suspiciunt, suum de magnis viris iudicium prærogativæ velut loco habitum putant, quod Camaldulensem comitia cuique religiosæ reipublicæ posthac exemplo esse incipient, sed id præcipue, quod suorum studia in dies vigeant, quod literarum etiam præsidium, otio depulso, ad monasticæ disciplinæ custodiam accedet. Majoribus dimissis comitiis nihil amplius videbatur esse, quod Congregationi præstaret Gasparenus. Præstitit tamen.

H h 2

Cum

Cum enim abeuntibus suprema præfectura cœnobii cujuslibet, cui præesse velint, detur optio, ipse insigniori quoque præterito, ut integrum esset Congregationi bene de ipsa meritis dignis præmiis afficere, maluit huc in tenue paucorum monachorum cœnobium secedere, ubi sibi, ac Deo vivere tandem liceret. Heu vos tamen miseros! Mors ex insidiis velut adorta, tantum virum tam de omnibus meritum, dum præsentissimo remedio contra levem morbum uti credebatis, interemit. Verum cum reipublicæ vestræ bono unice natus Gasparenus majora præstare Congregationi haud umquam posset, postquam eam velut de manu Canneto & Grando tradiderat, non erat cur sibi visurum diutius speraretis. Deo autem ut æternum viveret, suarum virtutum, totque susceptorum laborum præmium consecuturum vitæ vinculis tandem solvi, oportebat. Sospitet bonorum omnium largitor Deus magnos illos viros, qui vobis modo præfunt, ad vestræ Congregationis bonum, ac mihi liceat addere, ad rei literariæ ornamentum etiam, atque incrementum.

I N F U N E R E  
J O S E P H B O L A G N O  
N A V I A , E T M O S C O S O ,  
S. R. I. COMITIS &c.

*Cæsaris apud Venetam Rempublicam Oratoris.*

O R A T I O .

**H**onestius, ac pulcrius mortis genus inveniri nullum potest, Serenissime Princeps, quam si, quemadmodum fortissimi duces in acie, ita egregii viri, qui pacis negotia administrant, in magnarum rerum procuratione decedant. Non funebris itaque laudatio, sed gratulatio potius has decet triumphales exequias, quibus Serenissima Venetorum Respublica maximi omnium Principis, Augustissimi Caroli Sexti Imperatoris, Oratori Joseph Bolagno iusta persolvit. Quid enim tanto viro, qui se totum Cæsari addixerat, potuit optatius contingere, quam demandatam ab ipso provinciam non nisi cum vita deferere? Quid gloriosius, quam dum Cæsaris personam apud hanc Rempublicam gerit, in hujus tantæ Reipublicæ Cæsari conjunctissimæ, sibi carissimæ finem diem suum obire? Par est omnibus nascendi conditio, vitæ ratione distinguimur. Quid autem actus nostros, quibus vera hominis vita continetur, probat magis, ac commendat, quam ultimus vitæ actus, præcipue si, quod philosophorum monita suadent, in actu moriamur? (\*) Mittent propterea posteri querere, quantus vir fuerit, quibus Cæsaris administer præclaris muneribus fundus sit Joseph Bolagno, cum intelligent, legationem Cæsaris nomine Venetiis obeuntem fato concessisse. Hoc uno titulo nepotibus prodita ejus imago virtutum suarum, magnorumque ab eo gestorum magistratum fidem luculentissimam faciet. Si & mihi propterea aliud nihil propositum esset, quam ejus laudes oratione complecti; profecto, quando res ipsa loquitur, parcendum verbis ducerem, & ipsum, dum

---

(\*) Sen. ep. 8.

dum Invidiissimi Caroli Sexti Oratorem Venetiis ageret, Venetiis vita functum, ac publico funere magnificentissime Senatusconsulto elatum, contentus dixisse, idem initium, ac finem dicendi facerem. Sed posterorum etiam utilitas mihi spectanda est, quibus ex sapientissimarum rerumpublicarum institutis sub specie eorum, qui vita cesserint, laudandorum proponendum est exemplum, in quod inspiciant. Pluribus igitur agam, oportet, & qua via ille ad tantam gloriam contenderit, aperiam clarius, ut ejus vitam imitari possint, qui mortem gloriosam admirantur. In amplissimo autem argumento ut, qua maxima possum, brevitate, ac perspicuitate versem, Joseph Bolagno ostendam, nulli unquam erga se ipsum, nulli erga Principem suum, nulli erga Deum officio defuisse. Hæc cum docuero, tum demum de tanto viro integrum vobis erit existimare.

Posceret ratio, ut quo dicenda ordine proposui, eodem singula exequerer, cum præcipue aliter augefcere per partes oratio non possit, atque illustri, ut faciendum præcipitur, fine concludi. Verum a rhetorum præceptis recedere, & naturæ ordinem sequi præstat, & cum in Deum officia & prima ipsa per se sint, & prima semper clarissimo Bolagno habita, ab iis orationem auspicari, quæ omnium ille & erga se ipsum, & erga Principem suum officiorum initium, ac regulam esse voluit. Pronum autem erit omnibus credere, ex Hispania hominem, atque in media Asturia natum, in illa scilicet firmissima sinceræ religionis sede, quo ea se aliquando irruentibus undique Hispaniam barbaris veluti in tutissimam arcem recepit, antiquius nihil habuisse, quam Dei obsequium, & cultum. Religionis itaque a puero studiosus, iis promptam, quæ Dei sunt, senex etiam voluntatem servavit. Hoc autem eo difficilior puto, quod non semper eodem vitæ tenore usus, eodem tamen semper pietatis studio ductus est, ac seu privatim, seu publice, sive sibi, sive aliis vivens, cogitationem nunquam dimisit, cujus solo beneficio esset, & viveret. Cum propterea magis fortunæ, quæ appellamus, muneribus auctus est, & sublimius hominum favore evectus, tum maxime supremo benefactori Deo justa reddere sui officii esse credidit. Ex illo enim tempore, quem semper pietatis operibus deditum noverant, deditissimum vidisse testantur ii, qui eum ex longo ævo comitantur, nos quidem nostris oculis non sine magna omnium laude, atque admiratione vidimus, dum inter nos in hoc tanto fortunæ strepitu versatus est. Verene autem ejus aucta in dies religio sit, an ipse, qua a puero imbutus, eam in publicum tunc solum eduxerit, cum se cæteris exemplo esse debere intellexit, quid quæ-



quæritis? Magnum est si honoribus auctus inter plausus hominum ac studia pietatis cepit incrementa; nescio, an majus adhuc, si pristinam servavit tantum tot curis implicitus, atque in tam varia distractus. Quamquam satis hanc increvisse vel hoc unum argumento est, quod publico ex eo tempore non amplius abstinuit.

Sed inane quoddam religionis simulacrum est, cum ad aras provolutus meditatis carminibus Deum colis, nisi ipsum metuas, & dictis ab eo legibus obtemperes. Vos dicite, quicumque ejus consuetudine usi estis, qui diutius ejus lateri adhæsisistis, qui ejus vitam acriter, ut eorum solet, qui cæteris altius eminent, inspexistis, vos dicite, cui vicio Joseph Bolagno obnoxium, quibus perturbationibus in transversum abreptum, cujus rei potius, quam divinarum legum studiosum vidistis. Ita suæ fortunæ parem fatentur omnes, ut nunquam se efferrî ejus muneribus passus sit, ut magnas opes haberet, non ab iis haberetur, ut inter tot & fortunæ, & opum opportunitates (liceat id quoque, quod haud ita frequens in hac sæce temporum, ex totius familiæ testimonio dicere) a prima juventute eo nemo fuerit continentior, nemo temperantior. Quid referam quam lenis, quam humanus in suos, cum frequenti pro dignitate familia tamquam pluribus amicis stiparetur? Quam a mollibus abhorreret deliciis, quamquam imposita illi ab honore lauti, & splendidi cultus necessitate? Quam nunquam vel inter jocos, ac ludos a comi illa sua gravitate recederet, si quando inter sui fastigii sodales laxamenti aliquid fumeret? Quam omnia ille cum modo? Ex more tamen omnia, quæ facilia longa assuetudo reddiderat, sed ut his a longo tempore assuesceret, non nisi divinarum legum reverentia effecerat.

Illud vero unde ortum, quod se egenorum necessitatibus levandis tam promptum, tam præbuit liberalem? Nimirum meminerat, eos in divitum tutelam, ac fidem ab omnium domino, & parente Deo commendatos. Itaque Viennæ, dum illie esset, amplum & magnificum xenodochium suæ nationis hominibus excipiendis a fundamentis excitandum, omnique nitida, & pro loci ratione lauta suppellectile instruendum curavit. Quadam autem naturali in suos misericordia id factum suspicabitur nemo, qui supremis illum tabulis non Viennensi tantum Hispanorum xenodochio, ac in natali solo degentibus contrariis suis, verum etiam Neapolitanis, Mediolanensibus, quin etiam nostræ hujus urbis pauperculis alendis, extraneum extraneis magnam auri vim, quæ, si singula in summam redigas, plusquam mediocri conditione familiæ patrimonium conficiat, legasse sciat. Adeo non natura, non patriæ, non legum com-

mu-

munio, sed eadem, qua Deum diligebat, caritas tam Deo caros inopes illi conciliavit.

Hæc dum memoro, duo me eodem orationis filo consecutum tandem intelligo. Dum enim impleta ab Joseph Bolagno omnia in Deum officia doceo, simul & erga seipsum impleta ostendi. Neque enim ullum sanctius, & majori diligentia præstandum nobis ipsis officium esse potest, quam si nos mente, animoque ita comparemus, ut Deo dicto audientes, ejusque numinis quam observantissimi simus. Hoc ille cum probe nosceret, ad animi perturbationes cohibendas, ac velut frænandas, rationisque imperium in eas tuendum, ad virtutes, quantum homini licet, sibi omnes comparandas, moresque iisdem formandos, curam omnem, & studium præsertim contulit.

Sed aliud præterea fuit, quod sibi debere clarissimus Bolagno sensit. Natus erat familia nobilissima, unde illustres & toga & saggo viri omnibus seculis profecti sunt. Intelligebat propterea turpe sibi futurum, nisi avitam gloriæ hæreditatem, quam satis amplam a majoribus acceperat, ampliorem adhuc nascituris aliquando liberis transmitteret. Quamquam autem maximus paterno generi splendor a bellicis laudibus semper extiterat; homo tamen miti ingenio, & ad pacis artes natus statuit a literis, unde alterum illustrandæ gentis initium, novum sibi subsidium comparare. Oveti primum, deinde Salmanticæ, in illo scientiarum omnium apud Hispanos emporio, se in clarissimorum doctorum disciplinam tradidit, brevique studiorum curriculum emensus est. Tum vero ille, cui satis persuasum erat, non sibi tantummodo homines nasci, totum se ad juris scientiam contulit, qua una hominum inter se societas velut vinculis quibusdam constricta conservatur. Non legulejorum tamen formulis, ac forensibus cautionibus circumscriptam, leve opus, & fortasse viris nobili loco natis haud dignum, sed universam, quam late patet, jurisprudentiam, illam summorum Imperatorum curam, illum nunquam satis laudatum magnorum virorum laborem, statim complexus est. Neque enim aliarum literarum studio Joseph Bolagno se satis putasset, quibus adversus se ipsum tenebatur, officiis facturum, cum nulla sui facultate cessandum, sed omnes naturæ vires exerendas crederet. Celeri ingenio ad jurisprudentiam opus est? celerrimo ille ingenio discurrebat per omnia, & penitissima quæque quam citissime scrutabatur? Tenax memoria ad hoc studium afferenda? tenacissime semel comprehensa retinebat, memoriamque ea rerum multitudine alebat, qua perturbari, & obrui posse credidisses? Infinitum prope idem laborem poscit?

patientissimus laborum animus corpore etiam ad vigiliis, atque ad illud haud paucis letale operosum literatorum otium satis valido utebatur. Totus autem cum esset Joseph in jurisprudentiæ amore, lucis aliquid illi de suo allaturus, & philosophiam ipsi semper, ut tota cognita ratione naturæ sanctorum legum vim & clarius comprehenderet, & tueri facilius posset, & rerum gestarum monumenta adiunxit, quibus mirifice per totam vitam oblectatus, ut quæ facienda præcipiuntur, factis componendo, magis illustraret.

Hac tantarum rerum instructus scientia ne sibi quidem convenienter vixisset, si sibi vixisset. Vocatus itaque Salmanticam, rogatusque, ut publice de loco superiore vellet philosophiam primum, deinde jurisprudentiam interpretari, libenter provinciam iniit, eamque per plures annos ita gessit, ut non dicam aliis, sed sibi Joseph in suo munere explendo semper diligens & curiosus probaretur. (\*) *Cum jus civile docere, teste Tullio, semper pulcrum fuerit, hominumque clarissimorum discipulis floruerint domus; quanto pulcrius est Salmanticæ, in celeberrimo Hispaniæ gymnasio, imberbem adhuc juvenem, memoria firma, copiosa oratione, multijugi doctrina, de æquo, & legitimo, deque tota justis & injustis scientia apud frequentissimos auditores disserere, secretiora Institutionum, Pandectarum, Codicis, Novellarum excutere, obscura explanare, contraria non sine magnis scholæ acclamationibus inter se conciliare? Satis sorte sua contentus Bolagno hoc sibi, quod laborum, vitæ curriculum statuerat, cum in re hominum societati perquam utili animi, corporisque vires exerceret, & tantam inde gloriæ messem colligeret, ut nunquam majoribus suis dedecori, posteris autem honori futurus aliquando esset. Verum longe lateque per universa Hispaniæ regna cum tanti viri se fama diffudisset; nunquam interituri nominis Hispaniarum Rex Carolus II. ipsum rei publicæ admovere animum induxit.*

Exeat igitur tandem e scholæ umbra in publicam lucem Joseph Bolagno, & quem privatum admirati sumus, eundem cum potestate, & in magistratu admiremur. Parum dixero, si eum tantummodo officia omnia adversus suum Principem executum fuisse, dicam; imposita sibi Principis in subiectos ipsi populos officia servasse, dicendum est. Cum toti Insulari juri dicendo mittendus ex Hispania esset, qui Mediolanensem senatum suppleret, non opus fuit Regi sapientissimo per regna sua circumferre oculos, sed statim Salmaticensem tanti nominis professorem illum mittendum de-

(\*) *Grat.*

crevit. Joseph itaque triginta nondum annos natus, immatura ætate, sed matura virtute, Mediolanensis Senator designatus, iussus est in Italiam navigare, eo ducentibus fatis, ubi aliquando exstruatis Mediolani magnificis ædibus domicilium posteris suis perpetuum statueret. Nimius essem, si referre vellem, quam bene partes suas vir jurisprudentissimus in gravissimo munere expleverit, qua suavitate in judiciis ferendis severitatem temperaverit, ut tenaciorem justitiæ judicem nullum experta Insubria sit, ac nullum magis amaverit. Illud reticere non possum, quod sanctum illi, ac solemne tota vita fuit, numquam scilicet adeuntibus difficilem, calamitosis autem & supplicibus etiam facillimum, omnium preces audiisse, & curasse maxime, ne cuius præsertim humilis ac pauperis negotiis transigendis fori aut curiæ ambages, nedum potentium gratia, aut æmulorum invidia mora esset.

Ticinum Bolagno senatori cum provincia obtigisset (ad præclarissimas enim Insubriæ civitates regendas senatores Mediolano mittuntur) mirum quam lætus eam ille suscepit. Etenim fore sperabat, ut in ea urbe, ubi literæ omnes celebri gymnasio excoluntur, ad studia, quorum numquam amorem posuerat, quibus incrementa sua debere se noverat, totus ex intervallo redire doctorum virorum, quorum multa ibi frequentia, consuetudine aliquando posset. Sed Prætoris vigilantissimi providentiam, invictum animi robur, ingenii solertiam, inconcussam justitiam res alia gravior poposcit. Infederat Ticinensem agrum frequens latronum, ac grassatorum manus, neque illac vagari contenta, in Mediolanensem etiam agrum excurrerebat, ut si minus Ticino, munitissimæ urbi, Mediolano nunquam non patenti, & magnitudine sua eorum temeritati satis obnoxio posset jam metum incurere. Infesta itinera, direptæ domus, abacta pecora, sedibus suis agrestes depulsi: nihil sanctum, nihil tutum adversus eos, quibus rapto vivere ars una erat. Intentatum nihil Prætor relinquit, ut tot malis occurrat: præmia tradentibus proponit, dedentibus se dat veniæ spem, ab armatis circumveniri prædatores, eorum laqueas igne absumi jubet. Sed pessimum illud hominum genus, quibus desperatio animum addebat, inopia ingenium largiebatur, succrescente in dies multitudine, se insolentius gerit, & sedes identidem mutando omnem vim, atque artem eludit. Ea tamen fuit Prætoris constantia, ea in comparandis subsidiis, providendisque omnibus solertia, ea in mandatis dandis auctoritas, ut tandem iniquissimos humani generis hostes invenerit, ceperit, deleverit, uno judicio quindecim, cæterorum ductoribus, extremo supplicio, affectarum quin-

quinquaginta ad triremes damnatis. Tum vero gratiæ Prætori suo a Ticinensibus actæ, quod non solum hac animi fortitudine præfens inde malum depulisset, sed hoc edito exemplo futura etiam in tempora tantam pestem exterminasset. Iis postea laudibus, iis collegarum, atque omnium ordinum gratulationibus, cum Mediolanum abdicata Ticinensi prætura ad senatoria munia rediret, exceptus est, ut de subactis latronibus, & restituto Ticinensi agro triumphare videretur.

Cum non leve interea temporum calamitate detrimentum capisset in regno Neapolitano Principis patrimonium; ad id curandum idoneus Augustissimo Imperatori Carolo Sexto visus Joseph Bolagno, eoque Regiæ Cameræ Præfectus, Locumtenentem vocant, abire iussus est. Gravissima hæc est, & plena honoris & dignitatis procuratio, quam tamen multiplices curæ circumstant. Locanda vestigalia, exigendæ decumæ, publicorum reddituum ineundæ rationes cum multis, bona, quæ beneficiaria lege possideri solent, cum publica iterum sunt, pretio aliis addicenda, præterea jus iis omnibus dicendum, qui fiscum ipsum in jus vocant, cujus haud raro causa mala est sub bono Principe. Ingenio tamen, assiduitate, diligentia, animi firmitate omnibus Bolagno par ita omnia procuravit, ut imminutum Principis patrimonium, ac prope exhaustum restituerit, auxerit, locupletarit, & quod dictu magnum est, apud privatos nihil offenderit. Neque enim ut, quæ ejus erant, Principi vindicaret, ulli injurius, ulli onerosus, nimium molestus ulli esse voluit, qui sciebat, se tam justo, tamque miti Principi tandem probandum, si subditis Principi populis probaretur.

Ut Joseph optime de Neapolitano fisco promeritum magis honestaret, novisque augeret titulis Augustissimus Carolus, Viennam ad Imperii sedem arcessitum in Hispanicum Consilium adscivit. Mira est Caroli Cæsaris in legendis ministris sapientia, ut dubitari nequeat, quin dignus sit, quem tantus Imperator elegit. Quis autem Clarissimo Bolagno dignior, qui idem (\*) *Fabio Sabino*, sui temporis *Catoni*, virtutibus similis, nec *Domitio Ulpiano jurisperitissimo* eadè laude inferior, quemadmodum illi *Alexandrum Severum*, ita hic *Clementissimum Carolum* optimum facere poterat, nisi optimum invenisset. Novum autem hoc munus dignitate sua maxime illustre ideo illi gratius fuit, quod in eo Consilio Regenti Mediolanensium negotiis præcipue prospiciendum erat, illiusque civitatis, quam sibi alteram patriam, posterisque suis perpetuam sedem elegerat, bono consulendum. Quod ita quidem semper præstitit, ut erga ipsam caritas uni erga Principem fidei con-

(\*) *Æl. Lampr. Alex. Sev.*

cesserit, nihil præterea sibi præferri passa unquam sit.

Qua vero fide, qua longo rerum usu collecta prudentia, qua ingenii præstantia in Concilium Hispanicum adhibitus Joseph sui erga Principem officii partes impleverit, illud argumento sit, quod æquissimus rerum, atque hominum æstimator Carolus semper Augustus eum ad sanctius, supremum scilicet, quod appellant, Consilium Status evectum, statim ad Serenissimam Venetorum Rempubli- cam mentis suæ interpretem Oratorem legavit. Cum primum Venetias felix hoc nuncium allatum est, magna statim concitata est apud omnes hominis expectatio, quam ipse veniens non sustinuit solum, sed vicit. Ex illa die, qua urbem hanc cum tam magnifico apparatu ingressus est, tota civitas ejus humanitatem cum gravitate conjunctam, raram in tanto fastigio animi moderationem, magnificentiam singularem citra omnem quæsitæ ostentationis suspicionem admirata nunquam non est. Sed hæc quid juvat apud Senatum Amplissimum, qui mihi aures accommodat, referre, qui multo majora eories admiratus est, quæ nos, nisi obscure, & confuse, nescimus, qua in administrandis negotiis solertia, in conficiendis præstaret celeritate, quam facile omnia mente comprehenderet, quam longe ingenio prospiceret, qua voluntate, & sinceritate amicitiam, quæ Reipublicæ nostræ cum Cæsare intercedit, adeo aluerit semper, & foverit, ut jam sperandum sit, nulla re unquam fore, ut dissocietur. Eorum, quæ a me dicuntur, testis est illa de tanti viri salute sollicitudo, qua, cum primum a morbo decubuit, statim affectus est Amplissimus Ordo, testis hic tantus mæror, quo ejus funus pullatus prosequitur.

Quoniam vero eadem, quæ ejus vitæ, debet orationis esse conclusio, liceat mihi velut in orbem redire, ut illic desinat, unde initium sumpsit oratio. Quem ostendi, per totam vitam in omni erga Principem, erga seipsum, erga Deum officio constanter mansisse, quam bene officiorum omnium partes impleverit moriens, accipite. Cum defectus viribus, nullum amplius contra vim morbi subsidium a medicorum industria expectari posse intellexit, statim, quod postremi officii in Cæsarem fuit, quidquid officii adversus ipsum erat, in alium transtulit, & illius fidei, & dexteritati, qui in legationis rebus agendis socius illi fuerat, & secreta credidit, & sibi mandata transmisit. Tum vero eorum, quæ sibi debebat, momenta perpendens, se a mortalitate ad immortalē vitam asserturus, expiata conscientia, & Christianorum mysteriis munitus, subeuntem mortem nec metuisse visus est, nec doluisse. Quem vero se erga Deum præstitit? Ex gravissimi viri

testimonio mihi compertum est , ita se totum in ejus amorem effudisse , ut suavissimum filium Carolum , quem unicum unice diligebat , Mediolano , ubi in magistratu ordinario quæsturam cum magno omnium plausu gerit , Venetias acciri vœtuerit , ne ejus conspectus ipsum a cælestium rerum contemplatione averteret , ac paterna caritas , quo minus extremis horis secum ipse , & cum Deo esset , impedimento foret . Quæ alia præclare ab Joseph Bolagno facta , aut sapienter dicta cum hac poterunt tanta virtute comparari ? Parentes alios laudemus , quod liberos amarint ; laudandus Joseph , quod liberos amare aliquando desit . Dignum se filium , magnarum virtutum indole carum omnibus juvenem , jamdudum , quæ de ipso capta erat , spe , & expectatione majorem , quem semper in oculis tulerat , non modo videre moriens non optat , sed renuit , patrem hoc una ratione oblitus , ut Dei tantum possit meminisse . Hæc est fortissima hominis in Deum tendentis caritas ; quæ de ipsa triumphat natura , patremque , ac filium una victoria devicit , cum & sibi , & illi ultimos amplexus , & moribunda oscula negavit .

Post hæc neque ultra habeo , quod dicam , nec si haberem , dicendum arbitrarer , cum deceat immortale hoc Christiani hominis facinus ultimum a me commemorari , nosque omnes , qui a magnorum virorum vita alia etiam poscimus , non nisi Christianas virtutes in eorum morte admirari velimus . Faxit bonorum omnium largitor Deus , ut Augustissimus Imperator , quod pro ejus in Religionem promeritis , proque ea , quæ vobis , Patres Amplissimi , cum ipso amicitia intercedit , enixe precor , eos semper ministros , sicut habet , habeat , qui extincto Bolagno similes & jus populis dicere , & Principis patrimonium curare , & sanctioribus consiliis adesse possint , & cum ad vos semper Illustrissimo , atque Excellentissimo Joseph Bolagno pares Legatos miserit , eos reduces , incolumesque sua excipiat humanitate , vestraque in ipsum observantiæ , & voluntatis certus , adhuc certior eorum ore , & testimonio fiat . Tu vero , Carole Bolagno , quem tamquam præsentem honoris causa tandem compello , orbitatis vulnus ea , qua par est , virtute fortiter sustine . Quod tantum parentem amiseris , præsentem dolori est , immortalis gloriæ , quod habueris . Illatum tuis parentis tui obitu damnum facile reparabitur , cum ipse ad castigatissimum Patris exemplum ejusdem consilii , & adhortationibus , prudens dico , institutus , ac formatus , patrem ingenio , assiduitate , rerum agendarum pericia Cæsari Augustissimo reddes , & nobis aliquando Cæsaris beneficio redditurus .

I N F U N E R E  
BONAVENTURÆ FINARDI  
ABBATIS S. GEORGII MAJORIS

*Congregationis Casinensis .*

**Q**Uonam meo fato , Religiosissimi Patres , fieri dicam , ut qui Congregationis Casinensis virtuti ac felicitati mirifico faveo , idem illius tantum cladibus interesse , has vobiscum dolere , harum etiam alios in partem vocare cogar dicendo . Tertius intra hos haud ita multos annos præclarissimi hujus Sanguis Georgiani cœnobii Abbas effertur ; tertio ipse de extincti Abbatis laudibus apud vos in tanta clarorum virorum corona dicere jubeor . Id vero muneris plenum quidem honoris mihi æque nunc , ac olim , sed multo nunc , quam olim , gravius , multoque difficilius facile intelligo . Laudandus est enim Reverendissimus Abbas Bonaventura Finardus , cujus adhuc viventis nomen & ob gestum supremum Congregationis magistratum annalibus vestris , & ob ingenii laudem doctorum virorum literis immortalitati est commendatum . Quæ autem viro nominis immortalitatem jam consecuto digna erit oratio , nisi eadem nunquam interituro nomini pariter sustinendo par sit ? Ibit in sæcula , qua die , quo loco mortalitatem ille exuerit : a quo etiam supremis viventium officiis oratore laudatus sit , ibit in sæcula . Sed quæ me inanis cura sollicitat ? Quandoquidem tanti viri gloria jam suæ immortalitatis secunda obscurari impari laudatione non potest , ad dicendum aggrediar , & quæ de ejus virtutibus intra paucas horas meditatus sum , brevi oratione complectar . Atque ut certos mihi cancellos constituam , extra quos in parentissimum laudum suarum campum excurrere dicendo nequeam ; de Bonaventura Finardo Monacho primum , deinde de eodem Abbate , tum de ipso Congregationis Præsidente nonnulla , quæ scilicet eminent magis , ac sua se luce clarius produunt , conabor decerpere .

Qualem autem se Monachum gesserit Bonaventura Finardus , dum a me audire singuli cupiunt , ne putet ullus ab iis usque temporibus sumpturum me orationis initium , cum admodum adolescens Monachum in hoc ipso insigni cœnobio induit . Infinitus ne sim , qui esse bre-



brevis laboro, non ea dumtaxat, quæ tiro, sed quæ veteranus etiam in Casinenſibus caſtris geſſit diſciplinæ monaſticæ ſervantiſſimus, miſſa faciam. Quam primum viam ad evangelicæ virtutis apicem iniiit, hanc inſtitit ſemper, nunquam a majorum inſtitutis deſcendens, neque onerum, quæ haud levia cœnobitis toleranda, pertæſus. Sed quæ cum aliis, imo cum cœteris omnibus, qui Caſinenſi militiæ nomen dedere, communia ſunt, de Finardo haud æquum eſt memorari, cujus illud velut proprium, ac ſingulare cum laude prædicandum, quod arctiſſimo nexu ſanctiorum virtutum ſtudium cum literarum omnium amore, ſanctiorne, an doctior, dubium, conjunxit. Morum autem ſanctitatem qui Benediſtiniſ inſtitutis debuit, literarum ſtudia quodam quaſi hæreditario jure complexum, fateor. Natus enim fuit Bonaventura nobili ac vetuſta apud Bergomates Finarda gente, unde plures viri extitere ſuis, aliorumque ſcriptis clariſſimi. Quamquam ipſe, qui omnia familiæ decora volens abdicaverat, hanc velut avitam gloriæ hæreditatem ne adiſſe videretur, veritus, profanas literas attigit nunquam, ac ipſa rerum naturæ ſcientia, niſi qua viam ad altiora munit, cum primum licuit, repudiata, totum ſe ad ſublimiſſimam, quæ de divinis eſt, ſapientiam, ipſique affinem juris Pontificii diſciplinam contulit. Neque horum ſtudiis ſecreto tantum oblectatus eſt, ſed eadem in publicam lucem protulit, ac Venetiis, Neapoli, Romæ, in præclariffimis, & doctorum virorum copia referatiſſimis urbibus, quæ ſua erant placita, non ſine maxima ingenii, ac doctrinæ laude propugnavit. Sui enim inſtituti adoleſcentibus per quatuor & viginti annos, grande humani ævi ſpatium, per quatuor & viginti continentes annos e ſuperiori loco ſeveriſſimas diſciplinas tradidit. Quid eſt in literis conſenſcere, ſi hoc non eſt? niſi cui forte in literis conſenuiſſe minime Finardus videtur, quod novas vires ex ipſis ſumebat, & in dies firmior ad literarios labores prodibat. Sed abſoluto tandem altero ſexenii curriculo, quod a Clemente XI. Pontifice Maximo juſſus Romæ in Anſelmino Collegio inierat, cum plures ſacrorum Canonum ſtatim interpretes futuros, quorum aliqui magnæ tunc ſpei adoleſcentes, nunc conſummata doctrina viri me non ſine lacrymis audiunt, e ſua paleſtra dimiſſet, docendi provinciam & Finardus dimiſit. Ex eo tempore literis, in quibus per tot annos cum magnis corporis, animique laboribus verſatus fuerat, ad laxamentum curarum, & ad otii oblectationem uſus eſt. Creatus enim Abbas, & Monachis moderator datus, ſiquid temporis ex graviſſimis negotiis ſupererat, hoc celebrioribus juris Pontificii controverſiis, quas Romæ in frequentiffima, ac leſtiſſima doctorum virorum corona propugnaverat, ordine digerendis, atque in unum

unum corpus redigendis libens impendit. Affectum opus quamquam in tam varia distractus perficere nequaquam potuit, aliorum tamen cura ut suprema imposita manu in publicam lucem brevi emittatur, fore speramus.

At vero de Bonaventura Finardo Abbate orationem instituisse me, quod minime adverteram, intelligo. Idem & ipsi intelligite, auditores. Cum enim otii mentio facta est, de vestro Præsule, quem nunquam otiosum vidistis, nunquam vacuum deprehendistis, verba fieri, advertit fortasse nemo. Ideo autem in majori laude ponenda sunt ea, quæ dixi, tot scilicet, tantisque curis implicito Abbati, omnium majorum, minorumque rerum, ut a vobis ipsis accepimus, attentissimo tempore adhuc suppetere potuisse, quo se totum in literas abderet. Quanto vero illud præclarior, quod aliorum studiis provehendis intentior erat, quam suis? Quo enim erat ipse in literas amore, hoc cæteros, ac præcipue adolescentiores inflammare sui muneris esse duxit. Singulis propterea diebus modo hanc, modo illam scholam adire, atque inter auditores sedere solitus, acribus ac promptis ingeniis plaudendo, sponte currentes additis velut calcaribus incitabat, cum omnibus instar frequentissimi theatri Abbas esset, frequentioris Finardus. Sed alia sunt, quæ Præsul enixe procuravit. Multarum, magnarumque rerum scientia, nisi cum pietate in Deum, formandorumque morum solertia conjuncta sit, nescio quos spiritus facile affert, quos nisi frangas, universo cætui perniciës impendeat necesse est. Tantum malum ut suis caveret, totis viribus annixus Finardus sibi statim ab inita cœnobii præfectura ad Benedictinas leges castigatissimam vitæ rationem imperavit. Ita factum est, ut eandem unquam imperaret nemini, qui eam tamen ab omnibus diligenter servari voluit. Facile enim ad Præsulis exemplum mores quisque suos formabat, præcipue cum certantibus vitæ sanctimonia cum Abbate Monachis, ne hos nimium fatigaret sublimiori ad imitandum exemplo proposito, se quoque Abbas ferendorum onerum sedulitate vinci pateretur. Non est propterea cur quisquam miretur, quod sub tam miti Præsule adeo vixit regularis disciplina. Si qua est monasticæ vitæ austeritas, suavis illis Præsulis inter Monachos versantis, eorumque onera subeuntis moribus, placido illo oris habitu, blandis illis alloquiis miscere videbatur. Parvo itaque Præsuli vestro stertisse dicam (si parum est nunquam non aliis præire) fidelem monasticæ disciplinæ in iis, quibus præfuit, cœnobiis custodiam, haud parvo bonorum, quibus cœnobia sustentantur, administrationem. Quæ enim ad hoc collata hominis aut in literis vitam degere assueti, aut in colendis virtutibus exercitati cura levis videri potest, quam sua ipsius

ipſius levitas magno his animo viris moleſtiorẽ facit? Ut muneris tamen ſui expleret partes Finardus, hujusmodi curas haud gravatim ſubiit, tamque ſedulo, tam accurate œconomiz ſtudit, ut cœnobiorum, quibus præfeſtus fuit, utriuſque Brixiensis, nec non hujus San-georgiani patrimonium ſatis amplificaverit. Quam vero auri vim, cum illi ſacrorum ſplendor, locorumque, quæ Deus inſidet, honor præcipue cordi eſſet, impendi voluit, ut non niterent tantum deterſo, ſi quem vetuſtas induxerat, ſquallore, ac ſitu, ſed prætioſa ſupelleſtile etiam auferentur & ſui tituli templa, & his ſubje-ctæ minores Eccleſiæ, & ſacella. Singula ſi ingrediariſ, in iis ſolum ornaudis, in iis locupletandis occupatum ipſum, cæteris poſthabitis, facile credas.

Plura eſſent de Finardo Abbate dicenda, niſi ad aliqua de ipſo uni-verſæ Caſinenſis Congregationis Præſide delibanda ſatius eſſet, ne patientia veſtra abuti videar, properare. Qui Monachis Abbas exemplo fuerat, huic Abbatibus fuiſſe exemplo Præſidem, dicere prætereo. Præſtat enim non quæ Præſes geſſit, hic referre, ſed ea quæ fauſta ipſo Præſide, ſeu hominum, ſeu Cœlitum favore obtigere Congregationi. Cum enim laudi & gloriæ moderatoribus vertatur, ſi ad clavum ipſis ſedentibus aucta pluribus bonis reſpublica ſit, quis non laudari Finardum Præſidem putet, quod felicem illum proſpero Congregationis ſtatu prædicamus? Proh hominum fidem! Qui ejus nomine inſcribuntur Caſinenſis reipublicæ annales, quam læti, quam fauſtiſſimis ſucceſſibus memorandi! Neſcio an ab inſtituta Congregatione Præſes extiterit, quo magiſtratum gerente tanta aſ-fulſerit Caſinenſibus gloria. Tres S. R. E. Cardinales ampliſſimos, Finardo Præſide, Caſinenſis Congregatio, Italiæ finibus circumſcripta, atque haud ita alumnorum numero aſſuens, oſtentavit. Hujus quidem temporis monumenta unius obitus funeſtavit, ſed duorum, qui ſuperant, diuque ſuperaturos ſperamus, Leandri de Porzia, atque Angeli Mariæ Quirini, quos honoris, & amplitudinis gratia no-mino, firma adhuc ætas, ſpectata virtus, & quam in dies majorem ſibi, & parenti amatiffimæ colligunt, gloria, Finardini Præſidatus tem-pora percurrentes ſatis ex mœnore reficiet, eorumque plauſus inſtaurabit. Quam vero illud ſupremo huic omnium Præſecto illuſtre, quod adeo per ejus tempora literæ omnes cum amæniores, tum ſe-veroiores excultæ ſunt, ut tot prælorum ſaturis & diſcuſſæ vetuſtati tenebræ ſint, & lux altiffimis diſciplinis aſfulſerit, & ad omnes lite-rarum ſtudio inſtammandos ſub ipſius Præſidis auſpiciis prodierit tan-dem Bibliotheca Caſinenſis. Adde, hoc Præſide, monaſteriis eorum bona Commendatariorum voluntate, quod noſtris hiſce temporibus

nunquam alias contigit, restituta. Sed præ omnibus lætū illud ; & gloriosum : Benedicini fasti novis Sanctorum nominibus audī . Quod cum omnibus , qui huic militiæ nomen dedere , maximo gaudio fuit , tum præcipue hujus cœnobii alumniis , ejusque moderatori , quando Sancto Petro Urseolo per Beatum Joannem Maurocenum Urseoli consilio , Urseoli exemplo Monachum initia sua insigne hoc cœnobium debet .

Sed ut vela colligam , tempus me monet , quamquam longum æquoris spatium arandum restat , cursumque tranquilla maris facies , jucundissima nimirum ad dicendum materies suadet . Qui , quantusque Bonaventura Finardus fuerit , postquam non vobis , Patres Religiosissimi , qui penitus eum nostis , sed his , qui ad funus frequentes convenere , ostendere conatus sum , ad vos orationem convertere , vestrumque accepti ob tam cari Antistitis jacturam vulneris dolorem solari meæ partes essent . Sed cum oculos circumfero , vosque , cæterosque hoc mœrentium habitu intueor , simulque recordor , quam sereno vultu pro vestra humanitate , quamque hilari animo huc accedentem quemque excipere soletis , quam læti etiam huc appellere hi solent , sive ut ad amœnissimas hortorum vestrorum inambulationes divertant , sive spatiosissimas ac magnificas ædes sæpius quidem , sed nova semper cum admiratione visas circummeant , sive ut in instructissima bibliotheca libris , quos non alibi apud nos invenias , dent operam , sive ut sacris adsint , quibus tam splendido apparatu , ac pompa operamini , cum , inquam tam læta recordor ; conversa rerum facie , tantoque , quem vos , quem hi vestrum studiosissimi præ vobis dolorem fertis , ita exanimor , ut meo me officio imparem omnino sentiam . Finem itaque dicendi faciam , & Superos omnes precabor , ut vestrum singulos incolumes servant , & ab hoc præclarissimo cœnobio hujusmodi calamitatem æternum avertant .

# EPISTOLÆ.

AL 107219H

N. V.

## LAURENTIO GRIMANO

I.

*Trecentos fuisse senatores Romæ : præter hos alios etiam  
in Senatum convenisse.*



UM ad te superioribus diebus venissem, tibi gratulatum quod in summum ordinem cooptatus esses, amplissimo autem parenti tuo, quod senator ipse quinque filios senatores omnes extrema hac ætate amplecteretur; multa de senatu Romano, dum hunc cum Veneto conferimus, mutuis sermonibus jactata sunt. Quæ tunc exactius excutere minime est visum, ea nunc, quod ut facere aliquando vellem, rogasti, diligentius examinemus, quamquam aurificis statera ne modo quidem. De senatorum numero primum incidit sermo. Nihil certi de hoc afferri posse, ajunt nonnulli. Sub ipsum libertatis initium Brutus Consul diminutum Patrum numerum ad trecentorum summam explevit. Longe tamen plures insequentibus temporibus inter senatores adiecti. Nam Sylla rerum potitus quadringentos esse voluit. Auxit hunc numerum Julius Cæsar ad nougentos, quo extincto III-Viri supra mille senatores legere. Hac deformitate commotus Augustus tanta turba levavit senatum, eumque ad pristinum modum, ait Svetonius in Vita, & splendorem elegit. Hinc autem scrupulus injicitur, num sicut suus splendor, sic suus etiam modus, certus scilicet numerus senatui fuerit. Nullus dubito. Syllæ enim, & Cæsaris, ac III-Virorum acta nihil movent, ut credamus, licuisse salva republica magistratibus, quibus legendi senatus jus legitimum fuit, modo plures, modo pauciores, quod libitum inter civiles tumultus victoribus, Senatores deligere. Trecentos Senatores esse placuit primum regi Tarquinio Prisco, sub quo ait Dionysius Halicarnassæus l. 2. pag. 199. editionis Lypsiens. 1691. τότε πρῶτον ἰγένοντο Ῥωμαίοις τριακόσιοι Βουλευταὶ τῶς ὄντες διακόσιοι; tum primo Roma trecentos habuit Senatores, qui ducenti ante fuerant: placuit Bruto Consuli, qui diminutum Patrum numerum, teste Livio l. 11. c. 1. ad trecentorum summam explevit. Quoniam igitur, ab in-

telli-

testinis malis libera republica, ab ullis Censoribus nunquam legimus aut imminutum, aut auctum senatorum numerum, sed demortuis, aut loco motis alios subiectos tantummodo, puto jam tum lege sanctum, ut trecenti essent. Neque plures multo esse poterant, quando victor Sylla silentibus inter arma civilia legibus ad quadringentos auxisse novo exemplo memoratur. Sed nihil opus conjecturis. Idem Halicarnasseus l. VII. 461. ἡ δὲν ἦν τοι ἀποδείκνυσι φύλακας αὐτῶν τριακοσίους ἀνδρας ἐν τῶν πατρίων τῆς κρατίους τῆ καὶ πρεσβυτάτης, ἐξ ὧν ἡ δὲ βουλὴ σωζίσκην. Et nihilominus addidisti eis custodes trecentos viros, etate & virtute inter patricios eminentes, ex quibus senatus jam constat: ac paulo post p. 466. ἐνδυμνθέντας ὅτι ἡ βουλευμένη περὶ αὐτῶν πάρεσιν, ἀνδρες οἱ κρατίστοι τῆς πόλεως τριακόσιοι respiciant salutem deprecantem pro eo sanatum trecentos viros totius civitatis optimos. Quamquam vero trecenti essent senatores, non ideo trecenti tantum in senatum conveniebant, verum alii quoque, nimirum ii, quibus sententiæ in senatu dicendæ jus erat. Ita Livius l. XXIII. c. 32. Consules edixerunt, quoties senatum vocassent, ut senatores, quibusque in senatu sententiam dicere liceret, ad portam Capenam convenirent. Ii autem erant, qui magistratum gerebant, nondum tamen in senatum lecti. Habes, Senator amplissime, de numero Romanorum senatorum sententiam meam, quam si tuo ipse calculo probaveris, nemo jam non probet. Vase.

## E I D E M

## II.

*Abdicato magistratu, qui nondum senator, minime in senatum convenisse: Inter senatores eos etiam, qui magistratum non gesserant, adlectos. Pedarii senatores qui?*

**Q**Uæsiisse te memini, cum alius ex alio fereretur fermo, num illi, qui nondum senator ob magistratum in senatum conveniebat, venire etiam liceret, postquam abierat magistratu, tum etiam, num senator legeretur unquam, qui magistratum nullum gessisset.

Quod ad primum spectat, quod jus magistratui veniendi in curiam erat, idem non videtur illi fuisse, qui magistratum abdicaverat, nisi prius inter senatores cooptatus esset. P. Crassum, qui in senatum Quæstor venerat, post quæsturam non venisse, patet ex Valerio Maximo l. XI. c. I. Neque enim Q. Fabius Maximus objurgatus fuisset



set a Consulibus, quod colloquutus cum Crasso de iis esset, quæ secreto in curia acta erant. Hæc enim non nota Crasso non fuissent, si, quamvis non senator, in curiam venisset. Fabius autem per imprudentiam de his cum Crasso sermonem habuerat, ipsi curiam patere arbitratus, non ob gestam triennio ante quaesturam, sed quod triennio ante quaestorem jam a Censoribus in ordinem senatorium adlectum sibi persuaferat.

Quod vero ad alterum spectat, quamvis rector, & usitator veniendi in curiam via esset magistratus, indubium tamen est, patuisse in curiam aditum illis etiam, qui magistratum nullum gessissent. Singulis tantum lustris legebatur senatus. Quis autem non credat ex trecentis per integrum lustrum plures aliquando demortuos, quam essent ii, qui per idem tempus magistratus iniissent? Numerus itaque explendus erat ex iis, qui nullum magistratum cepissent. Ita Buteo dictator dictus ad legendum senatum, ut Livius refert l. XXIII. 23. *primum in demortuorum locum legit, qui curulem magistratum cepissent, necdum in senatum lecti essent, tum legit, qui ædiles, tribuni plebei, quaestoresque fuerant, tum ex iis, qui magistratum non cepissent, qui spolia ex hoste fixa domi haberent, aut civicam coronam accepissent.* Quisque igitur adlegi poterat in ordinem senatorium, qui bellica virtute, civili prudentia, ac morum probitate commendaretur, modo ætatem, ac censum senatorium haberet. Legebantur autem senatores plurimum ex equestri ordine, sed nonnumquam etiam ex plebejo. Qui vero nullo gesto magistratu in senatum legebantur, cum sententiam minime rogari solerent, ii sunt, quos pedarios appellabant, quod pedibus in aliorum sententiam discedebant. Parco pluribus. Cura valetudinem tuam. Vale.

## E I D E M

## III.

*Elevatus auctoritas A. Gellii de pedariis senatoribus, deque iis, qui in senatum non senatores veniebant.*

QUÆ tibi, Vir Amplissime, proxime scripsi, iis nonnulla erudite regeris ex A. Gellio l. 3. c. 18. unde tibi videri, ais, & magistratu functos adhuc venisse in curiam, licet nondum in senatum lecti essent, & eos, qui pedarii dicebantur, inde nomen sumpsisse, quod in curiam pedibus itarent, non quod pedibus in sententiam discederent. Meam, quam Gellii, pluris tibi esse aucto-  
rita-

ritatem, non ita sum audax, ut velim. Adverte tamen, quam multa turbat eo loco A. Gellius. Primo quod sive Gabius Bassus, sive Gellius inquit, qui *curules magistratus gessissent, curru solitos in curiam vebi*, non omnibus probatur, deceptumque seu Bassum, seu Gellium non unus existimat. Deinde quæ hæc consecutio verborum? *Qui nondum a censoribus in senatum lecti erant, senatores quidem non erant, sed quia honoribus populi usi quidem erant, in senatum veniebant, & sententiæ jus habebant. Nam & curulibus magistratibus functi, qui nondum a censoribus in senatum lecti erant, senatores non erant: & quia in postremis scripti erant, non rogabantur sententias, sed quas principes dixerant, in eas discedebant.* Bis ait, qui a censoribus in senatum lecti non erant, senatores non fuisse, quos nihilominus dicit in postremis scriptos. Seu in primis, seu in postremis qui scripti erant, senatores erant. Hos nondum senatores jus tamen sententiæ habuisse, affirmat, quos statim asserit, quia in postremis scripti, non rogari sententiam, sed in aliorum sententias discedere. Satisne videtur constare sibi A. Gellius?

Vidit hæc Gronovius, & corruptum locum arbitratus, una delera litera sanitati restituere conatus est. *Qui nondum a censoribus lecti erant, senatores non erant: & qui in postremis scripti, non rogabantur sententias.* Eorum, qui in curiam veniebant, duo fuisse genera, videtur voluisse Gellius significare, alterum eorum, qui magistratu functi, nondum erant senatores, alterum eorum, qui senatores erant, nondum tamen magistratum gesserant. Illi sententiam rogabantur, hi secus. At nonne, quæso, hæc pugnant cum superioribus, quibus confirmandis afferuntur? Etenim si, qui nullo gesto magistratu lecti erant in senatum, in postremis scripti, non sententias rogabantur, sed quas principes dixerant, in eas discedebant; cur non dicti pedarii, quod pedibus tantum sententiam dicerent? Mimographi etiam versus, quem statim Gellius laudat, Bassi commentarios propugnatne, an impugnât?

*Caput sine lingua pedaria sententia est.*

Si sententia pedarii est habentis caput sine lingua, pedarius est, qui non voce, quid ipse sentiat, dicit, sed in aliorum sequentiam pedibus discedit. Hujus autem vocabuli non hanc esse rationem Gellius opinatus est, quia cum senatusconsultum per discessionem fiebat, universi senatores sententiam pedibus ferebant. At pedarium dixit nemo eum, qui aliquando in aliorum abit sententiam, quam cæteroquin rogari, & dicere solet, sed illum, cui nunquam rogato sententia pedibus tantum dicenda semper est. Ex his, quid deferendum A. Gellii auctoritati hac in re credam, facile potes intelligere. Ipse nequaquam sententiam muto: quod volent, alii sentiant. Vale.

E. I.

## E I D E M

## I V.

*Locus Livii tentatus. Senatores appellati Patres conscripti.*

**T**Entandus est jam Livii locus, de cujus sanitate, quam nemo unus hactenus in dubium vocavit, quod ipse dubitarem, miratus es. Ita Livius lib. II. cap. I. *Patrum numerum primoribus equestris gradus lectis ad trecentorum summam explevit, traditumque inde fertur, ut in senatum vocarentur, qui Patres, quique conscripti essent: conscriptos videlicet in novum senatum appellabant lectos. Id mirum quantum profuit ad concordiam civitatis, jungendosque Patribus plebis animos.* Minime assequi me, haud diffiteor, quid sibi velint verba illa, traditumque inde fertur; ut in senatum vocarentur, qui patres, quique conscripti essent. Quid enim traditum inde est? Anne ut vocatu Consulibus & conscripti convenirent in senatum? Numquid minime vocati essent, nisi institutum hoc a Bruto transmissum posteris esset? Quam ob aliam causam novi veteribus senatoribus conscripti fuerant, nisi ut in senatum vocarentur? An vero id traditum, ut Consul in hæc verba senatum ediceret: *Qui patres, quique conscripti essent?* Sed edicti verba nobis servavit A. Gellius, loco proxima epistola laudato: **SENATORES. QUIBUS. Q. IN. SENATU. SENTENTIAM. DICERE. LICET.** Livius etiam l. XXIII. c. 52. *Consules edixerunt, ut senatores, quibusque in senatu sententiam dicere licet, ad pernam capenam convenirent.* Quid igitur a Bruto traditum, quod ad posteros deinceps pervenerit? Id puto ut senatores vocarentur *Patres conscripti.* Ad concordiam enim civitatis, jungendosque patribus plebis animos, sustulit statim Brutus discrimen omne inter novos, veteresque senatores, cumque sub regibus alii majorum, alii minorum gentium appellarentur, ut unius ordinis viri unius animi essent, nec quemquam præ aliis conditionis suæ puderet, instituit, ut Patres conscripti de utrorumque nomine vocarentur omnes. Dionysius usque a Romulo traditum hoc, retulit lib. II. p. 86. οἱ δὲ μετέχοντες τῆ βουλευτηρίας, Πατέρες ἑσγραφοὶ προσηγορεύθησαν, καὶ μέχρις ἐμὲ ταύτης ἐτυλχάνον τῆς προσηγορίας. *Qui vero censerentur in hoc concilio Patres conscripti nominati sunt, & sic vocantur nunc quoque.* A Bruti consulatu hoc, repetendum testatur hic Livius, cui major etiam hac in re videtur fides habenda. Deposito pignore, hunc esse Livii sensum, contenderem. Quomodo er-

L I

go,

go, ais, locus livianus legendus est? Mihi satis est, quod ulcus latere illic suspicor, indicasse; majorum gentium critici medicas manus adhibeant. Vis tamen, aliquid & ipse audeam? Quæ glossemata olent, quæque a mala manu videntur esse, deleto, atque ita legito: *traditumque inde fertur, ut senatores Patres conscripti vocarentur. Id mirum, quantum profuis ad concordiam civitatis, iungendoque patribus plebis animos.* Habes, Vir Amplissime, unum ordinem, unum nomen, nominisque hujus primam originem. Vale..

## V. CL. APOSTOLO ZENO.

### I.

*Locus Livii explicatus. Nullus senator aliquando Romanis, nisi qui patricius. Inter patricios cooptare populi erat.*

**Q**uidni Œdipum Davus consulam? Quæ aliis scribo, iudicio tuo prius subicere juvat, quam cum aliis communicem. Conciliandus mihi est Livio Livius, ex cujus pluribus locis cum planum sit, Romæ senatores non nisi a consulibus primum, deinde a censoribus lectos, ita ut amplius de hoc non videatur dubitandum; remanent tamen, quæ eruditos aliquos torqueant, verba Canuleii apud eundem, quibus videtur id universo populo tribui. Nosti illa l. IV. c. 4. *Hoc si polluit nobilitatem istam vestram, quam plerique oriundi ex Albanis, & Sabinis, non genere, nec sanguine, sed per cooptationem in patres habetis, aut ab regibus lecti, aut post reges exactos jussu populi.* Cur hæc crucem aliquibus figant, ipse non video. *Patres* eo loco, totaque illa Canuleii oratione pro patriciis dicuntur. Neque enim cum patribus stricte sumptis, sed cum patriciis res est, ac nobilitas non eorum erat tantummodo, qui patres, sed omnium, qui patricii. Sicut igitur eadem oratione *enubere e patribus* est enubere ex patriciis, sic cooptatio in patres est cooptatio in patricios, atque ut c. 16. ejusdem libri *transire a patribus ad plebem* est transire a patriciis, nec non l. VI. c. 42. *prætores unum e patribus creare* est creare e patriciis; ita hic *cooptari in patres* est *cooptari in patricios.*

Nemo ad Canuleii tempora in senatum a consulibus, aut censoribus lectus, qui non patricius esset: nemo, qui patricius genere non esset, inter patricios cooptatus nisi jussu populi.

Primum ne Romulus quidem, nedum Priscus Tarquinius, aut

re-

regum alius sibi hoc indulset, ut non patricios in senatum adlegeret, teste Dionysio. Ita hic l. II. pag. 111. de Romulo, & Tatío ἐδόξε τοῖς βασιλεῦσι, διπλάσιον τῷ προτέρῳ ποιεῖν τὸν τῶν πατρικίων ἀριθμὸν, πρακτὰ λήξαντας σὺν τοῖς ἐπιφανέστατοις οἰκίαις ἐκ τῶν ἄντερον ἐπονομασθέντων ἴσους τοῖς προτέροις πεωτέρους, ἕς, ἐκαλεσαν πατρικίους. ἔξ ὧν ἑκατὸν ἀνδρας ἕς αἱ φράτραι προεχειρίσαντο, τοῖς ἀρχαίοις βουλευταῖς προσεγραψαν. *Visum est regibus duplicare patriciorum numerum, equali numero e novis incolis ad priores familias illustres adle-cto, quos patricios vocarunt, atque ex iis centum viros curiarum suffragiis electos ad veterem senatorum numerum adscripserunt.* Ab Anco Martio Tarquinius Damarati filius vir fortissimus judicatus, ut idem l. III. p. 181. τὰ τε ἄλλα σημύων διετέλει, καὶ εἰς τὸν τῶν πατρικίων, τὴν καὶ βουλευτῶν ἀριθμὸν ὑπέγραψεν. tum aliis identidem honoribus est affectus, tum patriciorum, ac senatorum numero adscriptus. Tarquinius ipse deinde l. III. p. 199. ἐπιλέξας ἀνδρας ἑκατὸν ἐκ πάντων τῶν δημοτικῶν πατρικίους ἐποίησε, καὶ κατέταξεν εἰς τὸν τῶν βουλευτῶν ἀριθμὸν selectos ex omni plebejorum numero centum patricios fecit, & in senatorum numerum cooptavit. Primi consules l. V. p. 287. ἐκ τῶν δημοτικῶν τῶς κρατίστες ἐπιλέξαντες, πατρικίους ἐποίησαν, καὶ συνεπλήρωσαν ἔξ αὐτῶν τὴν βουλὴν ἕς τριακοσίους. *Præcipuos ex plebe allegerunt in patriciorum ordinem, & ex his senatum suppleverunt ad recentiorum numerum.* Ex his satis liquet; non prius aliquem genere plebejum lectum esse inter senatores, quam patricius legeretur.

Jus autem transferendi in ordinem patriciorum plebejos fuisse penes universum populum, quamquam nemini dubium puto, tamen habeo eundem Dionysium l. IV. p. 208. ubi hæc habentur de Servio Tullio, ut a regibus ipsis id juris populo permiffum appareat: *Ρωμαῖοι μὲν αὐτὸν ἐκ τοῦ δήμου μεταγαγεῖν ἠξίωσαν εἰς τὴς πατρικίους ἡφους ἐπιείκοντες, ὥσπερ ταρκύνιον τὸ, καὶ ἔτι πρὸ τούτου Νουμῶν Πομπήλιον. Suffragiis populi Romani e plebejo adscitus est in patriciorum ordinem, sicut Tarquinius, atque ante hunc ipsum Numa Pompilius.* Si eodem autem modo, quo Servius Tullius, & Tarquinius inter patricios coopatus est, distincte intelligimus, quod confuse, & permixte supra Historicus retulit, nimirum & Tarquinium adscitum inter patricios primum a populo, deinde inter senatores ab Anco Martio. Quin idem esse debet judicium de Numa Pompilio, dicendumque propterea statim a Romulo, populi Romani tantum fuisse in patricios, qui patricii non erant, adlegere. Neque contra hæc pugnat, quod Canulejus apud Livium dicit, coopatos aliquos in patricios a regibus. Etenim qui primi patricii fuere, hos a Romulo ipso lectos nemo non dicet, qui non antea centum sibi in consilium

patres adlegit, quam familias illustres ab aliis secrevisset, Halicarnasseo teste l. II. p. 82. τὸς ἐπιφανῆς κατὰ γένος, καὶ δὲ ἀρετὴν ἐπαγε-  
μῆνους, καὶ χρίμασιν ὥσιν τοῖς τότε καίροις, εὐπόρους, οἷς ἤδη πα-  
τρὶς ἦσαν, διαρίξεν ἀπὸ τῶν ἀσέμων καὶ ταπεινῶν, καὶ ἀπόρων. Illu-  
stres genere, & virtute celebres, opibusque, ut tum ferebant tempora,  
abundantes, quibus essent liberi, secrevit ab obscuris, abjectis, & ege-  
nis. Deinde p. 85. ὁ δὲ Ρωμύλος ἐπειδὴ ταῦτα διενέμιστος, βουλευτὰς  
εὐθὺς ἔγνω καταστήσασθαι, μεθ' ὧν πράττειν τὰ κοινὰ ἑμιλλῇ ἐκτῶν  
πατρικίων ἀνδρας ἐκατὸν ἐπιλεξάμενος. Romulus postquam hæc in de-  
centem ordinem redegit, consensim decrevit senatores creare, ut essent,  
quibuscum administraret rempublicam, centumque viros ex ordine patricio  
allegit. Multo minus hujus me sententiæ pænitet, quod ex Canu-  
leii oratione videtur id populi fuisse tantummodo post exactos re-  
ges. Quæ enim ab oratore dicuntur, quis ad fidem historiæ exi-  
gat?

Redeo in viam. Quod sub regibus factitatum, idem etiam sub  
consulibus. Supplerunt igitur primi consules senatum, at ex iis fa-  
milliis, quas prius suffragia populi patricias haberi, atque esse juss-  
rant. Utrumque Dionysius ait loco laudato, quamvis quid a quo-  
que factum sit, clare non distinguat. Livius alterius tantum memi-  
nit, suppleti a Consule senatus, alterum præterit, quod illud est,  
quod Canulejus ea oratione nobilibus exprobrat, scilicet eorum ali-  
quos patricios esse jussu populi. Id signanter paulo ante dixerat de  
gente Claudia: Claudiam certe gentem, post reges exactos, ex Sabinis  
non in civitatem modo accepimus, sed etiam in patriciorum numerum.  
Nullum igitur, ut omnia in unum conferam, facessat negotium Li-  
vii locus asserentibus, non ab aliis, quam a consulibus, aut censo-  
ribus lectos senatores. Sed manum de tabula, inquis. Non teneo te  
pluribus V. CL. Cura ut valeas. Vale.

## E I D E M

## I I.

*Duo Ciceronis loci de Senatorum electione explicati.*

**Q**uod te sæpius consulo, boni consule, vir ornatissime. Hæret  
aqua explicantibus & Tullii locum, unde iterum dubitandum  
videtur, censorumne, an universi populi esset senatores lege-  
re. Ita pro Sextio Cicero: *Majores nostri cum regum potestatem non su-  
lissent, ita magistratus annuos creaverunt; ut consilium senatus Reipublicæ*  
pro-

*præponerent sempiternum : deligerentur autem in id consilium ab universo populo , aditusque in illum summum ordinem omnium industriæ pateret . Verum aut locus hic haud ita valde arduus , & difficilis , aut lolo videretur ipse dicar . Qui magistratus , saltem majores , gesserant , ii a censoribus non solum in senatum legi solebant , aut poterant , sed omnino debebant . Livius l. XXII. c. 49. octoginta senatores , aut qui eos magistratus gessissent , unde in senatum legi deberent . Quos igitur universus populus creavit magistratus , dici non potest , eos in consilium senatus delegisse ? Hæc , quæ laudabilior via est , cohortatur Cicero cives suos , ut in senatum venire velint , per magistratus . Deligitur enim quisque in senatum , simul ac magistratus creatur , unde jus illi , ut a censoribus legi debeat .*

Quoniam vero Tullium in manibus habemus , miror , quod nemini in mentem venerit quærere , num etiam senatusconsulto senatores aliquando fierent . Philippica enim quinta in hæc verba sententiam dicit Cicero : *Censeo decernendum C. Cæsarem C. F. Pontificem , Pro prætorem , senatorem esse , sententiamque loco prætorio dicere .* Sed factum singulare , illis præsertim reipublicæ temporibus , nihil evincit . Ornando , honorandoque adolescenti Octaviano nullam legum rationem habendam , censuit Cicero . Placuit & hoc propterea , ut senator optimo jure haberetur , ac si a censoribus lectus esset . Plura scriberem , si te vacuum crederem . Vale .

## N. V. FRANCISCO TEUPOLO

### I.

*Veteres nummos Venetorum esse omnes ejusdem generis : facilius alibi , quam Venetiis inveniri .*

**D**E veteribus Teupolorum Principum nummis non alia a me dici possunt , quam quæ universe in omnes Venetorum veteres nummos conveniant . Et hi enim cum aliis iidem omnino . Singulos itaque proferri forte ab re fuisset ex Teupolo cimelio , nuper gentilis tui Joannis Dominici supremis tabulis in familiam tuam illato , quod ob magnam Romanorum numismatum vim omnibus est admirationi , nobis ob veterum nostratum denariorum accessionem etiam voluptati . Neque ipse dubito , quin hanc quoque celeberrimi musæi partem , sicut alias alia , pro tua , amplius.

plissimique patri tui erga me humanitate, lustrandam mihi præberi, iustus es. Sed ad propositum finem de meo, quæ satis essent, afferre posse mihi visus, nolui alienas merces in pergula exponere. Aliquot enim Venetos priscorum temporum nummos Roma in patriam ipse detuli, fore sperans, ut his, aliisque, quos Venetiis invenissem, locus esset in nostra bibliotheca, quam nulla re, quæ doctis æque, ac eruditis grata esse possit, non instructam vellem. Sed hic ne uno quidem factus sum ditior. Rarius enim Venetiis, quam alibi inveniuntur. Mirum hoc nemini debere esse, ait V. Cl. Ludovicus Antonius Muratorius quadam ad Petrum Catharinum Zenum τῶν μακρίτων epistola, quæ cum aliis ad eundem præstantium virorum in unum volumen compadis in eadem nostra bibliotheca servatur. Quæ enim terra abduntur, fieri potest, ut aliquo casu effodias, quæ voracissimum mare, quod nostram hanc urbem interluit, ac cingit, absorbit, qua ratione expiscaberis? Quamquam hoc etiam tantæ apud nos raritatis in causa fortasse est, quod ad novam cudendam vetus sæpius moneta conflata est. Ut ut tamen se res habeat, satis nummorum antiquorum ad nos pervenisse existimo, ut quæ ad Mattapanem, cujus generis Teupolæi nummi sunt, pertinent, explicare, ejusque fata enarrare possimus. Illius utramque faciem inspicere in Petri Ziani nummo, qui in subiecta tabella primum locum tenet, quo antiquior neque apud me, neque apud alios, quod ipse noverim, extat. Hunc cum vides, majorum tuorum, utriusque Principis Teupoli, Jacobi, ac Laurentii nummos vides. Quamquam & hos altera facie addi, volui, ac alios nonnullos præterea, qui iis, quæ de Mattapane dicenda sunt, lumen aliquod afferunt. Ex gazophylacio potissimum tuo forte erit aliquis, qui justam universæ rei nummarie Venetorum historiam aliquando conscribat. Ad hoc mihi neque satis virium, neque otii abunde est. Vale.





## E I D E M

## II.

*Nummum Petri Ziani vere esse mattapanem, ejus meminit Dandulus.*

**A**micus meus, cum in vivis degeret, Petrus Catharinus Zenus, in suis ad Joannis Casæ epistolam, quæ XV. est ad Carolum Gualteruccium, notis, Zianæum nummum credidit mattapanem esse, quem Andreas Dandulus in suis Chronicis refert, primo cusum ab ejus gentili Henrico Dandulo. De hoc ita Historicus lib. X. c. 3. p. 5. Subsequenter Dux argenteam monetam, vulgariter dictam Grossi Veneziani, vel Matapani, cum imagine Jesu Christi in throno ab uno latere, & ab alio cum figura S. Marci & Ducis valore viginti sex parvulorum, pri-

*mo fieri decrevit.* In Zeni mei sententia ipse quoque sum. Typum, quem Dandulus describit, non alius præfert, quam Zianæus nummus. Præterea cum ait Historicus, mattapanem primo cūsum ab Henrico Dandulo, satis declarat, hunc eum esse, qui *deinceps* sub aliis Principibus usque ad sua tempora cūsus fuerat. Non alius ideo a nummo nostro mattapanis est, quem a Petro Ziano, qui anno MCCV. Henrico Dandulo successit, ad ipsum Andream Dandulum, qui Dux renunciatus est anno MCCCXLVII. eodem metallo, modulo, ac typo, singulorum, qui fuerunt, Principum nomine signatum novimus. Tam longum nummi hujus ævum una causa fuit, aut ego fallor, cur Dandulus memoratu dignum duxerit, a quo primum percussus fuerit. Neque enim ipse, aliquid gloriæ gentili suo Henrico, Græci Imperii victori accessurum, arbitrari unquam potuit, quod primus nummulum hunc percuti jussit; sed gratum fore legentibus credidit, ejus originem noscere, quam ab antiquis temporibus repetendam sciebant, atque eo magis, quod nummo hoc nostri a priscis temporibus ad commercia cum exteris utebantur. Alii, Andrea Dandulo Duce, erant Venetis nummi. Ipsiusmet Andreae minorem nummum exhibet tabella nostra, qui dimidium mattapanis videri potest, forma tamen elegantiori, ac typo aliquantulum vario. Habet enim Ducem ad sinistram S Marci, præterea concinniori toga, & quæ suæ dignitatis est, indutum, ac coronatum pileo ducali, qui ab occipitio leviter assurgit. Sed Francisci Danduli, qui aliquot ante Andream annis patriæ Principatum consequutus fuit, alium nummulum vides, diverso omnino typo, tam elegantem, ut appareat & illis temporibus peritos artifices officinis monetariis apud nos nequaquam defuisse. Cur igitur adhuc cudi placebat rudem illum, & male figuratum superioris sæculi nummum? Nempe illum fuisse credendum est, cujus probitas cognita, & minime ideo suspecta exteris esset, ut cæteri magis elegantes urbis, & Venetæ ditionis finibus continerentur, ille vero ad omnes gentes deferretur. Hinc factum est, ut plusculi alibi, quam Venetiis inveniantur. Quam hæc duo commendant, nullam autem præter nostram commendant, vetustas, & vulgatiores ad res contrahendas usus, ea moneta est, cujus primum auctorem Dandulus in suis chronicis prodendum existimavit. Pergemus porro alias. Inter mattapanes interim majorum tuorum nummos recensere, eorumque originem refer ad Henricum Dandulum, qui Dux creatus est anno MCXCII. indubio alterius Danduli testimonio. Vale.

## E I D E M

## III.

*De valore, ac nomine nummi Veneti.*

**P**AUCA de valore nummi nostri, ac de ejus nomine. Mattapanem sex & viginti parvulos valuisse, ait Dandulus. Si parvuli isti minutissimi illi nummi sunt, qui in desuetudinem abiire, ac duodecies ærea moneta, quam *solidum*, aut *marculum* ab impressa S. Marci figura appellamus, continebantur, *bagattini* dicti, longe abest mattapanis ab eo, quod modo pretii illi est: si parvuli sunt ipsi nummi ærei, seu solidi nostrates, qui viceni in singulas libellas Venetas numerantur, nimium exsuperat pretium, quo nunc æstimatur. Solidi autem a nostris parvuli etiam appellantur, nihilque frequentius in mercatorum ore, quam *lire di piccoli*. Libella argentea videtur quidem in locum mattapanis successisse, qui nunc tamen sedecim solidis penditur. Quem vero id torqueat? Aliud olim, aliud ad præsens argenti pretium, neque vacat utriusque rationem inire, neque res hæc brevi codicillo perstringenda.

Quid significet, ac unde deductum sit nomen mattapanis, nemo quærat, nisi ineptire qui velit. Dictum etiam *Grossum*, testatur Dandulus. Grossus manet adhuc nomine tamen, non re. Ducatus enim argenteus in quatuor & viginti grossos, solidorum in singulos quinque, dispertitur, qui nusquam tamen cuduntur. Postremis his temporibus terebatur manibus quædam parva moneta argentea, haud recens cusa, solidorum quatuor, grossi, seu grossuli dicta, *Grossetti*. Conflata modo est, & in aliam versa. Nihilominus nomen usurpatur, & multa venalia tot grossis in libram indicantur. Hæc si pluribus, persequar, abuti tempore videbor. Vale.

## E I D E M

## IV.

*Alium aliis temporibus ejusdem monete typum fuisse.*

**Q**UO tempore excudi cœperit mattapanis, traditum est ab historicis, quo idem tempore cudi desierit, conjectura assequi conabimur. Inspice numisma Michaelis Steni, qui Dux anno  
M m MCD.

MCD. creatus est. Mattapanem facile agnoscis, sed quanto prioribus politiolem, & elegantiolem, quamque illi nummulo Andreæ Danduli, qui dimidium mattapanis videtur, similem! Dux facie est in alterum latus versa, concinnius indutus, & coronatus. Lemma est quoque in averſæ partis ora, cum priores nummi omni epigraphæ careant. Quis Ducum primus hac varietate mattapanem cuderit, ignoro, neque enim ullum vidi unquam hujus generis, nummo Andreæ Danduli recentiolem, ante Michaellem Stenum. Parum a vero abludemus tamen, si paulo post Danduli Principatum id credamus contigisse. Ex allato ejus nummulo satis apparet, jam tum fuisse, cui prior ille rudis mattapanis forderet, & ab eo tempore cogitatum de nova mattapanis forma, quæ priorum temporum inscientiam minus oleret. Fortasse ideo a Joanne Gradonico cœpit nova hac forma nummus hic percuti. Eodem ipsissimo typo, quo Steni, & Francisci Fuscari nummum vidi apud V. Cl. Apostolum Zenum, qui pro ea, quæ mihi cum illo intercedit, amicitia, ut librorum & lectissima sua bibliotheca copiam mihi nunquam non facit, ita & gazæ nummaria sua nihil non libens depromit. Quare a Nicolao Trono, qui tertius est a Francisco Fuscaro Dux, tandem puto mattapanem cudi desiisse. Hic enim novam monetam, ut narrant historici nostri, argenteam cudi voluit, sui ipsius imagine ad vivum impressa, quam ab ejus nomine *tronum* appellarunt. Hanc quoque mihi idem Zenus ostendit, cum aliam minusculam ex ære eadem tamen imagine ipse tantummodo habeam. Apud finitimos vulgandam illam, curasse Venetos, credo, cum adhuc Vicetiæ, & Veronæ *tronus* libella nostra appelletur. Hoc Principe extincto, lege statim cautum est, ne alius nummos propria imagine signaret, ac forte cum commercia minus procederent ob novos, ideoque suspectos nummos, reditum est ad mattapanem. Nicolaus alter, Marcellus scilicet Troni successor, mattapanem excudi jussit, majori modulo, quam prior, typoque aliquantulum diverso, sed quem ab eo esse, cognoscēs. Dux ad sinistram ante Sanctum Marcum in genua procumbit. Parte altera imagini Salvatoris nullæ litteræ adscriptæ sunt: lemma est in circulo. Additis characteribus IC. XC. imagini Servatoris nostri, levi etiam aliqua in lemmate variatione numisma est Andreæ Vendrameni. Usque ad Andream Gritum, qui XVI. sæculi anno tertio & vicesimo Dux creatus est, idem nulla varietate cufus est nummus. Vide tabellam exhibitam. Post hunc Principem, qui forte in manus veniunt, novi omnino nummi sunt, quorum alii simul cum mattapane jam sub aliis Principibus ante ipsum Gritum cudi cœperant, & sub ipso Grito cudebantur. Antiquitatum nostrarum studiosi,

dioli, quem protuli nummum a Nicolao Marcello percussum, ideoque & ejusdem typi alios ab aliis Principibus, eum esse, qui *marcellus* ab ejus nomine dictus est, per Monetam jurant, at *non ego credulus illis*. Quid marcellus fuerit, ignoro, sed ad decem solidorum summam significandam, aliquando uti adhuc hoc nomine vulgus, scio, cum a me prolatus Marcelli nummus quatuor & viginti solidorum summam conficiat. Ipse & hunc, & qui deinceps usque ad Andream Gritum huic haud multum absimiles excusi sunt, mattapanem vocatos, opinor. Paulo post Principis Griti obitum Joannes Casa Nuncium Apostolicum Venetiis agebat. Conflatis jam omnibus illius typi nummis, ut arbitror, manebat tamen nomen, quod ille usurpat, quo non alius certe nummus significari poterat, quam ille, de quo loquimur. Habes igitur mattapanis ortum, & interitum, cujus, si in re haud grandi grandibus verbis joculari me finis, tres epochas. Nimisne assurgo? tres ætates facio: primam mattapanis veteris, per sesquiscæculum ab Henrico Dandulo ad Andream cognominem, alteram novi, a Joanne Gradonico ad Christophorum Maurum per annos centum, tertiam restituti, a Nicolao Marcello ad Andream Gritum per annos quinquaginta. Qui hæc riserit, meliora & certiora proferat. Vale.

## E-I D-E M

## V.

*In Veneto nummo omnia Græcanice.*

**A** Genunc Teupolzi, seu mavis Zianzi, ac universe utramque mattapanis partem adversam, & aversam tandem consideremus. Cum omnia tam rudia, tam male figurata vides, temporum incertitiam, atque artium interitum incusa. Certeum omnia Græcanice. Quod Veneti imaginem D. Marci in nummis suis effinxere, sumptum a Græcis, quibus mos fuit Sanctorum, quos præcipuo cultu venerabantur, imagines in nummis effingere, ut advertit Cangius diss. de infer. ævi numism. c. XXXI. Quod Sanctus Marcus vexillum Duci porrigit, ad Græcorum pariter similitudinem inventum, apparet, in quorum nummis crucem, labarum, narcethem aut tenent, aut ab altero accipiunt Imperatores, quemadmodum ab Archangelo Michaelē accipit Isaaci Angelus. Quod uterque S. Marcus, & Dux stantes, quod uterque non lusca, sed plena facie, quod Dux barbatus, & togatus, omnia ex Græcorum moribus, ut patet eorum nummos

mos apud Cangium de Famil. Byzant. inspicienti. Aliqua deinde cultiori arte, & ex propriis moribus emendata: aliqua ad nostra usque tempora pervenere. Neque alicui mirum, quod ad dexteram Dux, Sanctus Marcus ad sinistram locatur. Ex Latinæ etiam Ecclesiæ disciplina locum sinistram digniori datum aliquando, novimus. Romæ in Basilica San-paulina in aræ majoris abside me vidisse, memini, ex opere musivo ad Servatoris nostri dexteram S. Paulum, ad sinistram S. Petrum. Apud Græcos etiam nemini dubium, quin id ferret consuetudo. In eorum numismatis non solum filii ad patris dexteram, & uxores ad dexteram maritorum, sed ad Cœlitum dexteram Imperatores. Sic Archangelus Michael sinister est Isaaccio Angelo in utroque ejus nummo, sic Deipara ipsa ad sinistram est Joanni Comneno, nec non Romano Diogeni in duplici nummo. Obsoleverat hæc consuetudo sæculo XIV. ut apparet ex minori nummulo Andree Danduli. Servata nihilominus est, puto ad antiquitatis reverentiam, in melioris formæ mattapane, qui deinde cufus, ut ex Michaelis Steni allato numismate. Sed tandem Nicolao Marcello Principe ad lævam Divi Patroni effingi cœpit imago Ducis. Illud vero quam Græcis usitatum, quod in averfa nummi parte Reparatoris nostri effigiem cudendam curarunt adscriptis literis Græcis IC. XC. Quem primum omnium nummum hisce adscriptis literis affert Cangius, est Michaelis Rhangabe, qui salutatus est Imperator anno DCCCXI. In nummis Zimisceanis, ni fallor, cœpit etiam cudi Salvator in throno sedens. Quod deinde nostris nummis additum in circulo GLORIA TIBI SOLI, ex Græcis quoque desumptum. Cangius inter numismata Leonis Isauri unum refert, ubi Christus in cathedra sedens cum hac epigraphe TIBI SOLI REX REGNANTIVM, quamquam Leonis non esse credit, ac manifestum est ad inferiora tempora pertinere. Unde autem omnia ad Græcorum morem? ais. Cangius Dissert. c. XXVIII. Adeo, inquit, *Veneti Byzantinis Augustis potissimum addicti, ut eorum non mores duntaxat, & habitus, sed & monetarum typos amplexi sint.* Ea aliquando inter Venetos, & Græcos Imperatores amicitia intercessit, ut Venetorum Duces præcipuis aulæ Byzantinæ honoribus audi sæpe sint, & uxores sæpe ex Augusta domo duxerint. Sed Henrici Danduli, ac Petri Ziani temporibus Veneti metuendi erant Græcis, quin ipsos, una cum Francis, jam Imperio expulerant. Græcanici igitur nummorum nostrorum, qui tunc cusi sunt, typi una ratio est, quod artes apud nos aliæ nullæ, quam quæ huc Byzantio aliquando delatæ, hic jam consueverant. De his satis. Vale.

## E I D E M

## VI.

*In nummi inscriptione non alia, quam Divi patroni, & Ducis nomina.*

**I**nscriptionem nummi haud intentatam præteribimus, ut si quem offendimus nodum, hunc expediamus. Cangius disertat. cap. XXVIII. eam ita legit: PETRUS ZIANI VENETI. S. M. Quod a dextera colligere cepit characteres, id in nummis usitatum. Verum non placet, cum ad sinistram perveneris, deorsum sursum, infra supra percurrendum esse. Fortasse ordo hic melior PETRUS ZIANI S. M. VENETI. Sed omnino dicendum, ita colligendos characteres, ut a parte nobiliori incipias, quæ in nummis nostris sinistra est. Ita optime circulum percurres. X S. M. VENETI. PETRUS ZIANI Cæterum ita legisse Cangium puto, quod *Veneti* jungendum cum *Ziani*, ac utrumque secundo casu elatum credidit. Quamquam vox illa *Dux* admonere eum debebat, quo casu essent illa *P. Ziani*, deceptus eo tamen est, quod illum fugit, nostrorum plerisque a primis temporibus cognominibus tamquam nominibus aptotis usos nulla per casus variatione. A Petro Ziano ad Andream Gritum ex nummis, qui apud me sunt, unus est Nicolai Troni ex ære minimi moduli, ubi legitur *Nicolaus Tronus*, duo, primus, & ultimus, ubi cognomina tamquam casibus destituta exeunt in *I. Petrus Ziani*, *Andreas Griti*, cæteri cognomen habent eodem modo indeclinabile, at in *O* desinens, *Geno*, *Dandulo*, *Gradonico*, *Superantio*, *Delphino*, *Mocenico*, *Barbadico*, quibus accensendos non dubito eos, quibus cognomen est ultima litera, aut etiam syllaba defectum, *Teupl. Sten. Marcell*. Quamvis enim haud sit rara apud nostros terminatio cognominis in *I*, longe frequentior est terminatio in *O*, ut clarum ex omnium temporum monumentis, ac potissimum nummis, inter quos accipe etiam novo typo, ac majori modulo nummum ejus, qui Grito successit, ac ita inscribitur: S. M. VENET. D PETRUS LANDO. Nec de nominibus Ducum aliud restat considerandum, nisi & hinc velimus monetariorum imperitiam reprehendere, quod nominis non semper integram primam syllabam expressere, unde in alterius Teupoli nummo *LA*. est *Laurentius*, in alterius Gradonici *BA*. est *Baribolomeus*. Sed acceda-

redamus jam ad cæterarum literarum interpretationem, nec pudeat ὡς ἔστιν πρότερον processisse.

Compendiariis illis literis S. M. significari *Sanctus Marcus*, cum de rebus Venerorum agitur, pronum est intelligere. In aliarum gentium nummis significari iisdem literis *Sancta Maria*, monet vir omnigenæ eruditionis, Archiepiscopus Ancyranus, Justus Fontaninus in suo Commentario de Disc. Vor. c. XIV. ubi etiam ait, non nisi post sæculum XI. inductum morem, ut *Sanctus* unica litera S scriberetur. Quod sequitur VENETI. integrum esse, neque aliter legendum aliqui credunt. Credidit idem Cangius, qui appositum illud voluit Ducis nomini. At melius alii, qui illud a cæteris separatim sumentes, illo, ajunt, Venetorum commune significari, ut primum nomen Divi patroni sit, gentis & civitatis deinde, tum Ducis, sapienterque factum, ut post patroni nomen statim nomen gentis subjiceretur, quo intelligerent omnes, imperium non Ducis esse, sed Venetorum. Satis acute. Verum si verbi illius sententiam nos modo assequimur, curiam eam non assequuti majores nostri? Libertatis tenacissimi, & in Ducis jura numquam non intenti, hoc scilicet neglexissent asseri communi civium principatus testimonium? VENETI. igitur in veteribus nummis est VENETICUS, ex priscorum temporum appellatione. Nunquam enim *Veneti* in *Venetus* mutari passa esset respublica, si commune omnium civium imperium significari per illud credidisset; *Veneticus* in *Venetus* mutari & jussisse potnit. Clare autem, nullo elemento destitutum legitur S. MARCUS VENETUS in averfa parte nummuli argentei, Andreæ Griti nomine signati, alio a mattapane typo, ac literis, quæ ejus temporis sunt. Cum autem alio majoris moduli, seu mattapane, ejusdem Griti VENET. sit *Veneti*: quemadmodum integre exprimitur in ejusdem moduli, ac typi nummis Joannis Mocenici, & Augustini Barbadici, in eo vero, qui ultimus est in tabula nostra, integre exprimitur VENETUS; mihi non videtur dubitandum, utrobique epitheton illud esse, quo Divum patronum, in sui cultus, ac positæ in eo spei testimonium, donant nostri, ideoque VENETI. *Veneticus* esse. In priscis igitur nummis, & qui ad priscos accedunt, VENETI. *Veneticus*, in recentioribus si occurrat VENET. *Venetus*, nihil hærendo in re satis certa, interpretaberis. Quod enim utrobique aliqui explicant *Venetiarum*, & in priscis non levem habet difficultatem, & in recentioribus satis refellitur eorum inscriptione, ubi integrum est VENE-TUS. Vale.



## E I D E M

## V I I.

*De notis sanctorum nominum Jesu Christi.*

**I**N tot epistolas dispersita, longius, quam pro re, excurrere oratio forte visa est. Ita quod ad levandum legendi fastidium exco- gitavi, eo fastidium ne auxerim, timeo. Finem propterea scribendi hac epistola faciam, postquam pauca de characteribus in parte aver- sa nummi imagini Redemptoris adscriptis verba fecero. Cave pri- mum, latinas literas illas IC. XC. esse, credas. Græcæ sunt. I *iota*, X *chi*, C *sigma* est, ex angulato Σ ita rotundatum. Contigit hoc & Latinis literis, ut ex angulatis ob scribendi celeritatem rotundæ fierent, quod per earum aliquot cundo ostendit Brenemannus Hist. Pandect. lib. II. c. 2. Nec quærendum, utrum Græci a Latinis, an Latini a Græcis id didicerint, cum utrique docti hoc sint a natura, laboris, ac temporis compendium suadente, ut viri docti observa- runt. Apud Latinos, ut id obiter dicam, quæ prima has vicissitudi- nes passa est, fuit forte litera M pro nota numeri milliarum, quæ hebetatis omnino angulis abiit in ∞, quod non inter cifras Gothi- cas, ut videtur credere Brenemannus, sed inter notas Romanorum recensendum est, cum temporibus Augusti usurparetur teste Panvinio, ac præterea Tabula Antii reperta, & *Antiatine* nomine designata, quam edidit libello singulari Joseph Rocchus Vulpus, ac itidem t. 3. *Lat. Vet.* Verum ne longius ab instituto recedam, IC. XC. in num- mis Imperatorum Græcorum passim videbis apud Cangium de Fam. Byzant. adscripta imagini Redemptoris, sicut Deiparæ imagini MP. ΘΥ. Hæc valent MHTHP ΘΕΟΥ; illa ΙΗCΟΥC ΧΡΙCΤΟC. Latine scribentibus eadem horum venerabilium nominum significandorum nota sæpius usurpata, Græcis tamen literis latinas immiscentes pro IC. XC. IS. XS. scripsere. Hoc primum accidisse potuit, quod, aliqui sigma ea figura scriptitarent, qua Jones utebantur. Cum au- tem hæc proxime ad Latinum S accedat, ut Brenemannus loco cit. observavit, factum est, ut imperiti librarii Græco sigmati Latinum S substituerint. Non duabus, sed tribus literis eadem nomina pla- cuit etiam significare, iisque aut omnibus Græcis, ut primum de primo dicam, ΙΗC, aut ultima Latina ΙΗΣ, quod nostris tempo- ribus usitatus. Varios etiam casus hujus venerabilis nominis ultima litera Latina per eandem notam efformarunt, nec solum invenies ΙΗΣ, sed etiam ΙΗΥ pro Jesu. Cum multi autem illud H pro La- tina

tina aspiratione acciperent, tanta est nonnullorum inscitia, factum est, ut etiam scriberent IHS, quod miror ne Græcos quidem puidisse facere. Extat inter alia apud Gangium numisma Basilii Macedonis sic inscriptum IHS XS REX REGNANTIUM.

Quod attinet ad nomen Christi, antiquissimis temporibus aut per solam Græcam X, aut per duas priores, utramque Græcam X & P significabatur, quæ simul etiam implicabantur, secunda in medio primæ intexta hoc modo  $\text{X}^{\text{P}}$ . Plura vide de his in *Flavii Clementis Tumulo Illustrato*. Frequentior tamen hujus nominis nota est prima, & ultima litera, aut utraque Græca XC, aut prior Græca altera Latina XS quæ variatur etiam pro casus variatione, ut cum scribimus PAX XI. Usitatus vero adhuc tribus literis sacrosanctum hoc nomen significare, duabus prioribus Græcis, ultima Latina, varia pro varietate casus XPS XPI XPO XPM. At insubidi aliqui P non *rbo* Græcum, sed Latinam literam existimantes, scripsere etiam Xp̄s Xpi. Scitius illi, qui secundam etiam literam a Latinis sumentes XRS scribere maluerunt, quod aliquando & a Græcis factum, quemadmodum in nummo Romani Diogenis apud sæpe laudatum Gangium IHS XRS REX REGNANTIUM. Hæc habui, Vir Amplissime, quæ sumpta ex majorum tuorum nummis occasione de veteribus nummis Venetorum ad te scriberem. Subsecivas horas, quibus ob molestissimas muneris mei curas non nisi satis brevibus uti possum, libens, & gaudens ad id contuli, non eo solum, quod hujusmodi studiis mirifice delector, sed ut gratum tibi facerem, qui aliqua de his a me audire optabas. Hoc si præstiti, maximum ex levi labore fructum cœpisse, credam. Tu voluntatem meam boni consule. Optime valere te, valere Laurentium patruum tuum, patronum meum benignissimum, juvandis omnibus natum, vehementer cupio. Vale.

## V. CL. BERNARDO MARIE DE RUBEIS

### ORD. PRÆDIC.

*De quibusdam vasculis: iis inscriptum videri nomen unguentarii,  
& diem repositi unguenti.*

**E**Runt fortasse non pauci, qui me ridebunt, quod tecum, viro rerum sublimissimarum studiis dedito, ausus sum leves prophæ-  
næ antiquitatis reliquias communicare. Sed rideant hi superciliosi senatus literarii principes, qui ne rogari quidem sententiam patiuntur, nisi de summa republica agatur, illisque, quæ ipsi legere dedignant-

dignantur, neminem credunt oculos admoturum. Horum ego morositatem rideo, te vero V. Cl. cum ob ceteras præclarissimas animi tui dotes, tum ob id maxime suspicio, quod reconditarum, ac sacrarum præcipue rerum scientia instructus nullum literarum genus fastidis, atque inferioris subsellii literatos ita non contemnis, ut me etiam minutum dumtaxat philologum amicitia tua digneris. Quoniam igitur sæculum hoc nihil, quod ad antiquitatem pertineat, elegantioris literaturæ studiosis indignum judicat; de quibusdam vasculis Romæ haud ita pridem repertis quid sentiam, tibi aperio libens, ac quid sis ipse sensurus, ut aperias, rogo.

In vinea Sancti Cæsarii, quæ juris est Collegii Clementini, ad viam Appiam inter Cælium montem, & circum Caracallæ ex quodam sepulcro effossa sunt ad centum quinquaginta vascula fictilia, altera parte ansata, quæ unguentaria nemo non putat. Hem novum! inquis. Passim e veterum sepulcris vasa omnium generum Romæ præsertim effodi, scimus. Numerum tamen tot vasculorum ex uno sepulcro haud ita sæpe erutum, scimus. Sed quod novum omnino est, his vasculis fere singulis inscriptum est nomen aliquod, ac præterea nota temporis. Eorum duo hic tibi delineanda curavi juxta graphidem Roma ad me missam.



N n

Alio-

Aliorum quinque præterea hæc sunt inscriptiones.

1. ΠΟΡ
2. ΣΕΙΑ
3. MARCIA. MARCI. L.  
A. D. XI. K. AP
4. TETTIA. CYMANA  
A. D. VI. EID. F.
5. C. IVTI. PRID. IDVS  
SEPT.

Sæpius accidisse in effodiendis veterum sepulcris, ut præter urnas, & vasa cineribus recipiendis, præter lacrymarum phialas, aliorum generum vascula reperta sint, nemo ignorat. Simul enim cum ossibus, & cineribus haud raro condita hæc sepulcris, probat Grutherus de jur. Man. l. II. c. 32. At unde hic tanta vasculorum vis, quanta non usquam, aut unquam fortasse? Cum unguentaria fuisse hæc, omnes putent, post consumpta unguenta, quæ illis continebantur, visum fuit in sepulcro condere unguentorum consumptorum vascula, velut ad significandam funeris magnificentiam, seu mavis, semptuosum luxum. Scis autem, qui fuerit unguentorum usus in mortuos. Ungebatur cadaver, antequam efferretur. Ita Grutherus l. I. c. 15. Ungebatur rogo impositum, quin rogos ipse ungebatur. Idem c. 26. Præterea non sine unguentis, & odoramentis cineres, & ossa urna claudebantur. Hinc patet, quam verum sit illud plinianum l. XII. c. 18. *Beatam illam fecit (Arabiam, unde odores, & aromata componendis unguentis) hominum etiam in morte luxuria: quæ Diis intellexerat genita, adhibens urendis defunctis*. Quare si periti asseverabant, eodem Plinio teste, non ferre (Arabiam) tantum anno sætu, quantum Nero princeps novissimo Poppæ suæ die concremaverit; quid mirum, quod totum nobilis, & prædivitis hominis myrothecium in ejus funere consumptum credimus, hujusque rei testimonium dicimus hanc tantam centum quinquaginta vasculorum copiam una cum illo sepultam?

Pretiosa in funeribus unguenta adhibita, patet ex uno Propertio qui nardina ad hoc memorat l. IV. el. 7.

Cur

*Cur nardo flammæ non oluerimæ?*

Pretiosissima in hujus, qui hoc sepulcro conditus, funere adhibita, haud ambigo. Unde id colligam, quæris? Advertisti, vascula nostra literata esse, cujusmodi nescio, an ullum alibi unquam visum. Quid autem aliud unguentorum thecis potuit inscribi, quam id, quod eorum pretium significaret? Fuit hoc unguentarii nomen, & dies repositi unguenti. Ab unguentario enim unguenta commendata, equis dubitabit? Ideo seplarius, seu unguentarius, ac myropola ille, *Cosmus* sæpe memoratus Martiali. Unguentarios in familia fuisse divitibus, & principibus, servos, & libertos, patet ex inscriptionibus, ubi hoc titulo non unus occurrit. Præterea scimus, viros nobiles, & primores matronas componendis unguentis oblectatas. Hinc tam varia vasculis nomina inscripta, marium, sœminarum, ingenuorum, libertorum, servorum, ut facile ab unguentarii nomine, sive hi myropolæ essent, sive ex familia, unguenti pretium dignosci posset. Haud ignoro, unguentis dedisse cognomina, aliquando locum, ubi primum inventa, sæpius succos, ex quibus confecta, cujus rei monet etiam Baysius de vase. Hinc Irinum, Crocinum, Amaracinum, Melinum, Nardinum. Verum potuit aliquis odorum istiusmodi studiosus e frequenti familia unguentarios habuisse, qui aut alicujus speciatim, aut universe omnium generum unguentorum artifices periti, ex quorum nomine commendata vellet unguenta sua.

Unguentarii nomini additum puto diem confecti, seu repositi unguenti. Neque enim poterant non eo pluris æstimari unguenta, quo recentiora. Vere siquidem Plinius l. XIII. c. 3. *Unguenta illico expirant, ac suis moriuntur boris*. Sicut igitur amphoris, & lagenis ad continenda vina, quæ ætatem ferebant, pretiosiora, quo vetustiora, inscribebatur nomen Consulis, sub quo reposita, ita his unguentorum thecis mensis, & dies inscriptus, ideoque sicut optimæ notæ vina, quæ longioris temporis; ita optimæ notæ unguenta, quæ recentioris. Nulla autem hic Consulum mentio, quia nullum unguentorum genus, quod ultra annum servaretur. Hoc tantum in unguentis conficiendis, comparandis, servandisque studium, aut ex his vasculis credamus, alicui peculiare fuisse, aut Romanis omnibus, nobilibus scilicet, & divitibus commune, neutrum pugnabit cum ea, quam novimus fuisse Romæ effusam in ejusmodi delicias luxuriam. Interim si tibi visus sum recte judicasse, vasa hæc e myrothecio fuisse domestico viri prædivitis alicujus, hujusmodi deliciarum præ cæteris forsitan studiosi, quo hominum curæ evadant, sine, me animum advertere. Tantam enim unguentorum vim, quæ magno ad balnea, ad convivia, ad singulas partes corporis, ut mos Romanis,

odoribus perfundendas parata certe fuerat, in funus tandem infumpram videmus. Sed de his inscriptis vasculis sententiam tuam expecto. Vale.

## CLEMENTI XI. PONTIFICI MAX.

*Dedicantur Oratiunculae de Myſterio Trinitatis.*

### I.

**P**Edibus tuis advoluto mihi, Beatiss. Pater, ut brevem de ineffabili Trinitatis mysterio orationem, quam auribus usurpasti, oculorum etiam iudicio tandem subjiciam, quem metum debita tantæ majestati facit reverentia, eum adimit explorata animi tui magnitudo. Quid enim est, cur credam, præ me lata formidinis specie posse, non munus, sed tributum offerentem tibi commendari? An tot gravissimis distractum curis ne videar tempore non meo adire, metuere dicam? At is es, quem pluribus intentum, & singulis adhuc parem, occupatum quamvis quicumque ad te accedit inveniat, sentit tamen nemo. An te in altissimo collocatum honoris gradu vereri jactabo? At is es, qui omnium non tantum nomine, sed re maximus nobis ideo probaris, quod cæteris par tibi uni videris. Cum enim scias, satis te virtutibus tuis suspiciendum, non quæris latebras, nec tandem adeuntes tristi supercilio terras, ut dignitati tuæ cultum, & admirationem concilies. Plenus igitur bonæ spei, quod me velis ea, qua soles, quaque plurimum commendaris, humanitate admittere, hanc, qualis qualis sit, argumento certe dignam te orationem offero, meque torum, Collegiumque nostrum tuarum virtutum observantissimum, tuo favore ornatissimum, meo, omniumque nomine tibi, Parenti optimo, Patrono beneficentissimo addico.

### I I.

Cum tacitus mecum reputarem, Beatiss. Pater, qua ratione commendationem aliquam ad te quærerem orationi huic, quam ante pedes tuos pudibundam sisto; nihil potius futurum credidi, quam si prohiberem, quo minus auderet in laudes tuas erumpere. Fateor tamen difficilior mihi fuisse laudes tuas silendo præterire, quam aliis fortasse consequi dicendo. Tot enim sunt, quæ scribis, & facis, ut si minus ornari possint verbis, uberem tamen dicendi materiam vel elingui præbeant. Tacere vero laudes tuas tam difficile est, quam  
res

res tuas gestas non admirari. Sed qui non potes imperare, ne res gestas admiremur, cum facere quin geras non possis, imperas, ne laudibus eas efferamus. O temporum nostrorum felicitatem, quibus Princeps contigit, non quem laudare liberum sit, sed qui laudes suas (prudens dico) omnino sileri jubeat. Hoc solum severe prohibes, hoc solum displicet, cum prohibeas, cætera solitus tanta suavitate præcipere, ut nihil placeat jam, quod ipse vetueris. Verum quo magis grave hoc nobis, eo tibi magis gloriosum, dicam etiam nobis, siquidem una est obedientis gloria, quæque difficillima exsequi. Igitur parvam hanc orationem de tuis laudibus obmutescere jussam ad pedes tuos devolutus offero, id unum orans, ut eam velis, meque simul maximo patrocinio tuo dignari.

## I I I.

Quæ nuper te auditore, Beatiss. Pater, placere sibi visa est oratiuncula, audet modo Sanctitatis tuæ pedes adire te lectorem fortasse habitura. Neque ea oculorum tuorum veretur judicium, postquam aurium subiit. De sublimissimo Divinæ Trinitatis mysterio agenti ut patientes aures præbuiſti, ita benignos oculos admoturum te sperat. Præter hoc fatetur nihil habere, quo tibi cum cæteris omnibus, tum sacra eloquentia vere maximo probari unquam possit. Neque enim a proposito argumento multum deflexisse dicar, quod investigabiles Dei vias minime ausus ingredi, imparem Trinitatis imaginem, attamen imaginem, ut ait Augustinus, idest hominem, tamquam lucentem in tenebris lucem e longinquo sum contemplatus. Fieri autem fortasse poterat, ut cognoscerentur in his tenebris mirabilia tanti mysterii, si oratorem alium, eumque potissimum, si quis est, qui in explicandis rebus divinis propius ad tuam eloquentiam accedit, natum argumentum fuisset. Ipse, quæ apud te dixi, Sanctitati tuæ offerre debeo, cui plurimos, & faustissimos annos ad pedis osculum devolutus precor.

## I V.

Pro tuo erga nos amore facis, Beatissime Pater, quod semper maxime facilis, facilior autem modo adeuntes omnes admittis, ut qui nuper, cum incommoda uteris valetudine, humanos casus pro nostro erga te amore metuimus, eo liberius fruamur bono, quod exorati Superi nobis servarunt. Quamquam enim, cum primum per vires licuit, non solum sacris interfueris functionibus, sed Sanctorum etiam

etiam monumenta nunquam tui oblitus per Urbis Ecclesias inviseris, ut satis conspectu tuo omnium ordinum mœstitiā levasse videaris; nullius tamen solatio negare potes benignus Pater, quo minus singuli novos semper securitatis, lætitiæque suæ fructus capiant. Hoc & mihi tandem conceditur, dum brevem hanc in sacello tuo habitam orationem oblaturus pedes tuos adeo. Inter postremos equidem numerari patior, dum captandam occasionem non existimavi, quæ se ultro debebat offerri. Hæc vero melius in tempore nunquam adesse poterat, quam modo, cum non solum gaudium nostrum ob confirmatam valetudinem tuam testari possum, sed etiam ad ovile tuum reducas oves, Ecclesiæque matri reconciliatos recens filios tibi gratulari. Hoc Deus Pontificatui tuo reservare voluit, ut difficillimis temporibus aliquid esset causæ, cur te vitæ non pigeret, quem diu vivere adeo Ecclesiæ interest. Augear itaque idem bona, qui vitam largitur, nec nos tantummodo, sed te etiam lætum velit, quod enixis precibus ab eo semper petituros nos pollicemur.

## V.

De sacerrimo argumento oratiunculas apud te habitas, tibi que inscriptas ut pedibus tuis sisterent, qui uni, alterique fratri meo benignissime concessisti, idem mihi, Beatiss. Pater, sed longe cumulativius indulges. Tunc enim majus beneficium est admitti, cum majoribus curis distineris. Quonam vero tempore majora te negotia circumstetisse credamus, quam hoc, cum difficillima, si unquam, incidere Christianæ reipublicæ tempora, quæ anxium & sollicitum te habent maximum ejus Rectorem. Quamquam enim alios satis commendaret æquus, rectusque in tantis rerum angustiis animus; ipse tamen aut novis arcendis, aut, quæ fuerunt, reparandis malis consilia, curas, totumque animum intendis. Hoc tibi meliora tempora debita vere fuisse ostendit, sed aut Pontificatui tuo hæc tempora Deus, ne maximo Principi deesset virtutum occasio, aut Pontificatum tuum his temporibus servavit, ut tot malis non sustinendis modo, sed propulsandis par aliquis inveniretur. Faxit igitur idem, ut possis, quod conari videmus, vetera nobis tempora reducere, qui auræ antiquitatis es adeo amans; tibi vero arcus, & statuas ob redditam Europæ pacem possit hæc tua Civitas excitare, qui Urbi ornandæ nullo non tempore vel inter has maximas occupationes intentus obeliscos digniori loco erigendos moveri veteri sede jussisti. Hæc dum tibi precor, pedibus tuis advolutus mihi, meæque orationi patrocinium tuum magna animi reverentia imploro.

## VI. Du-



## V I.

Dubius habendane esset apud Sanctitatem Tuam, ut mos obtinet, brevis oratiuncula de Trinitatis mysterio, qua die infallibili tuo Maximi Pontificis oraculo augendum erat novis nominibus Sanctorum album, ipse ad omnia, quæ juberet, paratus, paucula hæc, quæ apud te, si liceret, dicerem, meditatus sum. Neque aliud mihi fuerat argumentum, quam omnibus significare, quam sapienter diem Augustissimæ Trinitati sacram elegeris, qua, ut universis Christianis magnarum virtutum exempla proponeres, novos sanctissimis hominibus in terris honores decernendo, ejus, qua fruuntur in cælis, gloriæ desuper afflatus haud dubiam fidem omnibus faceres. Quamquam vero pudori meo maxime consultum intelligo, quod non licuit in illo frequentissimo Ecclesiasticorum Procerum, atque adeo totius Christianæ reipublicæ conventu, exilem hanc, & nequaquam audientium dignitati, & tractandarum rerum magnitudini parem orationem habere; eam tamen quo minus pedibus tuis sisterem, Beatissime Pater, teneri minime potui. Sciebam equidem oculorum tuorum judicium declinandum mihi, postquam & aurium effugere felici eventu contigerat. Verum & illud animadverti, qui dicendo eloquentiam eloquentissimo Pontifici probare debuissim, eundem me, quæ non dixeram, benignissimo Pontifici oblaturum, obsequium meum probare tantummodo debere. Ad id consilii itaque suscipiendum fecit animos singularis illa humanitas tua, qua tantum omnibus places, qua fortasse unice tibi places, cui cum omnia & levia placeant, nunquam parvum hoc maximi obsequii mei argumentum displicebit. Accipe igitur, Pater Beatissime, quod te jubente dicturus eram, te jubente non sum ausus dicere, & me ad pedum tuorum oscula demissum apostolica benedictione dignare.

## LAURO QUIRINO SENATORI

*Dedicatur laudatio Joannis Baptistæ Nicolosii.*

QUAM coram Serenissimo Principe, univerſoque Senatu de Magni Cancellarii Joannis Baptistæ Nicolosii laudibus orationem habui, ea non veretur te adire, Senator Præſtantiffime, & ut tuam eſſe velis, rogare. Auctor quidem alius ab illo tibi videbitur, de quo me non fugit, quam non demiffè aliquando ſentires. Ne exiſtimatione tua exciderem, qua mihi hætenus placere fortasſe poteram, nunquam animum induxiſſem, ut oculis tuis ſubjicerem exaſciatum duntaxat opus, niſi, ut nihil clariffimi viri ornando funeti deeſſet, quæ argumenti dignitate tantos auditores habuit laudatio, magno etiam alicui viro inſcribi debuiffet. Solent Hiſtorici, cum mortem referunt clarorum virorum, ad ſignificandum funeris honorem, a quo oratore laudati ſint, memoriæ prodere. Cum autem honori eſſe non poſſit Joanni Baptistæ Nicolosio obſcuro, & inſacundi oratoris nomen; honori ſoltem ſit, hoc literis mandari poſſe, ea oratione laudatum eſſe, quæ prodiit Senatori Ampliſſimo Lauro Quirino inſcripta. Id igitur deſ magno viro, quem vivum tantum obſervavi, quantum ab eo diligebare, ut honeſtari nomine tuo orationem meam velis, quo tanti viri funus magis honeſtetur. Nemo omnium eſt, ſi Nicolosia egrediar domo, ad quem hoc magis pertinere, quam ad te debeat, qui plures ſuſcepisti liberos Bernardi, Joannis Baptistæ Nicolosii fratris, nepotes. Quamquam te illi, illum tibi magis conjunxit magnarum virtutum ſimilitudo, idemque in patriam animus, quam fratris ejus filia, conjux lætiſſima, Camilla Nicolosia, digna patre, patruſque, digna te viro matrona. Suſcipe igitur hanc orationem, Senator Ampliſſime, & me ita excitatum velis, ut lætiora naſtus argumenta in obſervantiæ erga te meæ teſtimonium aliquid diligentiori lima politum non ad te ſolum, ſed de te ſcribere aliquando audeam.

## CAROLO REZZONICO

PROTONOTARIO APOST. de numero &amp;c. (a)

*Dedicatur laudatio Petri Barbadici.*

**E**TSI oratio hæc, Illustris. & Reverendis. Præsul, quam de Petri Barbadici, Patriarchæ Venetiæ, laudibus habui, biduo mihi vix ad scribendum concessio, non modo poliri, & comi, sed ne satis quidem succi, & sanguinis sumere potuerit, decolor propterea, & exilis; cum tamen fieri non posset, ut publico omnino abstineret, totius Senatus, ipsiusque Principis, qui magnificis Patriarchæ exequiis de more interfuere, manus aditura, Romam etiam, & ad te potissimum cogitavit. Religiosissimi Præsulis laudationem Romæ in ipsa Religionis arce audiri, non absurdum: avunculi vero amplissimi hoc qualecumque monumentum tibi suavissimæ sororis filio deberi etiam visum est. Miraberis tamen, unde ignoto homini tantum animorum, ut te adire non dubitaverim. Singularis humanitas tua animos fecit. Licet enim tibi ipse ignotissimus, non ideo tu quoque, qui generis nobilitate, hac Præsulis dignitate, pluribusque virtutibus ubique gentium clares, ignotus mihi esse potes. Sæpe & mihi cum his, qui istinc ad nos veniunt, de maximis animi tui ornamentis, de rebus a te gestis, de ea, quam in Romana Curia de te excitasti, expectatione multus sermo. Maluissem propterea amplissimas, ad quas virtutis via grassaris, dignitates tibi gratulari, quam tecum de acerbissimo avunculi tui, Patriarchæ nostri interitu conqueri. Sed pro tempore singula. Quoniam id tulit occasio, noxæ ne mihi sit, quod hoc mihi fumo, ut sub auspiciis tuis orationem hanc in publicum velim emitti. Vale.

## CAROLO BOLAGNO

S. R. I. Comiti &amp;c.

*Dedicatur laudatio Joseph Bolagno.*

**Q**UOD faustum, tuoque acerbissimo dolori leniendo satis sit, sub auspiciis tuis, Carole Bolagno, habitam in præclarissimi parentis tui funere orationem in publicum emitto. Gratus nemini esse potest vulgari per omnes gentes, perque omnes ætates tanti viri

O o

lau-

(a) nunc S. R. Rotæ Auditori.

laudes, quam tibi, qui omnium maxime patris gloriæ favere debes. Id vero si sperari nequaquam potest ab hac, quæ loco, & tempori servire debuit, oratiuncula, tamen eam domi servare tua interest, ut aliquam non corporis solum imaginem, sed animi quoque parentis habeas, atque illis, quos ex recentibus cum puella lectissima, ac nobilissima Margarita de Verme nuptiis suscipies, liberis aliquando ostendas. Hos Deus tibi cito largiatur, quando omnibus optandum est, non unum, sed plures esse terris Joseph Bolagno, ut qui in te, suavissimo filio, superest adhuc, in nepotibus immortalis fiat. Vale, Vir Clarissime, & patrem æques gloria, diuturniore vita superes. Vale.

# CARMINA.



## C A R M I N A .

## I.

*Zacharia Vallareffo Senatori Amplissimo.*

**M**œnas quis erit novo libello  
 Clarus laudibus eloquj senator?  
 Huic tu, Zacharia, patronus esto,  
 Primus quem puerum ipse ad Hippocrenes  
 Deduxi latices, volentem & idem  
 Admovi uberibus volens Suadæ.  
 Sacro hos, ne pereant, tibi iuventæ  
 Fætus discipulo minor magister.

## I I.

*Virtute beatos homines effici.*

O qui beatam divitiis cupis  
 Proferre vitam, quid Lybiam metis,  
 Arcæque sudatæ caminis  
 Trinacriis erythræa dona,  
 Aurique credis pondera pallidus?  
 Felix eris tunc, atque potens opum,  
 Flavescet auro pulcriore  
 Cum locuples probitate pectus.  
 Ditesce gemmis perpetuo tuis,  
 Quas nec vetustas infatiabili  
 Quidquid potens delere dente,  
 Ingeniumve manus rapacis  
 Auferre tentet. Carbasa lenibus  
 Nunc implet austris, æquora fluctibus  
 Fortuna mox tollit, parata,  
 Quæ dederat, spoliare donis.  
 Æquum sed ipsi nulla licentia  
 In pectus: atri funeris inscia  
 Virtus perennem astris receptum  
 Una animum sequitur superstes.

## III.

## I I I.

*Virtutem se ipsa contentam esse.*

Stet parvis licet ædibus  
 Res angusta mihi, nec laqueariis  
 Aurum fulgeat, aut ebur,  
 Nec picti niteant frigora marmoris,  
 Multus visere quæ cliens  
 Matutinus adest; pectora non mihi  
 Auri sacra fames quatit.  
 Heu curis valeat regia pallida,  
 Heu tristes valeant opes,  
 Et pondus nimium divitiarum grave.  
 Exquirant alii, Paro  
 Quæ suffulta caput nubibus atria  
 Condant; mens mihi pauperi  
 Recti lætitiarum conscia conferet.  
 Una est gaudia pectori  
 Quæ donat, tenui squallida tegmine,  
 Mendicæ hospita vel casæ  
 Virtus: hæc opibus sola beatior.  
 Non, quamvis tibi palleat  
 Captivis fluvius cornibus Indicus,  
 Exstinctis minus ignibus  
 Ardet sacra fames: nullius indiga  
 Virtus astra laceffere  
 Ignorat precibus, quæ sibi sufficit.

## I V.

*Ratio conficiendæ chartæ.*

Linteola accipies primum, quæ lecta jubebis  
 Oſonos undis mersa madere dies.  
 Inde solo impones, ac parva in frustula scindes,  
 Frustula doliolisingere, ut hic putreant:  
 Pistilla in numerum tollit, sublataque rursus  
 Dejicit in gyrum sæpius acta rota.  
 His subiecta statim pistillis lintea tunde,  
 Marcida cum cernes jam putruisse satis.

At



At multo primum mortaria flumine reple;  
 Et sic tunde undis lintea mersa diu.  
 Stante rota, massam tandem subducito lini,  
 Quam fons subiectis ignibus excipiet.  
 Jam propior fini labor est: craticula formam  
 Informi massæ protinus una dabit.  
 Forma eadem, & colum crates, quam vimine nullo  
 Efficiunt, quæ se ferrea fila secant.  
 Ergo fenestrata caldamque, & lintea crate  
 Hauri, tunc, crates qua patet, unda fluat.  
 Expanfa folii in morem sed lintea ferrum  
 Transversum ductum, dum fluit unda, tenet.  
 Exiit informi e massa formata papyrus;  
 Attamen hanc circa non labor unus erit.  
 Crate statim inuenta folium chartarius alter  
 Imponat panno, quem impiger ante paret,  
 Atque novo panno tegat illico: reddat utrumque  
 Tertius evolvens, digerat & folia.  
 Tam celeri hæc nunquam lingua sed posse referri,  
 Omnia festinis quam peragenda, puto.  
 In tumuli postquam congesta volumina morem  
 Aucta satis, validis omnia trade viris.  
 Prælo hi subjicient, & vasto robore prælum  
 Torquebunt, humor totus ut inde fluat.  
 Suspendent alii demum, quo perfluit aer  
 Siccet adhuc: tanti charta laboris opus.

## V.

*Generis nobilitatem stimulum ad virtutem esse.*

## E C L O G A.

*Juvenis, Senior.*

- Juv.* Ecce senex iterum: nil hac egisse capellas  
 Profuit. Ut mærens pavidi gregis immemor errat!  
 Quamquam, ne solitis rumpat mihi questibus aures,  
 Est timor; ultero affemur. Salve, vir bone, salve.  
*Sen.* Felices salvere jube: non respicit ulla  
 Sylvas missa salus, annisque, malisque gravatum  
 Me minus. Ah! dolor est primæ meminisse salutis.  
*Juv.* Quod quereris, de more facis: balatibus agni

Mu.

Mugitu tauri, seniores questibus auras  
Implent. Quando abiit cum prima ætate voluptas,  
Et volucrum cantus, & sylvæ causa doloris.

*Sen.* Quidni multa querar? Natus melioribus annis  
Hactenus infelix vitæ mala tempora traxi,  
Sæcula dum videam nigro fordere metallo.

*Juv.* Nimirum soli veteres, sene teste, beati.  
Aurea pendebant quondam gravi ab arbore poma,  
Terra dabat segetes bubus cessantibus, arva  
Irriguo placidus fons lacte secabat, & ipsis,  
Si vos audimus, sudabant mella salictis.

*Sen.* Hæc amens decantet anus: mihi dona videre  
His potiora datum: non aurea ab arbore poma,  
Aureus ast animus pastoribus: aurea virtus  
His quondam errabat sylvis, hæc arva tenebat.

*Juv.* At quis virtutem nostris dein expulit arvis?  
Tu meminisse potes, quando te grandior alter  
Non superat sylvis, memorata & videris unus.

*Sen.* Accipe, sis, causas & nostri disce doloris.  
Has quondam sylvas Divi, puerique Deorum  
Immixti nostro generi coluere, tenella  
Et quamvis dextra nondum aptus ab arbore pomis  
Carpendis, vidi tamen, & bene visa recordor,  
Hac egisse pecus Tyrsim, stratumque sub umbra  
Corpora lassa illic calamos inflasse Menalcam,  
Sanguinem utrumque Deum, quin ipsum fluminæ Phæbum  
Sepe gregem nostro tenerum tinxisse recordor.

*Juv.* Cælum habeant Superi, regnum pastoribus agri.

*Sen.* Heu! postquam sylvis urbem petiere relictis  
Prisci pastores Divorum sanguine creti,  
Una migravit virtus, agrosque subivit  
Ultro accita cohors vitiorum. Tum scelus omne,  
Et furta, & cædes arvis capere timeri.  
Exhinc primum oculos, atque invida verba caveri  
Agnis, hinc ingratum, infidumque arva sonare,  
Atque ignota prius, quæ horremus, nomina mille.  
Nam quid pastorem valeat cohibere furentem  
Ira, vesanis aut captum pectora flammis,  
Aut quos impatiens cæcos agit ardor habendi?  
Non prius exemplum terret, non ullus honesti  
Cordi innatus amor. Series inhonora parentum

Semine de vili genuit, seu robore duro,  
Limo seu natum turpi genus. *Æthere* lapsam  
Virtutem cæci nescimus. Scilicet astris  
Cum puris nostro generi commercia nulla.

*Juv.* Mollia corda Dii nobis, animumque pacem  
Virtutum faciles tribuere: redibit in agros,  
Si volumus, virtus: obscuro sanguine quamvis  
Orti, mox animo clarescere possumus alto.

*Sen.* O utinam. Facilis nimis at sperare juvenia est.  
Maeste animo, puer, & divino semine furtim  
Ornandis credam sublatum cœlitus agris.

V I.

*Gratiarum actio.*

Cum gratiam vobis velim merentibus  
Habere, gratiam referre haud mens erat.  
Referam tamen, solidamque referam, cum potis;  
Nam gratiam solum hic habet, qui rettulit.

V I I.

*Vestis theatralis promptuarium.*

Regibus ornandis, ornandis schemata servis  
Digesta hic pendent ordine quæque suo.  
Constare hæc tanto mirabere inania sumptu,  
Attamen est tanti fallere posse homines.

V I I I.

*Idem.*

Hic focco vestes, aptumque hic syrma cothurno,  
Hinc totum capiunt nostra theatra decus.  
Nil præter speciem, fidei cuncta aspera gemmis,  
Sed falli hac specie tu quoque sæpe soles.

## I X.

*Amicos ad convivium invitat.*

Nunquam remissus frangitur impete  
 Arcus; quid ultra Socraticis mades  
     Sermonibus pernox, & usque  
     Sollicitas animum severis,  
 Amice, curis? Quin potius novis  
 Tandem implicamus tempora floribus,  
     Testæque mandatum fideli  
     Promimus unanimes falernum?  
 Quamquam Catonis sæpe calefcere  
 Est visa virtus horrida cæcubo,  
     Et crine nutantes corollæ;  
     Herculeo madidum, sodalis,  
 Rex provocari non ego te velim  
 Cratere. Nunquam desipere est locus.  
     Tantum arbitris una remotis  
     Sollicitis animum juvabit  
 Laxare curis, dumque gerant jocos,  
 Circum deunces ferre bono die.  
     Heus coge cessantes sodales:  
     Castalidum numerum sororum  
 Implere certum est. Lustra abeant feræ,  
 Quas solitudo, atque improba pallido  
     Custode jejunis adegit  
     Faucibus esuries in agnos.  
 Nos ore gnatos promere pectoris  
 Arcana strinxit provida mutuis  
     Natura vinclis, obsequique  
     Ipsa juber faciles amicis.  
 Major voluptas nulla homini datur,  
 Quam si fluentes, heu nimium! dies  
     Fallamus una, & largiori  
     Ora scypho madeamus una.

X. *Al*

## X.

*Ad Amicum.*

Tot, tamque longis literis quid enecas,  
Amare quem juras? Amari me scio;  
Jam parce chartæ, parce, amice, tempori.

## X I.

*Dolet pernionibus infestari.*

Imos an æstas tota corripit pedes,  
Gelu rigescunt cætera  
Dum membra? Flamma torreo calcaneum,  
Qua mons sicanus perfurit.  
Non si, petulcum quod malum absomit gregem,  
Morbosa quem pecus cutem  
Corrupit asperam, coactum sisteret  
In calce, prurirem ~~magis~~  
Tentare plectro vim canoro barbiton,  
Librisque, inertem pulverem  
Licet excutere, cum pernionum protinus  
Explere rabiem, surgere,  
Solumque calce pruriente rumpere  
Vis dira cogit. Heu lues  
Infesta Musis! Armat in me jambicos  
Siquis favente haud pallade  
Ufus, chiragra ne ligatus dexteram  
Votis fatiget numina,  
Quacumque peste sed nocentior pedes  
Invadat imos pernio.

## X I I.

*In Alexandrum Magnum ob corruptam  
castrorum disciplinam.*

Siccine quem nullo mars anceps milite, nullo  
Robore quem Persis vicit, victoria vincit?

Siccine qui tantis par esse laboribus olim;  
 Et galea potare nives, tranare sonoras  
 Torrentum furias potuisti, abrupta jugorum  
 Invidus superare pedes; res ferre secundas  
 Nunc impar lætæ nutas sub pondere sortis?  
 Quo virtus abiit? quo priscus, & æquus utrique  
 Sorti animus, spreto te vincere fortior auro,  
 Quam cum Persarum strictos incurris in enses?  
 Exemplo sic jussu tuo jam Thessala languent  
 Robora, & Emathias enervant otia turmas.  
 Castra natant undante mero, positaque capillos  
 Casside fragranti Macedo perfundit amomo.  
 Posthac, credo equidem, fuerit vibrare sarissam  
 Doctior, idaliis didicit quam cingere sertis  
 Miles, & infestis obnoxia pectora telis  
 Objiciet, stabitque loco, cum languida vino  
 Etferet Emathiis madidus vestigia castris.  
 Te pudeat vicisse, tuis aut damna triumphis  
 Illata, & cladem, victor dum proteris hostem,  
 Susceptam repara: castris, quæ sustulit unum,  
 Principis exemplum durissima jura reponat.  
 Frange toros, tere calce scyphos, hanc exue vestem,  
 Aut patriam mentire, genus mentite. Quid ultra  
 Differs? Una potest purgare hæc crimina culpa.  
 Non tu Pellæus civis, non patre Philippo  
 Tu genitus, quem barbaricam gestare thiarum  
 Crine juvat, cui Græca phalanx procumbere prono,  
 Et colere abjecta ad terram cervice jubetur.

## XIII.

*De Cinnamo aucupio & literis simul operam dante.*

Cinnamus insidias avibus dum retia tendit,  
 Chartæ idem mandat plurima, plura legit.  
 Aucupione simul dices, Musisque vacare?  
 Nec vacat hic musis, nec vacat aucupio.

## XIV.

## XIV.

*Musis vacandum esse, dum vulgus inania solatia sectatur.*

Quid sacra Bromio nunc agimus die,  
 Tellurem madido cum pede cæteri  
   Pulsant? Oria nempe  
   Stultis grande negotium.  
 His largum tribuens dulcia munera,  
 Seu queis labra fluunt cretica, vitibus  
   Seu quæ læta falernis,  
   Se indulget Deus; at mihi  
 Idem, non alias plenior, adventit.  
 Expellens hominem corripuit furor  
   Vulgo corda negatus.  
 Jam mens igne novo calet  
 Toto plena Deo: jam sacrum Apollini  
 Lenæoque jugum, nec timor, additis  
   Nitor scandere pennis  
   Tantis numinibus comes.  
 Mixtus castaliis ipse fororibus  
 Aurato cytharam pectine personans  
   Sacros hic celebrabo  
   Baccho, ni vetitum, dies.

## XV.

*Joanni Baduario Patriarchæ Venetiarum (a) Gratiarum actio,  
 quod literariis exercitationibus interfueras.*

## Dialogus.

1. Non, cum Phœbus adest, interea silens  
 Dum cortina jacet, blanda sonantibus  
   Musis carmina, Præsul,  
   Te Phœbus facilis magis.
2. Non, rerum dominus fulmine Jupiter  
 Aures si posito colloquiis virum  
   Demittit, facili unquam  
   Certabit Baduario.

I. O

---

(a) deinde Ep. Brix. & J. R. E. Cardin.

1. O pulsare mihi, qua sonat Aufidus,  
Si nervis citharam Pieredes darent;  
Unus clavior iret  
Tusciis regibus edito.
2. Diræos numeros numina poscerem,  
Si ferret fidicen Pindarus æmulum;  
Par victoribus astra ut  
Unus tangeret isthmiiis
1. Impar eloquium munere sed pari  
Si donare vetat; solvere, quas licet,  
Quis grates negat? Aras  
Et dono colis impari.
2. Hoc si fas, igitur reddere gratias  
Ultra quæ mora? Sed gratia redditur,  
Non delenda die ulla  
Si altum mentibus hæreat.

## XVI.

*De bomiliis Clementis PP. XI. in varias linguas soluta, & ligata  
oratione converſit.*

Evolvis, latiis quicumque remotus ab oris,  
Quæ Clemens solitus promere verba gregi;  
Qualia verba legis, tali illum pectore crede,  
Non animum melius sermo referre potest.  
Præclaris gravitas dictis, & moribus una:  
Magna animus versat, magna que sermo sonat;  
Ipsaque sic factis se candida pectora produnt,  
Nulla velut nubes candida verba tegit.  
Elucet dictis, alitur quoque pectore sanctæ  
Religionis amor, crediti amorque gregis.  
Antiquum ut redolet sermo, sic moribus ille  
Antiquis vivit, vivere nosque jubet.  
Atque frui aspectu possint ut pectoris omnes  
Donatus linguis omnibus ille sonat.  
Sequana cum patrio, patrio Tagus ore loquentem  
Audit, tuque audis, Attica terra, tuo.  
Majestas augusta oris, vox atque decora  
Verum seposita vos regione latet.  
O ter felices, propriis quibus auribus oris

Sacri



Sacri audire sonum, cernere & ora datur.  
 Hoc dicente, novo vati mens igne calefcit,  
 Aptat, quæque audit grandia verba, modis.  
 Illi non aliter cithara certaret eburna,  
 Grandior a rebus nî sonus inde foret.  
 Jam Thufcis sociat, fidibus jam sacra Latinis  
 Verba, parem possit si dare Musa sonum.  
 Hinc certe ingenium, mens hinc celsissima, dignus  
 Nomine & hinc vates incipit esse suo.

## XVII.

*Ad Conuictores Collegii Clementini de Urbe laus Cardinalis Sarvitalis  
 ejusdem Collegii alumni.*

## E C L O G A.

*Tyrtus, Thyrsis.*

- T. Pingua dum tondent securæ prata bidentes,  
 Quidni sub patula fessi confedimus umbra?  
 Carmina tu ludes, tenui sequar ipse cicuta,  
 Tu melior cantu, melior tenui ipse cicuta.
- Tb. Alternis potius cantemus: te quoque noster,  
 Tyrtus, Phæbus amat: firma si mente reserves,  
 Agno quæ posito meditati hic carmina quondam  
 Mopsus, & illustis Corydon; rite ipse recordor.
- T. Sat memini; sed non, quæ Mopso, vox mihi: utrique  
 Tu certare potes: melior te Phæbus: utrumque  
 Pignore deposito vinces. Sed carmina solum  
 Dicere si te alterna iuvat; sequar: incipe, Thyrsis.
- Tb. Crescite, felices, primævæ crescite plantæ:  
 Non glacies vobis noceat, non defluus imber  
 Nunc parvo virgulta solo, & sine nomine plantæ,  
 Mox arbor, nostris & sylvis umbra, decusque.
- T. Crescite, felices, primævæ crescite plantæ,  
 Mitis sol radiis, miti rore educet æther,  
 Nunc virgulta, at mox expansis frondibus arbor,  
 Umbret quæ late, sylvas atque urgeat omnes.
- Tb. Rara arbor nostro sub cælo, & fluminis alta  
 Hac labentis aquis, humoribus usta negatis  
 Aruit, agricolæ multos frustrata labores  
 Induit aut nullis sterilis se fructibus unquam.

T. Plu-

- T. Plurima, quæ nostris sylvis educitur, arbor  
Cum mutata solum vertit digesta per agros,  
Ingenium nostro felix sub sidere servat,  
In quascumque voces artes, nec tarda sequetur.
- Tb. Haud procul aspiciamus multam modo crescere sylvam  
Atque tenella comis protendere brachia lætis  
Indutam, nemoris magnum decus, agricolisque  
Spem magnam, faveat quando illis mitior æther.
- T. Multa etiam nostras spes implet, cernimus, arbos:  
Multa brevi magnam cervicem sustulit astris,  
Non sterili tantum umbra felix, fructibus at quæ,  
Maturis onerata suos prævertitur annos.
- Tb. Æternum nostris sylvis decus, arbor, ad umbram  
Cujus securi canimus, mandata recenti  
Nunc sulco,eductis excelsis ad sidera ramis  
Una potes magno sylvam prætere tempore.
- T. O quæ crudeles imbres defendis, & æstum  
Pastori, pecorique, exorta his arbor in agris,  
Concilias adytis horrorem, atque otia servas  
Illis, qui veniunt huc dicere carmina vates.
- Tb. Hæc, equidem memini, pridem sensere futura,  
Qui primis teneram viderunt surgere ab annis  
Proceris æquam arboribus, frondisque recentes  
Inter ver nullis ventis florere caducum.
- T. Hæc avibus melius, vel lævo fulminis igne  
Prædixere mihi, qui jam videre tenellam  
Nulla eguisse manu, & vigili cessante colono  
Floribus ignotos subito succedere fructus.
- Tb. Salve, o ter felix, qua haud altera fructibus arbor  
Lætior, o seris factura nepotibus umbram,  
Haud usquam nobis in toto sanctior, ulla  
Te nemore assurgat, nostroque dicabere Phœbo.
- T. Salve, o sæcundi clarissima gloria ruris,  
Si licet, hæc ætas ritus imitata priores,  
Te colet æternum, nostris pastoribus una  
Templum eris, & numen, nostrisque vocabere votis.

## XVII.

*Rome edificiorum magnificentia.*

## E C L O G A.

*Pastores duo*

1. Fundata hæc nostris memoras pastoribus, ipsos  
 Quorum non pudeat Superos? Hæc mœnia pastor?  
 Has ædes pastor? Quis luit, amice, volentem,  
 Aut quem ludis? Agris quamquam hæc vidisse juvabit  
 Egressum, nam quisque mihi ut tam multa referret,  
 Urbibus haud Romam tantum præstare putassem,  
 Quo teneros ovium mos est depellere fœtus.
2. Vidi ego, cum primum muros, collesque subirem,  
 Sublata civem dextra, peregrinus ab ore  
 Dum pendet tacitus, qua primum parte docentem  
 Venerit in sacrum Latiusque, & Thuscus asylum  
 Pastor, qua steterint constructa mapalia culmis.
1. Unde ergo hæc vario suffulta palatia saxo,  
 Hæc fora, multiplici, seu multa columna coronet  
 Ordine, majores hæc sive cupressibus ædes  
 Claudant, non parvis æqua urbibus? Unde viarum  
 Hoc spatium, tot ludentesque per aera fontes?  
 Unde auro nitida, & maculoso marmore templa,  
 Singula conspicienda quidem, nisi vinceret unum  
 Omnia, cui par haud opere est, aut finibus ullum?
2. Hæccine miraris? Quid, quando audita recordor,  
 Si digito veterum monstro vestigia rerum?  
 Ducta palatino postremas colle subibat  
 Exquillas domus una, hortis, atque ædibus una  
 Par centum, nec tota jacet. Geminonte theatro  
 Moles visa tibi non parva parte superstes,  
 Aut quæ longa dies valuit subvertere nondum  
 Balnea tota? Arcus, pario de marmore signa,  
 Reliquias tantorum operum cum saxa vetusta  
 Ostendam tibi, tunc sapiens mirabere Romam.
1. Sæpius audieram, tantis spectanda ruinis  
 Mœnia, ruderibus priscis, & stantibus æque  
 Ædibus ornari: sic quercum sæpe videmus

Q q

De-

- Detonsam, exesam viridi decus addere sylvæ?  
 Ulli at sylvicolis hæc unquam condita, credam?
2. Quis credi hoc poscat? Vel si ditissimus agri,  
 Et pecorum, pastor fuerit tot sumptibus impar.  
 Auspiciis pastor quam magnis condidit urbem,  
 Hanc rerum domini ornarunt pastoribus orti,  
 Et summus, populis qui ponit jura, Sacerdos  
 Ornamenta novis gaudet junxisse vetusta.
1. Mitte hæc: Janiculo liceat descendere: totam  
 Æstimet hinc alius Romam: mihi singula tempus  
 Jam lustrare, dies quamquam haud suffecerit una.
2. Quos hinc ire vides, studium regione remota  
 Misit idem: comes illis emptus, qui omnia monstret.  
 Authoresque operum, tempusque, & nomina pandat.  
 Observata subire licet vestigia longe,  
 Nullo Pastores ignota docebimur ære.

## XVIII.

*Advenarum concursus Romam.*

Longæne tandem nulla viæ quies,  
 Seu dulce credas oceano caput  
 Nunquam fideli, seu laceſſas  
 Insidias hominum, ferasque  
 Excelsa vectus per juga? Non ego  
 Jucunda segnis laudo domi otia,  
 Quæ nullus unquam format usus  
 Nobilium haud studiosa morum.  
 Nimis latenti sub laribus suis  
 Angustus orbis: visere plurimas  
 Gentes, nec auditos Ulyſſi  
 Aure sonos stupuisse prodest.  
 At te quis error longius amovet?  
 Quo cunctus orbis confluit advena,  
 Accede flavi ad Thybris undas,  
 Parce viæ & sapiens periclis.  
 Gens, quæ remoto dissidet æquorè,  
 Nostriſ vel arcent finibus alpium  
 Prærupta, sole & pictus ora  
 Indus, hyperboreoque cælo

Dam-

Damnata proles, principis urbium  
Invisit arces. Hæc patrium solum  
Una omnibus, compendiumque  
Orbis, & una hominum magistra.

XIX.

*Fortunato Mauroceno, ex Senatore Monacho Casinensi, dedinde Episcopo  
Tavrisino. (a)*

Multa clarus imagine,  
Virtute, atque sacra clarior infula,  
Quem dignaberis auribus  
Pulsantem trepida fila manu liræ,  
Confestim posito metu  
Audax ille nova mente superbiat,  
Magno & parva mari dabit  
Plenus vela animi. Me increpitet lira  
Phœbus, Melpomene meum  
Ausum torva oculos terreat; haud ego  
Te mittam pavidus loqui  
Afflatu validus pectora fat tuo.  
Parvis non alius dabit  
Rerum æquare modis maxima pondera,  
Quam qui das citharæ inclitam  
Factis materiam, magnus honoribus  
Spretis, Adriacæ sacris  
Cum mutas latebris limina Curiae,  
Sumptis major honoribus  
Cum frustra latitans quæreris infulis.  
Quam pronum facientis est  
Magnis auspiciis grandia dicere.

XX.

*Laurentio Teupolo, Equiti, atque ædis Divi Marci Procuratori.*

Francigenum Regi, supremæ Cæsaris aulæ  
Orator, Latio postea misse Patri,  
Teupole, tergemino par vestit purpura honori,  
Cum vocat ad patrios Adria grata lares.

Qq 2

XXI.

(a) ac postea Brinienſi.

Induto at quamvis videaris murice magnus,  
A merito semper major es ipse tuo.

## XXI.

*Angelo Mariae Quirino, Monacho Casimensi, (a) cum Joannes Quirinus  
ejus frater adis D. Marci Procurator amplissimam dignitatem  
iniret.*

Non Batavos, caroque una cum fratre Britannos,  
Non, quæ Rhenus obit, Sequana & arva rigat,  
Non, quæ Belga colit sublimibus oppida muris,  
Ullus adire pudor, ullus adire timor.  
Auctus cum magno at se præbet frater honore  
Spectandum, & Veneti Principis ora subit;  
Frater abes, latitans tyrrheno sub lare? Lucis  
Hujus lætitiâ quin geminare venis?  
Te videant cives, atque alter clarus honore  
Contempto, sumpto clarus & alter exit.

## XXII.

*Urbis Venetiarum Fides, & Religio.*

Adriacæ torpet qua tethyos, orio silenti,  
Stagnoque vitreo quiescit æstus,  
Magnus naturæ, atque artis labor, urbs, opus Deorum;  
Extollit undis verticem superbum,  
De Venetæ gentis cognomine dicta, quam tulissent  
Fata esse principem, caputque genti.  
Laude sua hæc tantum celebris, cui floribus Deorum,  
Quos finxit ætas prisca, sparsit aras?  
Sudatosne Deos mortalibus, arbitrumne ponti,  
Jovemque, inane nomen, est precata?  
Induit huic cunis velamina, queis Fides comarum  
Obnubit aurum, parvulamque fovit.  
Grandia tum subiit vestigia, cum pede haud labante  
It proximo hosti terror, ac remoto.  
Cuncta potens nec tempus vertere, nec ferens secundo  
Fortuna flatu, in saxa nec ratem urgens,  
Firmam proposito movit, nova, cerbero magistro,  
Mutaret ut sacris sacra unquam avitis.

O Di-

(a) dein Archiep. Corcyr. postea Episc. Brix. ac S. R. E. Cardin. & Bibliothecario.

O Divum salve tantum minor æde , salve utraque  
 Urbs clarius Roma , manus Latinis  
 Ausas Diis nunquam protendere , Christianum & olim  
 Qui infecit error Bosphorum , haud secuta .  
 Salve , o ferre Fidem , qua sol caput exserens coas  
 Recludit oras , una lecta fatis .

## XXIII.

*Comiti Veritati Zenobio , Patricio Veneto , magnæ spei adolescenti .*

Seu magna , sive parva dicit Veritas  
 Non major hinc , minorve fuerit Veritas  
 Tui accipe omen nominis , mi Veritas .  
 Qui puer , adultus mox is esto Veritas ,  
 Sophiæque , musarumque amicus Veritas .

## XXIV.

*Comitibus Veritati , & Joanni Carolo fratribus Zenobiis , e gravi morbo convalescentibus .*

Indole par fratrum simili , spes unica gentis  
 Zenobiæ , illustris subsidiumque domus ,  
 Seu vis naturæ est , seu murui amoris eodem  
 Implicitos morbo decubuisse simul ;  
 Mæstorum hoc tandem potuerunt vota parentum ,  
 Quod placitum superis convaluisse simul .  
 Fratrum utrique Dii dent jam , votisque parentum ,  
 Longa sit ut valido corpore utrique salus .

## XXV.

*Carmen Italicum Francisci Coppette de verbis divini incarnatione ,  
 quod incipit Locar sopra gli abbiissi i fondamenti .  
 Latine redditum .*

Stat librata suo te pondere terra jubente ,  
 Per vacuumque aer multus inane fuit .  
 Ipse tuis manibus cælos , stellantia tecta ,  
 Et manibus fingis lumen utrumque tuis .  
 Humenti siccum coit , & concordia discors  
 Cum glacie flammis numine pacta tuo est .

Unus

Unus jura mari ponis, ventisque sonoris,  
 Totque animas unus corpora, & unus alis.  
 Tanta hæc cernentes unum omnia posse fatemur,  
 Et quam sit præstans vis tua, narrat opus.  
 Sumere sed Numen, mortalem & ponere vitam,  
 Æterna ut nobis vita parata foret,  
 Cum vis; hoc celsæ miracula cætera dextræ,  
 Et quæ per senos acta fuere dies.  
 Quam vincat, non ipse loquar, non Angelus, unum  
 Sed referat Verbum, quod capit ista, tuum.

## XXVI.

*Paraphrasis Psalmi 50. Miserere &c.*

Qua magna pietate soles, miseresce precantis,  
 Quam multa est pietas crimina terge mea.  
 Mundities abiit, mage largo crimina fonte  
 Ablue: peccati vincula solve mei.  
 Tota patet sceleris gravitas infanda scelesto,  
 Criminis inque oculis hæret imago mei.  
 Te uno teste scelus, te uno spectante patratum;  
 An poterunt ideo fallere verba Dei?  
 Non veniam indignis mortalis judicat esse,  
 Judicia ast hominum cæca refelle, Deus.  
 Immundo rivis sordes a fonte, parentum  
 Me noxæ heredem noxia origo fecit.  
 Religio, veraxque fides, constantia cara  
 Est tibi, Religio, firma fidelque mihi.  
 Ille ego, cui patuit, tua quod sapientia noscit,  
 Quæque oculis hominum condita, aperta mihi.  
 Ipse mea asperges si tempora sanguine, sordes  
 Protinus exciderint, sanguine mundus ero.  
 Tergere sique mei maculas dignabere cordis,  
 Corde erit extemplo nix minus alba meo.  
 Auribus excipiam placatum te mihi lætis,  
 Lætitia exsiliunt, quæ quatit ossa dolor.  
 Verte alio vultum, ne crimina conspice nostra:  
 Verte huc, & nostro pectore terge scelus.  
 Hæc pereant, nova & existant te corda creante,  
 Pectoris & repleat spiritus ima novus.

Par-



Parce, tuo ne aspectu frustreris egentem,  
Ne negot afflatus spiritus ille tuus.  
Venturus dederat quæ Christus, gaudia redde,  
Spiritus invalidum, qui Deus, ille regat.  
Si vis exemplo, si verbis ulla, redibit  
Errans ad tuum ovis me præeunte gregem.  
Sanguine dextra oset, fateor, sed solve nocentem,  
Me Deus una salus, me Deus una salus.  
Promissi mea lingua fidem caner usque: reclude  
Labra, canent laudes ora reclusa tuas.  
Rex ego, iussisses, cumulassem altaria donis,  
Non Dei at ira cadit, si hostia multa cadat.  
Hostia grata dolor, tibi corde dolente litamus,  
Invisa haud oculis tristia corda tuis.  
Ne noceant populo, quæ Rex admisit iniquus,  
Fac, maneant urbis mœnia tuta meæ.  
Cum nos respicies placatus, cæsa placebit  
Viktima, tunc vitulum sanguine & ara fluat.

## XXVII.

*Parafrasis psalmi 129. De profundis &c.*

Pœnarum, & scelerum barathrum dejectus ad imum,  
Hinc te clamo: audi, qui Deus alta tenes.  
Intentas, facilesque aures mihi dede vocanti:  
Audi: quod merui, deprecor ipse malum.  
Si scelera aspicias iudex tam fœda nocentis,  
Est veniæ spes te iudice nulla mihi.  
At sperare jubes: lex hæc mihi dicta; nocenti  
Ergo propitius tu mihi, namque soles.  
Quam tu pollicitus, fas est sperare salutem.  
Spero ego, quippe tuo spem facis ore Deus.  
Speremus nascente homines, & sole cadente,  
Tempore homo nullo speque, animisque cadat.  
Namque Dei est hominum large miserescere, nostra  
Pro vita & pretii Numen abunde tulit.  
Scilicet effuso vitam emit sanguine nobis  
Æterni Patris filius ipse suo.

## XXVIII.

*Ad Jesum flagellis cæsum*

Plurimus immani circum stat robore tortor,  
 Et te, Christe, unum mille flagella petunt.  
 Vulneribus durat virtus tot dia ferendis,  
 Deficiat quamvis qui ferit; illa viget.  
 Heu quantæ virtutis opus, quo debita ferre  
 Flagra mihi, cæsus pectora, terga, caput.  
 Hoc leve, ni tanti, Jesu, tibi causa doloris,  
 Et flagris corpus qui fodit, ipse forem.  
 Non tamen ipse doles, cædam quod terga flagellis.  
 Hoc, mihi quod fuerint debita flagra, doles.

## XXIX.

*Ad Jesum spinis coronatum.*

Dum sceleri vecors quærit plebs jura, fateri  
 Te Regem, & capiri debita ferre, pudet.  
 Hinc textis fingit spinis diadema, tuumque  
 Circumdat feritas ingeniosa caput.  
 Quæ nox urget adhuc, tortor, tua lumina? Regem  
 Disce tuum: capiti regia ferta sedent.  
 Aurea num refert, an spinea ferta coronent?  
 Quod tulit, est unum, quod dare tu poteras.

## X X X.

*Moribundus Jesus queritur, se a Patre derelictum.*

Quem genuit similem sibi mens sæcunda, parentis?  
 Frustra quæsitæ destituetur ope?  
 Vulnere confectus multo, palmasque, pedesque  
 Diro suffixus robore clamat opem.  
 Clamat opem, pereunt, sed non audita parenti  
 Verba, nec auxilium qui ferat, ullus adest.  
 Auxilium ingeminat, corda at delapsus ad ima  
 Cum vita abruptis languida verba dolor.  
 Plura ne, qui periit, nati debemus amori,  
 An natum passus qui periisse, Patri?

## XXXI.

## XXXI.

*Jesu Crucifixo.*

Verumne pendes corpus ? imagine  
 An ludor atra ? Quo decor excidit,  
 Lumenque vernantis juventæ  
 Purpureum ? Hæccine forma numen  
 Confessa, quæ inter ceu violas rosa,  
 Aut prona in undas sidera phosphorus,  
 Lætum nitebat ? Nullus ori  
 Nullus honos oculis : comarum  
 Aurum revulsum : vulnere plurimo  
 Concisa toto vulnere corpore,  
 Et nulla cunctis vena, quæ non  
 Sanguineo fluat imbre membris.  
 Sed ora quamvis fœdus, amabilis  
 Haud ulla nobis forma magis : viri ut  
 Sis nomen, infelix & umbra :  
 Ipse potens animis amoris  
 Spirare flammæ . Hæret adhuc meis  
 Defixa imago pectoribus prior,  
 Quam nec cruor fœdat, nec audent  
 Carnificum violare tela :

## XXXII.

*Mortalibus confugiendum esse ad Christi vulnera :*

Toto petita parva si navis mari  
 Impulsa ventis fluctuat,  
 Jactata pavidus colligit tum carbasa,  
 Versoque clavo navita  
 Portum, fremente qui jacet tutus noto,  
 Remis adactis occupat :  
 Exhaustus acri Marte, multo vulnere  
 Languentia & miles trahens

R r

Vix

Vix membra, medicas tristis implorat manus:  
 Curare fessis corpora  
 Subit viator, quæ patet primum, casam.  
 Heu quid moraris? quid manus,  
 Pedesve, dira vel reclusum cuspide  
 Adire tam piger latus,  
 Mortalis? Hujus sive vitæ fluctibus  
 Jactaris incertum, hostibus  
 Manus daturus sive plagis debilis,  
 Longave langues de via;  
 Aperta Christi portus inter vulnera  
 Tutus patebit naufrago,  
 Salusque certa saucio, & fesso quies.  
 Nimis o sibi genus nimis  
 Mortale fidens? Dura quæ discrimina,  
 Laborque terrent viribus  
 Fretum suis, callesque vetitos ingredi  
 Audax? Ineluctabili  
 Præceps ruina donec ante spectam opem  
 Votis precetur irritis.

## XXXII.

*B. Virgini, Cæli Regine.*

Serta tibi, Virgo, capiti data regia circum  
 Cælorumque tuis, terrarum & subdita regna  
 Imperiis, canimus: devota in carmina vires,  
 Quo te digna sonent, tu vati suffice, Mater.  
 Jamdudum Mariæ geminatis sauciâ telis  
 Rursus Amor tota graviore pondere dextra  
 Corda petit, divinus Amor, demittere summo  
 Gnarus tela polo trifidas imitantia flammâs.  
 Accepit tam gratum ignem, invitare parata,  
 Si cesset, Virgo, penitusque patentia velox  
 Pectora flamma subit, totasque vagata medullas  
 Carpit, mox cineres minitata. Heu spicula flammis

Side-

Sidereis accensa, paremque incendia flammis  
 Naſta animum! torum quamvis ignem hauriat, igni  
 Par vivit. Veluti radius quæ lilia Phœbus  
 Flammi vomus petiit, languent ſitientia, pronum  
 Inclinantque caput, demiffis frondibus omnis  
 Candor abit; ſtant attamen, & radicibus hærent.  
 Sed ſuperet quamvis, ignito ſaucia telo  
 Viſa eſt poſſe mori. Sevum tum ſuſtulit enſem.  
 Omnia Mors audax tentare, at decidit enſe  
 Cum ſævo ter dextra. Novum mirata timorem,  
 Torpentemque manum: mene hinc abſcedere viſam?  
 Quin moreris? tacitis ſeu ſedibus abderis orci,  
 Quando mori vetitum Morti? Diſcedimus orbe  
 Nondum, purgamusque metu? Quæ cura ſub armis  
 Ad celſas celeri turres, humilesque tabernas  
 Nunc pede graſſari? Mortalis ſcœmina Mortem  
 Territat, indicitque fugam. Credo, æthere lapſam  
 Æternis animant cognatam ſidera flammis.  
 Numinis ipſa parens: eſto. Num terruit ipſum  
 Mortali quondam latitans ſub imagine Numen?  
 Haud impune fuit quamquam mihi; Numen adorta  
 His ſpolia ampla humeris retuli. Sed magna triumphos  
 Jaſtanti nunc præda perit. Nec plura: reduo  
 Crines plena animi flaventes demetit enſe.  
 At color infecit cum primum decolor ora,  
 Ora roſas quondam mixtis imitata liguſtris,  
 Et ſine luce oculi; ſtupuit Mors ipſa, ſceluſque  
 Horruiſt ipſa ſuum. Tanti vix certa triumphi,  
 Vixque oculis fidens, conſtrictum corpus inerti  
 Frigore, & exanimum trepidanti cuſpide tentat,  
 Mox ſpolia ampla legit, ſpoliis atque implicat enſem.  
 Pallentes circum Morbi, triſtiſque ſeneſcus,  
 Unquibus atque ſuis laceratus corpora Livor,  
 Atque Odium, fidi comites, gnavique ſubire,  
 Quo vocat, & juffis operam præſtare parati  
 Plaudunt, quos verbis ita Mors affatur amicis:  
 Primo hominum ſcelere edita mecum turba malorum,  
 Quorum ope tot volito cunctis inviſta per annos,  
 Imperii tandem prolato jure, nocentes  
 Non tantum noſtro regno ſubmittimus, ipſos,

R r 2

Quos

Quos morum tegit integritas, hoc cædimus ense.  
 Jam satis est nasci morituris; solvere pœna  
 Nequaquam Deus ipse volet, si crimine solvit.  
 Et mihi Mors tandem videor: cum Numen ad auras  
 Funere contempto rediit: fuit ipsa pudori,  
 Nam quid dissimulem? mihi tanta licentia ferri.  
 Ast illata prius per natum damna parente  
 Pensamus, satis extincta: jacuere soluta  
 Frigore membra, urget, quem non excusseris unquam,  
 Conclusos oculos somnus: quo palleat idu.  
 Mors ipsa ignoro; cecidit tamen, istaque nostro  
 Vulnere pallentes inter censebitur umbras.  
 Ambiat ergo novum vitricia tempora sertum,  
 Audiat orbis io totus, resonetque triumphe,  
 Æther, & mortem non ultra rideat ullus.  
 Vix absolvit, io languenti voce triumphe  
 Turba sequax geminat, moribunda voce triumphe  
 Collis io resonat circum, sylvæque resultant.  
 Jamque perire brevi damnato flore cupressus  
 Implicat: hoc capiti sertum, crinesque coronat.  
 Ipsa sedens sursum, quo non velocior alter,  
 Urget æquum, nigro prælatas cuspide jactat  
 Exuvias, vitrixque effusis fertur habenis.  
 Ecce autem medio volitantem tramite sistit,  
 Quæ vis incertum, dejectamque excutit ipse  
 Haud alias hoc ausus equus: jacuere caduca  
 Serta præcul, trepidos & frustra exterrita poscit  
 Auxilium socios, spolia atque abrepta videnti.  
 Extemplo positos rursus Virgo induit artus,  
 Stantia membra regit revocatus spiritus, ignem  
 Sopitumque animat rursus, glacieque soluta  
 Itque, reditque suis sanguis per corpora rivis.  
 Ceu rosa, quæ viridi decerpta est cespite, languet,  
 Vivificus totis dum venis aruit humor,  
 Demittitque caput moriens: at rore benigno  
 Extremam tum merge, comarum rursus honorem  
 Explicat, & stabili pede ridens halat odorem.  
 Reddita Virgo sibi vix est, cum lapsus ab axe  
 Lucidus apparet currus, qui, sidera clarus  
 Pellere cum surgit sol, dignus sole videtur.

Stant

Stant circum Aligeri juvenes, turba editacælo,  
 Certantque obsequiis, & læta voce Parentem,  
 Æthereis mutet tellurem sedibus, orant.  
 Huc Virgo ascendit: zephyris tollentibus auras  
 Fertur per vacuas currus, terræque recedunt,  
 Clarior apparetque dies, & purior æther.  
 Haud tamen obtutu dignatur Parthenis uno  
 Desertæ telluris opes, dum mente voluptas,  
 Quo solum aspirat, tacita præsumitur omnis.  
 Aligeri haud cessant: testatur gaudia cantu  
 Sacra cohors intenta operi: pars æthere nubes  
 Hæc fugat, & radiis mage claris astra coronat,  
 Qua monstratur iter: pars hæc felicior astris  
 Ipsam infert Matrem, certant substernere curru  
 Seu celeres humeros, valida seu tollere dextra.  
 Interea capiti Angelicis de cœtibus unus,  
 Lucis inaccessæ folio qui proxima servat,  
 Obtendens alas, pedibus se Numinis ultro  
 Advolvit, datque has submisso pectore voces:  
 Rex Cœli, terræque potens, cui sola voluntas  
 Omnia posse facit, tu nos dignatus honore  
 Primo, das votis animos majoribus unus.  
 Quandoquidem Matrem tandem cupientibus astris  
 Menti inferre sedet, nostris hanc poscimus addi,  
 Rector magne choris. Sedes deserta rebelli  
 Agmine multa vacat jamdudum: damna Parente  
 Pensentur numeri: hæc reparet cum sænore cladem  
 Nostram, uni tandem doleat victoria victo.  
 Haud memorem, nostro Cælum debere labori  
 Quam mox excipiet. Gnavi pernicibus alis  
 Æthereas tranare vias, per inania fratres  
 Substernunt scandenti humeros, lateque fugatis  
 Calle intentato nebulis ad sidera tollunt.  
 Non ullum petimus, magnæ servire Parenti  
 Contenti, pretium, nec gloria parva superbos  
 Spe fovet, e nostro quod rettulit agmine Princeps  
 Fœcundandum illi divino pignore ventrem,  
 Aut quod Cœlicolæ terras habitavimus imas  
 Servitio intenti. Divinæ nostra Parentis  
 Pectora tangit honos: non sedes dignior ulla

Exci-

Excipiet, propior quam quæ tibi Numine totò  
 Expletur mentem felix, oculosque tuendo.  
 An duxit nulli quæ labi obnoxia vitam  
 Spiritibus pudor Angelicis, cui corpora mentis  
 Vclamen, non pondus iners, haud sedibus illa  
 Angelicis tandem jungetur? Num decusforis  
 Parthenium, aut divina sonans vox prodidit unquam  
 In terris hominem? Nostros de cœtibus unam  
 Mortales dixere; colat de cœtibus unam  
 Immortale genus nostris. Quod poscimus, ultro  
 Da, genitor, nobis, da dulci, nate, parenti,  
 Nec tua supplicibus pugnet sententia votis  
 Audiit hæc, cytharam David cum forte canoram  
 Lætitiâ tentaret ovans, arcesque petenti  
 Sidereas lætum Matri præana pararet.  
 Obstupuit primum, quod non præviderat ausum,  
 Mox folio, tantum non inflammatus ab ira,  
 Numinis accessit, capitique insigne decorum  
 Detraxit servum confessus, & oscula supplex  
 Postquam demisit pedibus, sic ore locutus:  
 Terrigenas, mentesque oculis qui respicis æquis  
 Aligeras, mundum ditione amplexus utrumque,  
 Ne sceleri detur, trepidum quod pectus honoris  
 Tangimur erepti cura, tactosque fatemur  
 Et mortale genus, qui non sumus æthere nati.  
 Cœtibus Angelicis si Matrem jungere certum  
 Consilio manet æterno, nil addimus; ipse  
 Virginis ipse parens, & primus sanguinis author  
 Exultans alia venerabor parte locatam.  
 Si secus at sperare licet, cœlestia corda  
 Urit adhuc dolor, & nunquam non gloria turbat  
 Aligeros hominum? Nobis de semine proles  
 Nostro debetur. Sede haud ornariet illa  
 Postulat, & nostro, modo quem non jactat, honorem  
 Virgo choro princeps dabit. At quæ indigna Parentem  
 Excipere est sedes? Non soli subdita cives  
 Indigenæ astra premunt; & nos pars magna senatus  
 Ætherei. Gratus quondam mortalibus error,  
 Mentibus Angelicis vitam par duxerat? Ergo  
 Luce nova pateant discrimina. Gloria major,

Mem-



Membrorum quod mole gravi sine corpore mentes  
 Parthenis æthereas animoque æquarit, & ore.  
 Aspice, suspensos animi pallefcere cura  
 Incerta Proceres, quos invida pectora cogunt  
 De proprio certare bono. Sic fallit inanis  
 Spes Abram, patresque tuos? Sic, Virgo, carebis  
 Anna matre, proculque a conjuge abibis Ioseph?  
 His jungi cupit illa; jube, Deus optime, jungi,  
 Qui sanguis noster passus, prolesque vocari  
 Quondam hominis, sumpta ostentas quoque corpora cælo.  
 Vix ea dicta dedit, trepido stellantia testâ  
 Assensu resonant, leni ceu flamine surgens  
 Mane novo zephyrus cedros cum perflat odoros,  
 Inclinatque caput placido nemus omne susurro.  
 Cum primum ac nutu, quem motis ignibus æther  
 Sentit, quem terra, & stygiæ tremuere cavernæ,  
 Velle loqui visum Numen; tum protinus omnes  
 Submissis petiere solum cervicibus, ales  
 Hinc cælo æquævus, Jesso hinc sanguine Reges.  
 Expectata sonant hac tandem oracula voce:  
 Pergite, felices animæ, mea cura, meque  
 Dextræ opus, his studiis ardere parentis honorem.  
 At non Angelicis, non priscorum illa parentum  
 Est addenda choris, cernit sublimis utrosque  
 Desuper, & folio mecum confidet eodem.  
 His dictis placati animi, victoria neutri  
 Quod cessit, vicisse putant, & lætus uterque  
 Certatim properant venienti occurrere Matri:  
 Jamque patent superi revoluti cardine postes:  
 Aligerum portis effunditur agmen apertis  
 Surgentis st pare latus, callemque parare.  
 At sine matre Deus, sine patre homo, Virginis idem;  
 Atque Dei soboles, stellanti sede relicta,  
 Clarus luce nova, lætoque augustior ore  
 Processit folio, medioque in limine Matrem  
 Obvius expectat, liquidumque per aera nanti  
 Ipse oculis animum, blandis & vocibus addit.  
 Orbem vix Lunæ tenuit, cum Luna premenda  
 Virgineis pedibus substernit cornua: Frater  
 Nescius hinc vinci accedentem lumine multo

Matrem obiit totam, splendentique induit auro:  
 Emenso sed jam tam longo tramite tandem,  
 Omnesque æternis lucentes ignibus orbes  
 Prætergressa, domum tenet omnipotentis olympi,  
 Et jam mater habet natum, natusque parentem.  
 Quis memoret fando, quæ verba, & vultus utrique,  
 Gaudia quanta animis, cum dulcis brachia natus  
 Laxat in amplexus, & laxat brachia mater.  
 Fit dux ille viæ: cœli penetralia Virgo  
 Progreditur media hinc atque hinc comitante caterva  
 Aligerum: nova lux, qua transit, visa per aulam  
 Spargi: Tum Superi assurgunt, totusque senatus  
 Aspectu expleri gaudent, geminantque Parentem,  
 Et Natum, resonatque novis concentibus aula.  
 Æterna ut ventum summi ad subsellia Patris,  
 Tum vero tantam non læso lumine lucem  
 Ferre stupet, capite & prono mentem tribus unam,  
 Tresque unum Virgo indiscretum Numen adorat.  
 Filius auratum solium conscenderat, unde  
 Sublimis terris imis dominatur, & astris;  
 Cum matrem extemplo sedem exascendere eandem  
 Invitat, laterique suo confidere dextro  
 At frontem multo Virgo suffusa pudore:  
 Numquid tentor? ait. Quo, rerum maxime Rector,  
 Nunc ancilla vocor? Neque enim cœlestia nati  
 Ora mihi propius, majestatemque verendam,  
 Cernere quando datur, pluris mihi mater haberi  
 Incipiam. Quanto dignatus honore parentem  
 In terris fueris, dum contemplata tremendum  
 Numen, Nate, tuum nosco; quam vile parenti  
 Sit pretium, penitus nosco, nec nominis augeat  
 Gloria tanti hominem. Jam terrarum incola visus,  
 Sic placuit, minima forsitan minor ipse parente:  
 Ablato in cœlis redeant discrimine tandem  
 Ordine quæque suo. Servantem iussa parentis,  
 Subiectumque homines homini stupere, Deumque,  
 Quem virtute animus, doctrina os, dextra fateri  
 Prodigis potuit, mater sum visa negare  
 Obsequio usa tuo: satis hoc: parebo iubenti  
 Ipsa Deo tandem, solii sive ima tenere,

Agmi-

Agmina sive inter postrema recedere longe  
 Hinc jubear, sat læta mihi quod detegis ora.  
 Dixerat. Interea dubia stant agmina mente  
 Cœlituum, precibusque Deus, votisque parentis  
 Annuat: Angelicis num cœtibus addere matrem,  
 Anne hominum malit. Nati quique æthere, quondam  
 Quique homines terras mutarunt æthere, rursus  
 Deposcunt sibi Matrem, & spe ducuntur inani.  
 Olli at subridens hominum sator, atque redemptor:  
 Quod petis, unum, inquit, matri concedere natus  
 Haud possum: folio tibi fas considerare nostro:  
 Huc ascende. Animus tuus hic contemptor honorum,  
 Qui primum dederat te Numinis esse parentem,  
 Dat modo reginam cellis dominarier astris.  
 Ætherei cives ut primum surgere matrem  
 Ad nati solium, laterique assidere dextro  
 Videre, extemplo geminato gaudia plausu  
 Testantur: resonat festivis vocibus aula.  
 Angelicis nollet transcriptam cœtibus ipse  
 Angelus; ipse suis, qui exuto corpore cœlis  
 Illatus, nollet: cumulari Materis honorem  
 Quisquis, & a voto se lusum gaudet inani.  
 Accedunt folio, & pronis cervicibus omnes  
 Oscula delibant pedibus, Dominamque salutant.  
 Hinc jussus toto discurrit plurimus axe  
 Angelus, æratis convulsaque sedibus astra,  
 Lumine quæ majore nitent, ceu pollice flores  
 Vere novo pratis ineteret, recto ordine nectit,  
 Atque novam fingit radianti luce coronam.  
 Hanc capit, & manibus compactum sidere fertum  
 Bis seno ipse suis capiti dum filius aptat,  
 His matrem affatur: supremi insignia regni  
 Ostentent late dominam, dominique parentem.  
 Quidquid ubique patet cœlesti a vertice ad ima  
 Terrarum, nostra quidquid ditione coercet  
 Numinis imperium, Superique, hominesque, rebellisque  
 Æternum gens horrendis damnata tenebris,  
 Pareat imperiis tandem, & tua jussa facessat.  
 Ipse ratum statuo, quod mater jusseris; ignes  
 Seu trifidos jubeas hominum pœnamve, metumve

Mitti, seu venia jubeas gaudere nocentes;  
Obsequium, faxo, discant a Numine cuncti.  
Vix hæc dicta dedit, cum protinus orbis uterque  
Reginam resonat, nequicquam & dentibus Orcus  
Infrendens, cogi sentit, Dominamque salutat.  
Clarius ex illo patriæ stellantis alumnis,  
Atque homini ire dies visus, geminataque cœlo  
Gaudia, & affulsit nova spes mortalibus ægris.

F I N I S.

# INDEX

## R E R U M,

*Quæ bis Opusculis continentur,*

### A

**A**bbatis Monachorum officia 215.  
 Acus Sarcinatricis, & Ornatricis 123. 156.  
 Adoptatus adoptantis nomina sumebat 78.  
 proprium nomen commutabat 79.  
 Amica in matronarum comitatu 138.  
 Amiculum 144.  
 Amor Romanarum faminarum in patriam 181.

Ancillarum munera 123.  
 Annuli aurei Romanorum 89. faminarum 154.  
 Annuli seguatorii 66.  
 Antiquitas originis nobilitatem commendat 45.  
 Archiva Monachorum 241.  
 Augustus non una imagine semper literas signavit 66.  
 Aurum in mundo muliebri 151.

### B

Baduaria familia 35.  
 Baduarius (Cardin. Joannes) 301.  
 Balteonia familia 220.  
 Balteonius (Fortunatus) 219.  
 (Joan. Antonius) 220.  
 Balnea mulieria diffinida a virilibus 129.  
 Barbatica familia 233.  
 Barbaticus (Cardin. Gregorius) 233. 234.  
 (Card. Joan. Franciscus) 234.  
 (Cadin. Marcus Antonius) 233.  
 234.  
 (Petrus) 232.

Barbari meliori jure aliquando usi in provinciis, quam Romani 34.  
 Bastardi nonnulli cognominati 52.  
 Bolagno (Carolus) 289.  
 (Joseph) 245.  
 Bonum genus, boni parentes idem ac nobiles 7.  
 Bulla aurea divitum 86. ejus jus ingenuofidem ibid.

### C

Caja prænomen faminarum 97. ita diffusa omnis materfamilias 112.  
 Calcei faminarum 150. 172.  
 Cannetus (Petrus) 243.  
 Capilli flavi etiam matronarum 160.  
 Caspius (Cletus) 212.  
 Cathedra idem ac sella muliebris 135.  
 Cicero demisse de majoribus suis loquitur 44.  
 Ciceronis majores illustres 42.  
 Ciceronum familia antiquissima a Volsorum rege 41.  
 Cincinni meretricum 158.  
 Circi diversi a cincinnis 157. puellarum erant ibid.  
 Clemens PP. XI. 284. 302.  
 Cænobium S. Georgii Majoris 215. 218.  
 ejus bibliotheca 222.  
 S. Michaelis de Muriano 240.  
 Cognomen apud recentiores 34. apud veteres 27. aliqui nullum usurparunt 29. licuit singulis pro libito sumere 81. famina etiam usurparunt 100.  
 Conjugum concordia 109.

S s 2 Con-

Conviviis intererant faming Romanæ 126.  
*Cosmetica*, seu arti fingendæ pulcritudi-  
 nis deditæ fæmine 165.  
*Crines matronarum proprii* 159.

## D

*Deciorum nobilitas* 47.  
*Dei cognatus homo* 32.  
*Dio Ciceroni infensus* 43.  
*Dionysii senioris timor* 17.  
*Dionysius T. Pomponii libertus dictus M.*  
*Pomponius* 28.  
*Divitiæ non sunt nobilitas* 21. aliquando  
*causa nobilitatis* 22.  
*Domi nobilis male definitur ab Erasmo* 39.  
 sumitur ad distinguendum locum, ubi  
 quis est nobilis 40. aliæ loquendi ratio-  
 nes, quæ idem significant 38.  
*Domina dicta materfamilias* 113.

## E

*Epaminondas genere nobilis* 16.  
Equester ordo apud Romanos non ex nobi-  
libus tantum 61.  
*Equites majori auctoritate quam senatores*  
 62.  
*Eunuchi* 139.  
*Eutychides Q. Cæcilii libertus dictus T.*  
*Cæcilius* 27.

## F

*Familia cognomento Nobiliorum apud Ro-*  
*manos* 11.  
*Familia proprie differt a gente, aliquan-*  
*do tamen pro ea sumitur* 26.  
*Filii per patrem nobilitantur* 49.  
*Finardus (Bonaventura)* 214.  
*Fæmina Romana in atrio versabantur*  
 121. per urbem itabant 124. specta-  
 culis intererant 125. carpento veheban-

tur 132. detesta capite in publicum pro-  
 dibant 160. scitius comis utebantur  
 169. superstitioni dedita 182.  
*Fæminarum Romanarum tres classes* 116.  
*Fontaninus (Justus)* 34. 35. 278.  
*Frons minima ad pulcritudinem* 170.  
*Funera matronarum* 183.

## G

*Gasparenus (Michael Angelus)* 239.  
*Genealogie* 24.  
*Generosus idem ac nobilis* 2. aliquando  
 differt a nobili 9.  
*Gens pro qualibet cognatione* 26. differt a  
 familia ibid.  
*Gentiles* 26. 31. idem ac barbari 33. no-  
 biles appellantur gentiles homines ibid.  
*Gentilitatis jura aliquando patriciorum*  
*tantummodo* 32. postea & plebejorum  
 nobilium 31.  
*Grædonicus (Petrus)* 25.  
 (Vincentius) 96.  
*Grandus (Guido)* 243.  
*Grimanus (Laurentius)* 261.

## H

*Honestum genus idem ac nobile* 18.  
*Hybrida* 31.

## I

*Ignobilis* 3. 6.  
*Imagines* 69. quorum? 73. servabantur in  
 atrio 69. quem ob finem? 70. in fune-  
 ribus proferebantur 71. damnatorum  
 vetitum servare 82.  
*Inaures* 113.  
*Insignia gentilitia nulla apud antiquos*  
 64. recentioribus unde sumpta? 67.  
*Instita stola adfuta* 144.  
*Jura gentilitatis* 32.  
*Jurisprudentiæ studium* 248.  
 La-

L.

- Lamiarum nobilitas 47.  
 Lanificio dabant operam matrone Romanæ 121.  
 Lælica 133.  
 Læsus adversus 121.  
 Lex Voconia de mulierum hæreditatibus 179.  
 Liberos suis uberibus non alebant matrone Romanæ 176.  
 Liberti fæminarum Cajsæ liberti dicebantur 177.  
 Liberti tribus nominibus appellabantur 28. singula unde sumpta? ibid.  
 Libertina pro meretrice 117.  
 Lunula calceorum infigne nobilitatis 83.

M

- Magistratum gerentes etiam non senatorum in senatum conveniebant 262.  
 Majorum mentionem faciunt nobiles 23. series illustris commendat nobilitatem 47.  
 Marcipor, Lucipor nomina servorum 32.  
 Marcus Cicero oratoris avus 43.  
 Maritus uxori iudex 180.  
 Materfamilias 114.  
 Mater ignobilis filiorum obscurat nobilitatem 49. nobilis eandem auget 50.  
 Matrona 114. idem ac fæmina honesta 115.  
 Matronæ purpura usæ 147. sordida negotia domi non obibant 175. nullam umquam reipublicæ partem attigere 181.  
 Mattapanis nummus Ducum Venetorum 170. alio etiam nomine nuncupatus 173. ejus primus auctor 271. varii typi 273. ætates 275. forma Græcica. ibid. inscriptio partis adversa 277. caracteres partis averfæ 279.

Maurocenus (Beat. Joannes) 35. 215.

258.

(Fortunatus)

307.

Medicamina varia fingenda pulcritudini 166.

Meretrices genere libertinæ 117. pedibus per urbem incedebant 136. cum pedisequis 173. purpura ipsi interdita 149.

Mitra inter capitis ornamenta 160.

Mulieres in manu, aut tutela alicujus 178.

N

Nere proprium matronarum 122.

Nicolsia familia 202.

Nicolsus (Angelus) 203.

(Joannes Baptista)

201.

Nimbus ad imminuendam frontem 170.

Nobiles, diâi gentiles 33. bonorum appetentes 91. ignobilium, & novorum contemptores ibid.

Nobilis a novo 4. dicitur de quacunque re 5. sæpius de hominibus 6. significat generis præstantiam ibid.

Nobilissimæ diâi nobilissimorum uxores. 15. earumque domus ibid.

Nobilissimatus dignitas 14. infra Casariatum 15.

Nobilissimi diâi Imperatorum filii 12.

Nobilitas definitur 15. ab imaginibus apud Romanos 7. 15. magni æstimata vel ab heroicis temporibus 36. apud nationes omnes in pretio ibid. non eadem tamē omnibus 37. est ejus propria qui habet 39. non obscuranda vitiis 20. tota a paterno genere 49.

Nobilitatem mentiti sunt nonnulli 90.

Nomen & cognomen fæminarum 110.

Nomen pro nobilitate 26. Romanis multiplex 27. proprie quod gentem significat ibid.

No-

Nomina meretricia 117  
 Nota Sanderum neminum JESU CHRIS-  
 TI 279.  
 Nothi, seu spurii nec per patrem, nec  
 per matrem nobilitantur 51. illis ali-  
 quid infamia detractum ex alterius no-  
 bilitate ibid. aliquando nullus iis ex  
 natalibus illegitimis pudor 52.  
 Notus pro nobili 6.

## O

Ornatricum elogium 156.  
 Ornatricus, quæ capillos comabat ibid.  
 Ornatus pro habitu capillorum ibid.

## P

Palla 144. purpurea 147.  
 Palliolum 149.  
 Patricia familia destituta magnis viris  
 non ideo plebejls accensebatur 48.  
 Patriciatus dignitas 15. 51.  
 Patricii omnes nobiles 14.  
 Patriciis aggregare populi tantum erat  
 58. 267.  
 Peregrini, qui civitatem adipiscebantur,  
 Romana nomina sibi sumebant 28.  
 Periscetia 145. 155.  
 Phalæx 88.  
 Plebis duplex acceptio 53.  
 Pomponia Macrina stemma 63.  
 Pomponius Salutius adoptatus a Scipione  
 78.  
 Populus 53.  
 Porzia (Cardin. Leander de) 237.  
 Prætexta 84. signum ingenuitatis 85. eam  
 ferebant pueri, & puella 143.  
 Principes plebis, primores plebis 59.  
 Princeps nobilitate potest ignobiles 23.  
 58.  
 Procuratio domus penes matrisfamilias  
 174.

Procuratores Caesarum 62.  
 Protonobilissimus 11.  
 Puella etiam nupta 112.  
 Puella octavo a natali die lustrabantur 96.  
 sub pedagogi custodia 103. lavificio de-  
 dita 104. nec non literis ibid. nobiles  
 Veneri puppas dicabant 107. immatu-  
 ra etiam nubebant 109. nuptus non da-  
 bantur inconsulta matre 172.  
 Pudicitia Romanarum matronarum 116.

## Q

Quirinus (Cardin. Angelus Maria) 217.  
 308.  
 (Joannes) 308.  
 (Laurus) 288.

## R

Restituere natales principes possunt 58.  
 Rezzonicus (Carolus) 289.  
 Romani peregrinos contemnebant 40.  
 Rubens (Bernardus Maria de) 280.

## S

Segmenta in palla 148.  
 Sella curulis interregum insignia 17. hac  
 primum consules usque exaldis regibus 58.  
 Sella gestatorii genus 134.  
 Sella meretricum 137.  
 Senatores dicti Patres conscripti 265.  
 nunquam lecti a populo 266. omnes pa-  
 tricii ibid.  
 Senatores pedarii 263. 264.  
 Senatorum Romanorum numerus 261.  
 Soccis non utebantur meretrices 172.  
 Stemma 67.  
 Stoicorum sententia de nobilitate 16.  
 Stola matronarum propria 143.  
 Sueve proprium ancillarum 123.  
 Supercilia arte producta 171.

Ter-



## T.

- Terra filius* 24.  
*Tertia prænomen fæminarum frequentius quam alia* 98.  
*Teupolorum Principum nummi* 269.  
*Teupolum Cimelium* ibid.  
*Teupolus (Franciscus)* 269.  
     *(Laurentius)* 280. 307.  
*Ticinenſe gymnaſium* 250.  
*Tria nomina nec ſolis nobilibus, nec omnibus* 27.  
**TRINITATIS** *Sanctiſs. Myſterium* 320.  
     *quod revelatum nobis eſt maxime eſt Deo gloria* 187.  
     *Ejus imagine honeſtatur homo* 189. 191.  
     *intelligentiam noſtram ſuperat* 195.  
     *ad ejus viſum aſpirandum* 197.  
     *ejus feſtum ſapienter poſt celebrata alia myſteria inſtitutum* 193.

## V

- Vallareſſus (Zacharias)* 293.  
*Vaſcula in ſepulchris* 281. *quorundam*

## inſcriptio

## ibid.

- Venetorum cognomina omnium antiquiſſima* 34. *ſæpius ex nominibus propriis* 35.  
     *nulla per caſus flexione uſurpata* 32.  
     277.  
*Venetorum Ducum nummi* 266.  
*Venetus clerus laudatus a Ben. XIII.* 237.  
*Veſtium muliebrium varia nomina* 146.  
     *color varius* 148.  
*Vinum interdictum fæminis Romanis* 127.  
*Virtus non eſt nobilitas* 16. *cauſa nobilitatis* 20. *præclarior nobilitate* 16.  
*Vitta inter capitis ornamenta* 156. *virginum ſimplex, nuptiarum duplex* 117.  
*Unguenta* 167. 282. 283.  
*Uxores in manu mariti ejus nomina uſurpabant* 101. *univiræ laudabantur* 110.  
*Uxorum duo genera* 111.

## Z

- Zenobii (Veritas, Jo. Joan. Carolus)* 309.  
*Zenobius (Veritas)* ibid.  
*Zenus (Apoſtolus)* 266. 274.  
     *(Petrus Catharinus)* 270. 271.  
*Zonus (Angelus)* 225.

# NOI REFORMATORI

Dello Studio di Padova.

**A** Vendo veduto per la Fede di Revisione, ed Approbazione del P. F. *Tommaso Maria Genari, Inquisitore*, nel Libro intitolato: *Stanislai Santinelli Congreg. a Somasca Clerici Regularis Dissertationes, Orationes, Epistola, & Carmina*; non v'esser cos'alcuna contra la Santa Fede Cattolica, e parimente, per Attestato del Segretario Nostro niente contra Principi, e buoni costumi, concediamo Licenza a *Cristoforo Zane, Stampatore*, che possa essere stampato, osservando gli ordini in materia di Stampe, e presentando le solite copie alle Pubbliche Librerie di Venezia, e di Padova.

Dat. 20. Giugno 1734.

(  
( *Lorenzo Tiepolo Kav. Proc. Ref.*  
( *Pietro Grimani Kav. Proc. Ref.*

Agostino Gadaldini Segret.





